

清代傳記叢刊·綜錄類②
周駿富輯

清史列傳

(四)

卷二五至
卷三二

清國史館原編



明文書局印行

清史列傳 卷二十五

大臣畫一傳檔正編二十二

黃仕簡子秉淳

黃仕簡福建平和人由曾祖黃梧率衆投誠封一等海澄公准襲十二次梧子芳度復以闔門殉難准世襲罔替俱有傳仕簡於雍正八年襲爵乾隆九年引見諭曰海澄公黃仕簡著賞給資治通鑑康熙字典上用綉緞仍令回籍伊係功臣之裔朕深望其成立以繼家聲在籍之日勤勉學習閒至督撫衙門聆其教導俟可以來京效力之日再行奏聞請旨十六年上南巡二月在蘇州接駕請當差諭曰黃仕簡奏請當差情辭懇切甚屬可嘉然伊係公爵用以提督總兵方爲允稱但看來年紀未壯若在京賞給差務未免路途遙遠盤折多有不便著總督喀爾吉善再爲教導學習俟才識堪以勝任之時奏聞請旨三月賞戴花翎十九年授浙江衢州鎮總兵二十三年四月丁母憂二十四年命署湖廣提督軍門二十五年服闋實授九月調廣東提督二十八年調福建水師提督二十九年三月奏廈門

商船雲集相沿索取陋規每船花邊銀一千五百圓不等督撫將軍提督及道府州縣中軍等官各有收受今據提督中軍參將溫泰開送清單事屬確鑿仰懇簡派大員赴閩澈底清查硃批嘉悅之汝可謂知恩朕亦可謂知人五月命尙書舒赫德等往訊尋奏督撫並無收受陋規事屬員惟代購物件屬實上以仕簡所奏尙屬有因免議處八月調廣東提督三十二年調福建陸路提督三十三年陞見命在乾清門行走復授其子黃秉淳爲藍翎侍衛三十四年以失察古田縣奸民蕭日安爲匪降一級留任十二月調水師提督三十五年正月以浙江衢州鎮任內失察嘉興縣陸添餘傳習邪教降一級留任二月奏漳浦縣民在詔安地方謠言惑衆拏獲匪犯蔡烏強等搜出僞劄據供漳浦下會村李阿閔與平和縣朱姓謀不軌阿閔給與劄付令糾夥見獲供出各犯臣隨赴漳浦詔安嚴拏餘黨硃批好已調汝水師矣此次水師雲南出師者竟不堪已有旨諭崔應階及汝汝宜勉力整飭三月奏在梅子坑獲李阿閔審明該犯因貧苦起意糾人搶劫先約蔡烏強入夥輾轉糾集多人並捏造朱振興姓名希圖煽惑經漳浦縣獲蔡烏強阿閔聞風脫逃臣親往緝拏供朱振興姓名係捏造並無其人見經督臣親提嚴訊疏

入報聞二十六年因福建省甄別年滿千總過少降三級留任二十七年六月疏言臣標五營每營額兵九百六十內前後二營戰兵各四百六十守兵五百與營制符合中左右三營全屬戰兵緣前任福建水師提臣萬正色於康熙十八年在湖南岳州帶戰兵三千來閩援剿海氛卽撥入提標中左右三營奏准仍給戰餉彼時爲憂遠涉積勞起見迨各兵陸續開除就閩召募應照例分別戰守方無歧異請將中左右三營戰兵照前後二營例減去戰額五百改爲守兵卽將各營內考技藝稍次者儘數改補如不足俟五營出有戰缺通融援補另募守兵足額議行三十九年十月兵部奏降革處分奉旨准開復四十四年十二月陛見四十五年正月上南巡扈蹕出京賞黃馬褂三月回任是年恩詔加一級四十七年十月奏臺灣有漳泉二府人械鬪流匪乘機搶殺把總林審被戕親赴臺灣督拏諭曰如此辦理方是此案關係重大黃仕簡一聞報卽帶兵渡臺查辦迅速完結自當交部議敘著傳諭黃仕簡卽督同將弁等勉力將首夥各要犯嚴拏務獲十一月諭曰黃仕簡奏抵臺查辦漳泉人械鬪一案先後拏獲要犯多名恭請王命正法各於犯事地方傳首示衆尙有未獲各犯見在查拏務獲等語所辦甚好同日又

據雅德奏到看來此案先後獲犯及辦理情形已有八九成未必致更生事端但尚有未獲聚衆首夥要犯殺官重犯等見在曾否就獲並此外餘黨不可不儘行搜緝務獲以淨根株著傳諭黃仕簡楊廷樺澈底跟查將未獲各犯逐一擒獲永除後患四十八年正月奏先後拏獲臺灣械鬪刁民及殺害汛弁首夥要犯二百餘名分別置法臺灣寧帖命交部議敘加一級諭曰據黃仕簡奏督拏械鬪刁民及殺害汛弁首夥要犯先後共拏獲二百餘名見在民人並無再敢互鬪滋事臺灣所屬均屬寧帖等語所辦甚好已交部議敘矣此案未獲餘黨及焚搶流匪仍著黃仕簡楊廷樺上緊逐一嚴加捕獲審辦完結黃仕簡不可因臺地見已寧帖稍存將就了事之見旋奏遵旨查臺灣府知府蘇泰於漳泉刁民械鬪並不速捕嚴懲輒出示諭和實屬姑息貽誤諭曰漳泉械鬪一案前經雅德具奏稱該府蘇泰前往面加曉諭各莊民遵依允服一摺朕卽慮及該府或竟不知事體輕重有央懇和息之事因諭令黃仕簡等查明據實奏參今據黃仕簡等查奏蘇泰果有勸和出示情事竟不出朕之所料是蘇泰罔顧大體姑息養奸非尋常玩延貽誤可比蘇泰著革職拏解刑部治罪二月奏會同臺灣道楊廷樺續獲械鬪人犯二

百六十名見赴諸羅起事處嚴拏餘匪諭曰據黃仕簡奏會同楊廷樺赴各莊連日搜捕前後拏獲各犯二百六十名將審明起意糾黨焚莊搶殺各要犯先行正法示衆見在漳泉人心帖服各屬寧謐等語所辦實屬可嘉已於摺內批示矣臺灣刁民械鬪一案黃仕簡一聞稟報卽帶兵渡臺查辦將首夥要犯拏獲多人陸續審明正法地方寧靜辦理甚屬妥速前已降旨交部議敘著再給黃仕簡上用荷包以示嘉獎又奏訪聞鳳山縣屬小岡山地方有匪徒倡亂隨往搜查並無蹤跡嗣據該縣知縣徐英稟報盤獲形跡可疑之林弄陳虎二名研鞫並無證據諭曰諸羅彰化二縣奸民不法聚衆械鬪甫經嚴拏重治乃又有奸匪豎旗可見臺灣諸事廢弛刁風未息不可不嚴拏究辦從重懲治以靖海疆而安良善至所稱形迹可疑之林弄陳虎二名是誰見其可疑有何形迹如果審明此二人並非豎旗奸匪或卽應問此二人或素有仇人挾嫌藉端陷害嚴切開導詢問從此跟究或可得實何以摺內全未奏及而但云毫無證據乎黃仕簡等查辦奸民聚衆一案甚爲妥速今審辦此事未免疏漏著卽督飭所屬勒限嚴拏奸匪豎旗之人務獲解究不得以查無蹤跡了事三月諭曰據黃仕簡奏拏獲鳳山縣編造逆詞豎

旗圖搶之首犯分別辦理一摺著交三法司覈議速奏至此案首犯陳虎等經鳳山縣知縣徐英因該犯形迹可疑卽行拏獲尙屬能事見在正有查辦之事未便令其引見著加恩加一級以示優獎俟該縣任滿調回內地時著奏聞請旨六月偕楊廷樺奏臺灣兵丁楊祐曾篤等因挾彰化縣民林文韜糾衆抵制夙嫌曾篤設計成擒楊祐用刀剗瞎文韜右眼擬楊祐等罪如例諭曰此案兵丁楊祐曾篤屢次糾人挾嫌爭毆並用刀剗瞎林文韜右眼實屬兇橫不法且林文韜等素被兵丁欺凌希圖抵制該處小刀會卽由此而起是楊祐等實爲此案罪魁自應從重定擬乃黃仕簡等僅照尋常爭毆折傷人肢體者一律科斷殊屬輕縱黃仕簡楊廷樺著交部議處尋議銷去加一級免降調十一月奏訪聞臺灣淡水屬奸民林淡等焚燒斃命隔兩月營員未曾具報見將諱匿玩延之副將左英移督臣題參並囑鎮臣柴大紀到臺督辦上是之十二月入覲賜雙眼花翎黑狐端罩四十九年正月命在御前侍衛上行走上南巡仍扈駕出京三月回任五十年正月與千叟宴五十一年正月因失跌請解任調理諭曰據雅德奏福建水師提督黃仕簡自上年失跌染患風疾乍痊乍發心神恍惚氣體虛弱一時恐難全愈已委福

寧鎮總兵何俊前往廈門幫辦水師提督事務並據該提督具奏患病情形請解任調理等語黃仕簡久任水師提督經理妥協而查辦械鬪一案尤著勞績方資倚任今因失跌染患風疾朕篤廑念著賞給人參二斤高麗清心丸二十九丸御用大荷包一對小荷包二對用示恩眷並諭令該提督加意調養不必開缺以冀就痊至該提督宣力年久偶患風疾固不忍卽令開缺但海疆重任關係緊要若該提督在任總理營務仍不免勞勩精神朕心更有所不忍見在雅德已委何俊前往代辦水師提督事務廈門距漳州不遠該提督自揣於病勢有益不妨與雅德商酌竟行回籍調理卽令何俊暫署提督事務並著雅德將該提督近來病勢如何曾否全愈迅速覆奏以慰懸注二月奏臺灣淡水同知潘凱赴貓裏社相驗中途被賊戕害並斃跟役十餘人見調官兵船隻軍火器械如係生番逞兇當力疾渡臺督剿諭曰朕聞有黃仕簡五百里奏報恐伊病勢加劇深爲軫惻及披閱奏摺乃係此事轉覺慰幸但官員竟被殺害不法已極不可不嚴加究治如係刁民謀害裝點生番形迹卽嚴拏首從各犯務獲嚴審確情立正刑誅毋使一人漏網若係生番所殺卽帶兵搜捕速拏正犯嚴辦以儆兇頑黃仕簡一聞信息卽力疾

前往甚屬奮勉可嘉續奏接鎮道等咨報同知潘凱係生番殺害卽督官兵渡臺進剿諭曰福建水師提督黃仕簡於查辦生番一案一聞稟報卽力疾前往督辦實屬奮勉出力殊堪嘉獎著加太子太保銜以示優眷旋奏同知潘凱係被直加未南及日懷二社生番殺害臣渡臺後會同鎮道督兵分投剿捕先後殺獲兇番首級三十八中槍落崖身死者百數十業將二社巢穴剿洗諭曰生番膽敢戕害官役實爲兇橫不法黃仕簡等聞信後卽渡臺剿捕殲戮無遺辦理甚爲妥速俱著交部議敘旋議加一級九月奏諸羅縣民楊功懋等兄弟因爭財起釁糾衆立會經臺灣鎮道飭屬查獲匪徒張泮等十四名石溜班汛把總陳和拏獲張烈解縣行至斗六門突被數十人持械奪犯陳和被戕卽督飭文武員弁嚴拏據鎮臣柴大紀等報稱陸續拏獲首從各犯楊功懋等五十三名諭曰楊功懋等釁起家庭膽敢私立會名結黨聚衆經把總陳和拏獲匪犯張烈復敢奪犯戕官實屬不法所有見獲之首從各犯楊懋功等五十三名著常青黃仕簡等審訊明確一面具奏一面將首要各重犯卽在該處正法示衆十二月臺灣居民林爽文滋擾黃仕簡奏帶兵由鹿耳門飛渡進剿諭曰黃仕簡甫經病愈一聞該民滋事之信卽

帶兵渡臺殊屬奮勉可嘉著賞給荷包等件以示優眷並著於辦理剿捕諸務外仍加意調攝勿過勞動至若輩么磨烏合黃仕簡到彼督率該鎮道盡力堵剿無難立就撲滅時陸路提督任承恩奏帶兵渡臺會剿諭曰此等羽黨不過么磨烏合上年臺灣卽有漳泉二處匪徒械鬪滋擾等案一經黃仕簡帶兵前往督辦立卽撲滅今林爽文等結黨橫行情事相等卽使該提督病後精神未能周到亦祇可添派能事總兵一員協剿任承恩本不應前往今已渡臺亦不必拘泥回任務須會同黃仕簡分路夾攻以期剋日戡功五十二年正月諭曰昨據徐嗣曾奏稱黃仕簡到臺後儼打死羽衆二千餘人餘俱星散奔逃內山等語內山係生番巢穴若輩被官兵追剿窮蹙逃竄或將所掠財物賄結生番容留藏匿或恃其人衆脅制生番尤不可不預行籌辦見在水陸兩提督帶領多兵自當乘此兵力搜剿殲除勿令餘黨得以逃匿負隅又諭曰黃仕簡抵臺迄今一月有餘尙未據奏報剿擊消息卽待厚集兵力剋期進攻亦應將敵情隨時奏報乃日今總無消息所辦何事看來黃仕簡於剿捕事宜不能得力著常青卽速渡臺督同黃仕簡等剿捕旋奏臣於正月初四抵臺先督兵守禦郡城十二日金門南澳銅山等標兵續

到遣海壇鎮郝壯猷率同副將丁朝雄等領兵往南路恢復鳳山又遣臺灣鎮總兵柴大紀率同參將潘翰等帶兵往北恢復諸羅彰化臣同臺灣道永福帶兵在南北處策應諭曰前據常青奏彰化縣城久經陳邦光等收復其鳳山等處亦經柴大紀等分路剿捕郡城已無事矣何以黃仕簡摺內僅稱派委總兵等分赴南北二路進剿恢復縣城竟似該處情形全未知悉者看來黃仕簡竟是安坐郡城並不親赴各該處督率剿捕大屬非是提督爲專閩大員領兵是其專責黃仕簡深受朕恩見帶兵剿賊雖係病後理宜奮勉出力乃於剿捕事宜奏報遲延全不得行軍要領該提督所司何事著傳旨嚴行申飭旋奏臺民滋事其間迫脅隨行者不少經臣檄示民人凡被脅者速行解散諭曰黃仕簡所奏非是此等辦法或因起事之初兵少賊多爲一時權宜之計則可若軍威壯盛自當趁此兵力蕩洗穴巢勿使轉留餘孽若黨羽旣散將來如何按名究辦況大兵一撤餘黨散而復聚豈不更煩兵力此皆平日伊等將就了事之見此次林爽文等糾衆滋事卽由從前姑息養癰所致今該民等肆擾至此豈可不殲戮淨盡以絕根株二月奏據北路總兵柴大紀克復諸羅林爽文潛回大里杙見在相機擒拏上以其遷延觀

望再行嚴飭又柴大紀奏仕簡派同剿擊之參將潘韜兵丁三百名留駐郡城自衛命常青查明據實奏參三月奏總兵郝壯猷見已克復鳳山南路岡山崙仔頂各處係其藪臣飛遣官兵往捕又淡水之新園等處彼勢猖獗飛咨郝壯猷派兵往剿並令游擊鄭嵩赴援查各路羽衆雖疊被官兵剿戮餘黨尙東徙西奔必須分頭剿捕除淨根株不遺餘孽諭曰黃仕簡奏報剿洗南路羽黨克復鳳山縣城一摺其所陳功案俱係罪案摺內旣稱南路之岡山崙仔頂等各處俱係其藪勢甚猖獗自應一舉撲滅何不親率弁兵前往剿捕乃惟添遣官兵飛檄該鎮將等進攻似此東堵西禦疲於來往適足爲彼所輕么膺草竊自然毫無顧忌日積月多至遊擊鄭嵩等分路進攻鳳山收復城池時伊仍安然坐守又不親往是誠何心又摺內稱官兵疊次剿擊餘黨東徙西奔四處皆有彼蹤等語黃仕簡並不親剿其巢將爲首擒獲致羽衆蔓延團結乃尙稱除盡根株不留餘孽伊試自思數月之久所辦何事若輩尙如此鷓張惟與任承恩互相推諉非伊二人貽誤而何尙靦顏爲此語乎黃仕簡任承恩始終貽誤緊要軍機其咎甚重必須拏問常青到臺灣後先將伊二人摘去花翎令其由北路回至內地廈門並著李侍堯於任

承恩到後卽行委員解京黃仕簡留廈門候旨時新授閩浙總督李侍堯渡臺灣奏南北兩路提臣互相推諉復命將任承恩革職拏問仕簡到廈門時一併傳旨革職旋李侍堯又奏仕簡駐守郡城不能督率剿捕以致彼等嘯聚諭曰本日李侍堯奏到並鈔錄海防同知楊廷理原稟據稱臺民滋事以來大兵僅屬固守皆以兵單難於遠捕爲辭黃仕簡駐守郡城致若輩嘯聚等語昨經降旨將任承恩革職拏問尙以黃仕簡年老有病僅令革職撤回內地今伊等如此貽誤則二人厥罪維均黃仕簡亦難稍爲寬宥著李侍堯一俟黃仕簡回廈門著傳旨一併革職拏交刑部治罪四月常青奏臣到臺灣遵將欽奉上諭付仕簡閱看並詢以剿擊機宜仕簡言語不清步履艱難病憊屬實接見在城員弁訪問見在賊勢與該提督等從前咨報迥殊請將仕簡等治罪諭曰昨已降旨將黃仕簡撤回內地俟伊到廈門時著李侍堯卽傳旨將伊一併革職拏交刑部治罪若論黃仕簡任承恩遺誤緊要軍務之罪均應按律卽行正法但念黃仕簡年老又係病後且伊從前辦事尙屬黽勉受恩最久所有公爵係伊祖所立功績自應承襲卽照黃仕簡從前原奏令伊長孫黃嘉謨承襲六月諭曰臺灣居民林爽文糾衆滋事黃仕簡

駐守郡城任承恩安坐鹿仔港僅派委將弁等零星打仗彼此觀望遷延以致林等日久未能撲滅貽誤軍機較郝壯猷之遇賊退避棄城潛逃者厥罪維均本應一體寘以重典因念黃仕簡年老患病且伊從前辦事尙屬奮勉受恩最久是以貸其一死未卽在臺灣一律正法僅令常青將黃仕簡革職拏問解赴行在今據常青等委員將仕簡解到令軍機大臣訊問伊供認各罪情甘重典但供詞尙有支吾狡展避重就輕難以憑信之處已降諭旨令常青藍元枚等查明據實覆奏黃仕簡著交刑部嚴行監禁俟常青查明到日若伊二人旣貽誤於前又復巧飾於後是卽不知朕恩仍應照律治罪十月命大學士九卿等會同嚴審定擬具奏尋奏黃仕簡業將貽誤軍機自行供認不諱請依統兵將帥致誤軍機例擬斬立決奉旨從寬改爲應斬監候秋後處決十二月諭曰本日旬到朝審官犯內黃仕簡究係老年抱病一聞臺民滋事之信卽力疾渡洋猶知以公事爲重其按兵株守漫無籌畫實由老病昏憤尙非出於有心是以姑從寬典免其旬決但溺職辜恩致若輩負隅猖獗該處兵民受戕者不少今剿捕事務尙未完竣皆伊之罪茲雖曲加恩貸已屬格外從寬未便卽行釋放黃仕簡仍著革職監禁五十三年二

月諭曰前年臺灣居民滋事黃仕簡因循延玩貽誤事機覈其情罪本應按律正法但念伊祖父世有勞績而黃仕簡向來辦事尙屬奮勉此次帶兵渡洋因循玩誤究因老病昏憤尙非出於有心是以上屆朝審尙到時從寬免其尙決見在臺灣已屆歲事黃仕簡著加恩釋放飭回原籍閉門靜居思過以示法外施仁至意五十四年卒於家子秉淳乾隆三十二年授藍翎侍衛三十八年授江南督標中營都司四十四年擢湖南沅州協副將四十八年二月諭曰福建提督黃仕簡之子黃秉淳見任湖南沅州協副將平日於營伍諸事是否能留心整飭量其才具將來堪勝總兵與否之處著傳諭舒常秉公據實覆奏諭曰據舒常奏黃仕簡子秉淳氣體薄弱步箭騎射未能出色是以從優保列三等又稱總兵大員有整飭將弁之責不僅以本身技藝爲長若以黃秉淳辦事才具將來尙堪勝總兵之任等語所奏兩歧不無觀望之意殊屬非是仍著傳諭舒常究竟黃秉淳平日辦事若何是否能勝總兵之任並見任沅州協副將是否不形踴躍令其另行詳悉覆奏七月諭曰前據舒常覆奏沅州協副將黃秉淳於訓練操防各事宜俱能實心辦理營務亦頗整飭其才具尙可勝總兵之任等語仕簡之子黃秉淳才具既可

勝總兵之任自應給咨送部引見見在黃仕簡奏請陞見已令其於臘底到京黃秉淳亦應於彼時來京可以順便見伊父仕簡隨傳諭舒常屆期給與黃秉淳咨文令其於十二月到京引見將此諭令知之四十九年擢河南南陽鎮總兵五十年調江蘇狼山鎮總兵五十一年卒諭曰據李世傑奏狼山鎮總兵黃秉淳病故黃秉淳係黃仕簡長子今患病身故黃仕簡聞之自必傷感但修短有數亦屬無可如何且黃仕簡病愈未久亦不可過於悲悼勉自節攝以慰廬注著賞給黃辦大荷包一對以示體卹至黃仕簡辦理海疆甚屬出力所有公爵應令何人承襲之處著黃仕簡自行酌量或於伊諸子中選擇一人或令其長孫承襲均聽黃仕簡之便酌定具奏朕當俞允也奏准以長孫嘉謨承襲五十五年兵部帶領引見奉旨黃嘉謨著在頭等待衛上行走嘉慶四年五月命爲散秩大臣十月授浙江温州鎮總兵

藍元枚

藍元枚福建漳浦人祖廷珍由行伍官至福建水師提督以平朱一貴功授三等輕車都尉世職贈太子少保諡襄毅自有傳父日寵官福建銅山營水師參將元

枚由世職隨標學習三十一年四月部議迴避本省奉旨發往廣東以外海水師參將補用三十三年七月補海門營參將三十五年七月擢龍門協副將三十八年正月因拏獲潛匿安南販賣夷鹽之逃軍趙元榮等調澄海協副將十月擢福建臺灣鎮總兵十二月調金門鎮上以元枚籍隸閩省命撫臣鍾音留心察看有無瞻徇情事三十九年八月鍾音覆奏元枚熟習海洋情形考拔弁兵糧缺尙屬秉公無徇私瞻顧事四十年六月丁母憂四十三年七月補江南蘇松鎮總兵四十七年五月署江南提督四十九年四月實授五十二年正月臺灣居民林爽文滋事上以元枚籍隸福建漳州兵衆所悉於該處情形自能熟諳諭令元枚卽馳驛前往泉州署理福建陸路提督卽駐筍蚶江一帶接應一切事宜二月奏馳抵福州隨訪探臺島情形自官兵渡臺後紛紛潰散但恐四方竄逸逃入內山與生番勾結搜捕更稽時日臣抵泉後當與督臣常青等實力查拏諭曰內山雖係生番巢穴但若輩窮蹙無歸或以賄結或以勢脅生番容留藏匿將來大兵撤後潛出滋擾尤屬不成事體該督等務須乘此兵力上緊搜捕俾盡根株以靖海疆初八日奏馳抵泉州查鹿仔港及北路之舢艫等處皆有官弁率同義民各相保護

報聞時水師提督黃仕簡陸路提督任承恩分路進剿觀望遷延三月命常青前往督辦將黃仕簡撤回廈門任承恩革職拏問元枚授水師提督四月授參贊帶兵前赴常青處會剿上以鹿仔港逼近對方最關緊要命元枚帶閩兵二千徑由蚶江配渡前赴鹿仔港賞戴花翎二十九日總督李侍堯奏劄致元枚訪察吳姓林姓械鬪卽俘山社民許樸等搶奪各案時鹿仔港惟總兵普吉保一人防堵上以普吉保到任未久於地方情形未能熟悉且不通閩省語音不如元枚之籍隸漳州熟諳情形較爲得力著元枚速赴鹿仔港無庸在漳浦留滯五月諭曰續到之浙兵二千名應令由蚶江配渡前往鹿仔港交藍元枚帶領至藍元枚受朕深恩授爲參贊且日擊黃仕簡任承恩觀望遷延自獲重譴料伊亦不敢復蹈故轍但該處見有兵三千八百名駐筭日久未免師老氣衰而浙省兵丁素性脆弱朕所素知臨陣打仗不能得力且鹿仔港逼近大里杙穴巢最關緊要若此時藍元枚到彼卽領兵進剿直攻該地無論浙兵柔懦萬一稍有挫損軍心爲其動搖固屬不成事體卽幸得勝仗彼等敗退勢必潰逃四散竄入深山藍元枚所帶之兵斷不能搜剿擒截常青帶領大兵到彼時辦理轉形費手所謂欲急轉緩於事無

濟朕意藍元枚到鹿仔港祇須會同柴大紀普吉保整頓兵力或往前移駐彰化
縣城作爲進攻大里杙之勢以牽綴其勢不能往南而懾伏其瞻顧或能會合柴
大紀普吉保先將南北通衢斗六門大武隴等處之占據羽衆合力剷除使常青
率領各項奮勇官兵廓清後路乘勝直趨北路全無阻擋專力直擣其巢自無難
一舉蕨功行軍之道緩急先後貴於審度機宜權衡悉當有欲速而反遲似緩而
轉急者所謂行軍貴機變也二十日奏浙兵已到蚶江卽配船候風放洋諭曰元
枚帶領浙兵前抵鹿仔港固不可冒昧向大里杙穴巢進攻但諸羅彰化斗六門
大武隴等處南北通衢皆爲若輩占據元枚至彼當會合普吉保整頓兵力先至
諸羅幫同柴大紀設法殲擒以便常青將南路羽黨除淨再由中路北路進抵大
里杙不致中途少有阻撓方爲上策六月奏二十日到鹿仔港隨於二十三日密
會普吉保於四更進兵前往柴坑子大武隴直攻餘黨斬獲甚衆上嘉之二十五
日奏諸羅彰化道路梗塞近海民人分逃鹿仔港臣隨親至街市慰諭撫卹稽查
難民壯勇者挑作義民給發口糧以資戰守又彰化淡水交界之大甲溪岸裏社
近大里杙該處義民熟番不肯附和見差弁曉諭令其攻迫對方分掣其勢上嘉

其所辦甚合機宜諭曰參贊藍元枚自抵鹿仔港以來一切調度合宜打仗得勝伊係藍廷珍之孫伊祖父從前剿辦臺民朱一貴收復全臺奮勇克捷威聲久著今藍元枚在鹿仔港統兵進剿能繼家聲實爲可嘉著賞戴雙眼花翎以示優眷七月十五日奏鹿仔港四面受敵若輩出沒無常兵力不敷懇再調福建兵二千廣東兵三千以備剿捕命李侍堯等照元枚請添兵數挑備撥往尋奏約會柴大紀帶兵直趨斗六門奮力攻剿諭曰此舉略見奮勇但應如此辦理八月初一日奏彰化等處羽衆屯聚多係被人迫脅業經逐細開導示以殺敵自效皆紛紛投出七月初三餘黨焚燒阿棟社臣帶兵堵殺又於埤頭莊大肚溪等處剿擊俱得勝仗初九日奏自二林進攻西螺焚燬條圳塘中浦厝等處穴巢臣族人藍啟能自山內漳浦竄攜眷逃出詢以熟識山路卽令隨同剿擊諭曰藍元枚雖調派官兵分路攻剿西螺餘黨兵威較爲振作但尙未能統兵前進擒爲首羽目大加斬獲本不應加以賞賚但伊族人藍啟能等男婦七十九人因所住地方離彼等不遠恐若輩偪令附和各帶家屬從小路投出又藍任等三人被彼攔住殺死拏去藍湖等三人眷屬十一口不知下落藍任等三人俱著加恩賞卹至藍元枚所奏

到之藍啟能等若能熟識山路卽令隨同剿擊其中如有曾經附和者仍請查明正法等語則所辦尤爲公當可嘉之至藍元枚著賞給緋絲蟒袍一件御用大小荷包以示獎勵至藍啟能等挈其老弱逃出訴其畏彼迫脅自屬實情如有熟悉該處路徑者正可用爲眼目嚮導令其隨同征剿更爲得力且旣自行投出亦當遵照前旨令其自新從前有無從附之處可以無須追究十一日李侍堯奏移會元枚從陸路進攻大里杙斗六門等處諭曰藍元枚急需乘此軍威壯盛若輩潰散之時一面妥爲招撫一面速赴北路將斗六門等處剿殺廓清道路前抵諸羅與柴大紀會合一處直抵穴巢以期一鼓成擒十七日奏分路遣弁曉諭迫脅餘黨及防範海口各事宜諭曰前以藍元枚殺退西螺羽衆擬卽統領官兵相機剿捕又伊族人藍啟能等在彰化投出懇求安插所辦尙爲妥協方以藍元枚係本省人統本省官兵可資倚任是以加恩獎勵藍元枚自應倍加奮勉速圖奏績且前因兵力單弱奏請增添業據李侍堯奏到粵兵漳兵皆經陸續配渡閩洋自己早抵鹿仔港該參贊正應乘其銳氣鼓勇前進以期迅速集事今閱所奏情形止係遵旨曉諭被脅羽衆防範海口各事宜且據稱臺灣南北道路被其阻隔往來

文報不無遲滯是則更應速領官兵前往剿擊打通道路乃既未前往進剿而於作何調度會合之處亦並未陳奏看其光景竟係株守鹿仔港一籌莫展矣卽云持重亦不應恇怯遷延若此前任承恩在鹿仔港時心存觀望束手無策以致曠日持久貽誤機宜是以降旨革職拏問治罪藍元枚尤非任承恩可比若復踵前轍觀望不進則藍元枚獲罪尤重不可不慎著先傳旨嚴行申飭前因徐鼎士擬由大甲分兵攻擊大里杙之北並約令藍元枚從鹿仔港進兵大肚溪以期裏應外合俾若輩腹背受敵擣其巢穴因諭令藍元枚卽從大肚溪進兵夾擊不知徐鼎士此策知會藍元枚否如藍元枚接奉前赴諸羅之旨已領兵自北而南固屬甚善否則急應帶兵赴大肚溪會同徐鼎士夾攻大里杙羽衆機不可失藍元枚務須加倍奮勉力圖自效勿再因循遲緩時被圍諸羅兩月元枚未發兵救援上訓飭之諭曰見在諸羅被圍甚急藍元枚若能進兵大肚溪與徐鼎士夾攻大里杙穴巢使林爽文回顧巢穴有所牽綴則圍困諸羅羽黨自當漸漸解散柴大紀可以捍衛無虞亦是一策若未能前進藍元枚亟應親統官兵速赴諸羅接應柴大紀毋得稍有遲緩九月初五日奏見在整頓兵力咨會大紀夾攻斗六門至大

甲溪岸裏社之義民熟番聲勢亦屬聯絡可以帶同殺擊諭曰諸羅被其圍困望救甚切經柴大紀兩次請兵往援該參贊自應帶兵星速前往策應鹿仔港距諸羅甚近該處被彼圍急藍元枚豈有不知之理況屢有旨催令自北而南接應諸羅計此時藍元枚早應接到何以摺內未曾提及又不速往援應乃轉稱見在咨會柴大紀該處此時正在被圍望救焉有餘力與藍元枚會合夾攻斗六門之理且藍元枚摺內既稱大甲溪岸裏社義民熟番聲勢聯絡該處路途頗平可以攻迫穴巢又稱斗六門係其要隘勢在必爭當多帶官兵先筭西螺進攻斗六門以便長驅直進即應酌定機宜令普吉保駐守鹿仔港該參贊親自帶兵前往痛加剿殺以圖進取乃既不由大肚溪進兵與徐鼎士會攻又不赴斗六門奮力攻擊殲除屯占羽黨救援柴大紀而於大里杙穴巢又稱官兵若攻剿太急若輩勢必抵死守禦一時恐難破是元枚竟係中無定見株守鹿仔港徒擁兵自衛並無寸進若鹿仔港果有餘黨攻擾藍元枚不能前進猶得有所藉口該處見在並無羽衆滋擾而藍元枚處添調官兵又已厚集乃一味株守瞻前顧後並不挪移尺寸耶看來藍元枚明知諸羅被圍甚急擁兵不救徒以大肚溪斗六門等處輾轉推

託以掩飾其株守坐視之罪豈能惑朕藍元枚之祖藍廷珍以一總兵帶兵渡臺灣剿除亂民七日之內剋期奏績朕軫念前勞是以將藍元枚屢加拔擢用至提督又以伊係本省人必能深悉敵情畀以剿擊之任授爲參贊並賞戴雙眼花翎自應加倍奮勉效法伊祖克繼家聲方爲無負委任今自到鹿仔港後遲回觀望一籌莫展卽所稱曉諭生番令其擒敵獻功等事皆不過藉詞文飾以爲站腳地步藍元枚受朕深恩何得恇怯委靡若此若再仍前觀望按兵不動則藍元枚卽爲任承恩之續況尤非若任承恩尙可推兵少也著先傳旨嚴行申飭初六日奏臣於七月二十二日染疾至二十五日復又猝受風寒漸覺疲困八月初八日若輩由竹子腳大肚溪柴坑仔三路來犯仍力疾帶兵堵禦回營愈覺精神不支見在漳州兵已到一千三百餘廣東兵一千五百餘兵力已足正當剿滅首夥之際焉敢抱病戀棧已將一切官兵移交普吉保管束飛咨將軍常青速撥大員前來經理自請罷斥效力交部治罪諭曰藍元枚到鹿仔港後辦理一切尙屬奮勉後因其擁兵觀望並無寸進又不親往援應諸羅節經降旨飭諭今藍元枚旣稱患病難以支持然猶在番仔溝竹子腳等處打仗力疾堵殺餘黨如果病證屬實其

情殊可憐憫見已頒賞大小荷包以示軫念福康安到彼卽傳旨賞給十八日卒諭曰福建水師提督藍元枚於臺灣居民林爽文滋事以來屢經統領將弁奮勇直前剿擊餘黨並籌畫一切皆有條理特降旨授爲參贊以示獎勵昨據藍元枚奏染患痢證屢次力疾統兵前往堵剿復降旨賞給大小荷包用昭體恤方冀速就全愈迅奏膚功以承恩敍茲據李侍堯奏藍元枚於八月十八日病故聞之深爲憫惻藍元枚著贈太子太保並賞銀一千兩以示朕軫念勤勞優卹戎臣之至意所有應得卹典著該部察例具奏又諭曰藍元枚業經加恩贈太子太保交部議卹並賞銀一千兩以示軫念所有應襲輕車都尉加一雲騎尉世職著伊長子藍誠卽行承襲仍俟百日後該督咨送到部帶領引見用示優卹勤勞有加無已之至意尋賜祭葬如例諡襄毅

福隆安

福隆安滿州鑲黃旗人大學士忠勇公傅恆之子尙和嘉公主授和碩額駙乾隆二十三年授御前侍衛二十六年三月兼管光祿寺四月兼管奉宸苑七月掌鑾儀衛事三十三年二月擢兵部尙書軍機處行走三月兼議政大臣四月調工部

尙書三十四年正月授御前大臣署總管內務府大臣九月署理藩院尙書賜紫
禁城內騎馬三十五年兼步軍統領七月管理藩院事十月授領侍衛內大臣襲
一等忠勇公爵三十六年疏言馬兵例准鄉試又可在營升拔是一人而兼兩途
請將籍隸大宛兩縣兵丁與武童一體應試取中武生再准鄉試部議從之三十
七年四月署鑲黃旗滿洲都統五月散秩大臣銜阿爾泰總兵宋元俊奏參四川
總督桂林在卡了軍營約令參將薛琮問道夾擊金川賊桂林略一進攻卽退並
將護軍統領明亮副都統鐵保撤回薛琮以糧盡救不至戰歿全軍盡覆桂林捏
飾具奏與鐵保終日酣飲將備罕得見面見在軍營修房居住勒取供應令提督
汪騰龍交銀總兵王萬邦贖取金川所遮官兵命福隆安往審六月奏審無酣飲
勒派事桂林所居有預備貯米板屋三間無不見者薛琮告急卽令宋元俊往援
惟官兵傷損不卽查奏屬實至贖取官兵係戶部司員汪承需聞有巴旺布拉克
底土兵送出迷失官兵信告知桂林取銀五百交汪騰龍備賞後未見送出仍將
銀取回其王萬邦給宋元俊札捏寫收銀贖人係爲宋元俊所愚請分別治罪諭
曰宋元俊汪承需均著革職拏問同桂林一併解赴行在候訊至王萬邦初爲宋

元俊所愚一經詰訊卽吐實情此案得以明確情尙可原且領兵打仗頗爲勇往免其革職治罪明亮鐵保汪騰龍已降旨革職鐵保仍遵前旨留任在軍營效力未幾元俊議革職仍留軍營桂林得旨發往伊犁效力贖罪福隆安又奏言賊番踞守碉樓木寨時出伺我兵舉動軍營事應謹密方可乘其不備已申明紀律整肅軍容以杜賊番窺伺又言臣沿途查看山險路遙輓運維艱打箭鑪等處雖貯糧萬餘而軍營存糧無幾不能剋期趕運阿爾泰年邁請令陝甘總督文綬往章谷等處督運得旨調文綬四川總督三十八年閏三月充四庫館正總裁四月加太子太保授正白旗滿洲都統三十九年四月御史李漱芳劾福隆安家人藍大在金陵館酌酒滋事鞠實擬罪部議革福隆安職詔留任十月疏言烏槍爲行軍利器八旗專操會操演習九進十連環所向無前各省綠營烏槍請照火器健銳二營進步連環式一體演習下部議行四十一年正月調兵部尙書仍管工部事務二月金川平敘功加三級命圖形紫光閣御製贊曰父定復叛子嘗媿之是用稽首躬請出師留於左右俾習規畫頗有嘉謀協予廣益七月兼文淵閣提舉閣事十一月充國史館正總裁四十二年四月暫署吏部尙書四十二年錦州副都

統德福劾協領福神保藉差斂錢命福隆安查辦尋奏訊福神保斂借商銀交將軍弘晌所設差局幫貼差費公用弘晌並未入己但以宗室大臣見小滋弊請交宗人府會同刑部治罪福神保等發烏魯木齊效力餘分別杖責得旨弘晌訊無染指亦未授意派斂著加恩以散秩大臣效力贖罪四十四年三月直隸總督周元理奏辦井陘縣民李馥等斂錢告官梁進文抗官毆差案步軍統領衙門緝獲案內逸犯供知縣周尙有苛斂侵肥各款命福隆安同刑部侍郎喀寧阿錢汝誠會鞫尙有派累屬實抵罪周元理以徇庇劣員革職四十七年四月上躬詣零壇行禮諭曰常雩大典朕親詣行禮壇內一切禮器均宜敬慎安設乃本日行禮時見壇內懸挂天鐙僅止二盞又更衣幄次所設坐褥亦不整齊郊壇典禮朕親詣行禮尙如此草率不敬若遣官恭代更不可問矣其罪甚大非尋常錯誤可比工部堂官羅源漢等近因福隆安患病精神不能周到遂各委蛇袖手而派出司員等亦俱怠忽從事以致種種玩誤不可不嚴示懲儆福隆安若照常辦事遇有此等錯誤其處分必較諸人加倍姑念患病屬實著加恩免其革職仍罰其公俸十年四十八年五月留京辦事十一月上閱朝審招冊疑趙文達毆斃夫役張二案

命覆訊諭曰前閱本年朝審情實招冊內趙文達毆死夫役張一一案忽疑其或有頂兇情節因詢之和坤福康安福長安俱不能深悉其中情僞因派阿桂和坤福康安劉墉會同刑部堂官覆訊該犯等始猶堅供前情及研鞫再三據供實係福隆安管事家人富禮善主使責打趙文達聽從動手屬實此案既據審明可見從前刑部堂官司員不能盡心推鞠復令查檢原案初供係福隆安署步軍統領時移送刑部其原咨內本有家人富禮善喝令打之語乃刑部定案時趙文達挺身直認證佐匠役等亦隨同指供司官既不嚴詰而發堂官審擬時該員等亦意存觀望不肯深究顛預了事以致富禮善脫然事外福隆安病體至今未愈被家人始終瞞哄竟無見聞而刑部堂官不加駁詰推求未免有意瞻徇福隆安情面刑部堂官實咎無可寬所有該堂官及主稿隨同畫押之司官等俱著交部嚴加議處至福隆安於此案雖原報本有富禮善之名及後改供亦實不知情但致刑部堂司官意存觀望實由平素恃朕恩以致人畏卽其過也此案若趙文達已經句決不特福隆安獲咎更重卽阿桂等亦不能無罪茲幸究出實情未致枉縱其情節尙可稍從寬減福隆安著罰公俸十年仍交部嚴加議處部議均革職奉旨

福隆安病後精神虛弱致被家人瞞哄前已罰公俸十年著加恩改爲革職留任刑部堂官降爲三品頂帶仍帶革職留任承辦司員分別降調革職四十九年閏三月卒諭曰尙書額駙公福隆安醇良謹飭勤慎小心綜理部務宣力有年昨歲因舊證復發屢經給假調理賜藥賜醫方冀年力尙強可以漸次平復倚畀正殷近聞病體加劇卽令伊子豐紳濟倫馳驛回京省視茲聞溘逝深爲悼惜著皇八子親往奠醑並賞給內庫銀五千兩派金簡經理喪事任內降革處分概予開復前次伊家奴犯罪伊自請罰公俸十年亦加恩寬免應得卹典察例具奏尋賜祭葬如例諡勤恪子豐紳濟倫襲一等忠勇公爵見官御前侍衛副都統

桂林

桂林滿洲鑲藍旗人姓伊爾根覺羅父鶴年官兩廣總督桂林由廩生捐主事乾隆二十五年授工部主事洊遷郎中三十三年遷山西河東道三十五年遷山西按察使三十六年三月擢戶部侍郎在軍機處行走九月命往四川辦理軍務桂林至成都以山路崎嶇民夫背運軍糧動以千數彈壓撫綏祇建昌道白瀛一人難以分理增委幹練佐雜按程巡查丞倅督站員散給口糧工價知府總司其事

議如所請行十一月奏言清溪縣南至打箭鑪軍糧柴彈多堆積緣運價俱承辦各員墊給藉口遲延酌支打箭鑪同知庫貯銀八千兩給站應用俟司庫銀到歸款得旨嘉獎旋授四川總督是月小金川頭人在卡外投文呈送禮物桂林檄列其酋僧格桑罪狀斥回諭曰僧格桑跳梁肆惡抗拒官兵非深入擒渠不足以示懲創今看所投文稟詞意鴟張齎稟頭人自應卽時拘執嚴行根究庶得賊巢確實情形攻剿亦易爲力乃故縱回巢而所辦檄諭意類調停並不辭嚴義正桂林著嚴行申飭十二月督兵復約咱斬賊百餘級生擒六人諭曰桂林等奏攻得約咱賊寨辦理大有起色可見事在人爲桂林能實心奮往遂見實效前已授伊總督似此方克副朕恩眷又奏攻克約咱東山梁大碉一衆碉四石卡二十餘上嘉之復請添調黔陝兵五千諭曰桂林等十一月二十日卽攻得約咱距此拜摺之時已逾兩旬何以至今尙無信息看來桂林竟自靜住約咱專待續調之兵方擬前進殊味兵貴神速之道桂林一路已有兵八千餘名雖云分防各處要隘何至用五千餘名之多前次阿爾泰等分派過多以致存兵太少不敷進剿之用桂林到彼何以不知另爲調度仍令以有用之兵置之無用之處乎前此桂林統兵奪

取約咱并續得東山梁礪卡頗知奮勉使賊人受創膽寒我兵若乘勝進攻賊必望風股慄易若摧枯而官兵新勝之後正當勵其銳氣及鋒而用今乃逗遛不進坐致老師不知師老則隳桂林未曾經歷行陣而於事理所在亦可籌度而得豈伊一經擢用後遂不復黽勉自勵耶溫福攻得巴郎拉帶兵直進已得制勝之勢且其地距美諾亦止一百五六十里是該處爲進攻正路較南路爲尤要所帶僅有黔兵三千亦不可無精銳接續見已飛諭舒明阿卽帶陝甘兵二千名由維州取道趕至溫福軍營應用其餘三千名令赴約咱一路以供桂林應用桂林須力圖奮往毋再遲延干咎旋奏令總兵宋元俊等設伏喇嘛寺深林桂林及阿爾泰等督兵偪卡丫元俊擊斬賊九十餘級克木城石卡礪寨獲刀矛鳥槍乘勝占據寺東墨爾多山梁諭曰一切布置合宜欣慰之至無意中用汝竟能得力亦賴半載軍機日聽朕訓也三十七年正月攻克卡丫越日復攻克郭松甲木噶爾金斃賊無算獲礪房石卡甚衆奏入諭令益當奮勇前進二月攻克噶爾金之後山梁一面襲阿仰由墨溝進取達烏上嘉之又奏言索諾木添兵助惡總以求賞革布什咱爲辭今若差人宣諭則復成絕望必預作準備或竟收革布什咱民人盡換

金川番悉力嚴防辦理更難臣意與其會攻於事後莫若迅發於幾先兩酋朋比爲奸正以我見剿小金川不能兼辦金川是以從中滋擾此時索諾木自必注意西南兩路所占革布什咱地不能分駐多人若乘索諾木兵力未備革布什咱人心未定之際相機而動正可撫剿並詢之宋元俊亦稱革布什咱被金川侵占番衆勉強服從果迅發大兵俾金川猝不及防自可先行收復隨遣守備陳定國赴巴旺布拉克底與革布什咱交界處察金川番情動靜臣與元俊分兵五路進攻約將軍溫福等合擊三月桂林令革布什咱投誠頭人旺勒丹等潛約其戚加理爾爲內應夾攻收復革布什咱寨落七十餘里招撫番民甚衆并令元俊定國帶綽斯甲木士兵據甲爾壘壩俾金川四面受敵諭交部議敘是月報元俊率兵赴默資溝攻吉地斷其水道燒斃賊番百餘進剿丹東桂林復以東山梁墨壘溝懸崖路窄積雪未消賊嚴守難越督飭緩施槍礮暗伏山腳巖洞中俟賊防稍懈卽乘機奪隘諭曰桂林奏復革布什咱之吉地官寨及默資溝地方所辦俱好默資溝旣已占據但其應援甲爾壘壩又預約綽斯甲布派兵堵截自不慮索諾木之復來爭奪但宋元俊所統兵練甚多莫若趁賊人防守未定之先乘勝直擣其巢

并將索諾木擒獲果能將金川翦除其餘各土司自便畏威守法方爲一勞永逸
桂林當酌量情形隨機妥辦總以動出萬全爲要至另摺所奏墨壘溝山嶺一帶
擬將槍礮暫緩施放飭令各兵密於巖洞藏伏賊番防禦久而必疏我兵即可乘
機奪隘所辦甚合機宜亦屬出奇制勝之策旋奏臣等察看扎哇窠山梁下有溝
內立礮卡若過此溝更可進攻阿仰隨令侍衛游鎮由東山梁壘壘溝山嶺攻擊
以張聲勢弁兵潛赴扎哇窠山梁絕崖設伏臣等督率弁兵由東山梁墨壘溝兩
路奮攻扎哇窠伏起賊驚竄克溝內大礮一石卡二十一別遣參將常泰環攻克
哩革番內變頭人安幫等迎獻所殺金川賊級都司李天貴等圍沙衝革番從內
占據碉房金川賊進退無路我兵痛殲之黨哩沙衝地盡復四月又奏英泰等攻
克達烏官寨上嘉其調度深合機宜賞御用玉韞是月又奏攻克格烏巴桑及那
隆山嶺元俊攻克丹東及覺拉喇嘛寺賊頭人三番衆百三十餘革布什咱地盡
復陳定國所調綽斯甲布兵檄暫駐交界候調諭曰革布什咱之地全行收復辦
理頗爲迅速惜所籌未能妥合前遣陳定國往綽斯甲布調令發兵占據甲爾壘
壩該酋業已發兵今旣盡得革布什咱之地正當乘勝進剿金川攻其不備乃宋

元俊飭令綽斯甲布番兵暫駐界上聽候調遣失此極好機會甚爲可惜又摺內奏稱該地當人心初定應於要隘處駐守官兵以資防範等語桂林所見亦誤革布什咱之地久爲金川侵占今官兵收復節次殲其防守番衆甚多又殺其頭人三名索諾木豈有不知況聞索諾木已將幫助小金川之賊兵撤回必係知官兵復侵其地懼而自防尤當乘其未備之時出其不意先發制人今宋元俊辦理既錯桂林卽應就近申飭不當聽其坐守觀望桂林在軍營節次所辦事務悉能妥協惟此一節則不免失算昨又傳諭文綬備調兵三千名兵力不爲不厚溫福桂林當竭力相機妥辦旋奏攻達烏東岸山梁及甲爾木侍衛六十一參領普寧參將薛琮陣亡自以畫策未周請交部治罪詔免五月元俊與原任四川總督阿爾泰劾桂林冒昧發兵傷弁兵六百餘人復於四月初六日夜偪薛琮同侍衛將備等領漢土兵三千餘從墨壘溝進繞至前敵山梁接應夾攻初六日桂林始與副都統鐵保提督汪騰龍等飭回薛琮糧盡請援始令都司廣著前往賊已據險全軍盡覆脫出僅二百餘名及巴旺布拉克底明正土民數百桂林虛詞陳奏又在卡了修房居住勒取屬員供應與鐵保汪騰龍終日酣飲在營將備罕得見面密

令汪騰龍交總兵王萬邦銀五百贖取所遮官兵以圖掩飾得旨革職拏問命額
駙尚書公福隆安往審尋審明所劾皆虛惟官兵傷損不卽查奏屬實至贖取官
兵係戶部司員汪承霈聞有巴旺布拉克底士兵送出迷失官兵信告桂林取銀
五百交汪騰龍備賞其王萬邦給宋元俊書札捏寫收銀向金川贖人係爲宋元
俊所愚請分別治罪詳福隆安傳諭曰前因阿爾泰宋元俊會參桂林乖張欺罔
至有將銀向金川贖取迷失兵丁之事因將桂林革職拏問特派福隆安馳往軍
營勘問旋據審明桂林並無造房居住驕縱不法各款至薛琮告急稟至桂林卽
派宋元俊赴援其發銀贖取兵丁一節係司員汪承霈及知州曹胤以聞有巴旺
布拉克底士兵尋覓官營迷失之兵頗爲出力是以向糧員取銀備賞曾經稟知
桂林支發非欲賞金川之人并審出宋元俊構陷串飾情節則桂林尙非法所難
貸但其在軍營內日親麴糲止圖己身安逸不能與士卒同甘共苦而北山梁傷
損官兵亦不得謂之無罪著加恩發往伊犁自備資斧效力贖罪交與舒赫德令
在印房學習當差三十八年七月詔給三等侍衛著往四川軍營辦理糧運奏言
糧運程途須兼資土司馬拉此時達木巴宗一帶存糧充備將軍阿桂令分運接

濟飭由美諾赴章谷章谷存米毋庸運赴南路軍營緣南路進剿皆以章谷爲後路章谷存貯有餘則轉運軍營自易三十九年正月奏言明亮移駐附近章谷之格藏橋由巴旺布拉克底進兵一切供運若取資章谷緩不及濟查巴旺布寨距臨卡三站係適中之地已令李世傑運貯米千二百石俟大兵進後再將巴旺布存運趕運臨卡奏入均報聞四月奏言科布多至僧格宗深箐僻遠請將僧格宗所需糧石改由南路章谷運交附近僧格宗等處就近支領上是之六月奏言僧格宗一帶山險前橫大河我兵營卡不能瀕河安設賊憑高滾石放槍我兵仰攻不甚得勢令僧格宗科多一路防兵移駐河南賊無從肆其鬼蜮上從之四十年四月授頭等侍衛九月授四川提督四十二年授兩廣總督四十四年廣西桂林柳州二府旱桂林恐穀價昂貴奏預撥備用廣東平糶穀十萬石分貯水次各州縣酌量動撥奏入報聞十二月卒諭曰兩廣總督桂林才具優長辦事敏練簡任封疆正資倚任忽聞溘逝深爲軫惜著加太子太保銜任內處分并著開復應得卹典該部察例具奏尋賜祭葬如例諡壯敏

謝塘

謝塘浙江嘉善人乾隆十六年聖駕南巡塘由優貢生召試第一賜舉人授內閣中書十七年會試中式進士改庶吉士十九年散館授職編修二十二年因撰擬原任閩浙總督喀爾吉善碑文措詞失當奉旨交部嚴加議處部議降二級調用二十四年九月諭曰原任編修謝塘前因撰文譌錯部議降調見未得缺念其事非大咎時歷二年著加恩准其開復十二月命在上書房行走二十六年充會試同考官二十八年充日講起居注官二十九年十二月遷侍講三十年四月擢右春坊右庶子充福建鄉試正考官十一月遷翰林院侍讀學士三十二年十月遷內閣學士十一月丁父憂三十五年二月服闋赴補閏五月補原官仍在上書房行走三十六年十月命教習庶吉士三十七年四月充殿試讀卷官三十八年五月授工部侍郎八月轉左侍郎十二月充經筵講官三十九年授江蘇學政四十二年二月奏廩生有恃符滋事經地方官詳請戒飭被責者遇出貢之年應扣除另選陪貢考充下部議行十月任滿回京四十三年正月調吏部左侍郎三月以隨同尙書永貴指名保題主事李漱芳議革職諭從寬留任是月充會試知貢舉奏填榜放榜應飭原派之副都統同入聚奎堂彈壓得旨嘉九四十四年充四庫

全書館總閱是年充江南鄉試正考官四十五年三月會試充知貢舉奏本科房官劉紹錦丁父憂禮部移會到臣惟時試卷未謄送卽知會內簾出闈因思考官有應行守制之事若文到至公堂在送卷之先原不妨知會內簾若已經閱卷仍令出闈難保無漏洩情弊應請嗣後凡在十五日以後者文到禮部暫行押住如屆十三四等日禮部文到時以已未送卷爲率酌定移知內簾與否下部議行是月調吏部右侍郎四月恩詔開復處分旋充國史館副總裁五月充殿試讀卷官十一月署廣西全州知州彭曰龍因縱令革役復充褫職赴部呈請捐復議與大學士公阿桂不合因見議不准捐復之山東商河縣教諭侯華案對較時侯華案未呈堂阿桂疑有請託經奏聞飭軍機大臣傳集查詢謝墉並細覈兩案情節其不准彭曰龍捐復一節尙屬平允復傳訊侯華案堅供并無囑託但謝墉身係堂官於侯華案不能避嫌彭曰龍案既有所見商諸各堂不允何妨兩議具奏乃始而爭執辯論繼復依違畫諾請交都察院議處尋議降調諭從寬改爲革職留任四十六年充會試正總裁復充殿試讀卷官四十七年轉吏部左侍郎四十八年充江南鄉試正考官旋授江蘇學政四十九年上南巡賜詩曰江浙均爲文物鄉

非鴻博此任難當雖然尙藻豈其韙必也窮經以是囊雅正清真茲已解抹塗剗襲亦應防士風淳則民風順敦化寧云虛飾庠五十年四月奏提督藍元枚咨營屬武生陳南圖滋事誤操汰革名糧交學收管查武生在營滋事若准咨回本學是營伍去一惰兵學校增一武劣殊非整飭膠庠之道且恐在營效力之武生等罔知警畏於營伍亦有關係臣卽飭學將該武生斥革請嗣後在營武生遇有過犯准營員徑行按律辦理一而咨學臣斥革殊批此奏是下部議行五十一年十一月任滿旋京召詢賑濟及湖河水勢情形命據實條奏以聞尋奏偏災賑濟請除錢米統用銀兩其銀由藩司印封頒發州縣按戶散給銀在五十萬以上請派近信大臣一員前往查察又湖河水勢全賴以清敵黃訪聞向來洪澤湖蓄水刷沙足資抵禦近年黃水過強湖身日漸淤高有昔如釜今如盤之說請酌加疏濬諭曰據謝墉奏賑濟暨水勢情形一摺朕詳加披閱內有礙難施行者如所稱賑濟除去錢米統用銀兩按照戶口定爲一次給發等語自古救荒本無善策惟平時於常社倉詳悉講求務期積貯充盈以備歉收賑卹之用蓋荒歲收成失望米糧價值自必昂貴小民嗷嗷待哺非散給米穀不足以充飢腹朕軫念窮黎每遇

各省奏報偏災不惜千百萬帑金加恩賑卹仍恐各該省倉貯不敷給賑屢經降旨截留漕糧并諭各該督撫於鄰近豐收省分設法採買糧石運往災區源源接濟所以籌畫民食者無微不至而銀米兼放原屬不得已之計如謝墉所言除去錢米統用銀兩則小民計口給銀所得無幾勢必不能於穀貴之時市易升斗以資養贍且災歉之區米難購運是名爲賑饑而於小民生計轉無裨益又所稱賑銀在五十萬兩以上者請派近信大臣一員前往查察等語地方辦理賑務原難保不肖官吏侵漁中飽惟在督撫司道督飭所屬層層周密稽查自不致滋生弊端若再簡派大臣前往該督撫皆不可信矣如果派往之人公正實心於事不爲無益而一省州縣鄉村亦必不能分身周歷設其人於外省情形不能熟悉徒生枝節轉致掣肘紛更甚或扶同瞻徇一味模稜地方官徒增酬應之煩而於賑務究不能查出弊竇是簡派大臣仍屬有名無實此皆揆之事理斷難准行其餘所言或有可採仍著大學士九卿詳議具奏五十二年三月諭曰據謝墉條奏洪澤湖淤墊日高前之如釜者今已如盤請加疏濬一摺經大學士九卿議駁在案茲李世傑等奏洪澤湖水下注清口暢出因將原摺交與謝墉閱看據稱本未諳悉

河工前年在江蘇接見汪兆棠言及洪澤湖日漸淤高是以據傳說之言具奏本年汪兆棠陛見來京復與講論仍如前說等語前年湖水甚少清口不能暢出朕屢訓諭籌畫以期濟運禦黃仍卽以盈虛消息事理之常慮及必有盛漲之時亦預行諭飭該督等加意防範上年湖水大漲果不出朕之所料是上年清水短少實是意中所知謝墉既未親至其地目擊情形何以率行入告見在洪澤湖水勢日長清口暢出已非如盤之明驗謝墉復稱得之汪兆棠所言而本年汪兆棠來京陛見經朕面詢該處情形亦奏稱清水暢順並未有淤墊如盤之說謝墉身爲卿貳汪兆棠究係司員體制所關自不值令其來京面爲質對但謝墉既有此說不可不詳加覈辦著該侍郎自行前往洪澤湖會同李世傑等周圍履勘測量湖中淺深實在有無淤墊秉公據實具奏墉往勘知所奏錯誤同督臣李世傑等會摺覆奏自請議處諭曰據謝墉李世傑等奏會勘洪澤湖水勢深至八九丈及十丈不等淺者亦在一二丈之間實無淤墊謝墉前此未經身履其地乃以傳聞不實之言率行陳奏懇交都察院議處等語洪澤湖水前年因上游河南安徽等省雨澤稀少淮流未能暢發以致湖中存水較少當今諭令畢沅前往桐柏山疏濬

淮源虔誠祈禱上年朕卽以盈虛消息事理之常淮水必盛漲發令該督加意預防自去年以來湖水充裕自由河神默佑來源旺盛得資濟運謝墉所奏乃係前年水短情形且治河如聚訟原無定論該侍郎得自傳聞據以入告尙非無因茲旣勘明水勢深通並無淤墊所有自請議處之處著加恩寬免五十三年七月諭曰本年三四月閒據阿桂奏外閒傳有謝墉抽身便討吳玉綸倒口卽吞之語朕卽以阿桂若僅奏謝墉聲譽不好伊二人前在吏部時原有齟齬而吳玉綸則並無芥蒂其言似非無據學政爲掄才所關旣聞有舞弊營私情事安得置之不辦隨降旨令李侍堯閔鶚元各將謝墉吳玉綸在任聲名究竟如何之處就近訪查據實具奏旋據閔鶚元奏謝墉初任江蘇學政聲名實屬平常其復任時尙知悔過頗爲謹飭而李侍堯則稱吳玉綸在學政任內聲名狼籍至今閩省士子猶懷忿恨上年因吳玉綸條奏科場該省之人無不傳爲笑柄以吳玉綸卽係作弊之人如何亦說防弊但事隔年久實無憑據等語適吳玉綸在熱河扈從隨卽面加詢問據稱因伊曾條奏西監應行補捐一事是以爲衆所怨昨謝墉帶領引見來至熱河亦面加詢問據奏伊因考試過嚴未免取怨於人及詰問以因何有抽身

倒口之語伊二人則皆奏係寄園寄所寄小說所載陳言想係怨之者因而附會等語辦理科場本當嚴密如果恪遵成法自矢潔清士心正當翦服卽或有被遺之人爲之散播謠言亦何至憎茲多口至吳玉綸條奏捐監係四十六年之事而其簡放福建學政已在四十八年以後相隔甚久尤爲兩不相涉若云出自寄園寄所寄則古今書籍所載陳言甚多何以不取而附會他人獨於謝墉吳玉綸二人曲加附會不謀而合但此事既經閱鶚元李侍堯就近查奏并非無因卽將伊二人革職交刑部審訊治罪亦不爲過姑念阿桂所奏究係傳聞而李侍堯等亦皆因事隔年久查無確據朕從來不爲已甚何必遽興大獄但伊二人俱係大員朕特簡學政乃聲名如此平常朕甚愧焉謝墉吳玉綸何以復勝卿貳之任均著降爲內閣學士其職不過專司批本并無應辦緊要之件伊二人學問尙可是以特予從寬降補此皆朕格外矜全伊二人務當痛自愧悔勉爲湔濯如再不知悛改必加倍重治其罪五十四年京察上以謝墉聲名平常交部議處部議革職奉旨謝墉學問較優在上書房行走多年革職從寬留任三月上書房行走曠班諭曰謝墉在學政任內聲名平常本係獲罪之人前京察議處時吏部議以革職念

其學問尙優是以從寬留任仍令在上書房行走伊更當知過感奮乃仍復儉安七日不到更屬有乖職守著降爲編修不必復在上書房行走著在武英殿修書處效力贖罪五十六年命仍直上書房六十年正月得旨謝墉年力就衰著以原品休致四月卒嘉慶五年二月諭曰原任侍郎謝墉在上書房行走有年勤慎供職朕自幼誦習經史係原任侍郎加太師銜奉寬授讀及長而肄業習詩文蒙皇考特派謝墉講論頗資其益茲因謝墉在學政任內聲名平常是以皇考將伊降爲編修但念謝墉究係內廷舊臣學問優長且在上書房供職時并無過失著加恩追贈三品卿銜該部照例給予卹典以示朕眷念施恩至意並賜祭葬如例子恭銘乾隆五十二年進士改庶吉士散館歸班呈請改補八品京官嘉慶五年九月諭曰本日謝墉之子恭銘前來行在接駕例應選補國子監學正學錄及司務等官但念謝墉在上書房授讀有年伊子謝恭銘著加恩以內閣中書補用三子錫楨由考職主簿充四庫館續辦三分全書總校乾隆五十二年欽賜舉人嘉慶三年七月遵川楚例捐納雙月郎中五年四月在實錄館行走七年十二月高宗純皇帝實錄書成議敘以本職卽用八年十一月銓授戶部山西司郎中

錢載

錢載浙江秀水人乾隆十七年進士改庶吉士十九年散館授編修二十二年三月充會試同考官二十三年三月大考二等七月充功臣館纂修十二月署日講起居注官二十四年五月充廣西鄉試正考官二十五年三月充會試同考官七月命以原銜充日講起居注官十月充續文獻通考纂修官十一月遷右春坊右中允二十六年五月遷侍讀八月擢右春坊右庶子三十年閏二月擢侍讀學士六月充江南鄉試副考官三十一年三月充會試同考官十月擢詹事府少詹事三十三年四月以開送試差贊善路斯道年力就衰上責其瞻徇情而交部議處尋降二級調用得旨革職從寬留任十一月稽查左翼宗學十二月擢詹事府詹事三十六年十月充武殿試讀卷官三十八年十月擢內閣學士三十九年六月充江西鄉試正考官四十年七月入直上書房十月充武殿試正考官四十一年五月提督山東學政四十二年差滿命仍在上書房行走四十三年六月教習庶吉士十月充武殿試讀卷官四十四年六月充江西鄉試正考官四十五年正月奉命祭告陝西四川嶽瀆及歷代帝王陵三月擢禮部左侍郎六月充江南鄉試

正考官十一月諭曰江南省第一名顧問卷頭場四書文三篇純用排偶於文體有乖錢載著交部議處部議降二級留任十二月奏考證堯陵應在平陽不應在濮州經大學士九卿議駁載又具摺奏辨諭曰前據錢載奏考證堯陵應在平陽不應在濮州經大學士九卿議駁該侍郎又具摺奏辨朕因復交原議大臣再議經大學士九卿等奏請將該侍郎所奏濮州屬虛平陽屬實之處仍毋庸議已降旨依議矣經生論古反覆辨證原所不禁但既形之奏牘並經廷臣集議卽不當再執成見況該侍郎奏稱呂不韋門下客浮說之譌夫呂不韋卽不足取亦尙不可以人廢言況其門下客所著之書所謂懸之國門千金不能易一字者豈能謂之不足據乎且其時去古未遠或尙有所承述今乃欲以數千年後虛揣之詞遽行翻駁有是理乎至其覆奏大要以酈道元水經注證濮州堯陵之虛不知水經注所稱今咸陽西有堯陵者實道元當時所親見該侍郎轉據爲辨誣尤屬自相矛盾至其覆奏內有原奏祇辨堯陵之有無未嘗敢一字涉及改祀之語該侍郎兩次具摺之意旣欲考證虛實卽爲改祀起見否則又何用如此喋喋爲耶錢載本係晚達且其事祇是考古是以不加深究若遇朝廷政治亦似此嘵嘵不已朕

必重治其罪卽如明季諸臣每因遇事紛呶盈廷聚訟假公濟私始則各成門戶繼且分樹黨援以致無益於國政而國事日非不可不引爲炯戒著傳旨申飭四十六年禮部恭擬壬寅年正月祀祈穀壇日用次辛上訓飭之下部議應革職加恩寬免詳曹秀先傳二月充會試知貢舉四十七年四月常雩以懸鐙及更衣幄次陳設不備奉旨交部嚴加議處部議革任得旨寬免詳德保傳四十八年三月休致五十八年卒孫昌齡己未科進士改庶吉士見任編修

阿肅

阿肅滿洲鑲白旗人姓伊爾根覺羅氏乾隆十九年進士改庶吉士二十五年散館授檢討二十六年遷司經局洗馬二十八年大考四等仍降檢討二十九年遷侍讀三十年充日講起居注官七月充山西鄉試正考官三十一年三月充會試同考官三十二年四月擢詹事府詹事三十三年四月開送試差贊善路斯道年力衰邁上以其瞻徇交部議處部議降二級調用得旨改爲革職留任九月命提督福建學政三十四年五月失察古田劣生鍾超倫等滋事部議革任諭從寬免其革職仍註冊三十五年九月請復原名考試之例疏稱舊例凡舉貢生監犯事

情罪較輕斥革後能改過自新准其原名應試令地方官查明申送提學卽准收考誠恐州縣官吏冒濫申詳難保無弊請嗣後該州縣官於結案時申明通詳督撫學政藩臬批飭存查方准收考其未經通詳批准者不得徑詳學政收考庶有稽查下部議駁諭曰部駁甚是依議阿肅係滿洲翰林初授以學政之任理應實心辦事整飭士習今所奏緣事斥革舉貢生監原名應試名爲嚴覈而意欲從寬多爲收考地步若伊不諳成例此奏出於旁人慫恿則是爲人所愚不應糊塗至此若阿肅冀以此奏取悅於衆則有意沽名尤爲不合著交部議處部議革任十一月諭曰前據阿肅條奏緣事斥革之舉貢生監於結案時詳報學政預爲收考地步殊乖整飭士習之意降旨交部議處今經部議降一級調用阿肅係革職留任又革任註冊之員無級可降請卽行革任覈其情罪尙可不致褫職而學政則不宜復留著加恩以詹事降一級來京候旨其從前革任註冊之案補官日一並帶於新任三十八年九月奉上諭阿肅遇有侍講缺出卽行補用並著在日講起居注官上額外行走三十九年三月命在上書房行走四月授光祿寺卿十月擢都察院左副都御史四十年三月充會試副考官四十一年五月遷禮部右侍郎

十一月兼署兵部侍郎四十二年八月充順天鄉試副考官四十五年五月兼公中佐領十一月調吏部侍郎四十八年正月初七日阿肅家夜演影戲乳婦王朱氏乘閒謀害阿肅幼子經軍機大臣會同審擬具奏諭曰軍機大臣會同刑部審擬吏部侍郎阿肅家乳婦王朱氏謀害伊子一案供詞內有正月初七日二更時合家俱聽影戲之語朕以是日係齋戒且值忌辰阿肅家不應演唱影戲指出詢問隨據軍機大臣奏請將阿肅交都察院嚴加議處等因本年新正初二三日即逢時享齋戒之期朕雖未親詣行禮值齋戒日內並不聽演音樂初五日方始幸豐澤園筵宴外藩阿肅身爲侍郎豈有不知乃竟於齋戒日期內伊雖在外聽任家中演唱影戲卽據稱爲娛侍伊母亦豈不可稍緩數日至元宵令節耶阿肅乃滿洲侍郎出身何至不知體制昏憤若此且本日召見阿肅詢及此事並加慰問云伊子垂死而得活將來或尙可能成器伊竟毫無感恩惶悚之意竟同木偶看來阿肅全係濡染習氣非無心過誤可比阿肅著交部嚴加議處旋議革職諭曰阿肅係滿洲侍郎於齋戒忌辰之期聽任家中演戲非尋常錯誤可比著革去侍郎第念在上書房行走尙屬勤慎加恩賞給翰林院侍讀學士在上書房行走兼

公中佐領四十九年充封朝鮮國王世子副使五十年擢內閣學士兼禮部侍郎充文淵閣直閣事五十一年八月充順天鄉試副考官五十四年因上書房曠班命褫阿肅職仍在上書房效力行走旋授光祿寺少卿五十七年卒子富連候補筆帖式

陸錫熊

陸錫熊江蘇上海人乾隆二十六年進士歸班銓選二十七年聖駕南巡召試一等授內閣中書二十八年補缺三十年充山西鄉試副考官三十三年四月京察一等加一級六月充浙江鄉試副考官十二月擢宗人府主事三十五年充廣東鄉試正考官三十六年三月充會試同考官五月擢刑部員外郎是年恭遇覃恩加一級三十七年三月充會試同考官十月擢本部郎中會開四庫全書館命司總纂三十八年八月諭曰辦理四庫全書處將永樂大典內檢出各書陸續進呈朕親加批閱開予題評見其考訂分排俱有條理而撰述提要粲然可觀則成於陸錫熊紀昀之手二人學問本優校書亦極勤勉紀昀曾任學士陸錫熊見任郎中均著授爲翰林院侍讀十二月補缺四十年二月擢右春坊右庶子旋授翰林

院侍讀學士閏十月充日講起居注官四十一年充文淵閣直閣事是年恭遇覃恩加一級四十二年四月京察屆期王大臣等驗看引見奉旨准其一等四十二年議敘四庫館纂辦諸臣奉旨陸錫熊等雖已加恩擢用但纂辦各書均爲出力著賞給緞匹筆紙墨硯以示獎勵四十五年五月京察屆期王大臣等驗看引見奉旨准其一等諭以應升之缺題奏六月授光祿寺卿八月命稽察右翼覺羅學是年恭遇覃恩加一級四十六年四月諭曰四庫全書總目提要見已告竣呈覽頗爲詳覈所有總纂官紀昀陸錫熊著交部從優議敘部議加一級紀錄三次四十七年五月轉大理寺卿七月撰四庫全書表文進呈得旨獎賚十月因四庫館進呈原任檢討毛奇齡所撰詩說一書內有字句違礙總纂官未經簽改得旨交部議處部議降調諭從寬留任四十八年十二月丁母憂五十年四庫全書告成議敘加一級紀錄二次五十一年六月服闋補光祿寺卿九月提督福建學政五十二年二月遷都察院左副都御史留學政任三月四庫全書處呈續繕三分內有李清所撰諸史異同一書語多妄誕總纂官未經掣燬命交部嚴加議處部議革職得旨改爲革職留任八年無過方准開復六月諭曰前因熱河文津閣所貯

四庫全書朕偶加批閱其中錯謬甚多因派扈從之阿哥及軍機大臣等復加詳閱並令在京之阿哥及大學士九卿等將文淵文源二閣所貯書籍一體校閱今據和珅等閱看各處譌舛不一而足此內閣若璩尙書古文疏證一書有引李清錢謙益諸說未經刪削並黃庭堅詩集注有連篇累葉空白未填者實屬草率已極著將承辦之總校分校官交部議處見據紀昀奏請將尙書古文疏證內各條遵照刪改陸續賠寫並請將文源閣所貯明季國初史部集部及子部之小說雜記諸書自認通行校看凡有違礙卽行修改仍知會文淵文津二閣詳校官畫一辦理再行賠寫抽換務期完善等語從前辦理四庫全書係總纂紀昀陸錫熊專司其事朕因該員等纂輯訂正著有微勞不次超擢數年之間晉階卿貳乃所辦書籍竟如此荒謬舛錯如果從前繕寫時謄錄率意脫落遺漏自不難將已邀議敘見任民社各員斥革治罪但此等譌謬該謄錄等惟知照本繕寫例不考訂改正而纂校各員則係有專司考訂之責自必未經寓目該員所辦何事其咎實無可道今紀昀自認通行覆閱明末各書復請將看出應換篇葉自行賠寫交部議處而陸錫熊則因見出學差轉得置身局外是使紀昀一人獨當其咎轉令見在

派出之大小各員分任其勞不足以昭平允著將文淵文源文津三閣書籍所有應行換寫篇葉及裝訂窆改各工價均令紀昀陸錫熊二人一體分賠五十三年二月因上年福建甄別教職數目過少下部議處部議革任得旨寬免仍注册五十五年正月任滿回京奏請前往盛京詳校文溯閣書籍九月奏所有書籍業經分閱各員全數校畢覆行覈簽亦已竣事其中錯落偏謬各書隨時繕寫改正此外漏寫錯寫應行另繕之本俱即自行賠寫完妥報聞是年恭遇覃恩開復降革處分五十六年二月命稽察左翼宗學十二月奏全書卷帙繁富屢校即屢有改正文淵文源兩閣經紀昀等覆校中間缺落舛譌尙多所有文溯閣全書亦應一體覆加詳覈俾得益增完善一交新春臣即起程赴盛京覈辦報聞五十七年抵奉天省城旋卒

海蘭察

海蘭察滿洲鑲黃旗人姓多拉爾世居黑龍江乾隆二十年以索倫馬甲從征準噶爾初輝特台吉巴雅爾來降既受封繼從阿睦爾撒納爲逆大兵追急遁入塔爾巴哈臺山中海蘭察奮力窮追射之墜馬生擒以歸敘功賞額爾克巴圖魯號

擢二等侍衛尋遷頭等侍衛命在乾清門行走授職騎都尉加一雲騎尉繪像紫光閣御製贊曰烈風掃枯迅其奚難亦賴衆傑摧敵攻堅於塔巴臺射巴雅爾是其偉績勇鮮倫比二十五年命歸入滿洲鑲黃旗三十二年五月隨征緬甸十二月大兵出虎踞門海蘭察率輕騎先驅至罕塔遇賊射斃三擒七遂薄老官屯斬級二百又設伏殲賊四百賊襲營援卻之次年十二月師出萬仞關敗賊於曼鳩江三十四年授鑲藍旗蒙古副都統是年十月大兵復薄老官屯攻賊於錫箔毀其木柵賊謀劫左哨急擊之追戮其大半生縛兩人歸明年撤兵命與總兵哈國興留防邊隘三十六年調鑲白旗蒙古副都統會大兵征金川命由滇赴西路軍營三十七年六月參贊大臣豐昇額攻美寨海蘭察至合力奮擊克之進剿瑪爾迪克七月敗賊於策卜丹八月賊於貢噶山左思繞截糧餉海蘭察馳禦斬級百十月攻路頂宗及喀木色爾獲卡寨五十碉三百殲賊數百得旨嘉獎擢正紅旗蒙古都統又從色木僧格山前進至格實迪十一月從山後奪取瑪覺烏大寨仰撲布喇克及扎喀爾寨得碉卡九十十二月進逼明郭宗突入寨門焚其轉經樓直擣美諾小金川平得旨授參贊大臣時大兵分三路進剿金川海蘭察隨將軍

溫福由功噶爾拉入三十八年二月趨昔嶺道經蘇克奈奪卡二與領隊大臣額森特會又奪碉卡五鑿冰開路一日抵木果木與昔嶺接昔嶺多賊碉其扼要大碉十三月海蘭察與額森特分攻第九第十碉往來冰雪中力戰克之佯撤兵賊衆下追伏起殪二百人上以官兵不避槍石海蘭察尤爲奮勇命交部優敘加三級第五碉尤堅厚海蘭察晝夜連礮轟擊殲賊甚多碉隨破閏三月移攻達扎克角山四月由達扎克角山梁奪獲得斯東寨隨攻大木柵賊屢從旁抄截力戰禦之時奉諭指示地圖海蘭察復往攻功噶爾拉山口多斬獲五月仍攻昔嶺賊巢造礮臺與賊峰等痛殲賊衆上嘉之六月初七日後路賊陷底木達占據附近登春碉寨海蘭察馳禦賊退正據要地嚴守聞大營報警疾趨木果不至則將軍令撤昔嶺兵初十日大營陷海蘭察令領隊大臣富興整兵出自殿後夜半至功噶爾拉牛天界營令撤功噶爾拉兵十一日率所撤兵令額森特等開路自與富興普爾普牛天界殿是夕屯崇德十二日至美諾與領隊博清額五岱和隆武合固守美諾巴朗地方隨開通副將軍阿桂後路馳奏請罪諭曰此時海蘭察已與劉秉恬富勒渾會合一處惟當示以鎮靜卽將美諾至明郭宗一帶辦理周密其餘

各緊要處應開通者迅速開通應剿殺者盡力剿殺總須占住小金川鄂克什地方整頓兵衆鼓勵士氣以期另辦阿桂聞賊猖獗自必統領大兵撤回殺賊祇須阿桂與海蘭察等會合大局卽定時留五岱共守美諾賊屢衝突均戰退大營撤出綠營兵多潰散海蘭察請遣回怯卒免搖亂新兵奏入上韙其言海蘭察探知南路兵尙屯僧格宗阿桂方駐營當功噶爾拉分兵千令額森特由南山往迎又令普爾普以三百兵邏巡鄂克什諸隘口上以海蘭察駐扎美諾清釐地方剿殺賊衆辦理接續臺站事務皆合機宜褒獎之七月美諾明郭宗俱失守海蘭察退保日隆上責其駐守美諾不能設法禦賊遽至失守原不能無罪若更有率先奔逃之事著阿桂至日隆時訊明據實參奏定罪八月阿桂抵日隆奏海蘭察當兵潰時尙能前後攔截並未偕懦卒潰竄惟平日不能申明軍律咎實難辭疏入得旨革去參贊降爲領隊大臣仍革職留任其本任養廉及應得分例不准支給俟另有奮勉出力處再予開復是月命阿桂爲定西將軍分道再舉海蘭察偕領隊常青普爾普保寧等帶兵八千由達木巴宗北山取道分三路進將斯達克拉阿噶爾布里碩藏噶爾山梁同時占據十一月至色布色爾仍分三路下壓奪別斯

滿大小十餘寨又同富興等將帛噶爾角克底木達布朗郭宗等寨先後攻獲大兵復據美諾上以海蘭察奮勉可嘉所有革職留任之案准其開復本任應得養廉分例並著照舊支給三十九年正月阿桂分隊三海蘭察領第一隊自明郭宗進谷噶山發槍斃賊哨又與保寧帶兵二千由喇穆喇穆橫梁繞八十餘里攻最高之登古山取之登古山對峙日羅博瓦山亦賊中奇險處二月普爾普順山梁進海蘭察繞出山後由石罅躍登賊憑高下壓海蘭察正鏖戰額森特保寧至合力迎擊賊少卻復分隊冒死衝突立殪數十人餘負矢遁乃還取羅博瓦前山逼第三第四峰應弦斃賊額森特攻第二峰普爾普攻第一峰俱克之上以羅博瓦爲賊險要門戶攻取時海蘭察尤出力授爲內大臣三月從第四峰下搶石卡三殲賊百隨攻克得斯東寨四月與阿桂議從日爾巴當噶繞截喇穆喇穆後路賊乘雨霧於山坡立兩碉海蘭察率兵毀之五月於喇穆喇穆後山助領隊烏什哈達築柵賊屢從林箐來犯偕額森特合擊賊披靡六月攻色溯普賊設大碉六左右應援額森特克左兩碉烏什哈達克右一碉海蘭察獨克中三碉及附近平寨七月抵色溯普南崖石壁陡滑官兵手足攀援上將東西峰碉寨賊剿殺殆盡又

從喇穆喇穆山麓乘勝攻日則丫口取戰礮數十平礮百木城五石卡五十上以海蘭察不避險隘每攻必克尤爲超軼出羣下部優敘加三級時賊堅守該布達什諾木城海蘭察繞至山溝左額森特從山溝右抄截與領隊官達色中路兵並捷遂進圍遜克爾宗諭曰海蘭察倡率官兵攻奪險要木城礮卡痛殺賊人洵屬超衆前給額爾克巴圖魯今改賞綽爾和羅科巴圖魯名號并賞銀三百兩現大兵已圍遜克爾宗其益加奮勉迅奏膚功八月從遜克爾宗峰脊偕額森特等分左右上攻登礮頂縱火焚其寨落風大作火熾燬平房礮卡二百餘又旁抄遜克爾宗西直逼賊寨官兵踴躍有豎梯上者有鑿牆進者有從缺處躍入者賊穴地匿不敢出得旨嘉獎九月取遜克爾宗水礮斷其汲道乘勢攻官寨賊槍石如雨海蘭察左頰傷時額森特已取遜克爾宗右第一寨海蘭察帶兵逼第二寨下躍入剿殺殆盡諭曰海蘭察傷甫平復仍帶兵攻奪堅礮尤堪嘉獎著阿桂記册俟攻得勒烏圍一并議敘十月據默格爾山梁及密拉噶拉木克大寨一石礮四山後爲凱立葉官寨亦乘勢取之復授爲參贊大臣又從默格爾西帶兵下壓布拉克森進攻格斯巴爾焚寨落數百又與領隊烏什哈達等取達爾扎克寨凱立葉

附近碉卡淨盡諭曰參贊海蘭察屢經奮勉超羣此次破碉殲賊亦屬出力海蘭察著在御前侍衛上行走十一月夜度山溝進格魯克古丫口崖谷壁立天明官兵登者六百賊并力拒奪二碉壓至桑噶斯瑪特卽從陡烏當噶山進克沙木拉渠什爾得等寨復督兵攻克革什戎岡及作固頂賊寨橫越山溝山梁直壓河岸獲戰碉寨落不計數遂與丹壩官兵合上嘉其功下部優敘加三級十二月抵桑噶斯瑪特山賊於碉外設木城遮護官兵從柵縫射入或拔柵木擊之毀其城殺賊數十乘勢攻戰碉殲斃尤衆四十年正月從康薩爾分路進剿取大碉九石卡十五並據山溝碉寨二月克甲爾納寨并取沿河斯莫思達大碉木城石卡三月攻勒吉爾博寨海蘭察克山麓碉二賊從噶爾丹寺來援擊敗之四月將軍阿桂派往宜喜會同明亮察看進兵路徑約期會攻上以海蘭察往來相度深合機宜賞大緞二隨分兵千偕福康安赴宜喜先取甲索賊碉進攻得楞山岡均克之又焚薩克薩谷大小寨落數百西北兩路兵合五月攻下巴木通大碉二海蘭察冒槍石扳開木城克之乘勢將色爾外安吉達佳布等寨攻獲直抵噶爾丹寺焚之有旨嘉將軍參贊調度有方六月從榮噶爾博山梁攻巴占寨落賊恃險拒連攻

未克七月議從舍圖枉卡繞截海蘭察督兵進遂據昆色爾山梁並果克多戰礮攻獲進至拉枯喇嘛寺及舊則大海又攻章噶大礮克之合諸路兵壓勒烏圍賊巢海蘭察從托古魯踰溝直上山梁八月取隆斯得寨三并分地設伏夜半遂克勒烏圍命交部優敘加三級九月整兵直攻噶拉依初從達思里正路入恐賊豫防改從達烏達圍進海蘭察繞至莫魯古上連奪噶克底綽爾丹等寨又克西里山梁並科布曲諸礮十月攻達噶從中路入令兩翼兵從旁抄越克兩堅礮下壓雅瑪朋寨閏十月據黃草坪官兵築柵斷賊援賊又起木城一海蘭察帶兵潛繞木城自上壓下克之諭曰海蘭察每遇攻礮奪隘俱率衆先登所至克捷功績尤爲超衆將來奏凱策勛必當格外加恩優錫海蘭察亦當努力爲之十一月分路攻奔布魯木乘夜潛抵山峰下焚賊木城官兵擁上賊潰遂據西里正寨議敘加一級又克舍勒固租魯寨四進攻雅瑪朋正寨從中路設伏偕普爾普等盡占附近寨落十二月克勒隈勒木通石礮築柵至科布曲海蘭察冒槍石進殲賊甚衆乘勝克索隆古得木巴爾們都斯等寨上以參贊等勞績多下部優敘加三級賊又於布哈爾下積木潛伏迎拒官兵海蘭察分兵三路並進立時攻開遂取奇石

磯又派兵將庫爾納額木里多各寨及巴斯科官寨剿盡優敘加三級四十一年正月克舍齊雍中兩寺海蘭察先至扼噶拉依河岸尋偕福康安普爾普等截噶拉依右奪獲大石卡移礮進轟官寨二月逆酋索諾木同衆頭日出寨就縛金川平有旨封海蘭察爲一等超勇侯賞戴雙眼花翎凱旋上幸良鄉城南行郊勞禮賜御用鞍轡馬一御紫光閣飲至賞緞二十端銀千兩閣上繪像列前五十功臣御製贊曰射巴雅爾超授侍衛洊至都統參畫軍計堅礪險砦無不克登勇而有謀封侯實應四十三年授領侍衛內大臣四十五年補公中佐領四十六年三月甘肅撒拉爾回匪蘇四十三爭立新教聚衆破河州據華林山屢犯蘭州城海蘭察奉命馳驛往四月抵蘭州率兵剿龍尾山奮擊之賊伏穴中死守時大學士公阿桂至令海蘭察總理營務五月偕明亮額森特等分左右翼上撲賊遁海蘭察射斃多賊復從龍尾山踰溝猝上華林山賊駭傾穴出佯退賊率衆來追還兵擊之賊不敢近閏五月率阿拉山馬兵繞華林山西南潛伏突出壕截賊殲之又率屯練兵取賊卡四棄馬步戰受槍傷上憫其勞諭阿桂撫慰之賊堅守爲負嵎計海蘭察單騎至五泉山審度賊情還向華林溝暫伏偵賊歸巢急起疾攻遂克之

頒賜嘉獎六月入賊營焚其帳房板屋賊退保華林寺官兵逼寺立柵盡殲賊衆以賊渠首級傳示各回民賊平諭曰此次剿滅撒拉爾賊匪海蘭察甚爲奮勉著將伊子安祿授爲三等侍衛以示鼓勵四十九年四月甘肅逆回復私起新教聚衆滋事上命海蘭察馳驛往五月授爲參贊大臣同尙書福康安等會剿時賊屯底店海蘭察帶巴圖魯侍衛等潛探賊徑遇賊迎擊之尋分兵進剿賊敗遁殲賊百六月由雙峴小路至賊巢周視地勢立卡進逼七月圍急賊思撲卡竄海蘭察豫伏於隘痛殲之遂破石峰堡擒賊魁張文慶等得旨擢其子安祿爲二等侍衛在乾清門行走又賜騎都尉世職卽以安祿襲五十年十二月賜紫禁城騎馬五十二年臺灣居民林爽文圍嘉義縣七月命海蘭察爲參贊大臣偕將軍福康安往剿十月渡鹿仔港登岸後三日率巴圖魯二十人至彰化縣之八卦山視地形見彼於山上築卡躍馬先登敵擁至發箭殪數人餘驚遁上以海蘭察甫抵臺灣卽能用少擊衆諭獎之十一月由笨港開通道路同福康安援嘉義分隊五沿途搜剿由崙仔頂崙仔尾運至牛稠山敵萬餘阻溪固守海蘭察越溪搶上山梁攻克敵柵乃遁追至大排竹盡焚穴巢抵縣城圍解諭曰海蘭察前在金川屢著勞

績今復身先士卒攻透重圍又帶兵出城往來剿殺實屬勇略過人應晉封公爵賞給紅寶石頂四團龍補褂用旌勳績海蘭察係索倫人屢立功勛疊加拔擢今特被殊恩異寵亦足令該處人員共知鼓勵尋授爲二等超勇公十二月剿城西大崙莊及海岸若輩焚城東興化店及員林穴巢督兵直剿北路時其屯中林尤剽悍海蘭察冒槍石馳殺克之其大埔林大埔尾等羽衆俱潰收復斗六門抵水沙連林已遁尋蹤搜捕飛箭中乘馬執旗羽衆生擒之直攻大里杙巢殲羽目數十羽黨二百爲首逃入番社卽由內山平林仔搜至集集埔等砦前阻大溪海蘭察策馬逕渡洗其砦追十餘里至浩淮角焚草窠千又剿小半天山巢寨海蘭察親巡邊界從東勢角山峰轉出獅子頭打鐵窠及鰕骨合歡諸社至極北之炭窠搜獲林等餘黨五十三年正月生擒爲首林爽文於老衢崎俘獻京師上念海蘭察功親解佩囊賜之二月兵至南路由灣裏社剿大穆降水底窠等處餘黨追至極南之瑯嶠白山梁排隊抵海岸執兇渠莊大田礮於市臺灣平諭曰海蘭察屢次督兵甚爲奮勇而籌辦一切俱能井井有條著再加賞紫韁併金黃辮珊瑚朝珠用示優異又命於臺灣郡城及嘉義縣並建福康安海蘭察等生祠塑像又繪

二十功臣像於紫光閣御製贊曰勇弗知書謀勝智士匹馬彎弓賊不敢視欲致活口射令勿死進爵錫服言難盡美五十六年廓爾喀賊匪滋擾後藏十一月上仍以福康安爲將軍海蘭察爲參贊率巴圖魯侍衛及索倫兵千往征之十二月自西寧出口五十七年三月抵後藏四月馳赴拉子催趲糧運閏四月抵第哩浪古與福康安分往絨轄聶拉木詳察地勢定計由濟隴進兵遣四隊乘夜進海蘭察偕阿滿泰等由中路仰攻黎明奪賊前碉賊守後碉不出官兵毀旁垣入短兵接殺賊目三賊兵二百生擒十餘人乘勝抵瑪噶爾轄爾甲山梁山下有紅旗賊目率賊蜂擁上我兵暫伏至山半橫衝賊陣奪旗殺賊賊且戰且退海蘭察疾馳下迎頭截擊凡殺賊目七賊二百餘生擒三十海蘭察馬足中槍經福康安奏入諭曰海蘭察與賊接戰馬匹受傷幸未顛蹶實賴上天護佑爲之額手虔謝特賞給行幸常佩護身佛一尊以爲諸事吉祥佳兆海蘭察臨陣勇往是其素性但身爲參贊所關甚重以後接仗時固當督率士卒鼓銳直前然究宜加意持重不可輕於冒險此必當謹遵訓誨也時進攻濟隴官寨海蘭察與台斐英阿督索倫騎兵往來衝擊自丑至亥克之斬級六百生擒二百頒賜嘉獎由濟隴進至索喇拉

山下有石卡大軍直前賊棄卡奔追至熱索橋賊急撤橋攻之不及因竄退密令阿滿泰等東越峨綠山從上流潛渡轉撲橋卡賊駭墜河者甚衆正路官兵乘勢渡遂據熱索橋進至密哩頂越崇山數重抵旺噶爾深入百七十里不見賊旺噶爾西南橫亘一河河岸北名旺堆南名協布魯克嗎迤東爲克堆寨賊各築卡拒守大兵至旺堆賊扼河抵禦不得渡仍留兵牽綴密從上游縛木渡直薄克堆寨出賊不意大敗之旺堆正路兵亦濟六月督兵自協布魯由噶多東南越雅爾賽拉山晝夜遄行至博爾東拉前山見賊木城三卡七轉從山顛繞壓卡上與阿滿泰上下夾擊拔其城卡乘勝追至瑪木拉殺伏賊百餘人上嘉之交部議敘加一級結營雍雅山賊酋具稟乞降斥之七月進攻噶勒拉山三路並捷乘勝窮追上堆補木山奪其卡由堆補下山爲帕朗古橫河賊扼橋拒官兵奪橋渡馳上甲爾古拉山賊來擾者往來迎擊皆敗之凡接戰兩日夜越大山二克木城四大小石卡十一奪據大橋一戮賊目十三斃賊六百生擒十七賊酋畏懼乞降有旨許納款班師九月海蘭察晉封一等公五十八年三月卒於家賜諡武壯時十五功臣圖像成御製贊曰勇而有謀侍衛游公索倫巨擘黼衣賜龍圖形四番福祿鮮比

旋終於家矜惜無已又諭曰海蘭察由行伍出身在戎陣多年其接戰次數不可勝記實不愧宣力之臣茲病卒於家非陣亡者比例不入昭忠祠但念軍營奮勉曾受多傷著加恩亦入昭忠祠以示軫念功臣之意子安祿襲公爵嘉慶四年隨征教匪在四川開縣枯草坪地方剿賊陣亡十二月得旨著安祿之子恩特賀莫扎拉芬承襲一等超勇公六年十月卒命安祿之弟三等輕車都尉兼三等待衛安成承襲現任二等待衛

普爾普

普爾普蒙古正黃旗人姓額爾特肯父巴圖濟爾噶勒本額魯特人乾隆十九年以都爾伯特部宰桑來降入正黃旗蒙古隨征四部於和闐立功官都統自有傳普爾普由閒散於二十九年授藍翎侍衛在乾清門行走三十三年正月遷三等侍衛二月隨征緬甸三十六年七月擢御前侍衛尋授公中佐領三十七年九月命領額魯特兵赴金川西路軍營交定邊右副將軍溫福委用十一月大兵攻取達克蘇賊碉普爾普奪據山卡斷賊來路十二月隨參贊大臣豐昇額攻明郭宗賊棄碉遁奉旨溫福一路派普爾普爲領軍侍衛尋偕頭等侍衛巴雅爾攻克明

郭宗南寨賞副都統職銜三十八年正月進攻噶爾拉取道丫口盡占賊番卡寨得旨褒獎三月攻昔嶺偕副都統海蘭察等力戰克要路賊碉二諭曰此次官兵不避槍石盡力攻剿均屬可嘉其中海蘭察額森特巴雅爾烏什哈達普爾普馬全阿爾納素尤爲奮勇出力著交部從優議敘十一月復偕海蘭察等分兵攻斯達克拉阿噶爾布里碩藏噶爾山梁克之尋攻色布色爾山梁擊敗賊番克碉座十餘諭曰羅博瓦爲賊酋緊要捷近門戶屢經阿桂等相機進剿今復將其山峯全行占住殲賊甚多皆由阿桂調度有方將領等奮勇直前海蘭察普爾普額森特等尤爲奮勇故能所向克捷實屬可嘉阿桂著加授太子太保海蘭察授爲內大臣普爾普額森特授爲散秩大臣以示獎勵嗣賊劫副將常祿保營普爾普分兵兩翼進擊賊敗遁五月繞喇穆喇穆賊營後與海蘭察合攻殲賊十餘被傷竄者甚衆六月攻色湖普多斬獲七月攻喇穆喇穆北而潛上山梁賊驚竄高碉固守發礮擊斃甚衆旋攻東面第一賊碉射中紅衣賊目一又攻該布達什諾拔木城二均得賞御用黑狐冠三十九年二月由羅博瓦山梁進見碉外有伏賊殲之三月克羅博瓦第一山峯得旨嘉獎八月賊劫外委王世貴鍾新所守卡普爾普

與二等侍衛副都統職銜烏什哈達往援賊潰奉旨普爾普著給一等功牌一個九月攻遜克爾宗受傷一處十二月攻舍圖旺斷遜克爾宗去路四十年六月攻克占搶修木柵二十六直據榮噶爾博第八峯七月攻章噶偕侍郎台斐英阿土舍爾都拉後山獲寨落二十餘八月攻賊貯鉛藥之隆斯得寨拔之尋偕台斐英阿等攻克勒烏圍賜什勒瑪咳巴圖魯名號閏十月進取阿禳曲強達巴連克大碉三木城四十一月抵西里山峯大兵仰攻賊越碉竄普爾普帶兵追躡多殺傷旋抵舍勒圖租魯克碉一寨二又攻克開布智章賊寨一十二月克薩爾丕及阿結占寨盡據勒隈勒木通及科木曲一帶山梁普爾普斬獲甚多四十一年正月賊退據雍中喇嘛寺大兵分三隊普爾普由右進賊驚竄尋合兵圍噶拉依賊巢同海蘭察等壘卡截其右克之金川平捷聞得旨普爾普著賞給三等男世襲罔替復命圖形紫光閣御製贊曰父是日磬子非弄兒命往剿賊盡力無遺金戈鐵衣冰山雪窖能入能出敵不敢校四月郊勞禮成賜御用鞍轡馬一五月授正紅旗護軍統領六月兼正白旗滿洲副都統七月賞戴雙眼花翎四十二年十月調鑲白旗護軍統領四十三年正月扈蹕謁泰東陵離營住宿經御前大臣福隆安

等奏參奉諭普爾普著革去御前侍衛護軍統領並拔去雙眼花翎加恩在副都統上行走仍罰副都統俸一年五月授管理健銳營大臣六月命在乾清門行走四十六年三月因侍衛瑪達里誤班不行揭參退出乾清門四十九年九月授正白旗護軍統領五十二年八月奉諭授領隊大臣隨將軍福康安赴臺灣剿臺民林爽文十一月大兵由鹿仔港進普爾普由茅港尾剿諸羅至郡城一帶屯聚羽衆十六日遇彼四五千人擊敗之追奔二十餘里殺其三百餘生擒二十餘復帶兵疏通郡城大路奮勇衝殺乃潰奔三功店諸羅縣圍解奉旨從優議敘嗣大兵克斗六門普爾普帶兵沿十四甲山一帶搜剿二十五日大兵克大里杙十二月初四日克集集埔普爾普偕總兵普吉保等攻克草嶺穴巢得旨交部議敘爽文逃小半山頂十八日大兵分三隊普爾普同海蘭察等由前山進林抵死拒山路險惡普爾普率所領廣東兵及屯練降番攀木柵奮勇先登乃潰爽文潛匿裏社埔尾等處普爾普偕普吉保等由內山木柵入於西北面截剿二十四日大兵於要路追殺普爾普由樸仔離東山進徒步穿林箐殺彼無算五十三年正月初四日擒爽文遂進軍瑯嶠追剿羽目莊大田十九日夜忽潛劫營普爾普於大武壠

隘口帶兵衝殺百餘生擒七十餘二十一日由東勢莊往北面內山搜剿二月初二日諭於臺灣郡城及嘉義縣建生祠事見海蘭察傳初五日大田就擒臺灣平奉旨普爾普給予一等功牌四月諭曰此次剿捕臺灣亂民大功迅速完竣其帶兵出力之巴圖魯侍衛等昨已降旨交福康安查明勞績茂著者奏明交部查照功牌酌給世職內鄂輝舒亮普爾普三人俱係大員奮勉出力朕所素知卽著軍機大臣會同該部查明鄂輝等三人節次打仗勞績查照應得功牌酌量議給世職以示酬庸延賞至意尋遵旨議普爾普加一雲騎尉併前所得三等男爲二等男准其承襲一次仍將原得之三等男世襲罔替五十五年三月卒子托布濟圖襲

富勒渾花尙阿

富勒渾滿洲正白旗人瓜爾佳氏由烏槍護軍校於乾隆六十年委署烏槍護軍參領嘉慶五年二月補副烏槍營護軍參領閏四月發往湖北以參將補用隨領隊大臣明亮剿辦青號賊匪七月賊匪竄赴鄖縣總兵孫清元追剿至分水嶺賊由文峪河竄往陝西白河縣境因遇官兵截剿仍由鄖縣鮑家店黃龍灘花果園

等處回竄時明亮繞道截殺行抵房縣富勒渾隨湖南沅州協副將佛凝奉檄帶兵馳往防堵行至花果園遇賊接仗斃賊三百餘人次日後股賊衆繼至佛凝力戰陣亡富勒渾奮勇剿殺復殲賊數十人賊拒戰益力富勒渾身受重傷遂歿於陣時湖北候補都司花尙阿與富勒渾併力轉戰同時陣亡事聞得旨富勒渾花尙阿著照例議卹均廕雲騎尉世職襲次完時各給恩騎尉世襲罔替富勒渾子希蘭都襲花尙阿子烏爾袞保襲花尙阿梅楞氏滿洲正黃旗人

勒爾謹

勒爾謹滿洲鑲白旗人姓宜特墨乾隆十年繙譯進士十五年授刑部主事十八年遷員外郎二十年授直隸天津道二十三年調甘肅寧夏道二十七年調甘肅道三十一年遷山東按察使三十二年疏稱各省府州縣官迎送上司違例遠出請交部嚴議容隱之上司一併議處下部議行三十三年遷陝西布政使三十六年擢陝西巡撫三十七年六月授陝甘總督疏請移西安寧夏滿洲兵各千駐巴里坤撥京兵分補西安寧夏額復奏請由京撥駐涼州滿洲兵千莊浪兵五百移西安副都統一員駐涼州軍機大臣議行八月賞戴孔雀翎三十八年二月疏言

巴里坤兵民子弟赴肅州考試往返四千餘里請歲科兩試考學政按臨肅州前封題發巴里坤道員扁試其武童外場鎮道會考將冊卷封送學臣按額取進並暫令該同知約束俟人文日盛再請設訓導行廩增出貢等事諭曰自平定西陲以來關外耕屯日闢生聚滋繁其秀民並知蒸蒸向化絃誦相聞漸成樂土前已議准辦事大臣所奏於烏魯木齊等處專設學額今巴里坤復請照例取進生童將來人文日盛卽當建置膠庠使遐方文德誕敷聲教廣被實從來所未有惟是該處民居稠密閭井殷繁兼之屬國來王征輶輻輳實爲邊陲一大都會今卽議定學額而原駐僅一同知尙與體制未合自應將巴里坤改設爲府烏魯木齊改爲屬州或將安西府移於巴里坤而改安西爲州並令統隸於邊郡規模尤爲閎遠其應如何定制設官酌予嘉名及建立學校之處著大學士九卿詳悉妥議具奏五月疏陳由京移涼莊官兵事宜一涼州移駐協領二作爲左右翼各管四旗各兼佐領一缺每佐領下防禦驍騎校各一一涼莊舊設兵房甚多請以賃價作賞項一莊浪城守營印信並涼州協領關防由部頒其佐領等圖記仍由本處鐫給一馬兵所需馬從前西安移涼莊兵內有養育兵一項卽裁馬乾糧銀一分三

釐零養贍今由京移駐兵請仍照原額歸入馬乾銀內於錢糧項下分三年扣還
一官兵俸餉糧料舊有科則請照例支給一官兵起程應帶何項軍器聽兵部酌
定一涼莊兩處應設礮十二在涼州鎮存貯礮內撥給一涼莊舊駐官兵三千賞
借銀九千兩除經帶往烏魯木齊外尙餘一半現交地方官收存請留備出差及
賞項借支之用軍機大臣議行六月疏言烏魯木齊等處定制設官仰蒙皇上指
授飭部定議巴里坤改設爲府以烏魯木齊爲屬州其原設寧邊通判改州同特
訥格爾縣丞改州判均歸巴里坤統轄臣查烏魯木齊地方遼闊僅令一知州管
理尙恐顧此失彼寧邊通判管理本城及呼圖壁瑪納斯三處州同亦難勝任請
將擬設之迪化州改爲直隸州擬設州同改爲知縣其特訥格爾新設州判暨吉
木薩舊有巡檢聽直隸州轄瑪訥斯呼圖壁佐雜等員聽知縣轄部議如所請尋
定新設府曰鎮西縣曰昌吉三十九年三月奏甘省倉儲一時未能足額請仍照
舊例於口內各屬一體收捐本色下部議行尋諭曰甘省捐監一事上年止准令
肅州以西收捐本色昨據該督以甘省通省倉儲一時未能全行足額奏請仍照
舊例口內各屬一體收捐業經部議准以本色報捐仍飭該管上司核實稽查勿
大臣畫一傳檔正編二十二

使滋弊業已允行第念此事必須能事之藩司實力經理方爲有益尹嘉銓謹厚有餘而整飭不足是以改擢京職特調王亶望前往甘省但董飭稽查乃總督專責著嚴加傳諭勒爾謹於王亶望到任後務率同實力查辦剔除諸弊如仍有濫收折色致缺倉儲及濫索科派等弊一經發覺惟勒爾謹是問四月疏請移巴里坤滿洲兵一千駐古城添設領隊大臣一軍機大臣議行十一月諭曰王亶望奏捐監事宜摺內稱現在收捐之安西肅州及口外各屬扣至九月底止共捐監一萬九千十七名收各色糧八十二萬七千五百餘石等語固屬承辦認真其情多有不可解處甘省人民艱窘者多安得有二萬人捐監若係外省人民就彼報捐則京城現有捐監之例衆人何以舍近而就遠其不可解者一也且甘省向稱地瘠民貧戶鮮蓋藏是本地民人食用尙且不敷安有如許餘糧供人採買若云商賈等從他處搬運至邊地上捐則沿途腳價所費不貲商人利析秋毫豈肯爲此重費捐納若收自近地則邊戶素無儲蓄何以忽而豐贏其不可解者二也況以半年收捐之監糧卽多至八十餘萬石若合一歲而計應有一百六十餘萬石若年復一年積聚日多勢必須添設倉廩收貯而陳陳相因更不免滋霉沔之虞且

各處尙有常平倉穀統計數復不少似此經久陳紅每年作何動用其不可解者
三也若云每歲春間出借籽種口糧需費甚多設無捐項勢不得不藉採買約歲
需價百餘萬金然此項究係購買民間與其歛粟歸之於官復行出借何如多留
米穀於閭閻聽其自爲流轉乎或以爲蓋藏家內多係富戶而出借種糧皆係貧
民貧富未必相通不得不官爲經理則又何如於春時多方勸諭富戶減價平糶
以利貧民轉需多此一層轉折其不可解者四也勒爾謹旣因該省民食籌辦經
營自應將各種情形通盤籌畫使於民生有實濟而無流弊方爲妥善著傳諭勒
爾謹將各條詳查據實覆奏十二月覆奏安西肅州及口外各屬捐監係自乾隆
三十七年十月起扣至本年九月止王亶望摺內未將年月敘明遂覺過多然實
係兩年所捐總數蓋緣新疆開闢以來路遠物稀貿易倍多獲利商民雲集而安
西肅州爲邊陲門戶無不經由又值糧價平該商等就近買糧捐監實爲便捷且
因舊例久停新例初開倍加踴躍甘省年來休養生息殷實之戶不少且安西肅
州所屬連稔捐監糧石實係本地富戶之餘糧供捐生之採買再收捐監糧原因
常平倉儲不足是以收捐彌補今以額貯糧數通核尙屬不敷將來收捐足額自

應奏明停止至建倉卽以捐生之倉費動用有盈無絀又民情錙銖較量平糶旣慮虧短出借更恐無還富戶糶糧得價實無勉強雖歛粟歸之於官而復散之於民且以富民之有餘濟窮黎之不足歲可省協濟銀百十萬公私兩便疏入諭曰爾等旣身任其事勉力妥爲之可也四十年七月疏言蘭州府向設同知經管黃河浮橋嗣因員缺移駐關展歸併臯蘭縣管理勢難兼顧至涼州府屬之平番縣河渠水利必須專員節宣請於二處各增設主簿一員查肅州州判經管屯戶近年所分屯糧漸少由該屯戶視爲官田不盡力所致請改屯歸民計畝陞科卽裁州判缺將俸廉等項分給二縣新設主簿又肅州嘉峪關爲新疆門戶距州城七十餘里遇有查辦事件該州鞭長莫及請裁哈密廳屬之酤水巡檢移駐嘉峪關爲肅州屬酤水地處郭壁可無藉專員彈壓下部議行四十一年四月奏請將瑪納斯屯兵改爲額駐養兵增設副將都司守備等官卽於內地裁撥移駐歸烏魯木齊都統轄部議從之又疏陳鎮西府所屬設官事宜一特訥格爾新設阜康縣請將所裁莊浪縣知縣訓導典史移設仍隸迪化州轄一平涼縣訓導請裁移新設之奇台縣其典史一缺將吉木薩所裁巡檢移設一吉木薩新設縣丞請作爲

特訥格爾分駐吉木薩縣丞一迪化舊城增設巡檢請將秦安縣隴城巡檢裁移一東吉爾瑪泰巡檢請移駐古城一阜康縣請定爲衝繁難邊要缺奇台縣定衝難最要滿缺吉木薩縣丞迪化城巡檢阜康奇台二縣訓導典史定爲邊要缺俱在陝甘兩省咨調俸滿題陞一哈密關展命盜案前議定由各該處大臣就近經行奏辦請仍其舊一瑪訥斯縣丞衙署請併建於新城與副將同城駐劄以便辦理兵民交涉事件一新設奇台阜康二縣請設歲科兩試學額一遞送公文馬匹應於內地偏僻驛內裁撥至買補倒馬價銀及所需夫馬外備站價照例支給再巴里坤糧務兵備道一員請改鑄分巡鎮迪糧務兵備道印兼管鎮西府迪化州所屬錢穀照伊犁例轉請都統核辦其哈密關展錢穀由該道呈報都統造銷阜康吉木薩糧石奏銷與迪化州分案造報併責成奇台縣經收各項稅糧疏入均下部議行十一月疏報中衛縣各渠俱由黃河西岸開口引灌寧夏寧朔平羅三縣田數萬頃漢渠計長一百九十餘里須添退水石閘並接建迎水埝岸加築高厚唐渠計長三百餘里渠身靠賀蘭山下一派沙磧近年湍流東注河底愈沖愈低渠口日淤日高本年搶挖渠口以下六十里水漸入渠其餘應用大石填塞中

流渠口外由黃河東岸向西北迎築攔水石壩並於渠身正開上下添退水石閘二庶唐渠一併挑通可垂永久再該縣有七星渠之白馬灘環洞山水衝坍二十餘丈須易地改建美利常樂二渠黃流徧徙渠口背流宜迎築石埧攔禦添建退水石閘以去泥沙又靈州有秦漢二渠秦渠渠口本低閘壩衝損所需工料無多令農民自修漢渠口高身低渠身地名野馬灘大圪塔二處壅淤九百餘丈應易地改濬得旨允行四十二年三月疏請增巴里坤城守營設都司一千總一把總二外委三馬步兵二百在踏實營沙州營裁撥部議行十一月疏報河州民黃國其家聚集多人豎旛念經令居民供應糧食該署州往捕輒恃衆拒捕傷差臣隨與按察使李本先後馳往查辦諭曰內地民人敢於設教聚衆並立有教主豎旛占聚一村入教者皆以白布爲號卽與前此山東叛逆王倫無異其情罪實爲可惡所有首夥各要犯必須上緊弋獲盡法重治其罪以示嚴懲但陝甘兩省回民最多而易滋事此案若係回民或恐恃其勇悍敢於抗拒不可不用官兵剿捕今勒爾謹前往自必帶有兵役第恐爲數無多或不敷應用提督法靈阿近在該省應卽選帶精兵星夜馳往協剿如各犯業就全獲則已若尙有抗拒情形法靈阿

卽在彼調度加之以兵或剿或擒相機妥辦勿使一犯漏網就獲後勒爾謹卽將案內各要犯嚴訊起意聚衆煽惑糾約各實情分別凌遲斬決一面於該處正法梟示一面奏聞尋奏言臣抵河州已據該州拏獲石忠信等究出首犯王伏林等有潛謀攻搶河州倉庫情事隨帶兵至王家坡巢穴戮賊衆四百餘名生擒五百餘名王伏林黃國其等業俱伏誅諭獎安速賞給朝珠荷包並交部議敘四十二年十月以高樸家人私攜玉石過境勒爾謹未能緝訪搜查奉詔嚴飭又失察私販玉石吳洲等經過甘肅地方部議革任詔免四十五年四月疏請迪化州昌吉縣額設廩增各二名六年一貢部議從之九月疏請伊犁增設撫民同知一員霍爾果斯東察罕烏蘇烏克爾博爾蘇克巴彥岱等處酌量數城遠近增設巡檢二員分駐十二月疏稱陝甘各營汛廣兵單請於前督臣黃廷桂奏裁公糧八千四百餘名內酌復二千以資巡防差操之用部議均從之四十六年三月疏報循化廳屬撒拉爾回人蘇四十三等因爭立新教滋事臣委蘭州府知府楊士璣河州協副將新柱前往辦理并卽選派本標兵二百帶同臬司福崧往捕旋奏楊士璣新柱被害臣飛調固原涼州甘州西寧肅州五提鎮兵二千又於本標兵續調三

百兼程前赴剿捕并札提督仁和會辦諭曰勒爾謹初派本標兵二百名原屬過少其知府楊士璣副將新柱前往查拏時辦理亦未能妥協以致被賊殺害至所帶兵數前後幾及三千人又扎會提督仁和前往會辦仁和係曾經出兵打仗之人軍務頗爲熟悉勒爾謹當與之和衷速辦總以慎重明決爲要四月疏言逆回據河州臣飭循化文武各員擒蘇四十三等家屬并飭署西寧鎮副將貢楚克達爾由循化一帶截其歸路旋聞逆回由小路潛赴省城其留河州之賊自屬無多卽飛飭該鎮作速收復河州臣將原帶本標兵留二百駐守狄道率同臬司福崧帶兵三百并傳集土兵七百星夜旋省救援諭曰番回爭立新教起釁勒爾謹節次所奏總未明晰前經朕降旨令其將舊教土兵作爲前驅勒爾謹何以不早行具奏又未將何日接奉諭旨之處奏明諸事遲延勞朕於數千里外爲之籌畫爲總督者應如是乎尋疏報臣自狄道帶兵旋蘭與提督仁和臬司福崧駐劄城外派兵保護逆賊無從得入民心漸安惟是逆酋未獲城門未開百姓日需河水臣現在派兵守東門按時啟閉聽民取水諭曰勒爾謹此奏恐有不實前伍彌奏勒爾謹專派蘭州道圖薩布候補道永慶駐劄城外隨同辦事則伊自必安坐城

內衙署當此緊急之際竟爾安然坐視實屬全無人心今勒爾謹又自稱駐劄城外此必伊近日自知罪重且聞伍彌泰已經奏及因復移居城外爲此節奏至伊摺內所稱現在派撥官兵把守城門按時啟閉聽民取水等語尤屬不成事體賊匪自擊退上山之後必不敢復近省城滋擾況現有官兵萬餘屯駐城外若尙慮賊人來犯則安用此官兵則乎且城門未開徒令遠近居民因此疑懼所謂示寇弱而怯兵志錯謬莫此爲甚又諭曰甘肅逆匪蘇四十三等肆擾不法一案係因爭立新教舊教不從致被殺害起釁若地方官早爲嚴明料理斷不致釀成事端乃勒爾謹經理不善以致養癰貽患從未奏明此事其罪已無可辭及事發之後卽當迅速妥辦以贖前愆乃朕已簡派八旗勁旅啟程前往並就近酌調阿拉善兵協剿而勒爾謹轉一味含糊且以半月之內卽可殲滅飾辭具奏致京兵等均各撤回令賊匪竄匿蘭州城外山梁幾及月餘雖節次剿捕賊匪窮蹙待斃已如釜底游魂而現在尙未淨盡殲戮致稽時日且調往將軍提鎮等在城外剿賊而勒爾謹竟安居城內衙署僅委道員駐紮城外視爲與己無涉以致衆相觀望坐失事機殊不可解朕初意本以逆匪滋事轉不便輕易地方大吏今勒爾謹如此

辦理錯謬其罪甚大難以姑容著革職拏交刑部治罪尋議斬決得旨改爲斬監候先是甘肅累年捏報旱災地方官從中侵蝕賑銀又報捐監生私收折色至是事發命籍其家敕大學士九卿會審勒爾謹捏旱冒賑侵蝕監糧通同舞弊營私各款屬實按律定擬卽行正法諭曰甘省收捐監本欲藉監糧爲備荒賑卹之用乾隆三十九年經勒爾謹奏請開例議准允行原令祇收本色糧米其時王亶望爲藩司卽公然私收折色銀兩勒爾謹竟如木偶毫無見聞勒爾謹本一庸懦無能之人因其平日尙屬小心勤慎用爲總督從前逆回一事原因勒爾謹養癰貽害所致卽收復河州亦係布政使福崧在彼籌畫幫同辦理勒爾謹失機貽誤本卽應正法彼時朕尙從寬改爲監候今又於王亶望私收折色冒賑婪贓一案全無覺察且亦收受屬員代辦物件一任家人等從中影射侵肥種種昏庸貽誤罪更難道勒爾謹著加恩賜令自盡八月總督李侍堯奏清釐甘肅各州縣已徵未解錢糧銀尙有五十餘萬派管馬廠遊擊佛津泰變價營馬二千餘匹虧缺捏報請革審上以勒爾謹久任總督政務廢弛命將伊子二人均發遣伊犁以示懲儆

柴大紀

柴大紀浙江江山人乾隆二十八年由武進士揀選守備分發福建試用三十六年九月補授福建水師提標左營守備四十年九月擢水師提標右營遊擊四十二年調澎湖水師右營遊擊四十三年二月擢水師右營參將七月擢湖南洞庭協水師副將四十六年九月擢福建海壇鎮總兵四十八年十一月調臺灣鎮總兵五十年九月諭曰昨據柴大紀差弁齎摺奏報收成雨水情形摺內書七月二十五日拜發今日又有該鎮奏到之摺閱之係自請貶封而摺內則寫七月二十七日與前摺日期不同地方遇有緊要事件雖遠隔重洋亦應隨時專差奏報若止係尋常之件斷無從臺灣地方僕僕差人齎奏摺者今所奏乃該鎮自請貶封非關緊要則其爲一次拜發之摺該鎮令差弁分日呈進無疑因命軍機大臣傳訊該弁所稱果不出朕所料總兵爲專闖大員且臺灣地處海疆尤須留心大體彈壓撫綏方於地方有益乃柴大紀將一次奏摺分別書寫日期令差弁分日呈進如此用心糊塗取巧殊屬非是柴大紀著傳諭嚴行申飭十一月調汀州鎮總兵未赴任直加未南及日懷二社生番滋事隨提督黃仕簡入山剿捕殺獲多名五十一年三月奉上諭前因柴大紀差弁齎摺囑令分日呈遞意存取巧恐於臺

灣重地難以勝任是以將該員調補汀州今柴大紀於生番滋事一案督率弁兵進山搜剿頗爲出力且殲戮甚多遠近番衆自必憚其威名聞風斂戢今甫經事定遽行更調恐非所宜柴大紀著仍回臺灣總兵之任八月諸羅縣居民楊功懋等滋事大紀卽行擒獲奉旨交部議敘軍功加一級十一月臺民林爽文滋事陷彰化十二月陷諸羅犯郡城大紀帶兵堵禦敗之於三坎店勢稍挫五十二年正月奏林分兩路犯府城西北二門臣於鹽埕橋堵禦殺其千餘嗣聞鳳山陷卽飭澎湖協水師遊擊蔡攀龍等帶兵恢復臣仍駐鹽埕橋堵截水陸羽黨諭曰此次柴大紀在臺打仗奮勇可嘉北路勢正蔓延鹽埕橋係水陸扼要之區該鎮自應仍在彼督率剿捕未便遽回郡城以致敵人踵後且南路旣經該鎮派撥澎湖協及城守兵丁共一千名前往諒亦足資抵禦二月奏郡城爲全臺根本並無城垣倘有疏失更難恢復現在於東西南三路分兵堵禦臣在鹽埕橋獨當北路羽衆諭曰閱柴大紀所奏郡城爲全臺根本卽應速建城垣以資保障嗣黃仕簡奏大紀帶兵往北路進剿生擒僞將軍廖東僞軍師侯辰二人殲戮甚衆隨督率守備邱能成等克復諸羅卽統兵往剿彰屬大里杙等處穴巢諭曰柴大紀於官兵未

到之先能督率兵民極力守禦郡城現在帶兵赴北路搜剿又能多殲羽衆收復縣城並生獲要犯其屬出力惟是臺灣係該鎮專管地方今有此羽黨聚衆不法之事該鎮本有應得之咎若能及時勇往剿捕豈止可以將功抵過朕必將伊從優議敘三月閩浙總督李侍堯奏柴大紀在諸羅咨請兩提臣撥兵協助非惟不能合剿大里杙並諸羅彰化間道路亦未疏通諭曰柴大紀自派往諸羅以後於剿捕一切不能如從前之出力且赦不問令其效力帶兵贖罪如伊等亦有畏葸觀望情事卽著常青據實參奏四月諭曰著常青詳悉曉諭柴大紀伊係臺灣總兵臺民滋事失陷城池已屬有罪之人且收復諸羅後效尤觀望其罪與黃仕簡任承恩無異念其從前守禦郡城尙屬出力姑令帶罪圖功現在大兵進剿羽黨竄入南山之路最關緊要卽責成該鎮專力堵截若能將爲首拏獲餘黨不使一名竄逸不但宥其前罪並當仍錄其功倘再不能實力奮勉立功自贖恐伊不能當此重罪也嗣調任湖廣總督仍留督師常青奏臣自抵臺後卽派柴大紀與總兵曾吉保夾攻斗六門以通南北之路前因柴大紀不能開通道路曾經參奏但自駐劄諸羅後賊尙知畏懼其功過原不相掩諭曰柴大紀一到諸羅不能將斗

六門羽衆搜除淨盡開通道路實有應得之罪但前此守禦郡城尙能奮勉且駐劄諸羅後若輩頗知畏避所稱功過不相掩自屬定論所有陸路提督一缺著加恩暫令柴大紀署理尋奉旨賞戴花翎是月授常青爲將軍五月常青奏近日餘黨侵擾諸羅縣城柴大紀督率官兵協力剿捕生擒羽衆蔡瑞等十一名斃斬數百得旨嘉獎嗣大紀奏臣自克復諸羅後搜捕餘黨有羽衆張慎徽等假充義民僞降立拏正法又餘黨屢次滋擾大坪頂牛稠山地方并來攻各城門營盤經官兵奮勇剿禦殲斃無算諭曰柴大紀駐守諸羅兩月有餘若輩屢次滋擾連得勝仗斬獲甚多並能識破內應奸匪擒拏正法始終奮勉出力朕心深爲嘉獎著交部議敘軍功加一級又諭曰前甘省剿捕逆回蕨事後曾命將行軍紀律擇其緊要數條頒發各營操演講習著將柴大紀用法嚴明得邀獎敘補行載入嗣奏爲首林爽文糾衆屢來侵犯臣臨陣未能卽獲現確探該犯潛居何處竭力擒拏諭曰柴大紀果能將爲首林爽文生擒解京其功甚大必邀不次之賞但該總兵等若自審兵力尙單不能率兵深入搗穴擒渠亦應持重不可冒昧輕進至林爽文屢次攻擾諸羅似因柴大紀稍有威望是以專力侵犯使柴大紀不能抵禦爲其

所圖則此外諸人更可不以爲意得以肆行無忌柴大紀能悉力堵禦奮勇殺退甚屬可嘉嗣奏林潛聚柴頭港草麻莊竹林腳龍山腳楓樹腳等處臣督兵進剿殲其甚衆得旨嘉獎六月常青奏北路荳麻莊距府城三十餘里係運糧要路林等滋擾柴大紀督兵往剿乃竄諭曰柴大紀自守諸羅以來屢次將敵敗退實屬奮勉可嘉著卽補授福建陸路提督但柴大紀任臺灣總兵已經數年於該處情形較爲熟悉將來剿堵完竣所有善後事宜正須該提督隨同常青悉心籌辦柴大紀著以陸路提督兼臺灣總兵事務七月常青奏諸羅四處爲敵把截惟鹽水港一路可通郡城羽黨自荳麻莊竄後復欲攻踞鹽水港以絕縣城糧餉柴大紀派兵固守頗資捍禦諭曰柴大紀自剿捕若輩以來督率官兵義民奮勇殺擊一切調度深合機宜著授爲參贊八月李侍堯奏大紀在諸羅被林圍攻日夜拒守以少擊衆節經常青遣總兵魏大斌等往援諒可奏功諭曰常青等所派接應之兵此時自己打通道路併力前進柴大紀得此兵力援應自更爲得力近日如何殺敵攻剿情形著迅速馳奏尋奉旨常青年老另授福康安爲將軍海蘭察爲參贊大臣赴臺督剿柴大紀仍照前參贊軍務嗣李侍堯奏大紀最奮勇且調度得

宜今既與魏大斌會合必能協力進剿諭曰魏大斌應援之兵既已會合柴大紀即不能進攻大里杙穴巢自應令魏大斌分兵出城將從前經過道路如鹿仔草一帶屯聚羽黨先行剿散廓清道路豈添此魏大斌兵力徒令幫守縣城而不思乘其新到銳氣相機進剿耶著傳諭柴大紀急應設法籌畫倍加奮勉嗣常青奏羽衆萬餘屢圍諸羅縣城俱經柴大紀督兵擊退尙屯聚近城各莊臣現派副將蔡攀龍等往援諭曰柴大紀素能激勵將士圍守數月未必竟至不支而常青現已派委蔡攀龍帶兵前往援應蔡攀龍亦奮勇可恃看來或竟能破敵解圍九月調水師提督奏臣陸續招集義民除派往鹿仔草鹽水港守禦外尙有四千餘名俱奮勇出力羽黨屢次攻城官兵協同義民殺退並斃僞將軍葉省生擒羽衆羅藍張本等魏大斌帶兵來援至劉厝莊地方被圍臣督兵引護進城諭曰諸羅被其攻擾柴大紀在彼激勵軍民設法堵禦并連次剿殺餘黨實屬出力朕既嘉其績復軫其勞但所奏皆八月以前之事現在蔡攀龍已抵諸羅縣城柴大紀等作何籌辦尙未據續有奏到柴大紀惟當倍加勉力迅速成功承受恩賞又諭曰如諸羅已無他慮自應悉力固守以待援應萬一實難守禦必須出城另圖進取務

將城內義民及其家屬妥爲捍衛先行送出然後振旅出城方爲妥善十月福康安奏臣此次由鹿仔港進剿已知會柴大紀等併力夾攻俟道里旣通再整兵進逼大里杙穴巢諭曰柴大紀在彼日久於該處情形自爲熟悉福康安當與之悉心籌畫福康安又奏諸羅久被圍困屢次救援皆未得手應令柴大紀仍前固守內外應合殺敵解圍諭曰柴大紀素有謀略固守諸羅已經數月當若輩猖獗之時尙能悉力堵禦奮勇殺擊況今彼勢日衰伊接奉前旨斷不肯委垂成之功而去十一月奉上諭柴大紀懋著勞績著加太子少保銜以示嘉獎嗣奏拏獲羽黨林培供係爲林爽文通信約堂兄林觀賜爲內應臣卽親往將林觀賜拏獲併林培一併正法羽衆搶割禾稻俱剿退搶回新穀數十石并獲溼穀及地瓜乾四百餘石當散作軍糧又於府城鹽水港運取番銀以資接濟諭曰林培一犯經柴大紀察出卽行查拏正法使餘黨無由逞其鬼蜮之技所辦甚好著賞給元狐暖冠一頂以示體恤柴大紀激勵兵民悉力守禦兩次赴府城鹽水港調運番銀復經奪獲賊匪所割之稻及溼穀地瓜乾四百餘石散給兵民作爲口食是該處糧餉火藥時有接濟雖至匱乏尙可儘力支持嗣奏諸羅縣城向惟堆土植竹並無磚

石臣克復諸羅時卽分兵筭營於縣城四門外要害處後敵勢猖獗遂環營開溝並築短牆各處安礮營盤甚堅固是以彼等數萬疊次來犯俱被官兵殺退若一旦棄去爲彼所踞克復甚難且城廂內外居住百姓二萬餘又加各莊避難入城者不下二萬實不忍將此數百萬生靈不顧臣惟有竭力保守以待援兵諭曰柴大紀所奏朕披覽之餘爲之墮淚柴大紀接到前旨正值該處晝夜攻圍城中糧餉將盡勢在急迫若卽遵旨帶兵出城未爲不可乃以該處係臺灣要隘恐一旦棄去難於收復並以城內居民數萬協力守禦不忍委之於人是其保護合縣民人與朕軫念義民多方愛護之意適相脗合所謂我君臣各盡其義也被圍日久心志益堅勉勵兵民忍飢固守惟知以國事民生爲重古之名將何以加之著卽封爲一等義勇伯世襲罔替並著浙江巡撫琅玕賞伊家屬銀一萬兩用示朕軫恤勳勞錫爵酬庸之至意又諭曰柴大紀固守縣城不辭勞瘁此時大兵雲集會合進剿餘黨自可指日蕩平計至明年二月中旬朕巡幸天津時可與福康安一同起程前來瞻觀嗣奏賊於近城地方搭寮屯聚被官兵燒燬惟彼屢竄屢聚城中諸物俱盡現食油糶且值冬令飢寒相迫勢殊危急諭曰柴大紀處情形較前

更加急迫奏到之摺係十月二十九日拜發而福康安已於初六日進兵由元長莊一路前往援應料此數日內柴大紀自能將縣城保守無虞十二月諸羅圍解福康安劾大紀人本詭詐甚染綠營習氣不可倚信諭曰柴大紀駐守縣城督率兵民力爲捍衛卒能保護無虞雖間有虛詞謊報此亦綠營積習情事所有設果如福康安所云爲人詭譎取巧則當縣城被圍緊急時朕曾經降旨諭令力不能支不妨帶兵出城柴大紀何難委城而出以爲脫身之計乃堅持定見竭力固守不忍數萬生靈委之於人是其尙知以國事爲重豈福康安目擊情形尙不心存憫惻轉事苛求不能以朕之心爲心乎柴大紀日覩糧食垂盡至以日食油糶爲詞希冀援兵速到若再實言少有糧米則兩路之救援更緩又安怪柴大紀之過甚其詞耶柴大紀係提督大員且屢經恩旨褒嘉或稍涉自滿在福康安前禮節或有不謹致爲福康安所憎遂爾直揭其短乎況柴大紀已加恩封以伯爵福康安所奏並無確據又豈可轉沒其功遽加以無名之罪耶柴大紀如果貪殘剝削實有取怨於民之處則百姓焉肯爲之出力死守著傳諭福康安仍宜加委用以勵衆志又諭曰德成自浙江差竣回京召見時詢及柴大紀平日居官聲名如何

據奏風聞柴大紀自復任臺灣總兵後縱恣自大居官貪黷並將所轄守兵私令渡回內地貿易牟利駐守之兵所存無幾爽文糾衆肆擾距府城止三十餘里柴大紀尙不思前往堵禦經永福催令出城始與打仗又因兵少敗衄以致猖獗不可復制果如所奏是柴大紀貪縱不職馭法牟利於林等起事之初任意玩視使得鴟張蔓延日久竟由柴大紀釀激事變其平日劣蹟已確有可據而福康安前奏祇含糊其詞柴大紀係守城有功之人若祇憑含糊無據之詞豈能將伊治以無名之罪福康安著傳旨嚴行申飭至李侍堯調任閩省於柴大紀平日廢弛玩誤之處豈無屬員稟報今有心瞻顧徇隱實屬辜恩昧良並著福康安李侍堯各行嚴查密訪據實參奏又諭李侍堯琅玕前降旨賞柴大紀銀兩暫停給發又諭曰本日提訊任承恩據供柴大紀操守平常聲名狼籍與昨日德成所奏大略相同似無虛假福康安李侍堯務將德成指出各款及任承恩所供一併據實查參又諭曰柴大紀如祇係小有侵漁私圖肥橐此等劣跡朕於他人尙不加深究況柴大紀係守城有功之人今廢弛行伍私令兵丁渡回內地貿易牟利以致存營兵少而於若輩起事之初並不卽時前往查辦轉回至府城及彼距城三十里尙

不思帶兵出城剿捕此三事是柴大紀最重之案伊雖有守城之功而其激變貽誤之罪斷難輕貸又諭閩撫徐嗣曾浙撫琅玕查明柴大紀各款據實參奏又諭曰柴大紀種種劣跡不妨從緩查辦若查辦太急或致畏罪自戕豈不使造言生事之人妄生議論以爲屈害有功之人耶福康安當熟籌妥辦五十三年正月諭曰柴大紀在縣城被圍日久其奏到接奉諭旨不肯帶兵出城一摺披閱之下朕爲墮淚卽在朝諸臣凡有人心者亦無不以柴大紀竭力守城稱其義勇是卽柴大紀小有過失亦當錄其大功而宥其微眚豈能據福康安所奏柴大紀爲人狡詐不可深信一語遽治以無名之罪前問李侍堯之諭尙未復奏想亦難於措詞耳嗣李侍堯奏柴大紀貪婪不職廢弛行伍至亂民滋擾府城又恇怯未卽出戰諭曰據李侍堯奏臺灣戍兵多有賣放私回以致缺額其留營當差之兵亦聽其在外營生鎮將等令其每月繳錢經年並不操演觀之不勝駭異又前歲臺民滋擾府城柴大紀恇怯不敢出戰經永福等面加誚讓始帶兵出城等語用兵之道當賞罰嚴明此次臺民糾衆滋事竟由柴大紀平日廢弛貪黷積漸釀成此而不嚴加查辦何以肅軍威而儆官邪柴大紀著革職拏問交福康安嚴審定擬具奏

又諭曰柴大紀怯懦遷延釀成巨案現經朕面詢押解臺灣亂民到京之侍衛額勒登保據稱亂民攻擾嘉義時俱係義民等出力守禦並非柴大紀之功其不肯出城一節亦義民等不肯將伊放出柴大紀亦畏賊不敢出城則前奏不忍將數萬生靈盡委賊手仍忍飢固守待援之語全不足信守城亦非其功種種劣蹟難以枚舉三月福康安奏柴大紀於亂民滋事之始觀望逗遛釀成逆案并據千總鄭名邦供武職陞補俱送番銀其婪索得賄情弊亦難掩飾諭曰前據琅玕奏查抄柴大紀家產據家屬供出臺灣任內前後所得共有五六萬金若僅止如鄭名邦所供爲數無幾焉能如此之多此外賣官鬻爵婪得多贓必有更大於此者不可不澈底根究四月福康安奏柴大紀巡查各營並不認真操演折收夫價每營至數百兩之多諭曰柴大紀身爲大員平日貪縱營私毫無顧忌於拔補弁兵得受謝銀並於巡查營伍時收受夫價以致武備廢弛釀成巨案自應澈底究辦訊取確情定擬具奏後卽將伊委委員解送來京沿途小心看押毋致有畏罪自戕等事五月福康安奏柴大紀在鹽埕橋打仗尙爲出力守禦嘉義亦有微勞但係專閫大員平日不能實力整頓網利廢弛肆行無忌值亂民猝發又觀望遷延以

致蔓延猖獗失陷城池皆由柴大紀玩誤所致現據大紀將婪索賂誤等情供認不諱請旨解京卽行正法諭軍機大臣會同大學士九卿覆訊並將福康安等審訊柴大紀摺發交核議具奏七月諭曰柴大紀在臺灣總兵任內賊私累萬盈千迨亂民竊發並不卽時帶兵親往撲滅以致釀成騷擾貽誤軍機經福康安等定擬斬決解京辦理本應立正典刑究念其守城微勞欲加恩從寬末減改爲監候茲將柴大紀解到令軍機大臣會同大學士九卿覆訊柴大紀復思狡展翻供抵賴經朕廷詢始俯首無辭而於認罪之下仍思狡飾甚屬可惡柴大紀竟係天奪其魄自行取死豈可復從寬典著照所擬卽行處斬十月徐嗣曾奏查有許懷等三十五名實係良民柴大紀誤拏卽欲正法經前任嘉義縣知縣陳良翼力爭取保釋放柴大紀仍謊報正法戮屍諭曰柴大紀自到諸羅後恇怯畏葸每次奏報妄稱俘馘多名以掩其株守不前之罪種種詐妄不實已出情理之外茲復查出許懷等三十五名被兵民誤拏柴大紀先已開單具奏混開正法七名戮屍七名及該縣陳良翼訊明實係良民柴大紀必欲迴護原奏按名正法爭執再三始准釋放是妄奏冒功幾令無辜良民數十人陷於重辟情節尤爲可惡柴大紀已於

前案正法著將柴大紀之子發往伊犁給與兵丁爲奴以示懲儆

尹德禧

尹德禧鑲黃旗包衣人初名色喀通額由領催撥守綏遠城乾隆二十年隨副都統鶴山出師伊犁二十一年隨副都統阿爾斌討叛賊青滾雜布二十三年擢鑲白旗驍騎校二十九年升防禦十一月開戶出旗發湖南以守備用三十年補臨武營守備三十六年擢四川川北鎮標右營都司更姓名入籍密雲縣三十八年調征金川四十年經將軍阿桂保題擢貴州荔波營遊擊四十四年擢撫標中軍參將四十六年擢定廣協副將五十年升湖廣鎮筸鎮總兵五十二年五月鳳凰廳屬苗匪石滿宜滋事帥師進剿燬賊巢生擒石滿宜多有斬獲撫臣浦霖以聞得旨優敘並賞戴花翎又諭曰湖南鳳凰廳屬苗匪石滿宜等搶奪拒捕滋事不法一案經總兵尹德禧會同該道親率將備官兵前往直搗賊巢立時平燬生擒首犯石滿宜等所辦妥速可嘉已降諭旨將該總兵交部從優議敘並賞戴花翎以示獎勵矣此案該總兵本屬有功無過但尹德禧有奏事之責於所屬苗匪滋事不法帶兵前往剿捕應一面查辦一面具奏由驛馳遞何以該鎮於此事並不

專摺夫奏事原不獨藉悉地方情形且據伊等所奏朕隨事可以觀其才具器識如該鎮等有喜事見長之人干預地方事務越俎妄陳者奏到時自難逃朕洞鑒至其本分應奏之事理應隨時據實陳奏乃近來各省總兵所奏不過具報到任及查閱營伍等事卽雨水收成亦不過間有奏及者但該鎮等果能將實在情形據實以告披閱之下設所奏與督撫不同或督撫有諱飾之處原可參互察照降旨詢問以收兼聽並觀之益乃該鎮等卽使奏及雨水收成亦不過做照督撫所奏敷衍塞責又安用此具文爲耶著通諭各省總兵此後遇有緊要事件皆須專摺奏聞卽尋常雨水收成情形亦應隨時據實奏報毋得循照舊例虛應故事並著尹德禧於苗匪滋事一案何以不將查辦情形自行具摺之處據實覆奏尋奏請交部議處得旨寬免時臺灣剿捕逆匪未歲十月命德禧督湖南兵赴臺五十二年正月至水沙連大營林爽文已就擒將軍福康安督兵剿捕莊大田派德禧帶兵堵竹仔港等處海口截拏逸賊旋擒莊大田於柴城臺灣平四月起程回任十月諭曰湖南鎮守總兵尹德禧前因辦理鳳凰廳滋事一案尙爲出力曾降旨賞戴花翎復令帶湖南官兵前赴臺灣協同剿捕逆匪見在該省官兵早已各

歸營伍該總兵自五十年陞見後雖距今未滿二年但尹德禧曾有微勞加恩之處與各省總兵不同著卽來京陞見十二月入覲五十四年署湖南提督五十六年十月卒遺疏懇恩賞准子孫入旗十二月諭曰原任總兵尹德禧曾經出師伊犁臺灣金川等處前在湖南鎮筵鎮總兵任內辦理鳳凰廳苗民滋事一案尙屬出力所有尹德禧子孫准其入旗子朝相隸鑲黃旗包衣

剛塔

剛塔滿洲正藍旗人姓烏濟克忒由前鋒委署筆帖式從征準噶爾回部有功授雲騎尉世職乾隆三十年授直隸岔道城守備三十四年擢多倫營都司三十八年擢泰寧鎮中營遊擊三十九年九月隨大學士舒赫德剿平山東臨清逆匪王倫有功山東撫臣楊景素奏留東省補用十二月署萊州營參將四十一年四月奉旨賞戴花翎十一月調補撫標中軍參將四十四年遷文登營副將尋擢直隸天津鎮總兵四十六年四月擢直隸提督四十七年四月兼署東陵總管內務府大臣馬蘭鎮總兵七月奉旨常青著署理直隸提督剛塔著以提督銜管理馬蘭鎮總兵兼總管內務府大臣十月仍授直隸提督兼署馬蘭鎮總兵四十八年正

月諭曰剛塔不必兼署總管內務府大臣四十九年正月調陝西固原提督四月二十二日奏甘肅鹽茶廳小山逆回田五等聚衆滋事攻破安西州城堡諭曰甘肅逆回新教自前歲大加懲創之後田五各逆等復敢自起新教糾夥聚衆甚至傷害百姓攻破城堡不法已極自係前因人數衆多搜捕未盡所致卽應迅速剿捕以靖地方二十五日奏賊在山波溝店子一帶劫掠一面飛咨督臣李侍堯派兵堵禦帶兵二百名馳赴追拏諭曰據剛塔所奏見在賊匪不盡竄匿山內尙有逸在他處滋事者與李侍堯所奏情形不符固原鹽茶廳一帶回民較多賊匪旣竄往雞窩山等處恐有潛相煽動糾入教情事該督等務宜迅速帶兵堵截擒拏剿捕淨盡二十九日諭曰剛塔前經奏報由固原起程追躡賊蹤見在該提督究至何處曾否遇賊擒殺何以日來未據奏報著傳諭該提督卽將追剿擒捕情形迅速馳奏五月初一日李侍堯奏剛塔帶兵迎剿斃賊四五十名親射死騎馬賊目一受箭傷一處得旨剛塔奮勇殺賊受傷殊屬可嘉著加恩賞給御用玉韞並賞給大小荷包用示獎勵仍著交部從優議給世職以旌勞勇初五日奏於狼山剿賊首逆田五傷重自殺餘賊竄往官川見在帶領寧夏涼州二鎮官兵追剿

報聞初九日奏於郭城驛詢知賊回占據頭寨子黑莊子等處卽派兵迎擊賊踞馬家堡見同寧夏總兵吉爾泰涼州總兵蘇定阿於要路防堵諭曰據剛塔奏賊衆占據馬家堡黑莊子兩處與經略李侍堯昨日奏到情形相同賊匪雖見據山上官兵已繞溝前進然則旣入山中四面堵截如釜底游魚株守空山食盡自斃但當嚴密堵截防其別尋路徑逃逸見在西安及甘州寧夏各處官兵俱已齊集兵力旣厚自可設法四路會剿堵截去路無難剋期撲滅十四日奏官兵圍困馬家堡遙望賊營周帀細察方知均係木棒撐單衣帽全夥業經翻山竄逸見在跟蹤追趕於馬家灣拏獲賊屬多名據稱賊回已往安定及蘭州會寧等處卽督兵追剿諭曰據剛塔所奏總不成話賊人困守馬家堡官兵圍攻紮營自必相距不遠剛塔等非瞽目之徒何至賊人詭設人形熟視無覩至今乘間遠颺李侍堯剛塔俱著傳旨嚴行申飭復諭部停其議敍十五日奏賊匪自初四日由馬家堡夜遁於初六日追至馬家灣賊已先竄西鞏諭曰賊匪不過四五百人旣已困守馬家堡剛塔帶兵數千名在彼剿捕乃一味怯懦無能又不知嚴防去路以致賊人乘夜潛逃肆行劫掠尙復有何顏面若再不努力向前剿滅賊匪淨盡其罪更不

可問十七日奏追賊至馬營街督兵奮擊斃賊四十餘名斬首級二十五諭曰剛塔奏初九日在馬營街剿賊一摺看此光景較前稍有起色但賊見既遁聚馬營街剛塔俞金鼇圖桑阿等所帶之兵俱已齊集自應各領將弁分布前後左右將賊人四面合圍併力進攻方能一舉集事盡數殲除不致仍前翻山逃竄乃閱摺內該提督等仍會集一處並不籌算及此若復致賊人翻山而遁更屬不成事體著再傳旨嚴行申飭時李侍堯奏賊回餘黨復竄據石峯堡西安副都統明善剿賊陣亡上以李侍堯剛塔屢次失機命大學士公阿桂尙書福康安馳往督師未到之先著護軍統領五岱總理軍務諭曰剛塔率領各處官兵不下數千名軍勢不爲不盛而馬營街石峯堡俱係通渭縣地方相距又不甚遠何以剛塔由馬營街一路追賊而於通渭縣城失守之處竟毫無策應且副都統明善於石峯堡遇賊打仗亦以單軍失利中矛陣亡剛塔亦並未派兵救接近在一縣之內彼此音信隔絕其故殊不可解著阿桂福康安到彼時細查當時實在情形如果有貽誤之處卽行奏參二十五日奏固原州報提標兵丁馬如林馬如海皆新教回民卽拏交按察使陳步瀛審辦諭曰剛塔縱令賊人竄逸以致到處聚集滋事肆行無

忌該提督此時尙有何面目覷然身列戎行至伊所奏拏獲兵丁馬如林馬如海俱係新教回匪既係新教卽當正法何必解交地方官行軍之時豈可拘例若是乎二十四日奏賊匪旋散旋聚見在鹿鹿山紮營又於附近通渭縣城伏羌等處屯踞與石峯堡之賊互相聯絡再訊據獲賊吳全供賊衆踞石峯堡後商議搶奪通渭伏羌秦州潼關等處以斷文報諭五岱等曰本日據剛塔奏見在賊匪情形內稱拏獲賊人吳全據供有聞得賊衆商議搶奪通渭伏羌秦州潼關等處以斷文報之語此供斷不足信賊匪聚衆滋事伏羌秦州一帶回匪素多或思竄往該處爲句結接應之計尙爲情事所有至潼關遠在西安省城之東諒此草竊技倆豈敢離其巢穴不畏官兵迎截剿殺徑至潼關之理此必係賊人故爲散播謠言希圖煽惑衆心此等匪徒一經拏獲剛塔等原應嚴密審鞫訊明後卽行正法何得於軍營衆廣之地任其信口混供此時賊勢蔓延皆剛塔疏縱之罪今於審訊賊人又全不小心詳慎剛塔何不曉事至於此極又據奏稱賊匪旋散旋聚見在鹿鹿山紮營數處約有數千人又於附近通渭縣伏羌等處紮營與石峯堡之賊互相聯絡等語既紮營數處何不帶兵奮勇單剿其一營別令截其來援之賊此

或一法也徒擁兵坐視以待其翻山而逃乃引兵尾追其後而又不及尙復成何事體有如此用兵之理乎附近通渭伏羌等處紮營又係何項賊匪何以李侍堯等節次摺內均未奏及伊等竟係張皇失措一味怯懦遂至漫無主見任聽賊匪妄供輒信爲實再傳諭五岱等務宜遵照前旨於官軍見紮營盤處所倍加小心防禦並當設法緝拏回賊送信之人以斷其互相聯絡之勢但盤獲後當密訊供詞迅速正法不可又如剛塔之拘例審辦二十六日諭曰剛塔於賊匪竄入馬家堡時並不堵截後路縱賊潛逃復札會總督轉輾耽延迨賊遠颺始帶兵尾追以致賊人四出旬結日益滋蔓擾害地方且於賊人攻破通渭縣城及至石峯堡肆行紛擾之處毫無策應失機債事其罪更無可道剛塔著革職拏問解交刑部治罪六月十五日福康安至靜寧奉命革剛塔職解交刑部治罪尋劾其種種遺誤罪無可道得旨命留京王大臣會同大學士九卿科道覈議定擬具奏上諭福康安曰近來五岱李侍堯剛塔等數次剿賊頗有起色伊等自必商同辦理但究係何人主意爲多著福康安秉公詢訪確實不可稍存袒護阿桂福康安合奏剛塔帶兵剿賊射賊受傷追至狼山馬營街殺賊數百餘名田五傷重自戕其時餘賊

不過八九十名使剛塔奮勇追剿即可及早完結乃馬家堡爲賊所誑致令翻山
逃逸各處賊衆四出滋擾雖竭力尾追其毫無籌畫以致賊勢蔓延剛塔亦不能
無罪奏入經大學士九卿會奏定擬剛塔照玩視軍務律斬決得旨剛塔本係武
夫有勇無謀甫到固原提督之任卽值逆回起事不能先期覺察及賊人竄聚馬
家堡時剛塔在山前紮營不思設法堵截後路致墮賊計迨賊已潛逃又不能繞
出邀截惟知在後尾追予以重辟亦係罪所應得但究係甫經到任未悉地利時
各路官兵尙未到齊伊所帶之兵不過數百尙能殲斃賊首出五並於馬家灣殺
獲賊人家口牲畜且身受箭傷覈其情罪尙可量從末減剛塔著免其死罪發往
伊犁效力贖罪以觀後效五十四年閏五月卒

清史列傳 卷二十六

大臣傳次編一

阿桂

阿桂正藍旗滿洲人章佳氏大學士阿克敦之子由廕生任大理寺寺丞乾隆三年中式舉人四年六月補兵部主事五年六月升員外郎八年三月升郎中軍機處行走六月調戶部顏料庫郎中十年二月調銀庫郎中十一年六月以失察庫項被竊降調七月補吏部員外郎十三年正月隨兵部尙書班第赴金川軍營辦事是年冬經略訥親總督張廣泗坐貽誤軍務獲罪提督岳鍾琪劾阿桂勾結張廣泗朦蔽訥親奉旨逮問十四年六月諭曰阿桂年少無知自干罪戾固應按律重懲但其獲罪之處與貽誤軍務者有間伊父阿克敦辦事勤勉高年僅有此子著加恩釋放十五年四月授吏部員外郎十六年十月仍在軍機處行走十七年正月升郎中十一月升江西按察使十八年三月授內閣侍讀學士二十年四月擢內閣學士是時大兵征準噶爾六月命赴烏里雅蘇臺辦理臺站二十一年丁

父憂回旗六月署鑲藍旗滿洲副都統七月諭曰青滾雜卜遣人至烏里雅蘇臺煽惑喀爾喀等著舒明會同親王成衮札布德沁札布等相機查辦再著阿桂速赴軍營協同辦理九月授參贊大臣十二月以北路軍務大臣應分駐地方辦事命阿桂駐科布多是月補鑲紅旗蒙古副都統二十二年正月命仍留烏里雅蘇臺辦事八月授工部侍郎十月命仍赴科布多辦事二十三年三月上以定邊將軍兆惠奏輝特賊人舍楞將入鄂羅斯命阿桂行知領兵大臣和碩齊唐喀祿留意截擒五月奏舍楞遣人約降和碩齊唐喀祿領兵往會爲賊掩襲見已領兵前往策應諭曰阿桂聞我兵爲舍楞所誘卽領兵策應甚屬奮勉著賞戴花翎逆人狡詐如此傳諭策布登札布乘其未入鄂羅斯境領兵速進與阿桂合力攻擊六月奏臣詢問舍楞處逃出之額魯特額勒椿謂舍楞不能入鄂羅斯將由哈薩克逃往土爾扈特或不達恐復回準噶爾當卽派兵在彼守候採取實信若已入哈薩克卽帶兵索取候其擒送上以阿桂觀望遲延嚴飭之七月諭阿桂不必回科布多卽來京請訓十月回京十一月命仍赴西路與副將軍富德合兵追剿準夷餘孽二十四年五月命往霍斯庫魯克同副將軍富德剿辦逆回霍集占八月

追賊至阿勒楚爾又追至伊西洱庫爾諾爾回衆乞降收獲賊衆萬二千人軍器二千餘件駝馬牛羊無數霍集占遁走拔達克山是年回部悉平九月上以阿克蘇新附爲回城要地命阿桂駐紮辦事十月奏查看阿克蘇牧羣牛羊除解往葉爾羌外請將見存牛羊爲伊犁駐防兵來年行糧之需已令該管官加意牧放以濟軍需十一月奏將軍兆惠經過阿克蘇會議伊犁駐兵及遷移回人屯田事宜諭曰屯田回人需兵彈壓自阿克蘇至伊犁安臺傳事聲息相通最關緊要阿桂卽領駐防兵丁護送回人往伊犁管理屯田事務二十五年二月諭曰據阿桂奏伊犁所派屯田及阿克蘇調兵兼辦嗎哈沁各事宜甚屬勇往可嘉此時白以屯田爲要務阿桂著專辦耕作營造諸事務使兵丁回人樂於從事三月諭曰阿桂奏伊犁河以南有地名海努克水土沃衍請於此處先行屯種所辦甚是果能實心奮勉則屯田一事當錄伊經始之功也七月加都統銜九月奏籌辦伊犁耕牧城守各事宜一增派回人屯田一增派官兵駐防協同耕種一增派官兵隨時酌量定數一次第建置城邑一預備屯田官兵馬駝又奏請定伊犁山川土穀諸祀典俱得旨允行十一月奏伊犁土田沃衍來年復添回人兵丁屯種收穫益豐軍

實既足可無庸阿克蘇接濟報聞并給優敘是年以西陲底定圖像紫光閣御製贊曰阿克敦子性頗捷敏力請從戎宜哉惟允身不勝衣心可干城楚才繼出爲國之楨二十六年四月奏伊犁牧羣蕃息請停止內地購辦又奏招徠葉爾羌喀什噶爾阿克蘇烏什等處回人添駐伊犁耕種屢奉優旨嘉獎授內大臣六月御書詩扇賜之詩曰典屬今時班定遠冠軍昔日霍票姚雪塗無藉持清暑欲扇仁風萬里遙七月授工部尙書議政處行走兼鑲藍旗漢軍都統仍留伊犁是月奏伊犁烏魯木齊之間有瑪斯納庫爾喀喇烏蘇晶河三處請各酌派屯田兵人各墾地十五畝晶河以西歸伊犁管轄托克多以東歸烏魯木齊管轄下軍機議行二十七年正月疏定約束章程一甲缺宜均齊一錢糧宜畫一一員缺宜變通一產業宜均分一家口宜量給養贍四月奏葉爾羌等城回人續請移駐伊犁者二百四十戶其年力强壯者給籽牛令往屯田老弱者交伯克養贍幼者長成補屯田之缺並請於霍濟格巴克海努克分屯安插六月疏請建關帝廟以原任將軍班第參贊大臣鄂容安竭忠全節請於廟後設位附祀十月予騎都尉世職二十八年正月回京命軍機處行走賜紫禁城騎馬五月上幸避暑山莊命留京辦事

六月充經筵講官諭曰阿桂在軍營殊爲出力且在伊犁辦事亦甚妥協著加恩擢入上三旗嗣是隸正白旗七月調正紅旗滿洲都統十月加太子太保二十九年三月署伊犁將軍尋調署四川總督時金川酋耶卡與綽斯甲布等九土司構釁阿桂巡邊至雜谷腦查閱營伍體察番情盡得耶卡狡獪怙惡狀並悉其山川形勢奏入上嘉之又奏松茂道有彈壓諸番之責請加兵備銜自松潘各營都司以下均聽節制十二月回京任工部尙書三十年正月上南巡命留京辦事閏二月烏什逆回賴利木圖拉作亂命赴伊犁辦事三月命馳至烏什與將軍明瑞協力攻城五月賊出劫營我兵擊敗之賴逆中箭死衆伯克復推額色木拉圖爲首以抗我師六月阿桂設伏督將弁往來衝擊賊據城死守我兵持雲梯登城亦不克賊糧盡計窮屢有密約出降者賊渠悉囚之八月賊內訌有沙布勒等擒額色木拉圖以獻烏什平奏至上以阿桂等剿辦遲延示怯損威獲犯後又未確訊起釁緣由草率錯謬交部嚴議尋議革職命從寬留任十一月命駐雅爾城十二月上以阿桂辦理烏什事務毫無章程尙書任三十一年五月上以伊犁生齒日繁籌辦安置事宜須有準則可垂永久命阿桂回伊犁與明瑞協同辦事七月奏

雅爾城距牧場遙遠近城地畝不敷耕種查有楚呼楚地方田土膏腴形勝亦便請移雅爾城於楚呼楚從之三十二年二月授伊犁將軍九月奏雅爾地方未設驛站請由楚呼楚至烏爾圖布拉克地方設臺三座下軍機議行三十三年二月授副將軍命偕經略大學士傅恆副將軍阿里衮進剿緬甸四月授兵部尙書六月授雲貴總督三十四年罷總督任以副將軍專辦軍務尋授正白旗領侍衛內大臣八月諭曰阿里衮阿桂進兵野牛壩阿桂見事較爲敏捷所有諸事主見決斷朕皆責成阿桂當竭力抒誠妥協爲之九月大兵收服猛拱阿桂進滾弄奏言俟經略傅恆到時卽進攻老官屯十月奏軍營糧不敷食用諭設法辦理毋再坐待內運又諭曰阿桂諸事畏怯此次進攻猛密豈伊一人所能勝任著革去副將軍授爲參贊大臣十一月以阿里衮病故仍授阿桂副將軍尋奏傅恆染瘴見患腹泄上以老官屯水土惡劣官兵不耐瘴癘命傅恆回京留阿桂籌辦撤兵事宜是月緬酋遣頭目齎書詣軍營投誠奏入諭曰惜駁乞降如果願爲臣僕納貢輸誠則緬地皆我版籍貿易無妨相通儻僅求撤兵未請納貢通商斷不可行十二月授禮部尙書三十五年上以緬酋奉表納貢久未至情僞殊不可信屢飭阿桂

整備邊防事宜時木邦蠻暮土司及孟連土目等慮爲緬夷所害求安置內地阿桂疏言永昌大理蒙化地方有舊存馬廠官莊田可以撥給請附近安插從之二月兼授鑲紅旗漢軍都統三月阿桂遣都司蘇爾相齎檄至老官屯交緬夷頭目諾爾塔轉遞阿瓦緬人拘留之并給回文請還木邦等三土司上以阿桂等遣使失當又撤兵時辦理恩遽爲敵所輕革退其子阿迪斯阿彌達官阿桂交部議處六月奏請派兵三千分駐隴川遮放至冬襲取猛密諭曰此次進兵意在懲創使之警懾國威非利其土地宜相機行之八月部議上諭曰阿桂辦理軍務一味取巧屢加寬宥此次部議革任難以再爲曲貸所有領侍衛內大臣禮部尙書鑲紅旗漢軍都統俱著革去以內大臣留辦副將軍事務令其自效三十六年二月奏緬匪狡猾已極應於今年大舉進剿請入覲面陳機密上詰責之阿桂復以籌備軍糧各條臚奏上大舉斷不可行又復飾詞瀆告令革任仍留軍營效力九月命隨副將軍尙書溫福赴四川效用先是一年金川酋郎卡故其子索諾木夜襲革布什咱土司據其寨落而小金川酋澤旺之子僧格桑亦與鄂克什構釁并侵擾明正土司四川總督阿爾泰調兵進剿至是上以阿爾泰辦理年餘不能剋期

歲事宜集大兵分路擊之故有是命十二月命署四川提督攻克巴朗拉達木巴宗各寨三十七年二月攻克資哩山進克阿喀木雅會松潘鎮總兵宋元俊亦收復革布什咱兩金川勢日蹙於是合謀以抗大兵上以兩酋同惡相濟罪在必誅命溫福等三路進兵阿桂自西路阿克木雅進攻喇卜楚克之又攻奪普爾瑪寨進逼美美卡小金川酋澤旺遣人詣軍營以伊子僧格桑獲罪天朝不敢親來先遣人謝罪而金川酋索諾木亦遣人投稟願爲小金川與鄂克什講和令僧格桑退還鄂克什侵地令澤旺率其子僧格桑詣營請罪奏入諭曰金川酋狡詐百出今雖力竭計窮籲求免死能保其永不復反乎宜一併擒獲兩金川地方全行平定以靖邊徼是月授參贊大臣四月諭曰頃令豐昇額往阿桂處協同攻剿伊係御前大臣領侍衛內大臣尙書奏事列名應在阿桂前但阿桂歷練軍務著阿桂列名在前豐昇額不可稍存意見致有掣肘阿桂亦須和衷辦理期於軍事有益五月總督桂林在墨壘溝失利革職逮問命阿桂馳赴南路接剿六月抵卡了軍營奏西路軍營以鄂克什爲正路而曾頭溝爲協剿之師南路軍營以卡了爲正路而綽斯甲布革布什咱爲協剿之師今卡了一路再得多兵擣其西南犄角之

形既成賊腹背受敵必難支禦所有續調官兵請添派南路以資進取八月奏甲爾木山梁逼近金川爲進取僧格宗要路由墨壘前進山形雖險至山頂道路較寬前次失利後賊必驕怠正可乘其不備迅擊之隨派弁兵分防各隘口并調派侍衛鎮將等分隊潛赴墨壘溝齊集是夜按隊進發夜半乘大霧掩襲奪山梁三座破礮二十四獲火藥器械無算復派兵別由深嘉卜踞其山寨扼金川之要路自此進取僧格宗可不攻自潰諭曰阿桂覓閒攻剿甲爾木山梁甚合機宜具見實心經理著授爲內大臣十一月攻克都恭日木則札爾瑪噶察丹嘉等寨大兵逼近僧格宗賊猶力拒我兵四面合圍賊棄寨循河而遁奏入諭曰僧格宗係小金川門戶突入毀礮殲賊從此直擣美諾小金川之事自當尅日告蕝阿桂等籌畫調度悉合機宜著賞御用黑狐冠以示獎異十二月授右副將軍時溫福以大學士授定邊將軍豐昇額亦授副將軍命分道並進直取美諾是月阿桂攻克美都喇嘛寺美都形勢最高俯視美諾賊巢與近巢等礮互相犄角卽乘勝進擊盡奪其礮寨僧格桑先期遁布朗郭宗諭曰阿桂由達烏踰險進攻連奏克捷一月之中直擣美諾僧格桑雖暫時鼠竄不日卽可就獲而賊巢已破我武維揚阿桂

交部從優議敘時溫福豐昇額已由西路攻克路頂宗明郭宗日果爾烏谷山至是與阿桂會於美諾卽馳剿布朗郭宗僧格桑先送其孥於金川已遁至底木達求見其父澤旺拒不納僧格桑遂渡河走金川溫福至底木達澤旺跪道左自陳不能教束其子之罪溫福令執之械送京師三十八年正月阿桂偕溫福等奏小金川全境蕩平卽應聲討金川而金川賊巢惟噶拉依及勒烏圍爲心腹地應分三路進兵臣溫福由功噶爾拉進臣阿桂由當噶爾拉進均攻噶拉依臣豐昇額由綽斯甲布進逕攻勒烏圍報聞二月授禮部尙書議政處行走四月加太子少保是月奏請將續調黔兵赴當噶爾拉軍營五月奏請再調貴州雲南湖廣兵五千迅赴軍營備剿上命總督劉秉恬赴溫福阿桂營商定需用兵數奏明調撥時溫福移攻昔領駐軍木果木賊誘降番叛分擾我兵後路侵占糧站兩營軍報不相聞六月犯木果木大營將軍溫福死之小金川地復陷於賊軍營奏至上震怒調發健銳火器兩營黑龍江吉林伊犁額魯特兵五千赴川備剿阿桂奏木果木一帶降番旣經蠢動則當噶爾拉後路均應防範本月七日軍營降番稟稱色木則有金川賊人教令今夜同反又科多及納圍各城均有賊番滋擾業經派兵剿

堵但各路碉寨相望官兵駐守爲數無多難以分兵四出逐一剿洗因將當噶爾拉以西各寨番人盡數調出收其軍器其桀驁者卽置於法餘分送至章谷打箭鑪酌賞各土司臣營左右降番所駐之處距賊碉不遠一爲賊誘慮生事端查有叛逆實跡卽正刑章餘令將領密加看守遇有可疑者卽行嚴辦庶免返顧之虞上以所辦深合機宜授定邊將軍旋奏美諾至僧格宗二帶道路尙未通凡小金川與金川接壤之處寨落甚多均添兵防備其色木則納圍拉約等寨已分派將弁痛剿焚其寨落其僧格宗至約咱卡了至榮寨小金川賊匪俱已淨盡餘寨亦分兵剿辦不日可以克復七月命回軍至美諾已失守阿桂奏木果木功噶爾拉一路別無官兵可調惟所貯軍糧火藥尙爲充裕臣悉力籌辦鼓勵衆心尙能堅守兩三月請勿慮聖懷諭曰自以由打箭鑪回軍爲要回至內地再籌進剿旋奏見在陸續撤兵分撤各要隘防守臣等親自斷後見至翁古爾壘思紐扼要地方暫駐又奏臣在南路日久所有巴旺布並克底革布什咱明正各土司相習已慣駕馭已熟是以仍派令協同防守衆情亦俱寧帖臣今馳赴省城與督臣商定整頓軍裝並議定道路卽由桃關出口前赴西路軍營諭曰收復小金川之舉西路

尤爲緊要而西路又分鄂什克別斯滿兩路自非阿桂領兵不可其南路或令明亮富德進兵諒阿桂籌之已熟朕惟阿桂是倚惟當密爲妥籌迅速具奏是月調戶部尙書八月奏赴日隆軍營臣阿桂與色布騰巴勒珠爾在西路督兵臣富德與明亮馳赴南路是月授定西將軍九月奏金川酋挾僧格桑以誘致降番既侵占各地則令金川賊衆守之仍挾僧格桑以歸其視僧格桑如孤豚腐鼠小金川番衆俱懷怨望而各土司亦慮金酋肆毒必殄滅之始獲安枕此次收復小金川及接剿金川自屬因勢易辦俟各路兵齊尅期十月杪進兵及期阿桂從中路攻資哩令富興等攻其北成德等攻其南三日克之并收復美美卡木蘭壩鄂克什寨十月收復路頂宗明郭宗及美諾賜御用黑狐冠旋收復大板昭會頭溝其帛噶爾角克底木達布朗郭宗以次俱下南路明亮等克復僧格宗與阿桂會於美諾凡七日小金川全境蕩平十二月奏酌貯軍需之地當遠近兼資層遞相及今大兵已克美諾卽日進攻金川則達木巴宗鄂克什等處均當貯米數千石其南路打箭鑪章谷綽斯甲布之梭磨從噶克周叟並應做此分貯各路總理司道府等量地勢之遠近時候之早晚數目之盈絀隨時稟商臣等酌覈情形令分路轉

輸則接濟既便亦不致積多成累又奏小金川各寨降番各就土司戶口多寡分別賞給見將彭魯爾各寨番人均交瓦寺土司管束山札舍壘等寨番人交木坪土司管束底木達曾頭溝等寨番人交雜谷腦五寨內屯弁管束餘零星寨落戶口分給巴旺布拉克底革什咱等安插又奏查進剿金川道路惟谷噶凱立葉較爲易進臣等將一切事宜料理蠱備擇於正月初一日密往底木達初六日卽從底木達發兵不令賊人知覺令軍士兼程而進裹帶乾糧不許舉火定於初十日從谷噶了口進兵突入其豐昇額明亮兩路已飛檄寄知同時並舉其舒常宜喜軍營亦囑其駕馭新土司多派土司奮力攻擊以收牽綴之益三十九年正月阿桂行抵布朗郭宗查點兵數軍械給十日裹糧分其兵爲三隊第一隊兵五千令海蘭察等統領初六日進發第二隊兵五千色布騰巴勒珠爾等統領初七日進發第三隊兵五千阿桂自領之初八日進發越八日大兵抵谷噶阿桂督兵進擊轉戰二十餘里抵喇穆克其左右兩山及贊巴拉克諸山次日克色依谷山奏入諭曰阿桂悉心調度動協機宜領兵各員協力進攻所向克捷先賞荷包以示鼓勵仍交部議敘二月克羅博瓦山三月奏賊恃遜克爾宗與喇穆喇穆爲犄角拒

守甚嚴若從羅博瓦進據日則了口賊必悉力來拒臣擬分兵六隊襲擊別斯滿諾爾各碉以擣其虛使賊疲於應援臣另選精兵從羅博瓦直攻喇穆喇穆之後以占日則了口則格魯瓦覺各寨均歸掌握從此進攻勒烏圍更覺直捷是月晉太子太保六月攻克色溯普七月克日則了口進攻遜克爾宗八月奏金川逆酋本爲各土司所切齒卽竄往他處亦斷不敢收留但力竭勢窮爲鋌而走險之計亦未可定當早爲檄示俾各先事豫防謹將諭旨指示勿留餘孽以滋後患并曉諭諸番協同擒獲之處譯出番字發各土司遵照加意嚴防不得絲毫疏懈上嘉之是月大兵攻遜克爾宗甚急賊酋僧格桑死於金川金川酋獻其尸阿桂仍督兵進攻九月奏賊以遜克爾宗爲緊要門戶死守愈力急切未能攻克當另由日爾巴當噶等處爲出奇制勝之計十月賞黑狐冠貂馬褂各一是月克默格爾山及凱立葉各險隘時我兵已深入賊巢而日爾巴當噶達爾札克等賊碉俱在我兵後阿桂派諸將率兵悉掃平之諭曰將軍阿桂自統兵進剿以來實心調度諸事皆合機宜此次又將日爾巴當噶全行攻克接通凱立葉指日卽擣勒烏圍甚屬可嘉著授爲御前大臣並賞戴雙眼花翎用昭恩眷十一月克格魯魯見古了口

金川東北之賊剿洗殆盡四十年正月克康薩爾山梁二月克沿河斯莫思達寨
四月克木思工噶克了口五月克下巴木通及勒吉爾博山梁進據得式梯復克
噶爾丹寺噶明噶等寨進攻巴占賊捨死抵禦屢戰未下阿桂相度形勢分兵從
舍圖枉卡繞擊以分賊勢七月克昆色爾及果克多山進克拉枯喇嘛寺蓄則大
海山梁旋克章噶諭曰阿桂籌辦軍營大小諸務實爲盡心時當盛暑統衆攻堅
賢勞足念因御製詩六韻親書箑頭賜之以示嘉獎詩曰掌握師行掄俊豪事無
巨細一心操功成九仞尤應慎惠洽諸軍實所裒探路欲因乘怠隙攻碉直可壓
危撓我居避暑原無暑卿效賢勞真是勞嘉予七言錫書扇凱歌三捷換征袍勉
之指日親郊勞紫閣勳銘崇爵叨八月克隆斯得寨獲其火藥槍子無算賊益不
支遂克勒烏圍賊巢諭曰官兵攻克勒烏圍已降旨將軍等從優議敘並遣阿彌
達齋紅寶石頂帽至軍營賞給阿桂俾益奮迅集勳九月克當噶克底達思里噶
拉宇莫魯古各寨十月克達木噶十一月克西里山雅瑪朋寨十二月克薩爾歪
寨旋克科布曲索隆古寨屢奉優旨褒敘旋授鑲黃旗領侍衛內大臣是月進據
噶占大頭人色木里雍中及布龍普阿納木等降四十一年正月克瑪爾古當噶

碉寨五百餘遂圍噶拉依諭曰阿桂等奏官兵已將金川全境掃平見在四面圍攻噶拉依巢穴賊酋索諾木弟兄及作惡頭人均在圍內且索諾木之母姑姊妹均已來營投降更不虞索諾木等尙懷觀望所有渠兇黨惡自必卽行擒縛馳遞紅旗褒績酬勳宜頒渥典阿桂蓋誠體國不憚艱勞制勝運籌克成偉績實爲此事首功加恩封爲頭等誠謀英勇公並賞四團龍補服金黃帶以昭崇典旋授吏部尙書協辦大學士是月莎羅奔岡達克降二月索諾木彭楚克及大頭人達爾什桑卡爾雅瑪剛阿庫魯降翌日逆酋索諾木降黨惡頭人等悉數就擒金川平奏捷諭曰此次平定金川實皆阿桂一人功績茲班師在邇特解親御黑狐骸黃馬褂先行隨報賞賜三月奏兩金川屯田事宜所有番衆擬分安於金川河東河西與官兵相錯而居並遵旨一體酌給牛具籽種此時屯田之初姑免其租賦三年後均照屯練納糧例交官以佐兵食下軍機議行四月命軍機處行走恩賞緞六十端銀六千兩是月庚申上東巡還駐蹕黃新莊阿桂等凱旋詣行在恭請聖安戊辰上幸良鄉城南行郊勞禮賜御用鞍轡馬一匹是日扈蹕還京己巳獻俘禮成上御紫光閣行飲至禮親賜阿桂等卮酒賜紫韁及四開襖袍圖像紫光閣

御製贊曰西師參贊經歷多年茲爲巨擘掄掌兵權誠而有謀英弗恃勇集衆出奇成勳元鞏五月上幸避暑山莊命留京辦事八月阿桂六十生辰賜崇勳者慶扁額聯云功冠紫光榮賜袞籌添絳甲贊調梅御製詩云功高殊衆賜冠衣壽日充閭耀吉輝謀勇奏平定玉壘歸來俾協贊黃扉六旬慶自今伊始廿四考當逾古稀不說保全最黽勉名同郭令豈其非四十二年正月雲貴總督圖思德奏緬酋惜駿已故其子贅角牙襲頭日得魯蘊具稟情願送還內地人輸誠納貢懇請開關上以受降通市及善後章程必得曉事之重臣相度妥辦命阿桂前往經理五月授武英殿大學士管理吏部兼正紅旗滿洲都統是月緬目送還蘇爾相等至虎踞關奏入遵旨回京六月調鑲白旗滿洲都統充玉牒館國史館四庫全書總裁文淵閣領閣事經筵講官十月調鑲黃旗滿洲都統管理戶部三庫四十二年四月充殿試讀卷官閏六月兼管理藩院事七月署兵部尙書時上詣盛京命留京辦事十一月命在總詣達上行走四十四年正月河決儀封蘭陽等處命赴河南查辦阿桂至工詢訪河狀開郭家莊引河築攔黃壩嗣以下流淤澱上流潰溢且風水時作屢築屢開因於王家莊築挑水壩順黃壩兜蓄水勢逼溜直入引

河至次年三月隄工始集四十五年正月兼翰林院掌院學士五月留京辦事十二月命勘浙江海塘四十六年正月奏劾杭嘉湖道王燧買部民女爲妾拆毀民居建造私宅及原任嘉興府知府陳虞盛前與王燧同在差局浮冒侵蝕等罪尋抵工次悉心履勘度潮勢之緩急沙性之堅軟工力之難易請築魚鱗石塘與柴塘並修以資鞏固而垂永久於是老鹽倉范公塘各隄一律修固二月命順道往清江查勘陶莊河身情形並高堰石工是年撤拉爾新教逆回滋事進逼蘭州上命阿桂督師剿除阿桂自磁州接旨卽馳赴軍營時賊已爲官兵所敗退踞龍虎華林等山阿桂派弁兵分三路擊之斃賊數百人賊勢漸蹙阿桂察看地形我兵必由龍虎山過溝再上華林山而山澗經水衝刷俱成橫截立礮僅容一人一騎兵力不能施展阿桂籌議俟川兵及阿拉善兵到齊以川兵攀踰險阻直擣賊巢以阿拉善兵防其竄逸乘其追捕可期一鼓剿洗淨盡而賊自創敗以後掘濠增卡止留向南小路盡力抵禦爲死守計是月各路兵及屯練兵抵營阿桂屢設伏誘戰賊出抗拒皆殲戮之五月攻克華林山大卡逼近賊營阿桂派兵四面設圍絕其水道六月督兵進攻賊營賊大潰逆首蘇四十三殲焉尋奏甘肅應行撫卹

事宜得旨俞允七月搜剿逆回餘匪始竣奉旨議敘時甘省監糧折色冒賑事覺上命阿桂按之盡得大小官吏通同舞弊狀讞定奏請添設倉廩存貯以濟民食又奏安插各城回衆及添設循化參將復設河州州判以資撫馭俱下軍機議行是秋河決青龍岡命赴河南會同河道總督李奉翰督辦十月抵工督同員弁將東西兩壩先後下埽引河流行漸暢十二月兩壩甫合龍而東壩旋又塌蟄阿桂等自請治罪求諳習河工大臣來豫籌辦諭曰近年諸臣中經理河務較有把握者舍阿桂豈復有人惟當安心靜鎮另籌妥辦旋奏請將青龍岡迤下至孔家莊榮華寺楊家堂引河一律加寬以期河流宣暢四十七年四月奏請另於青龍岡迤上自蘭陽至商邱添築大隄挑挖引河并於北岸建築壩基逼溜南趨以期截溜全歸新河得旨允行五月詣熱河行在復命面奉指示仍赴工所酌定章程分派段落委員承辦九月浙江布政使盛住揭總督陳輝祖查抄王賈望貲產抽換金玉上命阿桂蒞浙按之讞定順道勘南鹽河等處宣洩機宜及東伊家河運各工四十八年二月命勘河南蘭陽十二堡隄工並酌建戴村壩迤上閘座三月工竣回京命管理戶部刑部事四十九年甘肅鹽茶廳逆回田五等滋事田五斃張

阿渾等糾其衆踞石峰堡擾及通渭伏羌靜寧等境上以總督李侍堯等辦理失宜遣尙書福康安領侍衛內大臣海蘭察帥師往剿旋命阿桂督辦六月至軍與福康安等議安卡掘壕聚兵圍之使不得他竄凡賊匪滋擾之處派兵搜剿以次肅清七月進攻賊巢殲其衆八百餘人生擒七百餘人首逆張阿渾大通阿渾賊目楊慎四等悉數就擒械送京師敘功予輕車都尉世職八月命督河南睢州隄工三閱月工竣五十年舉千叟宴命領班入宴賚如意壽杖貂皮補服蟒袍八月再勘微山睢州工並閱洪澤湖清口情形十月回京賜調元錫瑞扁額五十一年四月再勘清口隄工六月查辦浙江倉庫虧缺彌補實數並勘海塘石工閏七月勘江南桃源安東黃河漫口情形及堵築事宜八月再赴浙江按平陽縣重徵案是月七十生辰賜平格延祺扁額聯云耆筵錫慶高千叟雲閣銘勳贊上台並如意紅絨結頂冠朝珠補服蟒袍貂皮等件九月回京總理兵部事務五十二年四月署正黃旗蒙古都統充殿試讀卷官五月留京辦事教習庶吉士六月赴河南督辦睢州十三堡漫口工程時臺灣奸民林爽文滋事遣福康安督剿上以阿桂素諳軍務如有所見據實奏聞阿桂奏大兵進剿宜扼其要害分路進攻先打通

諸羅使官兵聲勢聯絡並宜於鹽水港等處廓清後路由大甲溪剋期進攻庶易
掃除諭曰所見與朕略同已將一切機宜詳悉指示福康安辦理十月睢州合龍
勘江南臨湖輒石隄工五十三年正月回京二月臺灣平諭曰大學士阿桂夙興
夜寐一體宣勤著交部議敘圖像紫光閣御製贊曰戡外守中居恆亮功馳咨軍
務志每予同歸朝襄贊翦逆除兇三登紫閣福厚功崇七月勘湖北荊州被水情
形疏下流審金洲以導水勢修萬城隄以護城垣十月回京五十四年三月命充
上書房總師傅四月再勘荊州隄工五十五年二月上東巡五月巡幸熱河俱命
留京辦事五十六年五月如之時阿桂子工部右侍郎阿必達故軍機大臣奏聞
諭曰阿桂年高恐因此事悲切體氣失調賞給爛餅一匣務須仰體朕意善自寬
慰九月大兵征西藏廓爾喀五十七年廓爾喀平以阿桂贊襄機務圖像紫光閣
御製贊曰七旬以上身體康強從不言功黃閣贊襄威克久安曾亦協謀亶一个
臣有容休休嘉慶元年正月戊申朔太上皇帝授璽禮成今上皇帝卽位越四日
再舉千叟宴阿桂領班入宴如前儀八月八十生辰太上皇帝賜介眉三錫扁額
聯云純嘏懋勳延帶礪耆齡碩望重絲綸聖製詩云黃髮未曾駘背白廿年於是

掌絲綸試看信史今兮古幸我斯時君與臣耳重日明政何礙前功後業福猶申
相期矻矻漫言老七字促成賚壽辰九月辭管兵部十一月以疾乞假二年八月
卒奉太上皇帝敕諭大學士公阿桂老成練達辦事多年自平定西陲時卽隨同
出師旋經理新疆事務周詳妥善懋著勤勞嗣剿辦兩金川界以將軍重寄稟承
方略堅持定見克蕨膚功特封爲一等誠謀英勇公賞給四團龍補服黃帶紫韁
紅寶石帽頂雙眼花翎圖形紫光閣以旌殊勳續經簡任綸扉綜理部務贊襄樞
要二十餘年前因撒拉爾及石峰堡回匪滋事統兵剿捕立就殄平復加恩賞給
輕車都尉世職令伊長孫承襲疊沛恩施正資倚畀邇來雖精力稍衰兩耳重聽
猶照常趨直夙夜靖共頃聞患病頗劇卽特命三皇孫貝勒綏億御前侍衛豐仲
濟倫由熱河馳往看視並賞賜陀羅經被仍冀調理或可就痊茲聞溘逝深爲悼
惜著卽令綿億並另派散秩大臣一員帶侍衛十員前往奠醊加恩晉贈太保入
祀賢良祠九月今上親臨賜奠御製詩云帝念功勳舊朝廷重上公將星落霞表
箕尾見雲中函丈儀曾侍綸扉望最隆路人知感泣不愧世家風賜祭葬諡文成
子阿迪斯原襲一等誠謀英勇公官四川成都將軍緣事革退恩賞六品頂帶阿

必達原名阿彌達官至工部右侍郎先卒孫那彥珠襲一等誠謀英勇公那彥瞻原襲一等輕車都尉緣事革退那彥寶襲一等輕車都尉見官戶部右侍郎兼左翼總兵那彥成乾隆五十四年進士由編修遞擢至直隸總督嘉慶十八年十二月剿除河南教匪克復滑縣封三等子爵十九年正月班師復命諭曰那彥成係阿桂之孫亦由平日習聞祖訓勉紹家聲故能宣力效猷懋膺爵賞茲追念舊勳著於本月二十九日在阿桂墓次賜祭一壇著禧恩前往奠酒用示朕眷舊酬勳至意二十一年那彥成因前在陝甘總督任內那移賑銀並捏奏捐廉等事奉旨革職

福康安

福康安滿洲鑲黃旗人姓富察氏曾祖米思翰戶部尚書祖李榮保察哈爾總管俱追封一等公父傅恆大學士一等忠勇公追贈郡王爵銜米思翰傅恆均有傳乾隆三十二年福康安由閒散襲雲騎尉授三等侍衛命在乾清門行走三十四年擢二等侍衛命御前行走三十五年擢頭等侍衛三十六年授戶部右侍郎鑲藍旗蒙古副都統三十七年調鑲黃旗滿洲副都統大兵征金川以溫福爲定邊

將軍阿桂豐昇額爲副將軍命齎印往軍中授領隊大臣三十八年正月副將軍阿桂兵攻當噶爾拉山適福康安齎印至令同領兵六月賊潛通小金川陷木達木果木大營失事命阿桂爲定西將軍分道再舉十月由資哩進克布朗廓宗諸寨復據美諾三十九年二月大兵攻喇穆喇穆福康安克其西各碉會領隊海蘭察既取登古高峯遂乘勝克羅博瓦山上以羅博瓦爲賊要隘攻取時將領等董率得宜賞之三月從羅博瓦峯下北剿克得斯東寨夜有賊七八百人乘雪霧潛登山犯副將常祿保營福康安聞槍聲急以兵援擊賊退上嘉之五月賊雨中於山坡立兩碉福康安夜率兵八百冒雨毀垣入殺數賊立毀碉上嘉其壯軍威而破賊膽特旨襲獎尋奪喇穆喇穆山口木城後石卡二六月克色湖普南山碉福康安爲應視海數十殲賊數百阿桂令領隊額森特夜進兵攻色湖普南山碉福康安爲應視海蘭察兵登山巔並力助戰天明望海蘭察至碉下疾驅衆越重濠過冒槍石與賊持使不得他顧我兵遂得盡破喇穆喇穆碉卡取日則了口七月克嘉德古碉攻遜爾克宗西北寨有賊數十潛襲我兵後福康安擊退之賊既困於圍內日以距勒烏圍近恐破其巢也數夜出侵木城礮臺福康安屢敗之阿桂以賊死守險隘

改道由日爾巴當噶路入令福康安攻達爾札克山下各碉克之十一月攻格魯克古率兵裹糧夜踰溝攀崖上從山罅入取當噶海寨陡烏當噶大碉壓桑噶斯瑪特取其木城石卡四十年三月克勒吉爾博寨戰碉二賊從噶爾丹寺來援敗之四月阿桂分兵一千令福康安從參贊海蘭察赴宜喜軍先取甲索進攻得楞山下臨河賊碉拔石卡三又焚薩克薩谷大小寨數百渡河取斯年木咱爾斯聶斯羅市二寨上以福康安西路得力之人調宜喜攻剿尤爲出力授爲內大臣五月克榮噶爾博山進至第七峯賞嘉勇巴圖魯號六月於第七峯下冒槍石成木柵九接第八峯麓賊恃險拒守攻未克七月從舍圖往卡繞截大兵進至章噶福康安偕額森特攻巴木圖登直古腦山拔木城碉寨五十焚冷角寺下壓勒烏圍賊巢八月旣望夜半分兵自西北攻入破其寨據之遂克勒烏圍九月整兵直攻噶拉依初從達思里正路賊覺改由達烏圍分隊七福康安領第一隊奪達沙布果碉當噶克底綽爾丹諸寨又從達思里下起木柵斷科思果木與雅瑪朋所通路十月攻達噶木率左右兵繞出克堅碉二閏十月從阿穰曲下登前峯克大碉木城各二十十一月攻奔布魯木護起寨兵攻入碉洞其垣擲火焚之賊無得脫

者又克舍勒圖祖魯旁碉一寨二格什格章寨一薩爾歪碉寨三阿結占寨二十二月攻科布曲正梁由左進攻其礮卡遂盡得科布曲寨賊又於布哈爾下積木中潛伏以拒福康安從海蘭察攻破之悉取諸寨據噶占四十一年正月克舍齊雍中兩寺自拉古爾河圍噶拉依之右奪大石卡二移礮擊其寨首逆就縛金川平封福康安爲三等嘉勇男其原襲雲騎尉以福隆安次子豐仲果爾敏襲命獻俘馘上幸良鄉城南行郊勞禮賜御用鞍轡馬一御紫光閣飲至賞緞十二端銀五百兩閣上繪像列前五十功臣御製贊曰代兄以往繼父而奮矜許廩勵王臣之蓋登碉奪砦那須蒙甲嘉勇錫名世傳勲業轉戶部左侍郎四月擢鑲白旗蒙古都統七月賞戴雙眼花翎九月調正白旗滿洲都統十月賜紫禁城騎馬四十二年授吉林將軍四十三年調盛京將軍四十五年授雲貴總督尋奏銅廠立法宜詳用人尤要應實稽查各廠專理兼理官任事後所得銅數以憑甄別初試者必察其貪廉勤惰用定勸懲以冀廠內多一得力之人卽於將來銅政有裨至私錢燬於既行之後尤須禁於未鑄之先私鑄黑白利在多鉛少銅滇省前禁私銅未禁私鉛是以奸民於附近鉛廠賣鬻私鉛易滋私鑄若鉛銅於官給印券通商

額鉛外有券外夾帶及無券之鉛嚴禁無漏則奸民無利可圖勢將日止又奏滇銅多爲開采以裕其源無庸加價皆從之四十六年七月南掌國貢象四復陳交趾等國劫掠無禦敵器以餘象一求予礮福康安檄諭以國家法制有定不容妄求還其象不予之礮奏入上是之八月調四川總督兼署成都將軍命嚴緝噶匪四十七年五月奏蜀中匪徒已戢陳善後事保甲則量戶口地址立法清釐匪犯則並父兄牌甲各予治罪窩家嚴緝查拏賭博倍加禁戢僧道備販乞丐流民分別稽查遞籍銅鉛礦廠水手撈夫各有責成約束嚴禁持造兇刀停止海查兵役講聖諭廣訓並欽奉上諭律例冀使返樸還淳潛消暴戾噶匪字本無意義留此名色轉難示儆請改爲川省匪徒惡名旣已消除匪迹自無蹈襲從之八月擢御前大臣加太子太保四十八年四月命來京署工部尙書五月授總管鑾儀衛大臣閱兵大臣總管健銳營事務十二月命馳驛往廣東查鹽商公捐費買物修貢事四十九年三月奏商人所備貢物俟一二年商人充裕督臣代進洋商修物監督代進諭曰商人等領帑經運交課不過微末之人原不得非分進貢福康安所奏督臣代進竟應議駁洋商與鹽行無異斷不可行閏三月擢兵部尙書總管內

務府大臣四月甘肅逆回田五等私起新教聚衆滋事上命福康安帶欽差大臣關防馳驛往剿五月授參贊大臣同將軍阿桂會剿是月授陝甘總督六月統兵赴隆德進剿底店賊馬文燾率衆降由雙峴小路至賊卡立卡進逼七月率兵築卡及壕斷賊水道圍益急賊思撲卡竄阿桂命參贊海蘭察設伏於隘福康安往來督戰殲賊數千遂破石峯堡生擒賊首張文慶等晉封嘉勇侯五十年正月奏回民習武者多而習文應試者少當使沐浴詩書通知禮義馴其桀驁之氣即可化其頑梗之風則教導回民洵爲善後要務請於循化廳設學校以資訓迪上嘉之七月轉戶部尙書五十一年轉吏部尙書協辦大學士奏修寧夏各渠以興水利從之五十二年臺灣居民林爽文圍嘉義縣七月命福康安爲將軍偕參贊大臣海蘭察往剿十一月渡鹿仔港登岸後由新埤進兵援嘉義遇之搜剿至崙仔頂彼於竹園中突出抵禦福康安令兵屹立勿動率巴圖魯侍衛衝入其中敗之攻克俾長等十餘莊會天暮雨大至戰益力復克北社尾等處疾馳至縣慰撫畢盡運所得之糧入城以助民食圍旣解追擊至大排竹決溪水渡兵悉焚穴巢餘黨皆殲焉諭曰福康安調度有方振作士氣克敵致果迅奏捷音著封一等嘉勇

公賞紅寶石帽頂四團龍補服以示優異初嘉義被圍時提督柴大紀奏城中食盡竭力死守蔡攀龍奏督兵赴援斬擊通道至是福康安劾攀龍損兵多而圍不解大紀賴衆民一心奮勉以保孤城又軍餉未絕所言詭詐不可信上以二人守戰有功恐因提督大員屢經恩旨褒嘉或稍涉自滿在福康安前禮節不謹致爲所憎遂爾直揭其短會浙江欽差成德以柴大紀執法牟利狀上聞上曰柴大紀貪縱不職釀激事變福康安前次奏到之摺竟未言及祇含糊其辭實大不是豈欲待朕自爲揣度卽著傳旨嚴行申飭十二月剿城西大崙莊又焚城東興化店及員林巢穴督兵剿北路時彼據大浦林中林大浦尾三莊分兵三路並進乃同時潰又破菴古坑羽目蔡福柵收復斗六門抵水沙連彼等遁進攻大里杙穴巢獲羽目數十羽黨二百其首逃入番社未獲擒其家屬初福州將軍恆瑞擁兵鹽水港不救嘉義妄請益兵上命福康安劾之福康安袒恆瑞奏不以實五十三年正月諭曰恆瑞自臺灣帶兵赴援觀望遷延種種玩誤又妄行奏請添兵張大敵勢若治以搖惑軍心之罪卽應按照軍法立斬朕因念恆瑞年輕無識且係宗室姑援議親之條不卽置以重典乃福康安節次奏到之摺曲爲庇護且屢經令福

康安向恆瑞嚴詰妄請添兵搖惑軍心是其首罪乃福康安並不問此一條轉爲之多方開脫且稱其打仗奮勉仍請留於軍營其意不過遇有帶兵打仗即將恆瑞鋪敘功績冀朕加恩錄用豈能逃朕洞鑒福康安由垂髫參養經朕多年訓誨至於成人今甫經委任畀以軍營重寄卽見在剿捕亂民攻克穴巢皆朕指授方略再三訓示將士等踊躍用命始能所向克捷今甫經解圍得勝朕卽優加獎賞福康安自當倍加奮勉迅速擒拏爲首剋日蕙功以期承受恩眷乃竟敢藉此微勞袒護親戚此等伎倆豈能於朕前嘗試耶本應從重治罪因念其見在帶兵平亂業經攻克巢穴拏獲亂民家屬姑從寬免其深究著傳旨嚴行申飭尋統兵由內山搜至打鐵寮及鰕骨合歡諸社至極北之炭窰分兵截海口及各要隘使不得遁仍恐爲首見追急自戕密令巴圖魯侍衛十人及屯練兵數百易裝入緝生擒林爽文於老衢崎俘獻京師上念福康安功親解佩囊賜之二月督兵至南路由灣裏社剿南潭大穆殺散村寮水底寮等餘黨令福州將軍常青增兵嚴守諸海口追擊至極南之瑯嶠諭柴城隴巒居民僞留逃者以防驚竄分軍水陸並發至柴城陸路軍隊伍進至海岸執兇渠莊大田以獻悉除餘黨臺灣平諭曰福康

安此次前往督辦剿捕事宜遵照節次指示調度有方用心周密真能不負任使
朕爲嘉許著賞黃腰帶紫韁金黃辮珊瑚朝珠用示優異又命於臺灣郡城及嘉
義縣建生祠塑像又繪二十功臣於紫光閣御製贊曰金川領兵已著偉名幾處
封疆吏肅政成解圍擒逆能人不能崇封殊爵嘉爾忠誠六月奏熟番募補屯丁
應按番社酌挑令就近防守設屯弁以轄之給近山埔地資其養贍免其徭役清
釐所墾田以定界址點驗所製器械以備稽覈又奏善後十六事其要在於習戎
事除奸民清吏治肅郵政上皆從之十一月調閩浙總督五十四年正月調兩廣
總督二月奏安南阮匪復糾衆滋擾若俟奉諭旨始起程則行已緩心實不安已
赴漳泉閱兵俟再得粵中信卽兼程前赴粵西諭曰孫士毅前於黎城退出之後
朕以閩粵境壤毗連福康安得信必卽奏請前往早向軍機大臣言及今福康安
果有此奏不出朕之所料福康安秉性公忠能視國事如家事其才猷識見又能
明敏周到如此方不愧爲休戚相關實心任事之大臣四月奏安南阮光平恭順
輸款不必用兵上允所請六月奏歲兵後應以馘羶營轄鎮南關汛增兵巡察沿
邊各隘口排柵開壕禁防出入以杜偷越有內地人與夷人聯姻質田者治其罪

議行七月巡漕御史和琳參奏湖北按察使李天培私交湖廣糧船分運材木訊得福康安寄書索購情事嚴旨令自劾尋諭曰此案固由李天培假託聲勢牟利行私而其實總緣福康安託辦所致卽當治以應得之罪若見無安南輸誠求覲一事雖福康安平定臺灣功績懋著覈其情節尙不至革去公爵其所賞紅寶石帽頂四團龍服黃帶紫韁俱應革除斷不能施恩予留第念見在阮光顯前赴熱河瞻覲阮光平又懇於明年親自來京祝嘏儻將福康安所有章服遽行更換非特觀瞻不肅且類於愛憎無恆所關甚鉅福康安自請撤回公爵章服等項及斥革治罪之處著加恩免其撤回斥革福康安受恩深重乃不能加意謹慎致蹈愆尤亦不可無以示儆著罰總督養廉三年仍加罰公俸十年並帶革職留任用昭懲創十月獲洋盜林亞五等二十人審明抵法五十五年率安南國王阮光平來朝京師其返也命仍隨福康安行八月參將錢邦彥巡洋至崖州遇盜被害命與阮光平湖北別後回粵嚴緝洋匪五十六年二月諭曰福康安在兩廣總督任內緝拏洋匪整飭地方諸事認真妥協殊屬可嘉前罰養廉除已交納外著加恩寬免三月獲崖州案內盜犯周元保等續獲蜚家二等又獲疊劫盜犯霍發鬆鄧全

陳阿暴等先後抵法六月安南夷人請通市奏請定商人由內地出口先從原籍
確查繼飭關隘察驗夫船預編清冊行館各有責成回關勒定期限進口確驗牌
照在夷地則杜其逗遛於場廠則防其勾結違禁貨物加意盤查私越奸徒申明
稽察責鎮道以綜理俾丞牧以專司議行十一月廓爾喀賊匪擾後藏命福康安
爲將軍偕參贊海蘭察率巴圖魯侍衛往征之諭免所罰公俸五十七年三月抵
後藏四月自第哩浪古前往絨轄聶拉木察地勢以濟隴爲進兵正路疾行向宗
喀五月至轄布基時諸路兵未集先以所率衆進剿值雨夜分隊六逕趨擦木黎
明潛登山奪賊前碉賊守後碉不出官兵毀垣入短兵接戰殲賊目三賊衆二百
生擒十餘乘勝抵瑪噶爾轄爾甲山梁山下有紅旗賊目率衆擁上因令官兵設
伏留一路誘賊進至山半橫截賊隊奪其旗殪賊幾盡進攻濟隴濟隴爲賊要塞
大碉據險立各碉卡互相援應成犄角勢乃分兵攻撲翦其旁寨旣淨遂並力攻
中堅縛大木爲梯令屯兵蟻附登毀石壘礮擊之自丑至亥克其寨斬級六百生
擒二百奏入賜御製誌喜詩書扇及御用佩囊六月由濟隴進至索勒拉山下有
大石卡二大軍直前毀卡賊遁追至熱索橋賊急撤橋用火器隔河擊之不及賊

因令暫退密遣兵東越峨緣山從上流潛渡轉次賊前卡殲賊數十正路兵渡河奪其後石卡賊蒼黃竄多墜河中者進至密哩山頂徑益險仄日越大山數重令兵修路前進深入七十里不見賊旺噶爾西南橫亘一河旺堆在河北協布魯克瑪在河南迤東爲克堆寨賊各築卡死守大兵至旺堆賊扼河拒不得渡留兵牽綴之潛從上游縛木渡直薄克堆寨分三路進攻出賊不意賊大潰旺堆兵亦濟追戮甚衆由噶多進至作木古拉巴載山梁望對峙之大覺山賊營林立中隔一河山險峻不可下令駐一軍於山以一軍從噶多魯山下渡取其近河礪卡賊自陡礪上木城繞出力拒奮擊擒其魁餘皆竄大兵冒鋒刃鼓勇登破其木城時山梁一軍亦下爲橋以渡夾攻大敗之克大小賊寨十一賊營三石礪四木城五石卡二十戮賊目七賊黨四百結營雍雅山賊首乞降不許七月進攻噶勒拉山三路並捷追賊上堆補木山奪其卡由堆補水下山爲帕朗古橫河賊阨橋拒官兵奪橋過直攻甲爾古拉集木集兩要塞賊八千人來援且欲奪橋督兵力戰敗之凡接戰兩晝夜越大山二克木城四大小石卡十一戮賊目十三賊六百生擒十七賊酋畏懼乞降有旨許納款班師方福康安之未受降也諭曰此次督兵屢戰

克捷且經越艱險冒雨步戰手足胼胝用兵之難爲從來所未有實屬奮勇出力著加恩實授爲大學士會十五功臣圖像成御製贊曰百戰久經兩功近成近之險絕前聞未曾七戰七勝度索乘桴舊勳新讓嘉許首圖時大學士阿桂以未臨行陣奏以福康安爲首功也九月賞一等輕車都尉令其子德麟襲十一月諭曰福康安進剿廓爾喀如能直抵陽布將拉特納巴都爾巴都爾薩野悉數生擒解京獻俘其上宇分給附近各部落其功甚大前代功臣原有生非宗室晉封王爵之例朕本擬俟紅旗遞到加封王爵以昭異數今因廓爾喀畏罪投誠福康安遂傳旨受降班師歲事是以止將福康安賞給世職不克副朕初願然由今思之受降歲功未始非上天嘉佑我君臣之意蓋福康安係孝賢皇后之姪大學士傅恆之子如果得成鉅功或可晉封王爵祇以勳勞甚大用示酬庸而天下無識之徒或謬議朕厚於后族破格施恩傳之後世亦且以爲口實幾與漢唐之寵任外戚者無異朕將何以自解而福康安父子兄弟多登顯秩福康安又荷王封富察氏一門太盛於伊家亦屬無益但福康安旣成大功朕又不得不加以殊恩轉覺兩難茲如此竣事諸臻完善朕旣免加恩后族之嫌福康安亦無盛滿難居之慮較

之蕩平廓爾喀地方倍爲欣慰也惟是福康安此次跋涉險阻備嘗艱苦且調度有方使廓爾喀震懾威稜誠心向化可期永靖邊陲僅予世職尙不足以酬勞勩已授爲領侍衛內大臣將來在總管任內僅有千總等官跟隨不足以示寵異著照王公名下親軍校之例賞給六品頂戴藍翎三缺令福康安於伊得力家人內酌量給戴用昭格外加恩優眷勞臣至意十二月奏衛藏增汛練兵鑄錢通貨覈商上收支免番衆納賦又奏駐藏大臣每歲親視邊境理事應與達賴喇嘛班禪額爾德尼等禁其族屬不得與公事有大小番日缺出會同揀放前後藏應各置文員以理錢粟定聽差兵額以實操防五十八年正月奏藏內善後十八事一曰達賴喇嘛班禪額爾德尼與外番通信應告駐藏大臣二曰各邊境設鄂博三曰選邊界營官視內地邊俸例推升四曰禁襲充番目五曰諸大寺坐牀堪布公同補放六曰商上銀錢出入照新定數目畫一收放七曰濟隴聶拉木邊界收稅毋庸酌減八曰禁私給免差照票九曰僧俗戶口造冊清查十曰蒙古延喇嘛誦經由駐藏大臣給照往十一曰禁私用烏拉十二曰禁罰贖不公及私抄沒家產之弊十三曰官兵所需火藥就地配造十四曰達賴喇嘛賞噶布倫戴琿田廬不得

私占十五曰禁商上喇嘛預支錢糧十六曰各寨租賦按年收交商上逃亡絕戶免十七曰駐藏大臣署設譯廓爾喀番字吏十八曰廓爾喀貢使往來派文武官衛送又奏外番商人來藏者酌定次數由駐藏大臣給照往來由江孜定日兩汛官弁察之尋常交易隨時稽驗毋得私越均得旨議行三月安南國王阮光平卒上慮該國人心反側命福康安速赴粵西四月福康安母卒於家諭曰福康安三月甫抵邊壩至成都尙需五十日到京已在六月下旬百日將滿已屬無及福康安爲國家出力之人屢著勞績見因奉差在外以致伊母大事不獲躬親料理喪用爲之惻然然福康安若到京朕心轉不忍與之相見應在途成服辦理廣西事竣卽赴廣東在任守制過一二年朕酌量降旨再行赴闕上又以福康安途中患病令御醫涂景雲往視五月奏接廣西巡撫陳用敷扎知安南人心悅附四境平寧臣到粵不過遣員前往致祭別無要務臣母撫臣成立以仰邀恩佑今甫遭此事竟不到京卽赴總督之任不但心實不安且恐督亂治事未協轉負委任且臣母每勸臣勉圖報稱不得以定省遠違分心內顧茲既不獲侍湯藥親身含斂惟思於未卜窀穸之前居廬數日臣悲慕之心已伸鬱結之懷亦釋犬馬之疾轉得

速痊此臣迫切私情不敢於聖主之前稍有諱飾尋詔許來京六月加封嘉勇忠銳公八月調四川總督是歲金川土司年班入覲命福康安領之五十九年正月吉林將軍恆秀治漢務虧缺庫項勒派民戶命福康安往訊擬罪從輕諭曰福康安與恆秀誼屬姑表弟兄有心徇庇從寬定擬希圖含混了事福康安受朕厚恩特加簡派自應秉公持正方爲無負任使乃瞻顧親誼曲庇局員本應治以應得之罪因念其辦理廓爾喀一事不辭艱險著有勞績是以姑從寬宥但伊審辦此案種種瞻徇豈能於朕前調停混過著嚴行申飭既至四川親至重慶獲私鑄奸民曾石保等七月調雲貴總督九月諭曰朕披閱廓爾喀紀略福康安於人跡不到之處攀援登陟殊爲眷念已調任雲貴總督此時至重慶前赴雲南時屆冬令天氣漸寒特將御服黑狐大氅褂賞給俾資途中禦寒以示優眷六十年二月貴州逆苗石柳鄧聚衆圍正大營嗅腦營松桃廳三城湖南逆苗石三保等圍永綏附首逆吳半生爲亂命福康安督兵赴剿敗賊於銅仁之盤塘坳正大營城圍解正大之東爲新寨通楚境苗寨聚焉卽率兵進剿焚大寨二十六獲糧萬石以助民食閏二月繞出高壠坡破賊柵數百自高壠坡至嗅腦皆賊寨其巖門寨地所

坪尤險縱火焚之進克官舟營木城分兵取倬山等寨百餘復合趨嗅腦解其圍乘夜進兵悉焚野牛山白巖聖賊巢以清後路向松桃廳賊先於圍城時環立寨寨大兵至盡燬之城中兵亦出應賊遁上以福康安連解三圍迅速可嘉賞戴三眼花翎是時福康安率黔兵既剿淨後路老虎巖諸賊寨偵知石柳鄧據大塘汛大寨營適和琳所領四川兵亦至期於滿華寨合兵力剿焚賊寨四十石柳鄧渡河逸入楚匪石三保黃瓜寨中三月大兵臨河賊於對岸築卡拒守乃分兵潛從上流水田壩縛木筏候渡岸上縱民牧牛令降番屯練設伏以待賊數百乘船渡河掠牛伏兵起奪船渡木筏亦順流下遂盡濟河破木城賊棄卡竄遂取石花寨進剿上空從得拉大山下壓殲賊甚衆先一日令總兵花連布閒道援永綏至是復會剿凡三日永綏圍解進抵竹子山賊多聚蘭草坪西北崖板寨中僞於東南山凹樹旗示我兵出入路因其計攻之設伏對山石閒藏礮焉仍督兵自凹入賊悉衆來拒伏兵望見俟其過飛礮擊之賊驚潰坪上賊棄木城退保瑯木陀山卡四月克之駐營山梁山之西爲登高坡與黃瓜山對峙坡右老虎灣亦通黃瓜山賊寨乃分五路冒風雨進剿槍矢無虛發賊竄山後遂據黃瓜山大梁俯臨其山

夜復於風雨中下壓擲火藥焚竇燬大寨五十六擒賊百餘皆殲訊所擒賊知首逆吳半生糾黑苗據菹麻寨石柳鄧石三保據鴉西鴨保等寨附之遂由小紅巖徑攻菹麻奪大小喇耳山衝入賊隊至寨外縱火燒木城賊多被焚有潛匿巖洞者薰之悉斃燬苗寨四十吳半生遁往西梁復糾猿猿寨狗腦坡花苗二十餘寨來拒石三保率鴨保之匪來援乃分衆攻雷公山阻其援兵大軍左右擊西梁上中下三寨破之雷公山兵亦捷賊奔投花苗寨中五月大兵五路分剿克大小苗寨六十木城四石卡三十五進至大烏草河水深闊不可渡移師克沿河之沙兜諸寨又克盤基坳山是月調浙閩總督六月克竹山坳大梁賊潛出擾我兵敗之於板登寨再敗之於雷公灘遂奪右哨營七月令兵夜列炬岸上示欲渡河賊拒守甚力密從數里外諸苗坪作木橋以濟繞賊後焚其寨賊驚竄潛聚巖木林伺隙來奪橋設伏敗之遂督兵於衆山中越險進或分或合步步爲營晝夜不少息克馬蝗衝等大小寨五十直至狗腦坡山益險兵皆附藤葛行冒矢石直據山巔從高下壓破其寨賊首匿古丈坪五路並進殲賊一千風雨暴至賊宵遁八月克蝦蟆峒烏龍巖因雨駐兵楊柳坪旣霽攻茶它奪賊卡六抵夯乞降者七十餘寨

諭曰福康安運籌布置悉合機宜冒險進攻勤勞懋著應卽加恩優獎著仍帶榮賞四字佳號晉封貝子爵銜卽照宗室貝子之例所有護衛官員聽其自將家人揀放此乃逾格施恩俾異姓盡臣得邀殊寵將來我八旗大臣得有似此超衆宣勞者均可援以爲例豈非國家世臣之福九月克巖碧山焚巴溝等寨二十進攻麾手寨山分兵乘積霧雨由僻徑繞出山後面背合攻賊大潰時所調粵西兵亦至今花連布率之從長坪搜剿得苗寨四十上賞服貂尾褂賊首吳半生從鴨保至高多寨欲糾衆拒我兵偵得之遂督全軍急進圍其寨吳半生窮蹙出降上嘉其功賞其子德麟副都統銜在御前侍衛上行走十月抵鴨保賊巢鴨保之右天星寨爲賊中奇險處賊恃以爲固乃率衆夜發值雪後朔風起兵皆於陰晦中覓道進抵木城下擲火焚其窩棚賊駭竄得木城七石卡五克垂藤董羅諸寨賞上用黃裏元狐端罩一十一月克入盤寨平隴賊日吳八月就擒降苗吳隴登縛賊日隴五劬以獻大兵進攻大小天星寨克之十二月攻克爆木營乘風雪夜進拔地良八荆桃花諸寨賊又謀於普定寨糾衆來拒破之擒賊目二據高斗山計由平隴以復乾州賊恃擒頭坡騾馬峒諸險隘悉力死守乃於高斗駐營作進攻勢

潛分隊魚貫進克擒頭坡諸賊卡復撥兵斷賊歸路進取驟馬峒及兩岔河川峒諸山焚其寨三百由川峒進克金嶺衝山擒賊目一嘉慶元年正月克吉吉寨乾州屬大隴峒等寨暨斗角巖尾坡九十九峒苗千餘戶乞降二月大兵抵璧多山設卡賊竊從壁多對峙之高吉陀夜出窺我營擊退之且焚巴金灣寨三月賊伏兩叉溪欲阻我兵路爲礮所擊遁追剿至平逆坳奪石卡三賊又集衆數千襲爆木營後路分撲擒頭坡營卡悉以有備敗走四月克結石岡石城焚牧牛坪等大寨七十進克官道溪攻火麻營石城張兩翼以三面進薄之賊潰軍中製火箭數百枝遠近齊發燬其寨益多抵廖家衝奪山巔石卡一羣苗驟至上撲卡十數進皆敗偵其竄伏路多從連峯坳乃夜簡勁卒閒道潛發以其半擊賊半囊土負而登且戰且築卡斷其隘賊見兵已據險四散奔逃追戮無遺奪山梁七奏入諭曰福康安自剿捕苗匪以來備經艱險懋著勳勞今大兵進逼賊巢將緊要山梁俱已攻克業距平隴乾州不遠成功當在指日允宜特沛恩綸用加懋賞因念福康安父傅恆宣力有年屢著勞績未得身膺貝子封爵向來貝子襲封王爵如其父未得封王者例准追贈傅恆著加恩照宗室追封之例晉封貝子以光泉壤而

昭寵錫五月福康安染瘴患洩瀉猶督師前進夜有大星隕於營西北光芒有聲越數日卒於軍諭曰大學士貝子福康安秉性公忠才猷敏練敷歷中外懋著殊勲年力富強正資倚毗乃當大功垂成之際積勞成疾遽爾溘逝實深震悼且當患病之時猶復力疾督師親臨前敵實爲宣勞超衆體國忘身尤宜渥沛殊恩用昭飾終令典著晉封郡王爵銜賞內帑銀一萬兩經理喪事並賞給陀羅經被仍著於伊家宗祠之旁建蓋專祠以時致祭並推恩伊父傅恆亦追贈郡王爵銜其子德麟著加恩晉襲貝勒派固倫額駙豐仲殷德迎往奠醊帶同伊子德麟馳赴前途妥爲照料俟入城治喪朕必親往賜奠所有任內降革罰俸處分俱著開復其應得卹典並著該衙門察例具奏以示軫恤勲勞有加無已至意御製詩哭之曰到處稱名將功成勇有謀近期黃閣返驚報大星流自嘆賢臣失難禁悲淚收深恩縱加贈忠篤那能酬九月命入祀昭忠祠賢良祠從其父傅恆配享太廟予謚文襄賜祭葬如例二年二月得旨德麟承襲貝勒之爵出缺後伊子承襲貝子伊孫承襲鎮國公減至未入八分公止世襲罔替九年諭曰從前節次用兵時領兵官員原無格外犒賞之需自福康安屢次出師始開濫賞之端任性花費毫無

節制於是地方承辦之員迎合備送累萬盈千以及銀牌綢緞絡繹供支不過以賞兵爲名亦未必實惠盡逮戎行也卽如德麟迎其父柩地方官致送奠儀並備賞等銀四萬餘兩外省只知逢迎紈袴乳臭卑鄙惡習實出情理之外竟非人類所有德麟收受銀四萬一千五百五十二兩著罰令賠繳八萬兩以示悖入悖出之天理爲治世所不容十年二月諭曰帶兵大員本不當以一時犒勞私恩輒立賞號名目其始如傅恆等尙係將自有之物分給士衆迨後羣相效尤又不能出資購辦遂不得不向地方官調取預備而福康安爲尤甚因而承辦軍需者居然視爲正項支銷自有賞號名目以後帶兵大員藉詞取索漫無限制而地方局員亦不免以購備爲名浮濫多糜甚至舞弊營私取肥己橐交結見好及至報銷帑項時又復多方設法希圖掩飾所有軍營賞號一項必當嚴行禁止四月諭曰賞罰爲軍紀之要隨征官兵等果有奮勉出力者一經奏聞無不立沛恩施帶兵大員等何得擅立賞號用示施恩是以從前屢次用兵本無此項我皇考高宗純皇帝曾經屢頒聖訓著之令典自福康安出師臺灣等處始有自行賞給官兵銀兩綢緞之事爾時藉其聲勢向各省任意需索供其支用假公濟私養家肥己其後

各軍營習以爲常帶兵大員等不得不踵行犒賞而力有不能輒於軍需項下動用支銷以公項作爲私用嗣後設遇辦理軍需時不得再立賞需名目十三年德麟以雩壇視牲誤班飭部嚴議議上命降貝子在散秩大臣上行走。

蔡新

蔡新福建漳浦縣人贈尙書太傅世遠之族子乾隆元年二甲一名進士改庶吉士二年散館授編修九年充江西鄉試副考官十年入直上書房考試御史第一辭對品授侍講十一年提督河南學政任滿旋京奉旨不必在上書房行走旋諭仍入直十七年充江西鄉試正考官擢侍讀學士充日講起居注官九月擢內閣學士晉工部右侍郎調刑部右侍郎十八年以母老奏請歸省上許之賜其母貂皮大緞假滿仍供職新陳請終養時新母未滿八十且非獨子格於例而上允其請蓋異數也是歲冬里居命爲總師傅疏辭乞留養諭之曰並非令汝卽來供職原待後日之旨也二十五年上五旬萬壽入祝御書旌其母二十六年春駕巡幸江浙新詣行在諭以新母年逾八旬宜早歸二十九年丁母憂三十一年服闋補刑部右侍郎旋命視學直隸三十三年除工部尙書兼署刑部三十四年攝兵部

尙書兼管國子監事務新所居官房火陳請賠修賞給官修三十八年調禮部尙書充四庫全書館正總裁賜紫禁城騎馬賞澄懷園官房四十一年再攝兵部尙書是年新年七十御書武庫耆英及冠服諸珍物以賜四十四年四十五年並充順天鄉試正考官轉吏部尙書協辦大學士四十六年乞歸修墓俞允賜以詩四十八年上以新究心根柢能守家學錄寄御製君子小人論雲上於天解濮議辨令閱覆旋京赴熱河上賜以詩有曰年老君臣似老朋六月授文華殿大學士兼吏部尙書賜黃扉宿彥扁額四十九年充會試正考官前後充殿試讀卷官凡七次賜新長子本淑主事賚元狐端罩五十年正月與千叟宴賜酒食如意壽杖諸珍二月上臨雍講學新以大學士兼管國子監坐講天行健君子以自強不息二句賜茶及文綺先是御製三老五更說糾蔡邕獨斷父事兄事班固白虎通老更各一人之謬至是御製臨新建辟雍詩曰蔡新或備伯兄行註曰若今之羣臣孰可當老更之席者獨大學士蔡新長予四歲或可居兄事之列然恐其局趣勿敢當舉王導對晉元帝之語耳三月新乞致仕奏曰竊臣海濱下士遭逢聖明歷踐清華屢典文衡兼司胄監報未效於涓埃恩更深於覆幬洊陟黃扉實慚非據臣

叨皇上爵祿之榮亦已至矣而且參養內廷者四十一年與聞聖訓之精深飫聆講帷之緒論雖奉職無狀猶曲荷成全臣叨皇上知遇之隆又已至矣至於烏犢私情蠅蟻下慙無不可仰瀆天聽省規則計其行程請養則寬以歲月迨昔歲假滿還朝猶荷聖慈矜恤推恩下逮臣子亦邀曹署之榮凡天語之褒嘉賞賚之優渥皆微臣夢寐所難安亦筆墨所莫罄卽在廷諸臣見之無有不代臣感愧者臣叨皇上愛護矜憐之恩又如此其至也凡茲異數殊榮屈指朝列罕見比倫臣刻骨鏤肝曷云能報若遽圖自便豈復尙有人心所恨者犬馬之齒已衰疾病侵尋不能自料臣向有痰喘之證逢冬勤發春深則漸平復茲自去冬以來日甚一日元正千叟盛宴春仲臨雍大典臣多方調治惴惴焉惟懼不克沐寵光而襄大禮幸暱勉從事不致隕越以貽玷班聯此皆皇上至仁大德覆露羣工非微臣所能計及也嗣後春寒雨雪調度失宜耳聾腳弱心神恍惚至於朝端跪起之間每虞顛仆雖聖主包容許人扶掖而國體所關甚鉅臣亦何能自安氣候所臻實不獲已因於前月賜對之下冒昧陳請懇乞休致蒙皇上不加督責憫臣年邁察臣路遙猶以臣夏月較好聽臣酌量行走臣反覆思維雖父母顧復之恩何以踰此願

臣非敢忘致身大義以宴安爲懷也亦非以殆辱爲虞引古人止足之戒以自文其私也誠念綸扉重寄殿閣崇班猥以老邁龍鍾之身據爲持祿養安之計莫報毫芒徒慚衾影實臣所自顧而跼蹐者也因敢再申前請伏乞皇上解臣職任俾得一意調攝歸骸故里儻蒙皇上如天之庇稍留瞬息恭遇八旬大慶之年尙能扶掖瞻天代衢巷以祝三多同華嵩之呼萬歲犬馬餘生於願足矣諭曰大學士蔡新老成端謹品學兼優由乾隆元年進士洊陟卿班典司冑監簡用綸扉在上書房行走爲諸皇子總師傅朕視其年齒雖增精神不減正資倚畀茲以衰疾奏請解職回籍調理情詞懇切覽奏深眷於懷第念伊年近八旬閩籍又距京路遠不忍重拂其意勉從所請以原官致仕並晉加太子太師親製詩章以寵其行仍於朕巡幸熱河啟鑿送駕後再行束裝緩程回籍沿途經過地方官在二十里以內者照料護行俾得安適歸里怡志林泉蠲疴頤養以示朕優眷耆臣至意五月賜蔡新還里詩有曰祝八旬期仍赴闕愈哉嘉予意肫然又賜送新歸里詩有曰不忍言留合令歸及歸言別又依依賜御書金筵嵌玉如意諸珍皇上御製送蔡新予告歸漳浦詩有曰八閩鍾碩彥四輔仰英賢學毓千源導心通一貫傳新至

聞奏謝賜詩有曰喜卿桑梓堪娛老憐我肝膈未歇肩其後屢寄御製文令新閱看諭之曰在朝竟無可與言古文者不可阿好徒頌五十五年詣闕祝釐與宴同樂園賜詩有曰八旬幸我身猶健九望憐卿會膝前命沿途官令備船隻肩輿安頓行程並賞人漚一斤次年寄示詩文賞御製珪瑁說摺圭說墨刻二卷御製反蘇軾超然臺記說一篇諭以發看近作詩文以驗學詣不必和韻自是以後凡遇睿製必寄示內府書籍石刻及畫卷文房諸珍品在廷臣工所得邀賞者靡不賜賚焉五十七年壬子鄉試新重赴鹿鳴宴六十年恭遇高宗純皇帝御極周甲慶期諭新年近九十不必前來新奏庚申歲爲上九旬萬壽冀得詣闕再祝奉硃批字字出誠心我君臣共勉之若天恩得符所願實佳話也時閩省倉庫虧缺事覺上責新扶同隱諱自比寒蟬無體國公忠之意令疏覆新請下部議上以新大學士予告回籍優加恩禮地方有大吏貪黷事宜訪實入告因年老衰頹無從覺察免議處嘉慶元年二月御史宋澍奏蔡新家信內有言及洋匪情形命傳詢新子本俊本俊奏新原擬具奏因屆年節不便呈遞將奏片底藁寄交本俊臚真遇有奏事之便附入具奏上亦不之責並諭新不必稍存畏懼是年新年九十御書綠

野恆春扇並壽佛嵌玉如意蟒緞諸珍賜之諭軍機大臣向新齎摺家人問近狀賜新子本俊內閣中書並以端節伊邇賞紗扇香錠諸物用示眷注是歲發和詩章凡三四往復至臘盡又發看新作數種四年新聞高宗純皇帝哀詔具奏慰奉御批具見誠悃時新北上至省閩撫汪志伊奏蔡新奉太上皇帝遺詔卽由漳浦起行到省接見頗覺委頓步履甚艱似難冒暑遠行勸其暫行回家安養俟秋涼護送進京上諭曰蔡新係予告大學士聞皇考升遐卽懇請進京出於至誠朕已見其忱悃惟念蔡新年已九旬不便令其觸熱前來致滋勞頓卽皇考平日優待蔡新之意亦必不欲其年高遠涉至稱秋涼進京亦可不必梓宮於九月內奉移山陵若秋後起程到京已在永遠奉安之後亦不能瞻仰卽各省督撫並未俱令前來叩謁況蔡新係致仕老臣乎皇考在天靈爽薄海內外無不照臨蔡新祇須在彼處虔叩已足申其哀悃無庸僕僕遠來恩賜新子本俊一體殿試以部屬用是歲十二月新卒於家奏聞諭曰原任大學士蔡新人品端正學問深醇久任綸扉兼轄部務俱能恪恭奉職而在上書房行走年分最久朕及諸昆弟俱經授讀懋著勤勞自予告回籍以後頤養林泉年逾九秩鄉望翕然茲聞溘逝實深悼惜

著加恩晉贈太傅並著巡撫汪志伊前往代朕奠酒所有應得卹典著該衙門察例具奏任內如有降革處分俱准其開復以示朕眷念舊臣恩施無已之至意新有子四人並孫行達著汪志伊擇其有出息者二人送部引見謚文端六年新孫行達賜一體殿試八年福建巡撫李殿圖疏稱新品粹圭璋道光黼黻具明體達用之鴻猷本誠意正心之實學請入祀鄉賢祠奉旨俞允子本俊見官刑部郎中孫行達由庶吉士散館授工部主事以事革職

劉墉姪銀之

劉墉山東諸城人祖棨四川布政父統勳東閣大學士墉乾隆十六年進士改翰林院庶吉士十七年十月散館授編修二十年四月遷右春坊右中允五月擢翰林院侍講是年九月以統勳任陝甘總督查勘巴里坤哈密駐兵事宜附和將軍永常辦理失宜奉旨劉墉亦著革職拏交刑部十月恩旨釋放賞給編修二十一年五月充廣西鄉試正考官九月提督安徽學政二十四年四月奏言捐納貢監向例責成教官約束但貢監人數衆多既不歲考又無月課教官勢難綜覈請嗣後凡貢監遇有小過扑責示懲者州縣仍會同教官覈辦其舉報優劣止責成州

縣辦理部議准行九月調江蘇學政三歲試竣奏江蘇士習官方情形略言生監中滋事妄爲者府州縣官多所瞻顧不加創艾旣畏刁民又畏生監兼畏胥役以致遇事遲疑皂白不分科罪之後應責革者並不責革實屬闕冗怠玩訟棍蠹吏因得互售其姦上嘉其留心政體旋諭曰劉墉所奏切中該省吏治惡習江南士民風尙多屬浮靡喜事爲地方有司者加以骫骳姑息遂致漸染日深牢不可破故近來封疆懈弛之弊直省中惟江南爲甚督撫爲屬僚表率大吏不能振作闔屬誰不承風尹繼善等當從此痛除舊習刻自淬厲州縣官有怠玩相沿如劉墉所奏各情節卽嚴行體察據實參處二十七年授山西太原府知府三十年擢冀寧道三十一年以知府任內所屬陽曲縣令段成功侵蝕庫項事覺墉坐不能先事舉劾部議照扶同容隱律擬罪上加恩免死發軍臺效力贖罪三十二年恩旨釋還在修書處行走三十三年諭曰大學士劉統勳年屆七旬止此一子仍加恩以知府用三十四年授江蘇江寧府知府三十五年遷江西鹽驛道三十七年擢陝西按察使三十八年丁父憂命馳驛來京治喪三十九年上頒賜各大臣古今圖書集成以統勳先卒未預恩賞念劉墉克承世業特賜墉全部俾世守無替四

十一年二月服闋赴京上追念統勳宣力年久且察墉器識可用詔授內閣學士
卽在南書房行走時初設文淵閣官七月充直閣事九月充四庫全書館副總裁
並派辦西域圖志及日下舊聞考四十二年六月充江南鄉試正考官八月提督
江蘇學政四十三年八月奏泰州舉人徐述夔所著一柱樓詩詞悖逆經軍機大
臣鞠訊得實按律懲辦十月奏請將御製新樂府及御製全韻詩自行刊刻宣示
從之十一月擢戶部右侍郎四十四年調吏部右侍郎四十五年授湖南巡撫所
屬新化縣令有諱匿命盜案件據實劾參在任年餘盤查倉庫勸修城垣革除坐
省家人陋習撫卹武岡等州縣災民至籌辦倉穀開採峒確俱察例奏請奉旨允
行四十六年遷都察院左都御史四十七年二月仍直南書房賜紫禁城騎馬三
月充三通館總裁四月御史錢澧劾山東撫臣國泰貪縱營私所屬多虧空命偕
尙書和珅往按既抵省卽盤查歷城縣庫無缺額而銀色多攙雜知有偽訊係國
泰聞信後那移彌補以圖掩飾並廉得國泰婪索姦狀及藩司于易簡知府呂爾
昌馮埏先後在濟南府任內扶同骫法擬罪如律讞定回京命署吏部尙書兼管
國子監事務尋授工部尙書仍兼署吏部十一月奉旨在上書房總師傅上行走

四十八年總辦辟雍圖式及督辦內廷宮殿易瓦等工五月命署直隸總督七月調吏部尙書八月充順天鄉試正考官十一月充經筵講官四十九年兼署兵部尙書五十年二月以辟雍告成議敘四月復兼理國子監事務五月授協辦大學士五十一年充玉牒館副總裁五十三年正月諭曰向來大學士缺出多按資格以協辦大學士補授劉墉在尙書中資分較深且協辦有年本應實授惟是上年在熱河時及回鑾後曾與軍機大臣等論及嵇璜年老若求回籍不忍不從及曹文墉現有老親若求回籍養親亦不忍不從而皆惜之此不過尋常議論耳然見嵇璜精力尙未就衰在漢大臣中最爲老成且欲留以相伴又部院諸臣一時乏人曹文墉亦屬能事故胥遲之意軍機大臣自不敢以議論之言卽行宣露事隔多時嵇璜等亦並未有所陳請昨冬召見劉墉偶曾與之閒論及此乃次日曹文墉於召見時卽有告養之奏朕詢之軍機大臣俱稱並未向嵇璜等說及同稱係劉墉在懋勤殿所言者朕召見諸臣君臣之間原如家人父子且以劉墉係劉統勳之子內廷行走之人非不可與聞者是以向其論及乃劉墉卽以告知嵇璜等其意不過欲嵇璜聞知請告劉墉卽可覲覲補授大學士似此言語不謹此時豈

可卽以劉墉實授以遂其躁進之私耶三月命總辦萬壽慶典事宜九月御史祝德麟劾司業黃壽齡受賂一摺內稱國子監考試惟劉墉鄒炳泰二人清介素著諸生不敢向其饋送營求五十四年三月諭曰上書房阿哥等師傅自二月三十至本月初六七日之久無一人入書房殊出情理之外劉墉係大學士劉統勳之子朕念伊父宣力年久特加恩擢用其在府道任內頗覺阻勉及爲學政卽不肯認真逮授湖南巡撫聲名亦屬平常因內用尙書其辦理部務更復一味模稜朕曲賜優容未加譴責伊自當感激朕恩亟思愧奮益矢勤慎今阿哥師傅等不到書房至七日之久劉墉身爲總師傅又非嵇璜年老王杰兼軍機處行走者可比乃竟置若罔聞似此事事辜恩溺職於國家則爲不忠於伊父則爲不孝其過甚大豈可復邀寬宥且伊係大員亦不必再俟部議劉墉著降爲侍郎銜仍在總師傅上行走不必復兼南書房以觀其能愧悔奮勉否四月補內閣學士兼禮部侍郎銜八月提督順天學政九月遷禮部左侍郎五十六年正月遷都察院左都御史旋擢禮部尙書四月復兼管國子監事務是月署吏部尙書十月復賜紫禁城騎馬五十七年充順天鄉試正考官調吏部尙書五十八年充會試正考官嘉慶

二年三月授體仁閣大學士四月命偕尙書慶桂按訊山東控案事竣馳勘曹汎漫工奏言漫口須至秋汛後堵築而下游一帶間有淤墊必一律挑濬寬深大溜歸入正河方能暢達下注如所議行四年二月加太子少保銜十二月奏漕糧起運收米行船爲旗丁之專責而州縣僉派旗丁或將殷實之丁索錢賣放強派貧者貧丁若懦弱無能或致自盡以免累妻子納詞狀於懷中訴冤苦於身後此猶一人一家之事耳其貧丁之無賴者不以爲苦挈家上船居然温飽自水次以至通州盜賣官糧無復畏忌所賣既多或鑿船沈水以匿其迹或稱漕糧交兌本不足數抵通弊混同歸於無可考據卸桅拆柁無所不賣及至回空僅存船底於是新漕起運之時船已不可復用此亦州縣府道不職而督撫兩司不能察吏之一端也請敕下有漕省分督撫兩司嚴查州縣務僉殷實丁戶或一人力薄數家幫貼則賣糧拆船之弊可免上從之六年充會典館正總裁七年駕幸熱河命留京辦事九年七月上以墉母本年九十生辰時就養江蘇學政劉鐙之署內命墉親齎賜件前赴江蘇旋回京十二月卒諭曰前任大學士劉統勳翊贊先朝嘉猷茂著伊子劉墉克承家世清介持躬敦歷中外洊陟綸扉年逾八旬精神矍鑠茲聞

溘逝深爲軫惜加恩晉贈太子太保入祀賢良祠卽派慶郡王永璘帶領侍衛十員前往奠醑賞給陀羅經被銀一千兩併命壙姪鏗之來京經理喪事尋賜祭葬予諡文清子錫朋一品廕生刑部員外郎姪鏗之乾隆四十四年進士改翰林院庶吉士五十五年散館授檢討五十六年大考二等遷侍讀六十年遷侍講學士嘉慶三年三月大考二等轉侍讀學士十月充順天武鄉試副考官四年正月提督浙江學政十月遷詹事府詹事五年擢內閣學士兼禮部侍郎銜六年任滿回京七年正月遷兵部右侍郎七月轉左侍郎九年正月提督江蘇學政六月調吏部右侍郎仍留學政任十年正月調戶部右侍郎兼管錢法堂事務五月充教習庶吉士十二年充順天鄉試監臨尋提督順天學政十四年二月以祖母老病乞回京侍養允之四月充殿試讀卷官十五年六月充浙江鄉試正考官八月提督江蘇學政十六年擢兵部尙書召回京十八年八月兼管順天府府尹事九月逆匪林清滋事部議以鏗之失察應降調上加恩改爲留任十一月奏請酌改順天府屬各事宜一治中應改爲題缺一府屬各員與直隸各缺通融升調一四路同知所轄千把外委應覈明功過賞罰一酌添大興宛平兩縣驛馬及壯丁均下部

議行十二月賜紫禁城騎馬旋以緝捕逆匪功加太子少保銜十九年二月以鏤之母七十生辰賜御書貞壽延祺額四月充殿試讀卷官六月調戶部尙書二十年以宛平縣地界延長向祇設有營弁巡緝請將縣丞移駐龐各莊地方歸於南路同知管轄遇有盜劫案件作爲協緝開參從之二十二年四月充殿試讀卷官九月上秋獮迴鑾諭曰本日劉鏤之前來行在接駕經朕召見詢問該府尹等兩月以來備奏糧價一摺此外並未具奏一事步軍統領衙門五城奏獲匪犯多名該衙門亦未緝獲一犯係屬何故據奏各逆犯實未訪有蹤跡且順天府屬本年被旱較重因查辦撫卹籌議設廠煮賑等事未經派員緝捕恐致激變良民朕卽詢以查辦災務京城應設粥廠幾所需用米石若干奏稱尙未查明約於九月底十月初方能具奏等語所奏支吾遮飾太不成話撫卹災黎所以安輯良民緝捕邪匪所以芟除莠民本係並行不悖之事本年直隸被旱之區不止順天府屬該省照常緝拏匪犯施恩敕法兩不相妨劉鏤之於朕啟鑾後一味因循疲玩素餐耽逸全不辦理公事經朕降旨飭問無可登答強詞飾顏冒昧搪塞劉鏤之著交部議處尋議革職命以侍郎候補二十三年五月署兵部左侍郎六月兼署刑部

左侍郎八月充順天鄉試副考官十月福建同安縣民詹絨等以葉姓糾衆仇殺案懸十九年未結控都察院命鑲之偕刑部侍郎文孚往鞫尋讞明詹葉兩姓互殺治罪如律十二月遷都察院左都御史二十四年四月回京閏四月仍兼管順天府府尹事十一月復賜紫禁城騎馬二十五年三月調兵部尙書四月充殿試讀卷官八月復加太子少保銜九月調吏部尙書十二月充經筵講官道光元年卒諭曰吏部尙書劉鑲之由翰林洊陟正卿蒙皇考任用有年上年朕御極之初特調授吏部尙書每召對之時見其人頗明白遇事亦尙敢言所管吏部順天府事務均各妥協昨因染患痢疾兩次給假俾令安心調理冀其速就痊愈委任方長遽聞溘逝深爲悼惜著加恩賞給陀羅經被派散秩大臣一員帶領侍衛十員前往賜奠並賞內庫銀五百兩經理喪事伊長子兵部員外郎劉喜海俟服闋後著以郎中補用次子劉華海著賞給舉人准其一體會試所有任內一切處分悉予開復應得卹典該衙門察例具奏尋賜祭葬予諡文恭子喜海浙江布政使以四品頂帶休致華海欽賜舉人浙江候補知縣

王杰

王杰陝西韓城人乾隆十八年選拔貢生朝考一等一名引見以教職用二十五年中式舉人二十六年以一甲一名進士授修撰二十七年充湖南鄉試副考官二十九年提督福建學政三十二年擢侍讀三十三年六月授右庶子十月遷侍講學士三十四年擢少詹事充武會試總裁三十六年充日講起居注官南書房行走晉內閣學士兼禮部侍郎充江西鄉試正考官旋督學政三十九年署工部右侍郎十二月轉刑部右侍郎四十年充會試副總裁四十一年仍督學浙江四十二年回京署禮部右侍郎轉吏部右侍郎仍兼署禮部右侍郎命充四庫全書館暨三通館副總裁四十三年充會試副總裁四十四年二月轉吏部右侍郎五月奉旨添派閱看大清一統志八月充浙江鄉試正考官十二月充武英殿總裁同辦明史充國史館副總裁四十五年奏劾武英殿提調官少詹事陸費墀遺失四庫全書各原本奉旨所辦甚是復奉命督學浙江四十七年授左都御史旋京充四庫館副總裁上詢及其母年歲御書南陔承慶額賜之四十八年丁母憂回籍四十九年三月諭曰王杰著補授兵部尙書仍在家守制俟服滿來京供職時上南巡杰赴行在謝蒙恩召見諭曰汝來甚好君臣久別知爾應念我次日復諭

曰汝理學中人朕不欲奪情留汝供職即可還家五十年八月服闋進京充三通館總裁十一月充經筵講官五十一年正月賜紫禁城騎馬四月命充上書房總師傅十二月在軍機大臣上行走五十二年正月授東閣大學士兼管禮部事務三月充會試正總裁賞海澱直廬五十三年平定臺灣賜圖像紫光閣御製贊曰典學七閩肅正士風臺灣民俗頗悉心中山海險夷參畫具通有佐樽俎圖貌紀功五十四年三月充會試正總裁時廓爾喀平再賜圖像紫光閣御製贊曰司學閩疆臺灣事曉海洋進退頗亦了了短詩長紀晝夜騰章無暇贊策人各用長十一月因上書房各師傅曠班七日奉旨交部議處並退去總師傅上行走五十五年三月充會試正總裁十一月加太子太保銜五十六年奉命仍充上書房總師傅五十九年杰年七十生辰御書贊元錫嘏額臚名芸館魁多士耆福台階引大年聯句及壽佛如意御用冠服帶佩諸珍物以賜嘉慶元年骸疾乞退上書房南書房軍機處及兼管禮部各任得旨允如所請專在內閣看章疏三年四川總督勒保奏生擒首逆王三槐諭曰王杰見雖未在軍機處行走而軍興之時曾隨同辦理著交部從優議敘四年正月高宗純皇帝升遐命總理喪儀二月充實錄館

總裁五年四月杰患脾泄命公明安率醫官視之並賜內庫人蔘九月杰以病乞休奉旨慰留並許扶杖入內右門六年九月充順天鄉試正考官十月充會典館正總裁七年七月以病請致仕諭曰王杰因病具摺乞休著不必開缺如調理就痊照舊供職杰再請開缺得旨允其致仕加太子太傅銜在籍食俸又諭曰予告大學士王杰任內所有罰俸處分著加恩均予開復本年秋冬正俸銀米准其照常支給八年二月杰疏言略曰竊惟皇上親政以來宵旰勤勞恩威並濟內外臣工無不洗心滌慮共砥廉隅臣年齒既衰智識愈鈍更何有干慮之得惟是積弊相沿有極重難返而又不可不亟加整飭者一各省虧空之弊起於乾隆四十年以後州縣有所營求卽有所餽送往往往以缺分之繁簡分賄賂之等差此等贓私初非州縣家財直以國帑爲資緣之具上司既甘其餌明知之而不能問且受其挾制無可如何閒有初任人員天良未泯小心畏咎不甯接收止司轉爲之說合懦者千方抑勒强者百計調停務使之虛出通關而後已一縣如此通省皆然一省如此天下皆然於是大縣有虧空十餘萬者一遇奏銷橫徵暴斂那新掩舊小民困於追呼而莫之或恤靡然從風恬不爲怪至於名爲設法彌補而彌補無期

清查之數一次多於一次完繳之銀一限不如一限輾轉相蒙年復一年未知所極竊謂嘉慶四年以前之州縣此時或遷他處或經物故原難責之見任補償然從前州縣用度不節因而侵那倉庫今皇上飭紀整綱大吏皆以廉節相尙豈從前上司專講酬應州縣盡屬從容今茲上司各矢清廉州縣轉形拮据耶乃州縣則任催罔應上司亦一籌莫展意或有苦樂不均未之調劑與有賢否不分因以觀望與固宜廣求整飭之法以冀倉庫漸歸充實也一各省驛遞設立驛丞專司驛遞凡有差使各按品級乘騎之外加增不過二三騎多則驛丞不能派之民間也照常給廩之外一無使費使臣及家人等亦知驛丞之位卑俸薄無可誅求也迨後裁歸州縣百弊叢生請先言其病民者州縣管驛可以調派里下於是使臣乘騎之數日增一日有增至數十倍者任意隨帶多人無可查詢由是管號長隨辦差書役乘閒需索差使未到火票飛馳需車數輛及十餘輛者調至數十輛百餘輛不等羸馬亦然小民舍其農務自備口糧草料先期守候苦不堪言又慮告發也則按畝均攤甚而過往客商之車羸稽留賣放無可告訴無怪小民之含怨也至於州縣之耗帑又有無可如何者差使一過自館舍鋪設以及酒筵種種糜

費並有資緣餽送之事隨從家人有所謂鈔牌禮過站禮門包管廚等項名類甚繁自數十金至數百金多者更不可知大抵視氣燄之大小以爲應酬之多寡其他如本省之上司及鄰省之大員往來頓宿亦需供應其家人藉勢飽慾不饜不止而辦差長隨浮開冒領本官亦無可稽覈凡此費用州縣之廉俸不能支一皆取之庫帑而虧空之風又以成矣議者謂驛站裁歸州縣當時自爲調劑郵政起見每年一驛錢糧自數百金至數千金付之微員既非慎重之道抑且遇有緊要差使及護送兵差之類額馬不足必須借用民力是以定議裁改夫驛站未歸州縣以前豈無緊要差使豈無護送兵差之類當其時要已另設臺站或調撥營馬或籌項購買事竣各有報銷與驛站兩不相關若州縣管驛則平常供應卽有不可數計者然則虧空之弊大半因之欲杜虧空先清驛站當亦由漸轉移之策也況體恤民隱尤爲急務乎今當軍務旣竣我皇上勤求治理似無大於此二者但以積重之勢不可不思至當之方或追溯舊章或博訪衆論斟酌盡善斷自睿裁從此倉庫盈而郵政肅天下幸甚奏入上嘉納之閏二月杰起程有期具奏陛辭諭曰大學士王杰宜力綸屛歷有年所上年秋閒以老病陳請乞休經朕降旨慰

留嗣後再三陳懇不得已俯允所請令今歲春融後從容就道當經加太子太傅銜並在籍食俸用昭恩渥茲據奏擇定行期將次起程朕心彌深眷注因念先朝耆舊今當予告歸里特將皇考高宗純皇帝御前陳設玉鳩杖一枝加恩賞給俾得敬承遺澤朕賦詩二章親書條幅並書聯語以寵其行再加內府人漚一斤用資頤養派工部尙書縑布齎送前件并頒饌品賜餞仍著馳驛回籍所過地方官員在二十里以內者妥爲照料以示朕優眷老臣至意賜詩曰名冠朝班四十年清標直節永貞堅樞廷久直宣綸綉講幄昔從授簡編歸里先參天上佛杖鄉共仰地行仙期頤福壽增康健紫禁重來赴叟筵又曰屢蒙恩旨秉文衡藝苑羣瞻桃李榮直道一身立廊廟清風兩袖返韓城先皇手澤長承福東國靈瀆好衛生西望渭川雲渺渺鱗鴻時達慰離情聯語云詔宣恩禮崇耆宿詩賁林泉養大年五月杰抵里奏謝硃批云覽奏俱悉一路平安實深欣慰京中見望雨澤未能霑足川楚軍務略有頭緒亦未全靖特諭卿知又頒扇套香袋藥錠等物賜之六月具摺陳謝硃批云覽奏俱悉卿在家頤養努力加餐益增康健矣京中自四月半得雨陸續霑足麥收不過五六分晚禾日見芘芘川楚軍情甚好大約六月內可

全靖矣嗣是杰每有陳奏必奉硃批垂問八月奉硃批云卿在家頤養想益康健京中今夏雨暘時若百穀繁茂中元日經略奏報邪匪全靖朕承天恩考佑實深欽感特諭卿知同深欣慰二十日起程幸山莊見住兩間房行宮遙望西秦彌增想念十月硃批云卿在家安善覽奏欣慰今賜卿神饈並如意願永茂遐齡長延福壽十二月奉硃批云嚴寒沍凍諸惟珍攝用迓春祺益綿福履正月硃批云新春介祉福履益綿遙望關雲曷勝記念親書福字並荷包等物付使帶去賜卿以迓鴻禧益增純嘏是月十日杰夫婦年皆八十御書福綏燕喜額并壽佛如意等珍物命陝西巡撫方維甸於其生日齋至家賜之並賜詩曰輝騰紫極耀韓城海屋籌添鶴算羸地近西池增福祿星明南斗燦晶瑩兩朝調鼎文思被八秩齊眉壽域宏德業久敷俾戩穀期頤雙慶衍長庚十一月杰起程進京先是杰陳謝摺內有卽日脂車之語上諭令自行酌量杰因戀闕情殷急行就道於十二月抵京諭曰予告大學士王杰見在來京謝恩伊從前入直本係紫禁城內騎馬今年已八旬恐乘騎未能便適著加恩准其乘坐肩輿至隆宗門外扶杖進內預備召對以示朕優眷老臣至意召見後屢有食物之錫並疊前韻賜詩曰西來紫氣滿都

城八秩仙翁數倍羸趨禁仍隨鵷侶列杖朝爭覩鳳池瑩願卿永享修齡慶勸我當思治業宏眉壽無涯益康健千春旋轉樂同庚十年正月初七日召見諭曰明日出城卿不必到園子去俟二十後京城再見初十日杰卒於邸舍奏聞諭曰予告大學士王杰先朝耆舊久直內廷宣力有年忠清直勁老成端謹前年以老疾乞休經朕再三慰留因果次陳懇肫切勉從所請朕曾親製詩章優加錫賚以寵其行歸里以後屢有批章詢問知其起居無恙上年十月閒爲伊夫婦八十同庚特製詩章扁額並賜以如意文綺等件用迓福綏嗣據王杰謝恩摺內有卽日脂車詣闕之語朕惟慮其衝寒遠涉諭令自行酌量緩程行走旋於臘月初抵京特令肩輿進朝扶杖入對察其精神尙健賦詩誌喜並留俟春後再行起程回籍旬日以來屢經召見看其氣體稍形疲輒疊經諭以在寓靜攝方冀春和增健安愈言歸俾得頤養林泉壽躋大耋不意究以年高氣弱不勝嚴寒凜冽遽爾溘逝聞之良深悼惜著加恩晉贈太子太師入祀賢良祠賞給陀羅經被派榮郡王綿億帶領侍衛十員前往奠醑茶酒並賞給廣儲司庫銀二千兩經理喪事所有應得卹典該部察例具奏其靈柩回籍時著沿途地方官照料妥爲護送尋賜祭葬如

例證文端子堉時嘉慶元年廕生授兵部武選司員外郎見任江南道御史

彭元瑞

彭元瑞江西南昌人父廷誥康熙癸巳恩科副榜貢生星子縣教諭本生父廷訓康熙丙戌科進士由編修擢贊善入直南書房元瑞以乾隆十八年舉於鄉二十二年中式進士改庶吉士二十三年丁母憂二十六年服闋二十八年散館授編修充武英殿提調三十二年入直懋勤殿命寫經爲孝聖憲皇后祝釐三十三年四月廷試翰林詹事等官特旨免考尋奉諭曰中允曹文植編修彭元瑞沈初董誥學問俱優因內廷有承辦事件考試翰詹降旨停免未得與諸臣一體升轉著加恩各加一級九月充日講起居注官十二月遷侍講三十五年恭遇上六旬萬壽進萬福集成讚十章用唐懷仁所輯聖教序晉王羲之書排次成文上嘉之命以內府所藏宋搨本摹勒頒賜內外臣工三十六年五月擢詹事府少詹事六月入直南書房旋充江南鄉試正考官九月奉命提督江蘇學政初松江府屬有金山衛學起自明代爲勳屯軍戶舊設學額十二名而隸籍生童散處各縣冒混煩多難於稽覈疏請裁汰將原額十二名散歸松江所屬各學遵照通例不分民衛

進取下部議行三十八年十月遷內閣學士兼禮部侍郎三十九年受代回京署工部右侍郎兼管錢法堂事四十年三月充三通館副總裁四月充殿試讀卷官旋丁本生母憂四十一年服闋署工部左侍郎四十二年充浙江鄉試正考官尋奉視學浙江之命四十三年十月頒賜聖製全韻詩元瑞排集梁周興嗣千字文恭跋御書獎諭曰向爲全韻不過欲補黃綾本篇葉卿所知也然頗謂無能重搆者今見排千字文之疏所爲急則智生咄咄傷人以中多頌言故不復書今賜古研御墨並貂裘以旌異想逸材四十四年二月授戶部左侍郎四十五年上南巡賜詩曰江南兩名士汝今爲貳卿是因敦實行非特取虛聲司此盛文處要當明道衡學修民自化匪所重詞英命隨至江南閱召試卷三月調江蘇學政八月恭遇上七旬萬壽御刻古稀天子之寶獻古稀頌蒙恩賞賚其明年聖製古稀說勒石命以頌附於後是歲各省學政受代奉旨仍留江蘇學政任四十七年四月調吏部右侍郎四十八年五月調兵部右侍郎十月回京充國史館四庫全書館副總裁四十九年正月調吏部右侍郎十一月充經筵講官五十年正月詔開千叟宴元瑞年五十五亦叨宴賞如一品例撰進千叟宴樂章命工歌之尋奉敕撰擬

甯壽宮皇極殿鐙聯稱旨聖製詩曰凡事曾聞豫立銓嘉稱元瑞製鐙聯東西次序南而北左右分明後與前神以通靈氣以運六爲之儷四爲駢雙撐寶柱輝皇極虔祝天恩待八年越十年重荷御題詩云八柱鐙聯元瑞彭豫教琢句十年成東西南北方隅列左右後前次第呈詰武敷文勤實政撫遐惠近戒虛名恐難符願竟如願頌以爲規燭照明元瑞以是年正月丙辰詔舉千叟宴越月丁亥辟雍告成釋奠講學越月辛亥親耕藉田一時而三大禮行焉進三大禮賦五十一年正月擢禮部尙書舊無以新銜請封之例茲奉特旨予一品封典八月充順天鄉試正考官五十二年正月調兵部尙書充武英殿三通館總裁四月充殿試讀卷官五十三年二月賜紫禁城騎馬五十四年二月京察屆期奉上諭尙書彭元瑞夙夜宣勤著交部議敘尋議加一級三月調吏部尙書管理國子監四月充殿試讀卷官五月教習庶吉士十二月賜第於宣武門內五十五年四月充殿試讀卷官五月教習庶吉士八月恭遇上八旬萬壽敬集聖製詩爲萬壽衢歌三百首偕工部侍郎臣鄒奕孝填註宮譜奏進得旨優獎詔於聖節日自圓明園入宮樂工歌以導駕又以是年歲陽在庚進八庚全韻詩冊上親加裁定賜題曰羣臣所進

萬壽詩詞自當以彭元瑞此冊爲巨擘愛其用意巧而不纖文正而胥實因自首聯讀至末惜其尾聯平仄不諧蓋長律格調所最重也翌日召見元瑞言及之實亦驚惶無措予當下恍然有悟庚韻一百八十有九字讀至尾聯自當不諧首句因卽口占將尾聯上句之庚移爲首句用韻去一聯將末句諧平仄卽爲全璧此實西清佳話不可不紀因命董誥書冊後元瑞踞誦感服重繕一冊恭附跋語云自古人臣以文章受知者若楊徽之之選十聯柳公權之賡一韻卽已詫爲殊榮傳諸詩話從未有臣下之詩仰邀天章筆削者不材之木霑滴露而向榮在礦之金入紅鑪而成器臣以禱味仰邀誨育有言偶獲一知半解皆由闢迪之恩三生多幸君以作師執經請業正未有艾所爲服膺者眞服而心悅者眞悅也謹重繕一通附識末簡以彰詩教以寫感銘又敬集聖製文爲聖德頌均蒙寵錫十一月加太子少保十二月奉上諭吏部尙書彭元瑞供職內廷勤勞夙夜學問優長本日朕至甯壽宮見其所製鐙聯莊雅典切見在詞臣無出其右者協辦大學士員缺久未簡用有人彭元瑞著加恩協辦大學士尙其益勵操修勉勤職業以副朕造就成全至意五十六年四月以從子良驥爲其子頂冒吏員職名事覺未將容

隱之處據實檢舉經御史初彭齡劾奏部議奪職奉旨彭元瑞辜負朕恩徇情容隱本應按例懲辦念其學問素優堪任編纂書籍之事姑免其全行斥退著革去太子少保協辦大學士吏部尙書仍加恩降授侍郎南書房行走予以自新而觀後效尋補禮部侍郎十月遷工部尙書仍賜紫禁城騎馬十二月以太學石刻十三經暨石鼓文命充副總裁五十七年十月授翰林院掌院學士充經筵日講起居注官五十八年五月教習庶吉士五十九年九月石經告成恭編考文提要十三卷得旨褒獎晉太子少保賜賚有加旋充文淵閣領閣事上以廓爾喀歸降武功告蒞計自初定金川至是而十御刻十全老人之寶聖製記元瑞推廣聖意恭集聖製詩爲十全詩十章恭跋進呈茲恭輯聖製詩文凡係武功爲聖製詩文十全集表進之六十年五月教習庶吉士八月充順天鄉試正考官敬排御極六十年紆綢賑貸御製詩章纂爲孚惠全書六十四冊具表進呈蒙恩優賚嘉慶元年授受禮成太上皇帝御皇極殿舉千叟宴元瑞恭預耆筵敬集聖製詩爲衍聖製千叟宴詩八章並進千叟宴樂章四月充殿試讀卷官五月教習庶吉士十一月充武會試總裁二年命管理詹事府四年正月高宗純皇帝龍馭上賓奉旨總理

喪儀四月命充高宗純皇帝實錄副總裁專司編纂九月高宗純皇帝奉安禮成奉 上諭工部尙書彭元瑞敬擬祝文措詞得當著晉太子太保嗣因長子翼蒙官江南鹽巡消緣事被劾自以不能教訓疏請議處上宥之五年四月充實錄館正總裁初元瑞與翰林院掌院學士那彥成保舉編修繆晉堪勝道府上以繆晉爲平陽府知府至是以臧削職遣戍元瑞等濫舉匪人部議鐫二級得旨削加二級免其降調六年二月京察屆期奉上諭尙書彭元瑞恭辦高宗純皇帝實錄盡心編纂著交部議敘尋議加一級三月充會試總裁七年四月充殿試讀卷官五月教習庶吉士七月管理御書處充會典館總裁十二月奉上諭翰林院掌院學士例應滿員在前見在彭元瑞以尙書兼充英和係屬侍郎其班次在彭元瑞之後嗣後衙門一切應奏事件彭元瑞著列銜在英和之前遇有引見人員專著英和帶領彭元瑞年逾七十兼有骸疾著不必帶領會川楚邪匪蕩平論功上以元瑞雖未入直樞廷亦能留心軍務每有敷陳命交部議敘尋議軍功加一級旋以實錄館奏請議敘聲明總裁總纂不敢仰邀敘錄奉旨尙書彭元瑞專勩夙本尤爲出力此次卽著交部議敘元瑞以旬日之間疊被恩命具疏懇辭得旨俞允八年

正月以疾請解職溫諭慰留至六月始得請開缺仍留充實錄館總裁食尙書俸九月疾益劇半載以來仰蒙眷念命軍機大臣遣章京汪彥博往詢所服藥餌及病增減狀猶口往視者二至是復命軍機大臣遣章京汪彥博往詢所服藥餌及病增減狀猶口授子翼蒙等繕摺奏謝逾時卒遺疏不陳官閥不言子孫惟依戀恩德籲請皇上治益求治安益求安訓大臣以實心飭外吏以勤事官多缺壅惟堅持資格以正士趨詢事考言惟嚴辦公私以厚風俗疏入上震悼諭曰尙書彭元瑞由詞臣洊歷正卿學問素優供奉內廷幾四十年行走勤慎仰蒙皇考高宗純皇帝特達之知疊膺寵眷凡進呈文字每邀獎賞彭元瑞遭逢恩遇感激倍常迨朕親政後卽派令恭纂皇考實錄開館以來各總裁中惟彭元瑞專司彙本一切章程俱係伊一手經理見已將乾隆三十三年之書次第辦竣甚爲妥速上年冬月因二十年書成降旨將伊議敘彭元瑞具摺懇辭曾允所請俟實錄全分告成再予優敘數年籌辦軍務每有敷陳多可採納眷倚方深乃本年春間伊染患廢疾賞假調理遣醫診治嗣因伊久病未愈准予開缺仍留充實錄館總裁並給予尙書正俸銀米節次存問俾安心調養以冀速痊茲聞溘逝殊爲軫惜彭元瑞著加恩以工部

尙書加贈協辦大學士並賜經被一襲著乾清門侍衛總管內務府大臣孟佳帶侍衛十員前往賜奠並賞廣儲司庫銀一千兩料理喪事所有任內降革處分均予開復其應賠銀兩亦著概予寬免應得卹典該衙門察例具奏禮臣議上賜祭葬如例予諡文勤元瑞少負儁才多讀書工詞翰通籍後以文字受知兩朝入直南書房垂四十年內廷排架如祕殿珠林石渠寶笈編續西清寶鑑甯壽鑑古天祿琳琅諸書皆與編纂所爲文章自敷陳典禮歌頌功德恭和宸章申謝恩命及奉敕跋題內府珍藏卷軸蓋奏御書千有餘篇手輯爲經進彙四十五卷屢荷褒嘉駢蕃錫賚計賜御用紅絨結頂冠四御用十二章蟒服一全玉如意一黑狐端罩一黑狐長褂一其尋常蟒服鑲玉如意暨文綺豐貂筆墨牋研之類不勝書其恩遇優渥罕有倫比飾終之典亦綦隆焉十一年以疆臣請命入祀鄉賢祠長子翼蒙乾隆四十三年進士改庶吉士散館改部洊擢江南鹽巡道被劾奪職蒙恩錄用授七品小京官遷主事嘉慶十二年三月高宗純皇帝實錄告成奉上諭原任總裁前任工部尙書贈協辦大學士彭元瑞從前開館之時一切章程體例皆出其手茲當告歲未預觀成殊深惻念著加恩賜祭一壇入祀賢良祠其長子彭

翼蒙係原任禮部主事著以員外郎卽用補刑部員外郎次子翔履由一品廕生授刑部員外郎三子習恆西城兵馬司指揮見任雲南趙州知州孫邦疇嘉慶十年進士改庶吉士見任編修

孫士毅

孫士毅浙江仁和縣人乾隆二十六年進士歸班候選二十七年上南巡召試第一授內閣中書洊升侍讀三十四年春緬匪不靖隨大學士傅恆督師雲南主章奏師還敍勞遷戶部郎中四十年擢大理寺少卿旋授廣西布政使調雲南四十四年授雲南巡撫時總督李侍堯以賊獲罪士毅坐不先舉劾落職發軍臺效力臨行上念其學問優命纂校四庫全書特授翰林院編修四十七年書成擢太常寺少卿復出爲山東布政使次年遷廣西巡撫又次年調廣東尋署兩廣總督時陝甘總督福康安議於各營挑選壯兵勤加訓練上以雲貴四川兩廣福建等省係沿邊沿海重地應照行之士毅奏曰臣伏思法貴歷久可遵兵以制宜爲用各省形勢不同卽一省中地方險易亦復懸殊似宜略爲變通以收實效廣東營制水陸參半率係沿海要區廣西悉屬陸營多半沿邊重地督撫提鎮各標兵額本

多挑選易於足數此外各協營額兵較少或有護餉守隘派遣既多存營自少似未便概令對半抽撥致於地方形勢稍涉周章查廣東水陸各標營共實操兵六萬二千六百二十五名內水師兵一萬四百零七名共計水陸可備徵調兵二萬八千五百三十二名緣廣東是處濱海訓習最要且水師兵額既多又非如陸路兵之常有差遣是以所挑之數未便從減廣西各標營共實操兵二萬二千六百八十五名今挑備徵調兵一萬一千二百九十六名俱令慎選人材精壯技藝優嫻送總督衙門備查遇有徵調即可按冊而稽一呼卽集其未挑各兵誠恐無知備弁視爲弁兵已經挑選此外無關緊要卽可以老弱充數是因挑選勁旅而轉使通省一半額兵虛應故事耗糜廩餉更爲營伍大弊應責成統率大員按律分班查驗如有貽誤操防一體嚴懲以絕濫充之漸至槍礮爲軍營利器必須施放有準方克制勝四十二年欽奉諭旨通飭綠營倣照京營健銳火器營陣式練習準頭就臣本標而論槍兵技藝雖有可觀但其閒高低不齊亦復不少今令多備火藥不拘出數總聽臨時號令則熟極生巧自必益就精純其出師訓練原與陸路無異而水師所重則在熟悉風雲沙線把船守篷等事平日操演止在內河近

海地方其於涉歷外洋衝風抵浪是否戢折靈便究難隨時考驗廣東向分上下兩班輪巡外洋臣已飭行鎮將督率訓練以期一律精熟至裹帶乾糧兩粵地氣炎蒸炒麪存貯數日卽黴變不堪下咽因地制宜似改用炒米爲合用查甘省原議因裹帶粟米如無薪水之處不能爲炊是以每兵一名預備炒麪十五斤足供半月口糧兩粵山溪錯雜水陸豐腴無論僻徑衝途皆可隨時炊爨若每兵一名裹帶炒米十五斤得水便可泡食并省炊爨之煩雖未經安設糧站以前亦隨便可以療飢此項米石卽在各州縣碾支兵米動支存營收貯仍於各營應得兵糧內逐加換給出陳易新似此一轉移閒設遇徵調仍可旦夕啟行督撫提鎮俱係蒙恩簡畀之人本應未雨綢繆整頓營伍今復仰蒙聖慈諄切訓示一切定有章程若果認真訓練士卒自可悉成健銳儻因循積習不能實心訓練則名雖有征兵緩急仍歸無濟負恩曠職莫此爲甚應請嚴立科條以示懲創得旨此可徐徐爲之而必以實廣東舊有民欠銀米州縣不能催徵及奏銷屆期設法措墊狡黠者遂延抗不繳積弊旣久欠戶恃爲得計士毅奏請遣試用州縣丞倅等官擇最多之地逐戶查對並令通省儻造四十年以後民欠清冊詳報覈辦所有將來追

出銀米如係見在州縣本任所欠甫經墊解尙無別項情弊仍請給還本任諭曰
粵省民情獷悍從前李湖素稱風厲而於此民欠一事何以竟未能辦及孫士毅
由廣西調任廣東朕謂其人尙屬細心曉事不料其竟能如此辦理實屬可嘉至
所奏追出銀米仍請給還本任此則不可州縣催徵錢糧是其分內專責乃平時
不能振作致民間積漸拖欠及至奏銷時冀免處分私行墊補報解全完此等人
員不治以捏報之罪已屬寬典若將追出銀米仍行給還私橐則將何以示儆所
有此項錢糧將來自應充歸公用不得因欲杜該員等藉口虧賠爲此以公便私
之舉廣東茭塘地方夙爲盜藪屢治不悛復糾衆至三四十人拒捕傷官士毅悉
擒之有旨優獎賞戴花翎五十二年總督富勒渾縱僕婪索事聞嚴詢士毅士毅
訊知有據以實奏富勒渾時已解任奏上申飭諭曰富勒渾氣本粗率性情乖張
孫士毅奉旨飭交查詢伊家人受賄皆已供證明白乃不知愧慙輒敢怨及承審
之人看來孫士毅不免意存畏葸試思朕爲何如主而能任人徇隱翻案乎頃之
讞成上嘉其不避嫌怨所言皆屬公正授兩廣總督先是富勒渾奏廣東鹽務添
設運艘按季徵收餉價及頂補革商清釐積欠上命士毅覈辦士毅奏曰富勒渾

於整頓鹽務立意未嘗不善無如果於自用不宥採訪輿情又意存迴護加以粉飾措詞多涉影響臣謹就見在應行酌辦情形逐條剖析一艘船短缺則關鹽不繼各商守候需時節需貼補飯食而各商自雇民船運腳較帑艘加倍糜費較多富勒渾所奏艘船二百五十七隻及本年春季共配過鹽二十八萬餘包並無此數查省河舊有艘船連各商自置者數止七十二隻此外六十三隻名爲淇澳小船又新募民船一百二十二隻其中半係臨時封押勉強應募並非帑艘長年領運者可比卽富勒渾批准運鹽一次聽其出關攬載別貨而摺內竟稱已有艘船二百五十七隻並非確實查辦理之初已有蕭恆利等一十八船爭先告退經富勒渾□□□□□□□□再查省商定額每季應配鹽一十六萬四千餘包計本年春季缺額五萬有餘富勒渾截自上年十一月以後凡有到關及商配之鹽均歸入本年春季以見籌辦帑艘覈驗如此其實前後到關月日歷歷可查並非添設艘船以後運回關鹽卽有三十餘萬之多也臣實力籌辦去其封押之擾酌以經久之規務期新舊船戶各皆樂從以收實效一粵東餉課雖例應按季催完但向來總以年終奏銷爲準富勒渾請按季盤查原爲整頓積疲起見但粵商力微

貲少而埠銷時衰時旺情形又不能盡一儻遇旺銷之時原可以數月之有餘補終年之不足若時值鈍銷又責其按季完餉勢必以長年營運之貲本儘此一季完餉轉致徒手坐困乃富勒渾明知竭蹶因陳奏在前輒令那移墊完卽將春季未完餉銀作爲全數完庫具奏是發令那移墊完開捏報之弊見在夏季已滿而所欠春餉尙復不能清完臣察看情形四季勒限一事實多窒礙請仍照向例歲底奏銷庶定期不致過迫可以截長補短勉副例限一富勒渾因有疲埠三十九處請一并另召新商頂辦嗣和平龍川信豐永安嘉禾江浦七埠召有新商頂補樂昌永興興寧宜章郴州恭城連州七埠詳由鄰商兼辦其從前官辦之龍門花縣等處十四埠及委員赴辦之桂陽臨東之埠俱仍其舊另將見無承充之乳源翁源永安始興封川五埠亦檄飭暫歸官辦此外尙有鉛山南康上猶英德四埠雖經檄飭鄰商就近兼辦而各商均以力難兼顧不冝配運至今尙屬虛懸富勒渾欲作三十九埠均有著落遂約略具奏致於實在頂補兼辦之名數迥不相符伏思埠地虛懸而官辦亦非良法臣查有從前殷商公辦數年輒藉故脫卸者又有力能辦埠附在各商名下詭託幫辦者此等規避取巧頗不乏人容俟逐一清

釐如果身家仍前殷裕自應著令領回鹽埠出身辦理除將鉛山南康上猶英德四埠趕先頂補其餘暫歸官辦之埠亦可漸次撤換庶召頂均歸著實一富勒渾上年奏明商欠餉銀共四十一萬七千五百餘兩均請分限帶徵維時僅查出商欠數目並未分別有著無著嗣本年四月查明因疲革退之三十九埠實共欠銀二十三萬餘兩見無著落又另查得此三十九埠有隨埠輸息之賞借本銀七萬三千七百五十餘兩亦歸無著隨據商人何茂才等呈請照雍正元年之例每額鹽一包輸銀一錢約計三年半限內此三十餘萬兩無著之欠可以依限攤完經富勒渾據情入奏臣查得分限帶徵有著春夏二季應完四千九百五十餘兩見據各欠商完交過銀一萬一千五百五十餘兩覈計應完之數尙屬有盈無絀其通綱攤認無著銀計本年春夏兩季應完銀四萬七千七百二十餘兩距應完之數甚爲懸絕臣以該商等既呈請代完於先何以又觀望遷延於後細加詢訪始知富勒渾所辦亦有未能盡服人心者查各疲商既經革退則應完之欠自應先儘查追必家產實已盡絕方令通綱攤認伊等自覺心平乃任其逍遙事外甚至數月以來清查革埠業經交出之銀約共四千餘兩又聽其存貯運庫不將攤賠

之數目隨時減除以致通綱代完不能踊躍臣嚴飭署運司嵇承志卽將此項清查交出之四千餘兩歸入通綱代完數內此外仍將未至家產盡絕之商嚴切追查一有成數亦卽均派通綱俾攤賠之數藉以輕減庶積欠可望依限清完矣下部議行五十二年臺灣林爽文反士毅以閩省海道相接備兵潮州王師渡海預派粵兵前赴所需軍資器械辦理無誤屢邀議敘加太子太保賞戴雙眼花翎世襲一等輕車都尉明年臺灣平會安南國王黎維祜爲其臣阮惠所逐其母妻幼子敏關籲救士毅與廣西巡撫孫永清前後以聞上卽命士毅檄諭安南各路士毅時在潮先已馳赴龍州奏至上深嘉之士毅自請統兵出關並查奏黎維祜在其國良才縣境亦招聚義兵圖恢復遂詔士毅由廣西直抵黎城別命雲南提督烏大經由蒙自一路進剿夾攻阮惠遣其將拒於壽昌江又分兵屯嘉觀士毅至壽昌擊破之過江進兵至市球江賊守禦甚固十一月十六日日暮我兵隔岸排列槍礮與相持士毅令義民陽於下游造浮橋作欲渡狀以牽綴賊勢密遣總兵張朝龍於上游暗渡繞出賊後賊衆亂士毅卽勒兵乘筏占橋鼓勇直進賊棄寨奔逸我兵過江分路剿殺江岸及江中積屍幾滿生擒四百餘人悉斬之其嘉觀

一路爲游擊張純等擊退副將慶成守備黎致明設伏要害擒其僞指揮黎廷僞內衛栗全及已服復叛之陳明炳等十九日黎明乘勝至富良江江在國門外賊悉衆拒守盡收戰艦泊南岸江中礮聲不絕士毅察知賊陣弗整急覓船筏夜載兵僅百餘人先剿江心賊奪大船一賊稍退少閒復來凡五六戰殺賊百餘人生擒十七人賊膽落時覓船不得而沿江竹爲賊斬盡士毅因昏黑中賊不知我兵多寡遂以所有船筏盡載兵令提督許世亨等率二百餘人於次日五鼓直衝彼岸賊不知所爲奪其小船三十有餘急駛回更番渡兵二千人過江黎明分路追奔賊死者不可勝計有十餘船順風而逸遊擊張純追及之賊反拒我兵我兵圍其船焚而沈諸江賊數百人無得脫者獲僞印三遂克復黎城黎氏宗族及百姓等俱出城伏迎道左阮惠先遁歸富春是役也士毅親統大軍入其國境所向披靡士卒無不用命雲南烏大經之師但遙作聲援而已士毅旣入黎城出示安撫是夜黎維祁至營士毅傳旨令襲封國王並馳報孫永清送其家屬歸國奏上諭曰阮惠等逐主亂常竊據黎都一經大兵聲討望風奔竄該國當殘破之餘得天朝爲之興復黎氏國祚重延并不利其寸土於字小存亡之道仁至義盡實史册

所僅見孫士毅力肩重任調度有方不及一月卽已迅奏膚功克副委任著加恩
晉封一等謀勇公賞戴紅寶石頂以示優眷士毅懇辭上不許並諭令班師五十
四年正月初二日士毅偵知阮惠復糾衆將奪黎城遂與許世亨前進次日遇賊
力戰賊敗退黎維祁聞阮惠至攜家屬潛遁國內無主民皆竄賊勢復聚士毅知
黎城不可久駐先領兵渡市球江奪據北岸以待後隊之至總兵李化龍行至浮
橋失足溺水橋隨斷許世亨等沒焉士毅遂入鎮南關黎維祁與其母子俱至關
內送南寧安置事聞諭曰安南國內因土酋阮惠等構亂黎維祁藏匿民間其母
妻親來控訴是以命總督孫士毅就近籌辦出關後屢奏克捷成功實爲安速漢
大臣中有此全才能爲國家帶兵宣力者自應特沛殊恩復念安南向有瘴癘兵
夫人數衆多若在彼久駐轉於新造小邦多有不便況安南雖蕞爾一隅然黎氏
立國已久其興廢未必不關氣數黎維祁巽懦無能或者天厭黎氏不加護佑朕
從來辦事無不順天而行是以諭令孫士毅作速撤兵該督若遵前旨此時早已
進關乃在彼耽延一月有餘致賊衆乘閒復發蓋由孫士毅冀阮惠等投出或被
旁人縛送未免意存貪功因有此意外之變朕與孫士毅均不能辭咎阮惠既經

逃回復率衆前至必非旦夕所能糾合其中未必盡係賊黨自係附近黎城反側之徒從而附和孫士毅在彼何不留心偵察預爲布置乃待賊至始行迎堵致損官兵究係孫士毅成功後不無自滿之心有此挫折不特難邀懋賞卽令其仍留兩廣總督而威望已損亦不足彈壓海疆因命來京另候簡用以福康安代之先是阮惠奪黎城時屯兵富良江據其險士毅見賊衆蟻聚欲渡江剿殺誓以身殉許世亨力阻之且語以國體攸關令千總薛忠挽其韁而退至是請罪上但撤回所封公爵及紅寶石帽頂仍令戴單眼花翎駐鎮南關調兵阮惠既復據黎城自知得罪天朝悔懼求內附時福康安至士毅與嚴斥之既察其誠並以黎氏督亂不堪立國遂偕奏安南不必用兵狀上從其議旋授兵部尙書充軍機大臣供奉南書房恩賜紫禁城騎馬是冬命署四川總督次年實授蜀素多盜鑄百物騰踊士毅奏請發價收繳以杜其弊上謹之下其法於他省未幾江蘇高郵句容書吏冒徵事覺總督書麟獲罪上以江蘇爲財賦重地官吏最易滋弊必老成幹練者始克勝任非孫士毅不可遂調兩江總督士毅初到江南民遮訴者多涉官吏奏請別其重輕親提研鞠上鑒江省吏治廢弛已久敕士毅毋稍徇隱以整官方徐

州王平莊漫口未合士毅馳抵毛城鋪修築隄堰礪山蕭縣宿州靈璧及睢寧之十三社皆被水力籌疏洩與撫卹事胥稱旨五十六年夏授吏部尙書協辦大學士秋九月西藏巴勒布以貿易構釁奪據聶拉木之地四川總督鄂輝領兵赴藏命士毅往攝其事士毅先駐打箭爐籌辦軍糈上善其周詳命一人總理之次年春因臺站牛病轉運多遲自請親赴察木多嗣以我兵已進後藏復馳至前藏途路險峻馱載甚艱士毅督催奮勉由是大軍得迅奏膚功八月廓爾喀平授文淵閣大學士仍偕福康安和琳駐前藏籌畫善後事宜上以其所定章程可期經久嘉獎之五十八年軍務告竣覈辦奏銷上念士毅年老且藏內甫經安輯正資整飭之時而該省地通西路統轄地土各番非威重大臣不足以資鎮撫以福康安調四川總督嗣福康安率金川土司入覲仍命士毅權署並諭曰孫士毅年逾七十以實授大學士本應卽令來京供職但伊前次辦理糧餉事務不無遲誤且軍需款項皆係經手支發今令留川數月查辦奏銷俾不致有浮冒亦可將功補過五十九年秋福康安已調雲貴和琳初授四川總督例當入覲士毅請留二人會覈報銷適有邪教私鑄二案因諭曰此次報銷原係孫士毅一手經理福康安雖

在軍營帶兵和琳在前後藏往來催趨其中情形均未深悉今交與孫士毅辦理正可駕輕就熟止須分別准駁實用實銷覈明具題有何不能爲者卽或有須與和琳福康安商酌之處亦無難往返札商何必伊三人同在省城久駐會覈著傳諭孫士毅上緊趕辦不必再思委卸至孫士毅屢署督篆所屬邪匪私鑄等事未能覺察已難辭辦理不善之過其摺內稱福康安到任兩月地方已大覺改觀試思伊爲此言問心寧不自愧卽雲南錢局百弊叢生孫士毅曾任雲南巡撫藩司此弊端又誰之咎今令伊署四川總督印務一切惟當認真料理稍贖前愆不可存五日京兆之見致負委任又因覈奏所奉諭旨聲紋各案未得要領并附奏內有戀主情殷語蒙諭申飭向來辦事尙爲諳練何以近日漸不如前六十年春湖南苗反延及四川秀山境士毅卽馳赴秀山以遏其衝督辦糧餉及藥丸營帳之屬無不周備敕部優敘者再冬十一月賊爲福康安和琳所蹙潛窺秀山士毅率兵擊之斬首二百餘級擒賊目二防禦愈嚴嘉慶元年二月湖北邪匪滋事侵擾四川西陽州界士毅馳抵來鳳屢剿賊三月賊屯小坳士毅由閒道進攻伺賊不備夤夜冒雨先登分兵奪其坐仙坪賊驚竄我兵斬殺甚多是時天明賊喊聲四

起我兵不及賊十之一士毅令參將何元卿等固守山梁自領二十人馳回苗容調防守兵六百人率都司馬瑞圖等前赴小坳遂殺三四百人元卿見賊隊忽動知士毅已到大呼馳下賊前後受敵衆大亂元卿痛剿直至小坳與士毅合聲勢愈壯賊驚急無措遂殲之焚其巢奪獲刀矛千八百有餘牛羊雞犬之屬無算分賞士卒及難民等以功晉封三等男爵四月士毅以賊寨林立惟茶園溪最多必分路進剿始可集事時大雨旬日火藥不然俟其霽恐賊得預爲備乃乘夜兵分爲四人持短兵至涌而入呼聲震山賊俱竄聚茶園溪率衆抗拒千總張超執長矛先登斬其魁我兵望見勇氣百倍賊敗追奔四十餘里積屍徧野餘從老寨渡河而遁後濟者多溺斃賊旣被大創退據紅巖堡之旗鼓寨士毅移營前進六月於軍中得疾遽卒事聞加贈公爵謚文靖長孫均襲封伯爵人正白旗漢軍旗籍從士毅意也二年均來京謝恩上以士毅宣力有年命均在散秩大臣上行走四年因均年穉未能諳習奉旨回旗當差十一年均廢疾不能供職請以同祖弟玉墀承襲諭曰孫士毅前在兩廣總督任內辦理安南軍務屢章奏捷戡定黎城蒙皇考高宗純皇帝特封公爵彼時疊降諭旨原令其及早撤兵而孫士毅意存貪

功並不遵奉辦理以致遲延失事兵潰入關所奏情形多有虛捏隨將公爵革去迨後孫士毅因在四川總督任內辦理邪匪著有勞績復經賞給伯爵世襲此實皇考高宗純皇帝逾格鴻施伊於病中曾札懇利坤籲請願將承襲之長孫列入旗檔亦卽取巧之一端朕仰體皇考高宗純皇帝如天之仁於孫士毅種種欺飾之處不加追究未將孫均承襲伯爵斥革今孫均旣因病廢不能當差見在又無親子可以承襲乃具呈瀆請欲將同祖弟孫玉墀襲伯爵殊屬冒昧試思孫玉墀並未列入旗檔焉有以民籍准其入旗承襲之理且孫士毅在軍營出力之處業已令伊孫承襲伯爵一次儘足償其勞績見在孫均病廢此外更無例應承襲之人卽係無福受世襲之典所有孫士毅原給伯爵承襲之處著裁撤孫均並著出旗仍歸民籍

索琳

索琳完顏氏滿洲正藍旗人父那蘇泰熱河副都統乾隆元年索琳由廕生以主事用籤掣兵部三年中繙譯舉人洊升吏部員外郎調兵部十七年充軍機章京十九年擢刑部郎中二十年調戶部二十四年四月京察一等閏六月授山西歸

綏道二十五年正月遷按察使六月疏言查歸化城歸綏道審轉命盜各案如兇盜屍親事主均係民人由七協通判承審經同知歸綏道覆審招解臬司申請撫臣題結其有蒙古與蒙古交涉命盜案件由外藩各扎薩克派員來城會同通判審解同知轉解都統歸綏道會審咨部若係蒙古與民人交涉命盜案件通判驗報行文外藩扎薩克申請都統各委員來城審明仍經同知轉解歸綏道會同都統覆審移解臬司轉解撫臣會同將軍都統題結凡此案件例以扎薩克委員到齊之日起限有屢次訂期不至案犯經年久羈其干連待質之犯省釋無期更有牽涉二三旗分或一旗委員未到又另訂期勢不能依限完結查原定扎薩克委員會審之例原因蒙古不知法律恐其疑有屈抑故令會審以服其心見今各扎薩克無不深曉立法平允卽委員會審之時亦從無疑議是會審之例徒致案牘久懸犯證拖累請嗣後歸化城七協廳蒙古於蒙古命盜各案由通判驗訊申請都統就近派委土默特參佐領會審咨部其蒙古與民人交涉之案亦請都統委參佐領會審由撫臣會題所有各扎薩克委員會審之例停止結案後仍將審擬定罪之處由歸綏道行文扎薩克知照奏入上是之二十六年升浙江布政使二

十九年奏言四月欽奉上諭向來緣事降調官員例應引見者俱由該督撫出具考語送部引見朕既以覈其人之材具亦因以覘督撫之鑒別屬員法至善也其離任候補之員因係前任案件罪誤降調本籍督撫因非見屬之員無從出具考語嗣後離任人員緣事降調例應引見者並著原隸之督撫一體出具考語送部引見著爲令見在各員俱已欽遵辦理惟是此等離任人員已回本籍者大率別有事故未能即時赴補如丁憂則須俟服闋告病則須俟病痊他若終養更須俟養親事畢若遲至數年之後始赴任所請咨竊恐原隸之督撫或有更易而接任之督撫未悉賢否亦無從出具考語查向來官員遇有事故離任原有給咨回籍之例伏思與其事後無從考覈似不若於請咨回籍時卽令該督撫豫將該員平日爲官如何出具切實考語明立印案並咨明本籍督撫存案庶原籍任所皆有原隸之督撫考語可稽易於查辦如蒙俞允則將此等候補降調人員例應引見者准其由本籍咨送祇須令本籍督撫查明從前咨回存案考語於文內敘明送部卽與原隸之督撫出考無異而該員得免遠赴任所往返稽遲似覺便捷得旨嘉獎三十年閏二月授副都統賞戴花翎前往庫倫協同桑齋多爾濟辦事四月

民人趙立喇嘛垂黨等與鄂羅斯私行貿易經成衮扎布奏聞上命桑齋多爾濟索琳查明具奏六月成衮扎布奏稱恰克圖往來之人及恰克圖居住之人等皆言鄂羅斯尙通貿易而協理台吉沙克都爾亦告稱曾見桑齋多爾濟屬下官員達賴等齋有王大臣等文書帶領商人連次赴鄂羅斯貿易諭曰鄂羅斯貿易之處已經停止桑齋多爾濟豈可潛行貿易著阿里衮馳驛前往庫倫查辦卽帶領索琳一同辦理七月諭曰前據成衮扎布奏稱恰克圖地方並未停止貿易等語朕曾令索琳等查明具奏乃索琳扶同桑齋多爾濟掩飾並不據實陳奏今知阿里衮到彼查辦恐其敗露始行請罪殊屬不堪索琳著革去副都統自備資斧管理恰克圖兵在章京上效力贖罪三十三年八月召還京十月授戶部右侍郎十一月命在軍機處行走三十四年署理藩院侍郎三十五年七月理藩院奏參古北口驛站章京富爾德赫短發馬價命偕羅布藏錫喇布前往審訊索琳傳寫諭旨舛錯下部嚴議降一級留任尋偕刑部侍郎博清額赴土默特鞫誠親王壻納遜特固斯謀鳩格格案十一月充國史館副總裁三十六年正月因未能究出謀鳩實情反將案犯交納遜特固斯看守徑自回京上嚴飭之降三級調用三月命

署內閣學士在軍機上行走旋以副都統銜赴西藏辦事三十七年二月諭曰據桂林奏准駐藏大臣咨稱民人杜華飲酒身死不明通判蘇恩楨遊擊永明互相推諉不辦應由內地另行派員往辦西藏距內地甚遠故特派大臣前往辦事遇有案件理宜卽行審擬完結如屬員推諉不辦亦應一面奏參一面辦理豈有調取內地官員往辦之理乎在莽古賚從前惟管理旗務謂不諳事體猶可索琳由軍機章京擢任布政使辦事有年又屢經差遣並曾在軍機處行走熟聆朕旨何事未經自非莽古賚可比此等舉動甚屬不堪莽古賚索琳俱著嚴行申飭五月吏部議奏浙江失察屬員侵虧之歷任撫藩索琳應降二級調用命俟更換回京之日再行請旨三十年閏三月署禮部侍郎四月諭曰索琳前以戶部侍郎與署侍郎博清額前往土默特查審事件未能妥協是以將伊革去侍郎降署內閣學士令其在軍機司員上行走嗣因駐藏需員復給與副都統銜前往辦事乃於民人杜華身死不明一案部議請革去職銜彼時因索琳駐藏在外當經降旨俟其更換回京之日再降諭旨後又因藏內及前任浙江藩司任內例應議處者三案共應降七級調用均聲明換班回京之日請旨今經兵部彙案具奏索琳著銷去

副都統銜加恩授爲內閣學士革職留任俟八年無過方准開復所有禮部侍郎員缺仍著索琳暫行署理是月命在軍機處學習行走十月補內閣學士兼禮部侍郎銜旋赴歸化城鞫案十一月署理藩院侍郎往庫倫換班四十一年四月升理藩院尙書留庫倫辦事七月因審理命案徇情營私降理藩院侍郎仍帶革職留任四十三年七月召還京復因在庫倫時辦理鄂羅斯與商人貿易事宜未能妥協部議革任從之八月命在理藩院郎中上行走四十四年正月復以副都統銜赴藏辦事賞戴花翎十一月巴唐賊匪阻路行劫命索琳帶兵前往尋奏賊匪亟宜懲創已令公班第達前赴嘉禾喀爾見在趕辦烏拉牲隻令遊擊納其善等帶往班第達營俟來春進兵以期迅速奏功上嘉之四十五年二月行抵拉里山卒

劉星煒

劉星煒江蘇武進人乾隆十三年進士改庶吉士十六年散館授編修十七年三月充順天鄉試同考官六月大考二等八月充會試同考官十八年七月充河南鄉試正考官十月遷侍講十九年四月充日講起居注官六月提督廣東學政二

十一年奏肇慶府鶴山縣立縣之初有廣州府民一百五戶呈請修城入籍奏准應試易滋冒考之弊除已移住鶴山准其應試外餘必查有產業呈縣注明方准仍移知原籍以防重考其廬墓田糧在原籍不願遷者仍歸原籍應試從之是年丁母憂二十三年服闋二十四年正月補原官九月提督安徽學政二十五年轉侍讀奏歲科兩試童生請兼試五言六韻排律詩一首詩文並優者列在前茅文可入彀而詩律未諧者量爲節取並飭學官月課一體限韻課詩下部議行時福建學政汪廷瑛奏准將各省新進童生試卷同考列一等生員試卷解部磨勘星煒以童生試卷繁多若俱由塘馬遞送恐不便於郵政請將歲科試各項文冊照例隨本送部其生童各卷令學臣自備車腳專差承役解送上允之二十六年遷左春坊左庶子尋升翰林院侍讀學士二十八年大考二等二十九年命在上書房行走三十年正月擢內閣學士兼禮部侍郎銜九月遷禮部右侍郎三十一年九月充武會試正考官十月調工部右侍郎三十三年六月充江西鄉試正考官七月轉左侍郎三十七年卒

王利

王昶江蘇青浦人乾隆十九年進士二十二年上南巡召試一等欽賜內閣中書二十三年補內閣中書二十四年八月充順天鄉試同考官十一月在軍機司員上行走二十五年八月充順天鄉試同考官二十六年三月充會試同考官二十七年八月充順天鄉試同考官二十八年三月充會試同考官二十九年三月擢刑部山東司主事辦理秋審事三十一年遷浙江司員外郎署郎中三十二年五月升江西司郎中三十三年四月京察一等記名以道府用七月以漏洩查辦兩淮鹽引一案奉旨革職九月雲貴總督阿桂請帶往雲南軍營效力三十六年十月諭曰據溫福奏革職郎中王昶在滇省軍營自備資斧效力見已滿三年今派令隨赴四川辦事懇量予加恩等語王昶著賞給主事所有應得分例准其支食十一月補吏部考功司主事三十七年十二月副將軍阿桂奏前經帶往辦事之主事王昶由雲南軍營效力復帶赴四川軍營一切奏摺文移皆其承辦頗爲出力得旨王昶著加恩以吏部員外郎用三十八年補稽勳司員外郎三十九年以軍營奮勉經大學士阿桂保奏以本部郎中升用四十年補文選司郎中四十一年五月諭曰吏部郎中王昶在軍機出力年久頗著勤勞著加恩升鴻臚寺卿並

賞戴花翎仍在軍機處司員上行走七月授通政司副使四十二年遷大理寺卿四十四年擢都察院左副都御史四十五年三月授江西按察使八月丁母憂回籍四十八年二月服闋補直隸按察使三月調陝西按察使十月奏稱向例重犯脫逃州縣先於本境查拏初參限滿不獲始造具事由清冊分咨鄰省通緝查命案初參以半年爲限閱時既久頑獷之徒早已乘閒遠颺請嗣後遇有兇犯脫逃一面在本地嚴拏一面飛咨鄰省通緝得旨依議速行十二月奏陝省幅員遼闊東南與楚蜀接壤最易藏奸見飭各屬將舊有保甲逐一清理漢中興安一帶流寓民人取具相識保結方准棲止其無人認識蹤跡可疑者遞回原籍至往來過客於歇店給發印簿登記彙查儻詢出命盜重犯曾在該店歇宿照例治罪再兇器必宜禁絕除鳥槍業已陸續收繳其餘順刀禰刀不惟不容佩帶並不許製造仍飭各屬嚴密稽查毋任胥役藉端滋擾得旨實力爲之五十年署陝西布政使五十七年七月遷雲南布政使九月諭曰據永保奏臬司王昶已升任雲南藩司應行交代赴任等語前因伊陽縣逸犯秦國棟及大名案首犯段文經徐克展等查拏未獲令王昶在商州搜捕今兩案正犯尙未弋獲正應令王昶在彼悉心督

緝乃永保以該司升任雲南遽派潼商道德明前往商州更換王昶何拘泥不曉事體如此所有陝西臬司印務著顧長紱兼署外王昶應仍在商州潼關一帶嚴緝要犯俟拏獲後再令交代起程十月又諭曰王昶前在商州一帶緝拏要犯今秦國棟業經拏獲王昶著仍遵前旨卽來京陛見後再赴雲南藩司新任五十三
年調江西布政使五十四年二月授刑部右侍郎五十五年三月江蘇高郵州知州吳煥袒庇書役私雕印信冒徵錢糧一案經該州巡檢陳倚道查獲疊稟本省各上司遲延不辦至是揭報戶部上命偕兵部尙書慶桂馳驛前往會同兩江總督書麟審訊嗣以書麟奏到摺內並不細覈詳稟批發日月嚴究徇縱情節將巡撫閱鶚元奏參代爲掩飾將書麟交部嚴議諭曰此案關係吏胥假票重徵官吏通同隱蔽王昶籍隸江南未免心存瞻顧且恐不能堅定漫無主見必致附和書麟所奏代人受過著將案內犯證一切卷宗迅速解赴熱河行在審辦七月命赴湖南鞫湘鄉縣糧書需索案九月赴湖北鞫應城縣倉書浮收案十月鞫江陵縣書吏偷減土方案十一月鞫永明縣賄買武童案十二月鞫長沙縣勒買常平倉穀案各得實以聞五十七年八月充順天鄉試副考官五十八年三月奏給假回

籍省墓上允之十二月回京諭曰侍郎王昶假滿召見看其年力就衰伊亦自以精神日減難以供職王昶著以原品休致俟來歲春融卽行回籍以示體恤嘉慶十一年六月卒

陸費墀

陸費墀浙江桐鄉人乾隆三十年南巡召試賜舉人授內閣中書三十一年進士改庶吉士三十四年散館授編修三十五年充順天鄉試同考官三十八年二月命儒臣校覈明代永樂大典詔求天下遺書開四庫全書館選翰林官專司纂輯以墀充總校官十月充日講起居注官三十九年諭曰編修陸費墀承辦四庫全書並薈要處繕錄之事一切綜覈稽查頗能實心勤勉且其學問亦優加恩以侍讀升用四十年擢侍讀學士尋升少詹事四十一年充文淵閣直閣事四十三年以纂辦各書均能出力賞緞匹荷包筆墨紙硯等物四十五年武英殿遺失四庫全書底本三十餘種經總裁吏部左侍郎王杰奏參上以墀專司提調前後數年事出一手命解任審訊嗣查明實因書卷浩繁收發不清所致別無情弊得旨開復仍下部議處尋議降一級准其抵銷九月上以歷代官制沿革不一有今古異

名而職司無異或古有其官今無其官古無其官今有其官命纂歷代職官表一書埤偕內閣學士紀昀光祿寺卿陸錫熊翰林院編修孫士毅等總其事四十七年七月擢內閣學士兼禮部侍郎銜十月以四庫全書內語有悖謬未經改正下部議處尋議降一級留任四十八年以母年九十奏懇給假回籍省視上允所請並賜埤母御書扁額四十九年正月擢禮部右侍郎二月命充四庫全書館副總裁官十一月充經筵講官五十年仍充文淵閣直閣事五十一年轉左侍郎尋丁母憂五十二年正月以續繕三分書內有悖妄不經之語埤在館時未經奏請銷燬下部嚴議部議革職上改爲補官日革職留任六月上以四庫全書謬謬甚多命大學士九卿等覆加詳閱尋奏書中有違礙諸說未經刪削且有連篇累牘脫空無字者請將承辦各員懲處諭曰辦理四庫全書係總纂紀昀陸錫熊總校陸費墀專司其事朕因該員等纂輯訂正著有微勞不次超擢晉階卿貳乃所辦書籍如此荒謬舛錯咎無可辭陸費墀本係武英殿提調復充總校所有四庫全書伊一人實始終其事而其洊升侍郎受恩尤重較之紀昀陸錫熊其咎亦更重見在續辦三分書應發文瀾文匯文宗三閣陳設者所有而葉裝訂木匣刻字等項

俱著陸費墀自出己資罰賠辦理以示懲儆而服衆心仍下部嚴議尋照部議革職五十五年九月卒十月諭曰陸費墀本係寒士家無擔石向在于敏中處藉館爲業諒不過千金產業耳今所辦三閣書匣等項及繳出罰銀一萬兩計其家資已不下二三萬若非從前在四庫館提調任內苞苴餽送何以有此多資見在陸費墀業已身故所有插架裝匣等事若令伊子接辦恐未能諳習且身後所遺家業想已無多亦難措辦此時三分書俱已校對完竣自應全行發往三處藏弄未便稽延著傳諭海凝全德卽做照前次發去裝潢書匣等式樣製造專派妥商辦理並著海凝查明陸費墀原籍見有書房產業加恩酌留一千兩之數爲伊家屬養贍如尙有餘資卽作爲三閣辦書之用子鑿福建建陽縣知縣元鑽直隸天津縣知縣孫瓌湖南巡撫緣案革職

清史列傳 卷二十七

大臣傳次編二

尹壯圖

尹壯圖雲南蒙自人乾隆三十一年進士改庶吉士三十九年五月遷禮部郎中十一月授江南道御史四十二年轉京畿道御史四十四年十月擢光祿寺少卿十二月遷太僕寺少卿四十五年擢內閣學士兼禮部侍郎四十八年充順天鄉試副考官五十二年丁父憂五十五年服闋補授原職十一月奏言督撫自蹈愆尤聖恩不卽加之罷斥罰銀數萬兩充公因有督撫等自請認罰銀若干萬兩者在桀驁之督撫藉口以快其饕餮之私卽清廉自矢者不得不望屬員之依助日後遇有虧空營私重案不容不曲爲庇護是罰銀雖嚴不惟無以動其愧懼之心且潛生其玩易之念請永停罰銀之例如才具平常者或卽罷斥或用京職毋許再膺外任諭曰尹壯圖奏請將罰銀之例永遠停止固屬不爲無見不知朕之督撫皆因一時無人往往棄瑕錄用量予從寬卽或議繳罰項皆留爲地方工程公

用亦以督撫等祿入豐腴而所獲之咎尙非法所難宥是以酌量議罰用示薄懲但督撫等或有昧良負恩之人以措辦官項爲辭需索屬員派令伙助而屬員亦藉此斂派以爲逢迎上司之地此等情弊不能保其必無尹壯圖旣爲此奏自必確有見聞今祇係空言並無左證著將所指督撫何人逢迎上司者何人藉端勒派致有虧空庫項者何人指實奏參朕必嚴加訊究重治其罪尹壯圖不得以風聞取譽也壯圖覆奏各督撫聲名狼籍吏治廢弛臣經過地方體察官吏賢否商民半皆蹙額興歎各省風氣大抵皆然若勒派逢迎之人彼上司屬員授受時外間豈能得見請旨簡派滿洲大臣同臣往各省密查虧空諭曰尹壯圖覆奏朕披覽再三並未指實一人一事仍係撫拾浮詞空言支飾至所稱經過之直隸山東河南湖廣江西廣西貴州雲南等省商民蹙額興歎其意竟似居今之世民不堪命矣此係聞自何人於何處見此情狀又請簡派滿洲大臣同伊密往各省盤查虧空不但無此政體卽偶有虧缺之處一聞欽差信息早已設法彌縫尹壯圖亦知事有難行不過欲藉此奏見長或幸邀錄用此等居心豈能逃朕洞鑒著將所奏逐一指實覆奏不可徒以空言無實自蹈欺罔之咎也尋壯圖覆奏自認措詞

失當不能指出確據并請治罪上命戶部侍郎慶成帶同壯圖往山西盤查虧空
諭曰尹壯圖逞臆妄言陳奏不實自問亦難解免今已令侍郎慶成帶伊前往所
指書麟管轄之山西切實盤查若果有虧缺卽當嚴行究辦若毫無虧缺則是尹
壯圖以捕風捉影之談爲沽譽邀名之舉不但誣地方官以貪污之罪並將天下
億兆民人感戴真誠全爲泯沒試令尹壯圖清夜捫心亦何忍爲此耶著將尹壯
圖莠言亂政之處通諭知之十二月慶成奏查明山西大同府及藩庫無虧復據
壯圖奏親自盤查不能指出虧空確據請回京治罪上以壯圖陳奏不實切責之
命慶成帶同壯圖再赴直隸及山東江南逐加盤查慶成奏查正定府倉庫及直
隸藩庫均無虧缺見在查過兩省其大小官吏並無腴民斂怨之處諭曰尹壯圖
來往山西直隸卽日又須往山東江南等省所過地方甚多小民有無蹙額之狀
興嘆之語著尹壯圖於途中體察諮詢據實具奏五十六年正月慶成奏查山東
省之蘭山縣及江南省之山陽倉庫存貯齊全仍帶同尹壯圖前往江蘇盤查並
據壯圖奏經過各州縣地方百姓俱極安帖隨處體察毫無興歎情事諭曰尹壯
圖前奏所言商民蹙額興歎竟屬全無影響今已日擊商民樂業情形自不能復

置一詞但伊從前所聞得自何人傳說著慶成卽向尹壯圖確切詢明令其指實具奏慶成奏傳旨向尹壯圖確詢商民蹙額興歎究係何處令其指實具奏二三人不可含糊支飾據尹壯圖覆稱回籍所過之處所見之人因不知其姓名並不記是何州縣地方不敢妄指只求治以虛誑之罪又據慶成奏江蘇藩庫完足卽日帶同尹壯圖起程回京候旨諭曰尹壯圖節次覆奏總不能指實一人一事因令慶成帶赴山西直隸山東江南等省盤查倉庫俱無虧短是尹壯圖逞臆妄言竟敢以不能記憶虛詞有心欺罔其咎實無可寬宥尹壯圖著革職交與慶成押帶來京交刑部治罪尋命大學士九卿會同審訊論罪如律奏入諭曰尹壯圖俯首認罪將飾詞妄奏各實情逐一供吐大學士九卿照挾詐欺公安生異議律問擬斬決在諸臣以尹壯圖如此乖謬不敬自應按律問擬卽不立實典刑亦當遣發伊犁以示懲儆然朕孜孜求治兢惕爲懷從前彭元瑞呈進古稀頌贊揚鴻業因作古稀說有以頌爲規之語今尹壯圖逞臆妄言亦不妨以謗爲規不值遽加之重罪也尹壯圖著加恩免其治罪以內閣侍讀用仍帶革職留任八年無過方准開復五月諭曰尹壯圖前經降旨以內閣侍讀用但念員缺甚少補授無期著

加恩以禮部主事用嗣因母老奉命歸養嘉慶四年正月諭曰前任內閣學士尹壯圖曾以各省倉庫多有虧缺藉詞彌補層層朘削以致生民受困之處具摺陳奏其事雖查無實據而所奏實非無因似此敢言之臣急宜錄用尹壯圖前以禮部主事請假回籍著富綱傳知尹壯圖令其卽行來京候旨擢用並著准其馳驛四月壯圖抵京具呈以母老乞恩歸養諭曰前因內閣學士尹壯圖曾奏各直省倉庫虧缺經派令慶成帶同尹壯圖前赴各省盤查彼時各該督撫等冀圖蒙蔽多係設法那移彌縫掩飾遂致尹壯圖以陳奏不實降調回籍此皆朕所深知是以令其馳驛來京另候擢用今尹壯圖於本日來京具摺謝恩據軍機王大臣面奏尹壯圖見有老母年逾八十等語尹壯圖籍隸雲南距京較遠旣難迎養若留京供職則伊母子萬里睽違朕心實有所不忍尹壯圖從前尙屬敢言著賞給給事中銜仍令馳驛回籍侍母他年再來京供職是月壯圖奏請清查各省陋規諭曰陋規一項原不應公然以此名目達於朕前但州縣於通都大邑差務較繁頗資民力皆係積習相沿不能一時槩行革除今若遽行明示科條則地方州縣或因辦公竭蹶設法病民滋事巧取其弊轉較向來陋規爲甚至分別二千以上至

於數萬者留半辦公其餘分幫衝途苦缺定爲成式是明導以取財之方流弊有不可勝言者尹壯圖所奏實不可行前已令其回籍侍養著賞給伊母大緞二匹交尹壯圖帶回以示恩眷至尹壯圖見係給事中銜准其在籍奏事所有呈遞奏摺卽交雲南巡撫轉遞但須擇緊要事件據實入告不得因有奏事之責遂爾挾制地方想尹壯圖亦不肖出此也七月壯圖抵滇具摺謝恩五年奏請慎拔真才以儲實用一嚴保舉處分以專責成也伏讀上諭命在京王大臣各舉所知密爲陳奏誠操迪知忱恂之要但不嚴定賞罰章程誠恐保舉大臣不加慎重日久弊生轉啟揣摩鑽營之漸請敕下吏部嚴定保舉處分所保得人不惜進賢上賞如所保之人有犯貪酷敗檢諸罪保舉者亦酌其情法輕重示罰俾諸大臣知信賞必罰不敢不十分慎重矣一科場防杜關節宜操其要害也鄉會試爲士子進身之階始若夤緣詭遇其出身先已不正安望異日克爲良臣比年雖嚴定科條總不能操其要害如闈中有通關節者名曰亮卷房考於閱卷時先將佳文壓住而以庸淺之卷故爲陪襯主司綜理全局往往易受其愚設主司偶向其房搜閱落卷伊等咸以主司房考俱係欽點不受節制往往曉曉爭執是以搜卷之例扞格

難行請敕下主司命房考於頭場正卷薦畢各將落卷送主司搜閱儻得佳文卽發監試補印薦條如有爭執監試將兩造棄取之文進呈妍媸不難立辨矣請敕下各省一體遵行一八旗人才宜廣爲鼓勵以儲實用也國家任人圖政內而六部九卿外而督撫藩臬莫不滿漢兼用以成相維之勢而六部司員尤爲造就人才之藪乃漢司員分部及散館改部者將近百人而滿員寥寥無幾良由各部滿洲司員俱由本部筆帖式保題升用其中行走勤敏固不乏人但於彙案文義未能暢曉請敕下滿洲父兄嚴督子弟講習經書精通文理先於童試廣取生員若干名鄉會試廣取舉人進士若干名庶分部學習不致乏人遇有郎中員外主事缺先儘科甲班挑補行之十年則八旗子弟明體達用之材當必較漢員爲更優矣上命軍機大臣議奏尋覆奏尹壯圖嚴定保舉章程及八旗六部司員先儘科甲之處均毋庸議惟房考落卷送主考搜閱事近可行請嗣後每科房考落卷交監試御史存貯送主考搜閱俟命下載入科場條例諭曰此次密保人員其所保之人將來如有貪酷枉法情事經朕指出自應交部嚴議本有成例可循若果有出色人員建樹功績必將保舉人員重加優獎權衡出自朕裁其主考披閱落卷

議令各房落卷由監試御史交進著禮部載入科場條例至滿洲素以騎射清語爲重卽隨時訓諭亦恐未臻諳熟若保題各缺皆由科甲之人是令其專攻舉業更致拋荒本務轉非造就滿洲人才之意自應循照舊例毋庸另立科條六年雲南巡撫初彭齡陳請歸養尹壯圖奏初彭齡在滇清介率屬實惠在民能假以歲月則滇民元氣可望其復若令其怙怙去任殊失赤子之望又奏滿洲子弟宜於十五六歲以前專責以熟讀經書講明義理俟心性融澈精力完固後再責以騎射繙譯更易爲力諭曰尹壯圖欲留初彭齡在滇勿令歸養試思尹壯圖亦因母老回籍侍養獨不念初彭齡雙親年邁而轉拂其孝養之忱乎又另摺奏滿洲子弟繙譯一道必先通曉漢文易於明透伊並不知清文義理爲此督論況國語本應不學而能而騎射亦須童年練習若如尹壯圖所言必俟十五六歲以後始行學習安能精熟尹壯圖令其在籍奏事原爲該地方官吏或有廢弛貪黷之事伊得隨時密陳乃竟欲干涉朕用人大權並將從前具奏滿洲讀書應試曾經駁飭之事復行瀆陳更張本朝成法本應治以妄言之罪但朕正當求言之際從不肖以言罪人著伊桑阿將原摺擲還並傳旨嚴行申飭此後遇有地方不公不法事

件仍准其具摺密陳八年閏二月奏言天下之大萬幾之繁皆係皇上一人獨理而內外諸臣俱不過浮沈旅進旅退之中無一人能匡扶弼亮請於內之卿貳翰詹科道外之藩臬道府慎選二十人輪直內廷將每日奏章諭旨於進呈後盡心檢校然後發鈔有疎忽偏倚之處許其就近詳辨可否諭曰尹壯圖所言皆迂闊糺謬斷不可行朕宵旰憂勤每日召見諸臣不獨內而卿貳外而督撫卽翰詹科道藩臬道府無不一體召對令伊等據實敷陳有所裨益若如尹壯圖所奏欲於內外諸臣中另選二十人輪直檢校奏章諭旨是直於軍機大臣之外添設一內軍機成何政體尹壯圖籍隸雲南近日如藩司陳孝昇道員薩榮安冒銷軍需款項劣蹟顯然伊近在本省豈無風聞今經署巡撫初彭齡參出究辦而伊竟無一言奏及著那彥寶傳到尹壯圖面加訊問因何不將陳孝昇等列款奏參之處據實明白登覆繕摺交那彥寶代行陳遞三月署雲南巡撫那彥寶奏傳旨詢問各情節尹壯圖自認糊塗冒昧並據壯圖覆奏請交部議處諭曰尹壯圖前奏迂闊糺謬經朕逐一指實伊已自認糊塗冒昧至尹壯圖見在雲南省城課士於陳孝昇薩榮安各劣蹟豈無風聞今經詰問乃以不得確據爲詞亦屬強爲支飾但伊

非見任官員所有自請交部議處之處姑加恩寬免著永保傳旨申飭嗣後遇有緊要事件仍准其具摺陳遞十三年閏五月卒十八年雲南巡撫孫玉庭奏請人祀鄉賢祠得旨俞允子佩珩見任戶部主事

舒常

舒常姓舒穆魯滿洲正白旗人父舒赫德武英殿大學士諡文襄有傳乾隆十一年由文生員授藍翎侍衛十六年擢三等侍衛十八年在乾清門行走十九年舒赫德在北路軍營獲咎命奪舒常職發黑龍江披甲二十一年復授三等侍衛派往西路出兵二十二年復以舒赫德獲咎舒常仍奪職發黑龍江二十三年復授三等侍衛二十七年擢二等侍衛三十七年授正黃旗滿洲副都統又授鑲藍旗護軍統領三十八年派往金川軍營命於溫福一路爲參贊大臣十一月疏言噶爾瑪木魯宗巴朗索三處原係賞給綽斯甲布地方理應斷還但從噶爾見在出兵助剿遽奪其地恐致失望因諭令兩土司各自出力俟事竣後秉公剖斷並諭令綽斯甲布如果實心報效將來定邀優賞得旨舒常傳諭綽斯甲布土司之語與朕旨適相符合著將此摺鈔寄阿桂閱看十二月奏攻克日旁山口東邊碉座

賊番連接死守已飭參將馬應詔相度情形可進則進勿使有用之兵置之無用之地得旨所辦甚是此時不宜冒險深入致有疎虞尋奏金酋情願退出甲爾壘壩轉懇綽斯甲布乞降當卽駕馭綽斯甲布令其設法收復甲爾壘壩又諭知投降一事斷不能允必爲各土司斬除日後禍根以堅彼助剿之心上嘉之三十八年六月疏言土兵在營頗爲得力遇有應給之賞尤當立時頒發則受者倍覺銜恩而見者亦知奮勇其陣亡者請給銀三兩以資埋葬從之又奏安礮設寨並防護糧臺情形得旨汝所辦皆中機宜好勉之三十九年四月以土司壅中旺爾結親率土兵二千餘名赴營協剿派令四路進攻會大雪兵不能進而賊來益衆舒常恐土兵傷損致挫銳氣再三諭令撤兵奏入諭曰舒常見賊衆守禦甚緊恐土兵徒傷無益曉諭至再三土司始聽從撤回深合駕馭外番之道伊等見參贊大臣如此矜憐愛護益足勵其勇往之忱舒常所辦甚合機宜尋以前副將李天佑等捏報兵丁鄧有德陣亡摺內未將該兵斫柴被掠曾經錄供奏明之處詳細聲明自請嚴議特旨寬免四十一年奏口外屯政已開兵番等安土樂業見在蕎麥瓜蔬一望青蔥景象安恬敕甯可卜得旨欣覽之四十二年以舒赫德病故命馳

驛來京治喪六月授工部侍郎十月授倉場侍郎十二月承襲雲騎尉四十三年
奏採買奉天陝西麥石其自津抵通請照二十七年例責成坐糧廳大通橋監督
辦運由倉監收毋庸交地方官雇運並不復貯五城糶廩得旨允行四十四年三
月奏請楊村通判務關同知所管漕務文件徑申倉場衙門報聞旋授貴州巡撫
十一月以黔省每歲額辦楚鉛二百五十萬斤運往漢口設局坐賣委員承運抵
漢必俟賣完始行齎價回黔守候需時本任轉多曠誤疏請嗣後令前後委員交
替承管以免濡滯又奏減貴東道糧道養廉均報聞旋署雲貴總督四十五年授
湖廣總督四十六年正月疏請將荊州關改歸地方官管理即於就近之荊宜施
道荊州府知府二員內遴選接辦下部知之七月奏拏獲囑匪彭家桂所有派出
官兵鹽菜口糧俱捐廉發給上以其急公嘉獎之四十七年兼署湖北巡撫四十
八年以光化汛都司守備向駐襄陽去汛窳遠請移駐密邇光化之穀城縣議行
十一月奏房縣九道梁應添設巡檢一員即將安陸府照磨缺裁抵議行十二月
疏言巴陵縣當長江洞庭湖交會之衝湖西向有塘汛保甲稽查惟所管江面自
荆湖腦城陵磯以下至荷葉洲九十里西岸隸湖北監利東岸隸湖南臨湘水面

則仍係巴陵所轄緝捕巡防恆多扞格查巴陵水道此外尙轄三百餘里請將九十里江面於江心分界西面撥監利東面撥臨湘建設卡房以專巡緝部議從之四十九年授兩廣總督九月入覲十一月回任兼署廣東巡撫奉硃批汝精神頗不及前當善爲調攝勿以養子爲念諸事不可廢弛五十年三月擢工部尙書命來京供職五月命署江西巡撫八月奏言湖北被旱多赴江西販買糧石恐市僧遏糴居奇請將常平倉穀先行開糶俾資接濟奉硃批所辦好覽奏略慰九月疏請以南城縣伏牛司巡檢移駐新豐市甯州州同移駐渣津議行五十二年正月命署湖廣總督兼署巡撫諭曰湖北吏治廢弛皆係從前歷任督撫因循日久不加整頓所致舒常亦不能辭其咎見在舒常兼署督撫兩篆務宜董率屬員認真督辦庶積年玩愒習氣日漸改觀如再不實心整理則日甚一日伊於胡底恐不能當其咎也尋奏接奉上諭跪讀之下不勝惶悚惟有振作整飭俾各屬共知畏愧力挽因循延玩之習得旨旣已失之於前莫更迴護於後慎之七月奏湖北早稻豐收秋成大有見動支倉穀二十萬碾米解閩以濟軍需並親往湖南與撫臣浦霖籌議接濟閩兵糧石得旨臺灣剿捕逆匪尙未蒞事所需糧石較多該督等

不分畛域先事豫籌殊屬急公著交部議敘五十三年三月以楚省綱鹽積壓命實力整頓四月奏言川鹽來路由宜昌府屬之巴東歸州見已申明例禁並札令宜昌鎮會同該府多派兵役分駐要道常川偵緝得旨引鹽積滯因在楚行銷繁費浮重以致不能源源轉運該督接奉前旨自應將向來浮費嚴查飭禁實力整頓方於鹺務有裨今乃僅以申明例禁派委緝私爲詞並不認真查辦實爲昧良之過著傳旨申飭仍著將該省相沿繁費如何立法查辦之處據實具奏尋奏漢口商人匣費繁重白屬實在情形嗣後臣等及承緝文武各員惟有絲毫無染一律湔除並嚴緝奸商私販毋使稍侵官引得旨該督等務先正己率屬力爲整頓勿致日久玩生又踵前弊七月湖北荆江泛漲隄塍潰決荆州府全城被淹命大學士公阿桂馳往查辦旋以荆州將軍圖桑阿奏請改建城垣奉旨荆州爲古來重鎮城猶是城江猶是江從古未有被淹之事本朝百餘年亦未聞此乃十年之間三被淹浸而此次江水竟入城內是否江流遷移密邇城垣以致受患著阿桂會同舒常親加履勘通盤籌畫期於一勞永逸旋以阿桂到彼尙需時日命舒常先行籌勘覆奏尋奏荆州郡治地當孔道四百平原襟帶襄樊控扼黔蜀是以古

稱重鎮附近惟荆門州地勢較高然相距窈遠不足以控制江湖此外更無移建之處且體察輿情咸以廬墓田園由來已久遽議遷移似非所願誠如聖諭不如以移建城垣之資爲增築隄塍之用似可常保鞏固也得旨自應如此已陸續降旨矣又奏查勘沿江隄工漫潰二十餘處命解任留工效力自贖仍暫署事務九月以荊州被水由窖金洲漲沙增長偪溜北趨所致奉上諭舒常才本中平因其小心謹慎且係舒赫德之子是以擢用總督乃兩任楚省並不實心任事於窖金洲漲沙偪溜共見共聞之事尙不加意籌辦致郡城被水災實爲辜負任使著革去翎頂仍留工所效力贖罪十一月諭曰舒常前因荊州隄工潰決業經革職所襲雲騎尉世職至舒常襲次已完該旗請將敕書奏繳但念伊父舒赫德宣力年久不忍將伊父所襲世職遽行停襲著加恩留於舒常本身俟荊州隄工完竣再行來京五十四年四月賞給頭等侍衛九月授都察院左都御史五十五年十二月授鑲黃旗蒙古都統嘉慶二年署刑部尙書三年四月署兵部尙書十一月卒諡恪儋子敷慶任三等待衛

宗室興肇

宗室興肇鑲藍旗人乾隆三十年封二等輔國將軍賞戴花翎乾清門行走三十一年充十五善射三十三年率健銳營兵赴雲南軍營三十四年圍攻西甌受傷上嘉其奮勉授正白旗護軍統領三十五年副將軍阿桂征緬甸撤兵太驟興肇隨同畫押革去護軍統領三十七年十月襲奉恩輔國公授正藍旗護軍統領旋充領隊大臣赴金川帶兵十一月兼宗人府右宗人三十九年授荊州將軍仍留軍營四十年十一月大軍進取碾占興肇在巴扎木帶兵接應擒獲甚衆十二月定邊右副將軍明亮等攻克乃當興肇占據山頂及官兵直抵獨松復在後策應均下部優敘四十一年正月協辦大學士阿桂檄撤荊州滿兵赴將軍任二月金川平奏捷圖像紫光閣御製贊曰憶當國初勦業開基宗室王公宣力率師承平錫慶安享榮華董軍建勳斯爲可嘉五十二年調西安將軍五十三年調安遠城將軍五十七年以所管旗兵藥神保等偷盜銀兩審擬輕縱部議革職上從之命退出乾清門仍留公爵罰俸五年旋授散秩大臣五十八年復授荊州將軍六十年五月率滿兵二千赴湖南協剿苗匪因行走迅速賞大小荷包七月諭曰興肇帶兵二千名自當沿途偵訪賊蹤就近剿殺以期廓清後路再赴鎮筸會同攻捕

方爲無責任使乃途次並未打仗及到鎮筸又復漫無調度僅將帶往之兵分駐城外殊不可解前因帶兵迅速尙復加之獎賞今不料其糊塗至此著交部嚴加議處尋議革職詔改爲革職留任十月隨貝子大學士福康安等連克馬腦寨豬草寨殺苗坪竹子寨等處復分路進攻高多寨生擒首逆吳半生下部議敘是月攻克大坡腦得勝山等處木城石卡三十餘座復賞荷包十一月獲賊日吳八月於臥盤寨十二月由鏢木營山坡乘雪未融奮勇截殺斃賊無算復攻克禽頭坡一帶要隘疊邀優賞嘉慶元年正月偕鑲藍旗蒙古都統額勒登保進攻吉吉寨奪據山梁乾州屬之大隴峒趕子坪河洛坪各寨長及斗角巖尾坡九十九峒苗匪俱先後乞降三月特賜蟒袍是月由高吉垞乘勝追至巴金灣將苗寨全行燒燬於兩義溪礮擊藏伏苗匪進至平逆坳奪獲賊卡三處六月隨總督和琳分路進剿生擒石老秦等十六名八月首逆石柳鄧據平隴興肇等由強虎哨進攻奪獲麻里灣等賊卡十餘處九月連克黃土坡蒼茅坪木城石卡六處復從牛心地象心地至山家坳將平隴賊巢併力攻擊斃賊三百餘名復賜蟒袍十二月由平隴後山右隆等處進兵生擒苗匪一百餘名下部優敘二年二月命偕總兵王文

雄率湖南撤回各兵迅抵襄陽與湖北巡撫惠齡等合剿教匪三月偵知賊首姚之富等由泌陽鄧州分股竄逸卽偕文雄擊之於裕州古石灘興肇伏兵山坳追剿三十餘里上嘉其調度有方賞青玉扳指並大小荷包七月由白洋坪率領馬隊斃賊百餘名生擒賊匪十七名八月由石窰灰小道繞至江岸殺賊無算復追至襄陽小河口星夜圍剿賊衆披靡時賊將渡茨河鎮興肇隨明亮等自楓樹埡追剿殲賊甚衆九月復由吳家灣截擊斃賊千餘人賊竄入湖北竹谿縣之水坪欲與小河口賊聚興肇等由椒嶺岡協擊賊西逸十月賊匪自雞心嶺折回復隨明亮率各路官兵隱伏峽口連剿四晝夜斃賊五千餘賞玉扳指荷包十一月追賊於周家壩上高川斃賊千餘名生擒二百名賊首姚之富等入漢中復與賊黨齊王氏李全張漢潮等股匪會合於唐家壩興肇等分帶馬兵由涼埡子鐵嶺關追剿三十餘里三年正月齊王氏等由西鄉渡江竄至石泉上以興肇疏於防範嚴飭之二月賊黨李全由懷陽東趨熬屋攻北城垣興肇等四面兜圍殲賊八百餘名生擒三百餘名復敗之於姚村三月追至尹家衛殲賊無算五月擊張漢潮於南漳殲賊六千餘名生擒九百餘名搜獲大小礮位及兵器五百餘件六月擊

之於司馬岡時賊匪自楚竄陝復由陝入川上切責之七月剿賊於袁家廟斬級六百又於平壩開縣等處斃賊千餘八月復敗賊於西河口時張逆由太平竄至石泉縣境奏入諭曰張漢潮一股屢經剿殺勢已潰散乃明亮等任其竄至石泉焚掠所辦何事明亮與肇均著革去花翎帶罪自贖十月追剿張漢潮於火石嶺十一月復擊之於石塘壩獲器械無算張逆由固城八里關竄至五郎興肇等於兩河追殺六十餘里賊由火碛溝前竄復倍道鈔擊俘斬五百餘名四年三月擊敗張逆於馬伏城五月賊竄入豫境興肇等分路進剿賊越南嶺竄六月至金竹溝焚掠興肇等擒斬百餘人七月復敗之於紅河寺八月賊走採玉窰舊縣關一帶興肇等追殺五十餘里斬獲甚衆九月賊由老林乘夜偷渡前竄諭曰明亮奏稱張漢潮又從深林密箐中偷渡前竄實出情理之外不知伊等是何肺腸其上

次所奏三面合圍之語想亦未必確實今將伊等前摺鈔寄邢彥成松筠閱看著卽切實詳查如果前次奏報盡屬虛言竟將明亮恆瑞興肇三人奏明革職拏問治以欺妄之罪尋在張家坪殲斃張漢潮下部議敘十月又諭曰興肇與明亮種種欺飾之處扶同入奏著革職拏問交松筠嚴審定擬尋擬發往伊犁奉詔改發

烏魯木齊效力贖罪以其子成寬襲公爵十二月丁母憂命回京五年特予三等侍衛爲和闐辦事大臣七月遷二等侍衛十月調塔爾巴哈臺參贊大臣十年二月審辦哈薩克拜氈燒燬房一案未能徹底根究所擬佐領穆特布罪復失之輕縱部議降三級調用詔改爲革職留任九月因前在軍營收受備賞銀諭曰前因湖北省清查軍需銀款內有地方官呈送興肇備賞銀三千四百兩諭令貯繳前據興肇具摺陳辨祇自認賠而不認收受朕恐外省查辦或有舛誤諭令吳熊光詳細確查經該督將呈送收數月日並經手之員逐一查明具奏當令宗人府軍機大臣傳問供認收受屬實前奏實屬無恥巧辨著交宗人府酌議懲處尋議以不准用四品頂帶亦不准食宗室錢糧上從之十二年仍授二等侍衛在大門上行走十三年六月擢鑲紅旗漢軍副都統十一月授杭州將軍十四年調荊州將軍十五年調察哈爾都統十六年因民人在牧廠內偷挖黃芪拒傷官兵未經奏辦部議降三級調用上改爲降二級授頭等侍衛十七年正月遷正紅旗蒙古副都統十二月授密雲副都統旋授江甯將軍十九年授正藍旗漢軍都統二十二年上以興肇年老命以二品頂帶休致二十五年卒

劉秉恬

劉秉恬山西洪洞人乾隆二十一年舉人二十六年取中明通榜中書軍機處行走二十九年擢吏部主事三十年正月升員外郎九月升郎中三十二年授御史三十四年巡視南漕差竣巡視南城授吏科給事中三十四年大學士傅恆督師緬甸奏請秉恬隨赴軍營二月擢鴻臚寺少卿三十五年大兵凱旋五月擢都察院左副都御史六月擢刑部右侍郎七月調兵部左侍郎尋調倉場侍郎三十六年八月奏大通橋以下至通州石壩等處均未挑濬因而衝決隄岸閘座與其補苴於事後曷若綢繆於幾先得旨允行三十七年六月諭川省見在大兵分路進剿兩金川所有軍營糧餉最關緊要南路見派阿爾泰在彼專管其西路著派侍郎劉秉恬專辦劉秉恬人頗明白奮勉此事尙所優爲著卽馳驛速赴川省不必來京請訓又諭曰劉秉恬見在出差往四川辦理西路軍營糧餉著給與欽差大臣關防七月諭曰因川省軍營糧運緊要特派侍郎劉秉恬前往西路鄂實前往南路分頭督率今思南路徑僻站長山巒陡險輓運較艱尤當設法趕運劉秉恬平日頗能辦事著調赴南路上緊籌辦秉恬以西路急需接濟奏請暫留二三日

料理完竣再赴南路奏入硃批是極如此方是又奏南路糧運人俱畏其難臣亦非敢輕言其易然天下亦無必不可辦之事硃批所見甚是勉爲之又奏糧運站夫回空之日請仍給口糧得旨允行十月大兵由甲爾木一路進攻小金川秉恬奏道險萬分惟羊隻可江涉山回招集蠻民販羊至營以六羊抵米一石得旨嘉獎十二月奏見在官兵攻克僧格宗其地距達烏六十餘里臣親往查看酌定程途適中之地復於策爾丹色木安設一站以便轉運至策爾丹色木見有喇嘛寺一所卽將運到米石收貯寺內更得蔽風雨而資防衛再查僧格宗及附近之納圍納扎木等處軍糧乾隆十二三年係由西路餽送運價較省今由南路支應道遠站長俟攻克美諾之日將此一帶軍糧仍歸西路支放則輓運較易錢糧亦可節省奏入上嘉之是月諭軍機大臣等據劉秉恬奏見在馳赴美諾就近督令糧員上緊趕運不敢稍存畛域之見等語所辦甚是深屬可嘉已於摺內批示矣劉秉恬自派赴南路辦糧以來一切俱能奮勉妥協軍儲源源接濟以利進行且由達烏自赴美諾身親督率輓運不辭勞瘁實能與軍營大臣衝鋒陷陣者交濟奏功朕心深爲欣悅前此漢大臣中原有賞給花翎者劉秉恬此次如此認真任事

宜從格外優獎著加恩賞戴花翎賞給大荷包一對小荷包二箇以示恩眷旋授四川總督諭仍留美諾等處董辦一切事務並就近督催糧運三十八年正月奏小金川全境蕩平見在分兵三路剋期申討金川糧運最關緊要臣供支當噶爾拉之外兼辦南路運往綽斯甲布軍糧不敢推諉貽誤此外吉地丹東一路見有官兵六千臣於章谷存糧內督令源源運往足供接濟得旨嘉獎又諭曰劉秉恬見駐美諾辦理一切軍務董天弼又駐布朗郭宗經理降番諸事所有防範機宜乃伊一人專責著將美臥溝及曾頭溝兩路酌量形勢選派幹練備弁帶兵駐守以防賊衆滋事其地有類此要隘之處亦著一體妥辦或美諾兵數不敷派撥川省尙有可調之兵卽著劉秉恬等悉心經理總期於事有益不可惜費旋奏價格宗降番一項俱一例辦理其不隨行者斷無取給內地之糧俾資養贍但旣宥以不死卽當令其自生查美諾爲小金川居中之地臣到彼將各寨逐一清釐並令乘此布種之時照常耕作其力不能者或聽其傭工或量予籽種則見在歸來者可保其無他心其逃往金川者亦將聞風而至奏入上嘉之二月諭據劉秉恬奏稱溫福見在取道進攻昔嶺迅速移營但道路初開恐糧道稍有稽遲卽日馳赴

木果木大營由功噶爾拉一帶地方沿途查辦將道路設法開修驛站妥爲安設並催僱在途米石速赴軍營適中之地帶兵駐防並令先往木果木及功噶爾拉兩處察看情形今尙未接奉前旨一聞溫福移營之信卽迅速前往與朕所降諭旨適合可嘉之至劉秉恬向在軍機處行走有年久經歷練而又不肯稍存畏難之見不辭勞瘁動合機宜深得古大臣實心體國之道實能副朕委任深用嘉慰似此勤勞軍務卽與統兵督戰無異劉秉恬著交部照軍功議敘以示優獎又諭曰據劉秉恬奏綽斯布土司工噶羅爾布差頭人生根吉投稟劉秉恬以綽斯甲布力量較別土司不同而與金川親暱尤久見雖附列行閒未見十分出力其意尙冀大兵中輟既可全恭順之名復不失嫺親之誼方以彌縫爲得計其懇求退回噶爾瑪六宗地方具稟已非一次而試開進剿金川之路皆人所共知該土司不過藉此以表其恭順因而試探軍情尤須直揭其隱私方足使番人知所做勵隨於該頭人叩見時面爲嚴切曉示諭以大兵以次征剿務必掃盡蠻氛斷不中止不似從前提督辦法其六宗等處事平後自然從公剖斷此時無暇辦及至爾土司自去年九月隨征金川至今並未搶得金川一處且容金川賊人在爾境內

放夾壩不能發兵搶擄殺賊所謂實心出力者安在生根吉聞諭慙沮不能置對
惟稱回告土司恪奉遵行并另寫檄諭嚴行詰駁發交該頭人齎回等語所辦甚
合機宜閱其檄藁亦極詞嚴義正實爲可嘉三月奏臣赴木果木大營沿途查辦
一切事宜行至崇德地方卽遇大雪次日抵功噶爾拉地氣極寒四山皆雪甫經
設站人夫尙無棲止之處隨於附近站所飛調篋蓆搭蓋窩棚又湊集帳房各夫
免露處之虞軍糧藉得轉輸迅速至簇拉角克西口係布朗郭宗運糧接濟要道
西口至東口約六七十里多係土路尙易開修由溝口通至木波地方便合帛噶
爾郭克碯及布朗郭宗大路今若將此路開通較爲平易再自功噶爾拉前至軍
營路極陡滑各夫負重維艱已經撥夫重修道路並將冰凌隨時斫鑿不致少誤
糧運奏人報聞又奏定嚴緝逃兵章程諭曰劉秉恬所議甚當卽照此辦理四月
加太子太保六月底木達布朗郭宗兩處失守諭曰此次賊番侵擾原屬猝不及
防其疎忽尙不足爲劉秉恬責惟董天弼本屬輒弱無能之人前經切諭劉秉恬
令其留心查察乃董天弼擅離防守之地退居美諾劉秉恬豈無聞見因何不早
奏參該督之咎實在於此劉秉恬著交部嚴加議處尋諭曰劉秉恬革去總督著

賞給按察使銜翎頂暫行照舊帶用仍令其實心辦事七月諭劉秉恬著革職留於軍營效力自備資斧贖罪又諭曰劉秉恬前此督辦糧務尙屬奮勉妥協且在川年餘道路情形已熟曾爲總督川省文武皆其屬員委以專辦自當聽其調度但伊係革職之員奏摺行文諸多未便著派按察使郝碩前往同劉秉恬督辦西路糧運務使軍糧源源接濟以裕軍儲三十九年奏川省軍糧均係米石至麪斤一項採辦較少而裹帶最爲便捷見在進剿金川約需十七八萬斤業已有盈無絀奏入上嘉之四十年五月奏口外雨頗多楸坻至日爾拉薩拉一帶最關緊要或有雨淋塌卸之處臣趕緊修整並順道前往大板昭軍營等處與督臣富勒渾悉心籌酌將北路軍食歸併西路遞運以省糜費奏入上嘉之八月諭曰劉秉恬前此獲罪原係總督任內之事伊自革職後駐劄楸坻總理糧運兩載以來尙能留心經理妥協盡力著加恩賞給兵部郎中賞戴花翎十月奏補職方司郎中仍帶欽差關防十二月補授吏部右侍郎四十一年調吏部左侍郎四十四年正月諭曰劉秉恬之母年逾八旬見在患病頗重病中思念其子甚切劉秉恬承辦軍需奏銷業將完竣著馳驛迅速回京侍奉伊母聞子剋期回京自必心生欣喜病

勢或可稍痊將此速行傳諭知之是月丁母艱十二月諭畢沉見在丁母憂陝西巡撫員缺緊要卽著劉秉恬署理不必來京請訓伊曾任封疆且守制已屆一年見因一時不得其人暫令署理並非開在任守制之例也四十五年三月諭劉秉恬見有面諭之事著卽馳驛前赴行在陛見其陝西巡撫印務著交布政使尙安護理將此由六百里傳諭知之四月調署雲南巡撫奏云銅與鹽爲地方自然之利何以近年來滇省屢行竭蹶似轉爲地方之累必當求其受累之由斯可得去累之道上是之四十六年八月署雲貴總督時安南國王以內地人民出邊居住咨請防禁秉恬照會國王稱內外界址天然判別無須復加中畫至內地百姓祇緣爾國需用內地貨物天朝俯念藩封世守一視同仁特准開通關市爲爾國利賴否則內地之人焉有遠詣爾國貿易之理又爾國土民欠稅不完一節此非經徵頭目催辦不力卽係私收侵用之故內地民人不與往來貿易且並非在外墾田種地本無應納租賦焉有內地民人脅制土民欠稅之說但旣稱內地之民就寓日衆更有動稱內地差委徵索租賦大爲民擾之事天朝法紀森嚴斷不容若輩潛居境外滋生事端惟有責令爾國就近查出槩行送回內地以憑究治儻有

聞風逃逸者仍卽查明各犯姓名籍貫補開咨報庶內地查拏易盡無從漏網隨具摺陳奏諭曰據劉秉恬奏接據安南國王來咨酌擬照會文彙檄飭一摺所辦甚是已於摺內批示矣安南臣服本朝素稱恭順該國沿邊一帶隘口雖許內地民人往來貿易但其中難保無匪徒在彼滋事之處惟在該督撫隨時嚴飭沿邊鎮將及地方官留心查察按驗查照籍貫毋許游民私越儻有不安本分之徒潛竄彼境滋事卽嚴拏究辦自可以綏屬國而靖邊隅劉秉恬所奏見在飛飭文武各屬巡防偵探遇有並無牌照竄回游民卽行截拏解省嚴審所辦甚爲妥協至其所擬該國照會文彙措詞亦尙屬得體其中稍有字句應行刪節者已令軍機大臣酌改發回該督等卽遵照繕寫發往將此由五百里諭令知之九月諭滇省額運京銅向來辦理遲延皆由該督撫等不能實心籌辦所致此次庚子正運加運八起京銅於七月內全數埽幫辦理甚爲妥速劉秉恬著交部議敘四十八年諭此次壬寅正運加運八起京銅於本年三月全數埽幫爲期尤早劉秉恬著交部議敘五十年諭劉秉恬奏查明滇省歷來文武官員有去思德政等碑一百餘座見在逐一撲毀辦理實屬可嘉劉秉恬著交部議敘五十一年正月諭曰劉秉

恬身任巡撫其初到雲南聲名皆屬平常近聞伊能遵朕教誨痛自改悔無從前
聲名平常之事數年來辦理鹽銅等事俱能迅速妥協劉秉恬應慎之在已持之
以久庶不致負朕教誨成全諄諄告誡之至意閏七月調兵部侍郎五十二年正
月調倉場侍郎十月諭今歲係全漕年分各漕糧較往歲多至一倍有餘該倉場
侍郎等辦理甚爲妥速蘇凌阿劉秉恬俱著交部議敘五十七年閏四月奏籌辦
截漕事宜近日臨清一帶水勢漸消河面未能寬闊江西船體較大請將在前之
南昌等七幫跟接赴通儘在後之廣信等六幫截留撥給得旨嘉獎六月奏本年
江西南昌等五幫出臨清閘後水淺起撥之費較多擬將袁州等三幫應交之贈
剝米一石二斗除免交二斗以抵直省撥價外其餘一石令該三幫彙交臨清州
知州轉交江西前五幫總運通判以爲將來接濟前五幫各項之費得旨所辦好
有旨議敘五十八年諭倉場侍郎等奏七月初五日已將全漕俱行起竣較之五
十六年無閏之歲更早四日辦理尙爲妥速諾穆清劉秉恬及坐糧廳俱著加恩
交部分別議敘以示獎勵嘉慶四年九月調兵部右侍郎五年正月調兵部左侍
郎二月卒子寶箴原任安慶府知府寶笈廕生籤掣刑部主事捐升郎中寶書兵

馬司副指揮候補通判寶籙兵部司務廳行走

烏什哈達

烏什哈達滿洲正黃旗人伊爾根覺羅氏住吉林乾隆十九年由閒散授前鋒二十七年派防伊犁二十八年授前鋒藍翎長二十九年擢前鋒校三十一年隨征緬甸三十三年以軍功賞法福哩巴圖魯名號授三等待衛三十五年隨征金川三十六年攻克巴朗拉西面山梁卡座三十七年二月將已占山峰被賊奪去旋復帶兵占踞並將卡賊全行剿洗奏入上以其功過足以相抵宥之三月偕攻資哩賊砦克之命予議敘七月擢二等待衛旋授正白旗蒙古副都統三十八年攻克昔嶺大碉得旨嘉獎三十九年攻克羅博瓦山碉卡賞荷包燧囊四十年屢於雅瑪朋砦並瓦喇占等處奪柵立功四十一年奏凱予騎都尉加一雲騎尉世職並賜銀緞旋授和闐領隊大臣四十六年向欽差理藩院右侍郎復興告三品銜和闐辦事大臣德風私動玉石錢文修理衙署等款德風亦告烏什哈達收受阿奇木伯克皮張多款上命工部尙書綽克托暨復興鞠之旋奏德風以烏什哈達東三省人意存輕視遇公務有意飭駁不假辭色以致烏什哈達不能隱忍訐以

洩忿德風私動錢文屬實照例擬罪烏什哈達私受皮張皆以物抵給並非勒取
惟訐款實少誣多應革職發烏什邊卡侍衛上效力下軍機大臣議行四十九年
復授頭等侍衛虎槍營營長五十二年授健銳營翼長出師臺灣與普爾普由茅
港剿洗諸羅至臺灣之屯聚亂民奮勇剿殺府縣之路賴以通得旨賞還法福哩
巴圖魯名號五十三年由水路擒獲羽首莊大田奉旨官兵直抵瑯嶼時烏什哈
達帶領水師兵丁順風連檣而至四面合圍水陸並進俾莊大田得以即時擒獲
勇往可嘉烏什哈達著交部查照功牌議給世職凱旋後圖像後三十功臣於紫
光閣命詞臣爲之贊尋授吉林副都統復調齊齊哈爾副都統又調熊岳副都統
五十六年調鑲紅旗蒙古副都統五十九年召見奏廓爾喀軍務不實諭曰烏什
哈達前在廓爾喀軍前並未奮勉藉稱在前修路跌傷福康安因其無用置於後
隊朕所深知乃今日召見時伊轉以爲有功巧飾奏對實屬不堪烏什哈達著革
職發往伊犁當差以爲巧佞者戒嘉慶元年釋回至河南請赴楚省軍營效力得
旨俞允賞頭等侍衛卽隨副都統銜鄂輝剿辦襄陽撲城之匪殲斃甚多餘皆退
竄奉旨議敘復隨鍾祥賊夥有功賞大小荷包二年二月派駐守城西岸適有

賊七八百人在古河口側探水遂率兵勇力剿傷斃過半餘皆退逃旋派防四川石砭廳九月率副將達桑阿等由申溪一路往攻白崖山賊將頭層木卡攻克逆匪撲水死者五百餘名三年正月逆首王三槐等在梁山墊江一帶滋擾復由臨江寺夥聚渠口白崖山暗與會合擁衆過江王三槐亦至其時有匪船數十停泊岸上疾呼船中之賊應聲卽登蜂擁不下數千烏什哈達不顧兵力單弱卽出迎禦剿力竭陣亡事聞命咨部加等優卹予輕車都尉世職長子圖爾弼善襲

鄂輝

鄂輝滿洲正白旗人姓碧魯乾隆三十六年由前鋒校分發四川試用守備三十七年署建昌鎮越嶲營守備三十八年六月隨將軍阿桂攻剿金川敘功賞戴花翎擢甯越營都司三十九年八月擢廣東潮州鎮遊擊四十年五月擢湖北興國營參將四十一年擢貴州上江協副將四十二年四月調成都將軍標中軍副將四十五年擢四川建昌鎮總兵四十六年五月隨大學士阿桂進剿蘭州逆回賞法什尙阿巴圖魯名號四十八年六月擢雲南提督五十一年三月調成都將軍十一月奏言新疆屯練民戶承墾地畝原借牛價口糧請寬限徵還得旨豁免五

十二年正月署四川總督八月將軍福康安剿臺灣亂民鄂輝奉調帶領四川屯練降番赴閩十月得旨鄂輝久歷行陣於軍旅較爲諳習著授爲參贊協同福康安悉心籌辦進剿十一月隨福康安渡海由鹿仔港赴援諸羅鄂輝堵截東莊溪橋攻克牛稠山竹柵諸羅圍解追至大排竹痛殲之及我軍進偪斗六門亂民從山上撲殺鄂輝分領兵練衝截之盡奔逸進攻大埔林大埔尾二莊殺獲無數乃潰爲首林爽文由大里杙逃入內山番界鄂輝同各將弁追至集埔五十三年正月擒獲之上以鄂輝等勇略最著令臺灣郡城及嘉義縣建祠塑像並命畫像紫光閣御製贊曰無前出力屯練之兵將軍鄂輝實率以行覆穴摧壘到處功成勇而有謀覃國之英敍功賞雙眼花翎雲騎尉世職七月詣熱河陛見旋回任時巴勒布滋擾西藏搶占濟隴聶拉木等處上命鄂輝馳驛抵川與提督成德帶兵赴剿復命侍郎巴忠馳赴後藏偕鄂輝等查辦九月諭曰據慶林奏賊匪紛紛退去自係聞知內地大兵將到預爲奔竄之計鄂輝成德正應會合兵力趕緊行走乘勝追殺斷斷不可因有賊匪敗逃信息進兵稍緩又致遲誤事機也十月諭曰昨據成德奏仲巴呼圖克圖與章嘉呼圖克圖私自差人與賊衆說和鄂輝摺內於

講和一事竟未提及未免稍存將就完事之見巴勒布賊衆擅敢侵犯後藏邊界業經內地派兵前往若不示以兵威將來大兵全撤設復潛來滋擾勢必紛紛徵調疲於奔走尙復成何事體鄂輝等若尙能趕上痛加殲戮固屬甚善儻賊去已遠不值爲窮追之計亦應將巴勒布附近邊界奪取一二處使之震懾乞降方能歲事鄂輝等不可不遵照妥辦也五十四年六月鄂輝偕成德巴忠舒濂普福等奏收復巴勒布侵占藏地設站定界事宜一前藏向駐綠營官兵五百十員名見有駐藏大臣管轄其扎什倫布地方亦應酌撥綠營官兵分駐請於察木多抽撥外委一員兵六十名江卡抽撥兵三十名碩板多抽撥都司一員兵二十名前藏抽撥兵四十名以上四處共抽撥兵一百五十名卽令抽撥之都司外委管領移駐後藏於馬兵內挑拔二名作爲軍功外委管束兵丁再後藏旣移駐官兵由後藏至前藏一路應分立塘汛十三處以唐古忒番兵安設每塘挑選附近番兵四五名並交噶布倫等辦給口糧均令駐防後藏都司隨時稽查管束一拉子地方請添設唐古忒番兵二百名并添第巴二名管領按年一次更換至脅噶爾番兵亦不敷防守請於拉子防兵內撥出三十名安置脅噶爾地方其薩喀一處距拉

子不遠亦卽於防兵內撥出三十名輪赴該處巡哨再宗喀聶拉木濟隴等處遠在極邊其緊要處所仍須修砌卡隘堅礮以資瞭望而嚴防守一西藏官兵以耕牧爲生見飭噶布倫等按寨落名號編定數目前藏派唐古忒兵八百名後藏四百名於每歲九月望後操演至十月底止隨同綠營駐防一體練習至操演槍箭於綠營內挑取千把弁兵數十名充爲教習令其分領番兵逐日操演唐古忒兵向無錢糧令定於派出操演日期至散操日止令噶布倫等酌給口糧又達木兵向駐達木角地方換班應差令併歸操演番兵內一體教習仍照舊令達賴喇嘛月給口糧又查達賴喇嘛山上舊存大小鐵礮二十餘位請編定號數令綠營兵帶領番兵演習施放一請於秋收後查明稞麥時值動項發交該噶布倫等在附近各處買稞麥三千石交駐藏糧員於扎什倫布城內建倉收貯俟採買二年後按年出陳易新以六千石常貯爲額至拉里察木多巴塘裏塘四處糧臺皆有糧員而察木多尤爲川藏居中之地方請一體儲備一西藏各寨落設立第巴管理缺分甚多其間美惡不齊然皆有應辦事件請令噶布倫等嗣後無論缺分一體補放務令該第巴親往照料不許擅差家丁代往差遣堪布囊蘇赴京進貢并赴

打箭鑪辦茶皆係經行內地往返需時請嗣後均由駐藏大臣會同達賴喇嘛及噶布倫等揀選妥人給與護牌將需用夫馬酌定數目註明沿途照給以杜需索一駐藏大臣應於二人內按年分爲兩次輪赴後藏巡查之便親加操演分別勸懲至藏衆散居各處耳目難周該處有噶布倫四人管理地方事務嗣後請於四人內每年輪派一人於春秋隙時親往稽查一從前駐藏大臣同居一處自珠爾默特納木扎勒滋事後房屋入官始行分駐查前藏之撒木珠康撒爾住房卽係從前珠爾默特納木扎勒舊居其地房屋寬廠足敷駐藏大臣二人分駐且同居一處遇有公事卽可隨時商辦一西藏貿易外番必須老成謹慎之第巴協同該處頭目專管卡契回民及巴勒布平日悉心撫馭不許互相欺壓爭競以便秉公調處仍責令噶布倫等隨時訪察儻有第巴頭人及官弁兵役倚勢強買苦累地方卽稟駐藏大臣拏究一向來西藏遇有訟事係歸管理刑法頭人朗仔轄聽斷俱照夷例分別重輕罰以金銀牛馬減免完結恐有高下等弊見在告知達賴喇嘛及噶布倫等凡有關涉漢回外番等事均令朗仔轄呈報揀員會同審理一聶拉木濟隴緘峽三處均與巴勒布連界邇來販運日多巴勒布駝載貨物來藏買

易者第巴收稅加至十分之一易致爭執以後止准減半收取並令勒碑界所長遠遵循一西藏鹽斤於沙中刨出本不潔淨應卽挖出時交該處第巴查驗鹽斤成色酌中定價毋許故昂任意勒買一駐藏大臣衙門向挑官兵應役均無定額將備以下從而效尤應酌定名數按期更換至駐藏大臣差遣官兵赴省製辦賞號之事有曠操防應咨明本省總督飭有司代辦遇便帶藏並飭禁兵丁雇役番婦以肅營伍一西藏噶布倫戴紉第巴等缺辦理地方管束兵民均關緊要遇有缺出應於誠實勤妥子弟中慎選承充至第巴營官商車特巴等不下二三百缺逐一奏補未免過繁應請將大處緊要地方缺出調驗補放其偏遠第巴等缺出仍令達賴喇嘛自行選擇一理藩院司員並駐藏遊擊向未議給關防懇敕部鑄給辦理藏番事務章京關防一顆駐藏遊擊關防一顆俾辦事呼應較靈一宗喀濟隴聶拉木等處爲巴勒布往來門戶收稅行鹽等事均關緊要見在噶布倫揀派第巴三人分頭安設又選老成能事戴紉駐劄脅勒爾地方統轄宗喀濟隴聶拉木三處就近稽查其缺較爲繁重請照阿哩第巴之例由部發給號紙以專責成一從前解赴打箭鑪口外兵餉皆係元寶迨後祇解碎銀但自省至藏萬里崎

峴儻有拙失各站易於推卸況番地買賣交易均以元寶成色爲足請嗣後仍照舊以元寶起運一西藏向有賞需一項係蒙皇上軫念達木官兵素無錢糧將三十九族每年所交例馬銀三百九十餘兩買辦緞布煙茶銀牌按年獎賞一次此外並無別款今既添設唐古忒番兵按期操演經駐藏大臣親查自當照例獎賞請於川省閒款內加給銀五百兩飭辦緞布煙茶銀牌等項備賞一口外至西藏一切事務向歸駐藏大臣管理但裏塘巴塘與川省較近皆有土司管理原非西藏所屬應劃分總理請自南墩迤西一路凡屬西藏所管之地照舊歸駐藏大臣管理其巴塘迤東土司地方歸川省將軍督提衙門就近管理至江卡乍了察木多並移駐後藏各營汛臺站統歸駐藏大臣總理其巴塘裏塘安設塘汛官兵就近歸和卓協副將兼轄一打箭鑪出口以至西藏向於文職內派委州縣丞倅武職內揀派遊擊都司守備千總分駐辦理三年一次更換該文武等官員遠役三年往返將及四載向來期滿並無保題升轉之途嗣後請令駐藏大臣照金川營屯各員三年期滿出具考語奏明咨送本省將軍督提考察保題仍照邊俸報滿之例一體升用其駐防官兵遇換班之期亦須選派妥幹以資防守奏入下軍機

大臣議行九月鄂輝偕成德舒濂普福等奏巴勒布貢使沿途行走安靜自藏起程妥爲照料前進五十五年前藏達賴喇嘛之弟商卓特巴等在各商上漁利舞弊四月命鄂輝赴藏查辦旋翰實以商卓特巴等解京治罪十月擢四川總督五十六年廓爾喀侵占聶拉木濟隴定日等處九月鄂輝偕提督成德帶兵進剿先是巴忠以駐藏大臣專擅藏務又素諳唐古忒言語因授意噶布倫丹津班珠爾與廓爾喀定議歲給元寶三百錠令退還侵地鄂輝等遂藉是議和藏事嗣因後藏措不給銀復致侵擾事聞巴忠畏罪自盡命鄂輝迅速進兵立功自贖十月奏言賊匪業已敗回不過在濟隴聶拉木一帶觀望拒守俟與成德抵藏設法攻取諭曰賊匪見在濟隴聶拉木一帶正可帶兵星馳赴藏痛殲賊衆鄂輝身爲總督應將成德行程遲緩奏參星速趕上奮力剿戮乃計不出此坐失機會且鄂輝等身在中途賊匪於搶掠後早經飽載而歸安得大言不慚爲此賊匪敗回之語著傳旨申飭命將軍福康安由青海抵藏督兵諭曰上次廓爾喀因鹽稅細務與唐古忒人等爭執鄂輝聽從巴忠謬爲辦理以致復滋事端朕格外加恩不卽問罪仍令帶兵赴藏立功自贖理應加倍奮勉剋期抵藏乃竟濡滯不前坐失機會其

錯謬甚大鄂輝著革去總督賞給副都統銜駐藏辦事聽候福康安調度差遣五十七年二月鄂輝偕成德等攻克聶拉木寨賊匪及福康安抵藏鄂輝督辦糧運七月奏言沿途查催定日一路糧石馳往聶拉木接濟成德上嘉之十月工部尙書和琳奏參鄂輝積壓糧運並壓閣廓爾喀表章貢物諭曰鄂輝於糧運積壓姑念伊係總辦之員彼時又赴聶拉木一帶查催勢難兼顧尙非有心玩誤而廓爾喀呈進表貢匿不具奏鄂輝之罪實在於此邊外重務竟敢壅於上聞此而不嚴行查辦何以肅政治而飭官常著將鄂輝革職交福康安嚴切跟究旋福康安奏言鄂輝因貢品較少不合體制先發檄駁斥擬俟廓爾喀貢使到來再辦但未能先行具奏命解回前藏永遠枷號五十八年帶罪回京賞拜唐阿六十年四月加員外郎銜擢熱河總管嘉慶元年二月賞給三等侍衛馳赴荊州軍營協剿邪匪三月賞頭等侍衛四月賞副都統銜八月調赴湖南軍營剿捕苗匪九月永保奏鄂輝剿除鍾祥邪匪奮勇殺賊命加太子少保並都統銜授湖南提督十月抵湖南大壩角軍營十一月率兵由老石溝山梁攻克平隴寨旋進占養兵塘山梁德楞泰爲右路攻克菜衝土貫坡湖耳坳等處石卡進逼平隴後山復奪據馬頭山

餘錦坡賊卡十二月由貴魚坡下溝深入繞出石隆山後掘要圍裏與領侍衛內大臣一等威勇侯額勒登保等併力攻克斬首逆石柳鄧擒獲石老喬藏功予三等男爵二年正月督兵擒獲吳廷義並各寨賊目旋留乾州查辦餘匪開通道路辦理撤兵善後各事宜九月擢雲貴總督十二月抵黔撫剿狝苗並搜查安順興義及馬乃屯鑼鍋背松等處苗黨均得旨交部議敘三年六月卒遺疏入諭曰鄂輝自擢授雲貴總督以來辦理苗疆軍務一切事宜奮勉妥協著加恩入祀賢良祠其前賞三等男爵卽著伊長子鄂彌善承襲賜卹如例謚恪靖四年十月以鄂輝前在湖北辦理教匪時於軍需項內得受餽送銀四千兩命撤出賢良祠子鄂彌善見襲男爵

舒亮

舒亮正白旗滿洲人蘇佳氏由前鋒於乾隆三十三年補前鋒校三十七年委署前鋒參領從副都統齊里克齊征金川三十八年升副護軍參領三十九年二月升前鋒參領七月官軍攻穆谷舒亮伏軍山下待賊殲斃甚多又進攻卡角賊匿兵山溝舒亮先於密箐中望見火光以火器就擊之賊潰敗奏入賜緞兩匹以功

加副都統銜遂授鑲白旗滿洲副都統十二月調補荊州副都統四十一年二月再調鑲黃旗滿洲副都統又以克噶拉依功賜穆騰額巴圖魯名號六月授管理健銳營大臣及金川凱旋圖形紫光閣御製贊曰率健銳營訓練有素節制之師五步六步礮礮叢中鼓勇身先勞而不伐是用稱賢四十二年補鑲藍旗護軍統領四十六年五月大學士阿桂剿撒拉爾逆回蘇四十三舒亮從至即收賊於華林山賊懼掘濠設卡以自固閏五月阿桂督令領隊大臣海蘭察由山西橫衝賊卡舒亮從南山進當賊鋒賊蠡出抗拒箭射舒亮傷左骹拔箭裹創而戰奪賊卡四座斃賊百餘得旨優獎並賞大小荷包銀百兩六月與海蘭察乘賊不備以土袋填賊濠渡軍擊之守濠之賊剪馘殆盡復奪十餘卡賊首蘇四十三爲我兵所戮舒亮剿華林寺餘匪事平回京供職四十八年調正黃旗護軍統領五十二年林爽文叛擾臺灣七月舒亮與領侍衛內大臣海蘭察護軍統領普爾普並授領隊大臣從協辦大學士陝甘總督福康安渡海征之爽文圍諸羅久福康安議官軍至後即取路笨港救諸羅舒亮由烏日莊夾攻以分賊勢十二月賊方踞北大肚山拒我舒亮迎擊破之連破南大肚王田莊瀨湑莊以至半山莊坑子莊遂達

烏日莊賊巢得旨從優議敘五十三年二月爽文逃入內山匿東勢角福康安督
舒亮及成都將軍鄂輝由歸仔頭偪之至麻著社分軍鄂輝由樸仔離東山路進
舒亮直取東勢角山徑峻險諸將皆步上殺賊二千餘名獲軍械無算爽文窘甚
復走至老衢峙舒亮督軍急進獲之奏入諭曰此次臺灣逆匪滋事至一年之久
福康安等帶兵渡洋旬日之內卽將逆匪痛加殲戮擣穴擒渠各村莊得以安堵
如舊該處地隔重洋五方雜處風俗素稱刁悍經此一番懲創若不明示威武恐
民人等事過卽忘不足令其怵目儆心常思安分畏法將來事竣後如福康安海
蘭察及鄂輝普爾普舒亮等之勇略最著者應於臺灣郡城及嘉義縣兩處共建
生祠塑立像貌俾該處民人望而生惕日久不忘舒亮隨押爽文並各賊目入京
賊黨賴大病困舒亮在途誅之以六百里奏聞奉旨申飭時已授爲鑲紅旗蒙古
都統命仍回正黃旗護軍統領任四月敘功給雲騎尉世職再圖形紫光閣御製
贊曰金川之役已爲領隊事定功成統軍歸內搜捕逸賊不遺醜輩生致逆渠其
能不昧冬調鑲黃旗護軍統領五十五年擢荊州將軍五十八年調黑龍江將軍
六十年坐私買貂皮革任去世職會川陝楚邪匪滋事叛據當陽縣命以三等待

衛赴軍營自效嘉慶元年三月總督畢沅至當陽舒亮統河南兵至襄陽策應先擊斬賊目孫應元等再戰劉家集擒賊目朱正英升二等侍衛四月會軍圍當陽乘賊困憊留西門一而縱之舒亮自北擊之殺賊目熊道成等三名擒賊目張仲選等六人是月擢頭等侍衛五月舒亮由東門缺口登城賊目王正統執白旗指揮迎敵擊以火槍立斃舒亮左額亦受槍傷進剿不已毀賊所築子牆礮臺進占東門賊退守西門依龜背山爲巢穴官軍乘勝直進賊易服將遁官軍四面蹙之凡斬馘生擒一千餘人獲賊首陳德本遂復當陽奉旨加副都統銜賞戴花翎並有玉扳指大小荷包之賜尋授鑲藍旗漢軍副都統命赴鍾祥協同永保辦賊九月鍾祥賊分東西路竄唐縣鄧州舒亮伏軍呂堰驛待之賊至伏發西竄之賊殲焉乃合兵追東竄之賊十月有草店之捷舒亮爲槍所中賞銀絲盒大小荷包獎勵之十一月賊偵知官軍在蕭家岡乃詭稱難民渡滾河逸去舒亮坐堵剿不力革去花翎及巴圖魯名號命總督惠齡訊問奏參二年正月敗賊於興隆店又敗賊於都司街及吳家店賞鑲玉如意一次大小荷包二次適惠齡以帶兵需人請命留營效力二月屢敗賊於劉家港小阜街曾家店賞銀絲盒一大小荷包各二

三月統軍至河南張博士店鎮遏賊勢四月移駐李家橋五月以賊渡漢江降爲三品頂帶留副都統三年二月復坐剿白巖山賊不力總督勒保劾奏請褫革治罪奉旨舒亮官職全行斥革作爲兵丁留營效力贖罪尋卒於軍

穆克登阿

穆克登阿董鄂氏鑲紅旗滿洲人由烏槍護軍於乾隆二十九年補烏槍藍翎長三十二年擢烏槍護軍校三十五年升委護軍參領三十六年補副護軍參領三十七年揀發四川以游擊用三十八年赴金川軍營隨四川總督富勒渾於明郭宗要隘堵禦有功賞戴花翎授四川重慶鎮標中營游擊四十一年擢城守營參將四十二年升江西袁州協副將旋丁母憂四十三年四月命在二等待衛上行走五月署廣西慶遠協副將十二月署廣東右翼鎮總兵四十四年服闋實授四十九年調四川松潘鎮總兵五十二年臺灣忽報林爽文滋擾嘉義縣城四川總督鄂輝檄調四川屯練降番赴閩以穆克登阿熟諳軍旅奏令統率屯練降番二千名前赴臺灣十一月行抵元長莊隨將軍福康安等分隊進發一路焚斫竹圍草藪進至牛稠山官兵搶上山梁林大潰遂由斗六門進攻大里杙穴巢奏入飭

部優敘斗六門餘黨萬餘分據大埔林中林大埔尾三莊阻截道路時羽黨剽悍多聚中林官兵分路進攻穆克登阿偕參贊大臣海蘭察等專攻中林大克之官兵收復斗六門林爽文勢窮踞集集埔自固並於北山草嶺設卡騷擾十二月福康安等將集集埔剿洗穆克登阿等攻克草嶺羽黨入內山官兵掘隘圍剿五十二年正月於老衢崎地方擒獲林爽文及羽目何有忠等又於瑯嶠地方擒獲羽黨莊大田等四十餘名及餘黨八百餘名臺灣平賞給穆克登阿奮圖禮巴圖魯名號並交部從優議敘圖像紫光閣御製贊曰斗六里杙排竹爲城直斫而入大敗賊兵隴種鹿埕內山遁形搜擒首惡林林衆英七月調建昌鎮總兵五十六年七月廓爾喀滋擾西藏踞聶拉木成都將軍成德奏令穆克登阿帶領屯練官兵赴藏相機剿辦十二月上以穆克登阿行走濡遲嚴飭之尋偕成德率領弁兵由拍甲嶺乘夜進剿斃賊二百餘人又生擒七名奪獲器械米糧無算奏入賞大小荷包五十七年正月圍攻聶拉木寨穆克登阿等帶兵分路截殺斃賊甚衆復四面攻之拋擲火彈燒燬賊巢逃竄者悉被殲誅五月賊於德親鼎山前築卡三處下木薩橋前安設木柵抵拒穆克登阿等進據德親鼎山攻破頭卡焚燒木柵斃

賊多名生擒乃勒興等七名六月由交柰山進攻克多洛卡及隴岡等處先是駐藏大臣巴忠與廓爾喀說和私許銀兩廓爾喀頭人有呈送穆克登阿及總兵張芝元公信一封白布二匹存巴勒布商頭巴特巴第家至是工部尙書和琳查出奏聞諭曰穆克登阿張芝元係前赴邊界之人於許銀說和之事斷難諉爲不知姑念伊二人係巴忠等差遣前往聽從辦理非扞意者可比此時亦不復深究是年廓爾喀歸順圖像紫光閣命儒臣製贊五十八年授四川提督六十年二月黔省松桃廳苗匪竄入陝省秀山縣境穆克登阿率領將弁由巴家汛鈔截賊匪後路偕四川總督和琳前後夾攻槍斃苗匪六十餘名閏二月剿賊於石隄司復由紅巖洞牛角山一路隨剿進追至湖南邊界前與雲貴總督福康安和琳協剿永綏一帶苗匪四月由黃瓜寨進剿燒燬太平山木城攻克下染新寨時葫蘆坪馬鞍山附近諸寨均有逆苗出入嘉慶元年四月福康安飭穆克登阿等迎頭剿捕連用槍礮轟擊斃賊無算八月駐劄永綏一路招集鄉勇二千餘名攻補林及硃口等寨焚賊巢二十餘戶十月由脂夷坪分路攻剿擊斃苗匪二百餘名生擒麻老江等十一名十一月進據崖板寨山梁桐木等寨苗楊巖有等率所管苗人四

十五戶投誠二年正月進剿大小柵苗目麻季三麻滿東等節次率椿木麻臘等三十餘寨苗民乞降二月官兵疏通永綏道路將張坪董馬等處營卡安置穆克登阿偕內大臣德楞泰傳集各戶寨百長曉以利害羣苗感服穆克登阿自協剿苗疆以來疊奉恩賞大小荷包蟒袍喜字玉扳指等件八次時川楚教匪滋事領侍衛內大臣額勒登保等奏令穆克登阿馳赴達州會剿四月由余家巖進攻冉家壩燒燬金峩寺賊寨賊首王三槐欲竄新甯復經穆克登阿等邀擊之殲斃及落水者數百人王三槐竄重石子與香鑪坪賊相首尾東茨菇梁西富成寨賊皆踞險設卡穆克登阿等由羅江口進剿茨菇梁富成寨均克之賊欲襲羅江口潛出四千餘人撲鐵釘壩穆克登阿用大礮轟擊並密派將弁設伏截其後路官兵三面圍擊斃賊殲擒無算五月賊匪潛赴花潭子欲偷渡竄入新甯經防守東林河副將王承勳追擊穆克登阿等聞槍礮聲帶兵截圍殲斃多名尋由黃家寨進攻香鑪坪射入火箭焚之寨內賊無倖免賊竄陳家壩於附近之汪家山安子坪等處分隊屯劄六月穆克登阿等擊安子坪生擒賊目陳明彩等二十七名進抵苦草壩汪家山賊退屯精忠寺山包偕德楞泰等分路攻之斃賊二千餘名生擒

男婦三百餘名並獲僞總兵熊永明亢作倖及賊首徐添德之母徐王氏王三槐之母王楊氏上以其奮勇嘉之穆克登阿自剿辦教匪以來疊奉恩賞扳指金盒喜字牌大小荷包四次楚匪竄至中河穆克登阿追擊至固軍壩盡殲之閏六月剿溫湯井賊匪擒斬二百餘名時萬縣之董家營開縣之白巖山等處俱有新起賊匪陝甘總督宜綏派穆克登阿等剿辦由萬縣進攻董家營殲斃多名生擒唐泳等四十四名八月進攻白巖山賊首林亮功分立卡座抗拒我兵未能徑上奉旨申飭九月奪據張家觜千層巖賊卡進攻鴨子坪上以未能直搗賊巢嚴飭之十二月偕護軍統領舒亮奏白巖山屯聚賊衆計有萬餘臣等疊次仰攻勢難得手見在設法剿辦上以其遲緩無能責之二月總統勒保奏王三槐等先於正月遣人赴白巖山勾結林亮功等全夥萬餘人陸續竄出合夥尋卽攻撲該縣城池竄赴臨江市屯聚查此股賊匪係專交穆克登阿等辦理伊等駐劄韓彭坳所帶官兵不下六千餘名而株守半年一籌莫展應請治罪奉旨革職作爲兵丁留軍營效力贖罪並將家產查鈔示警王三槐屯踞安樂坪七月勒保率穆克登阿等分路進攻克之王三槐就縛奏入上嘉之十二月奉旨署四川松潘鎮總兵協剿

冷天祿股匪四年七月協攻張添倫股匪於八石坪龔文玉股匪於犬禾田皆克之五年二月因患目疾奉旨原品休致十二年九月卒子慶昌見任湖南衡州協副將慶麟戶部員外郎

孫全謀

孫全謀福建龍溪人乾隆三十五年由行伍拔補水師提標中軍外委三十八年升右營把總四十五年遷前營守備四十八年升後營遊擊五十二年臺灣忽報林爽文滋事圍提督柴大紀於諸羅全謀隨總兵蔡攀龍等往援突圍入城復出與擊戰大破之道路遂通諭曰諸羅爲南北兩路要區屢經亂民竊伺糾衆滋擾柴大紀督率官兵義民悉力捍禦因兵少力單正在望援之際孫全謀等帶領官兵直前攻剿殺散羽衆速達諸羅復帶兵出城將該處屯聚羽黨痛加剿殺實屬奮勇出力可嘉之至廣東羅定協副將著孫全謀補授並賞戴花翎五十三年二月臺灣平交部議敘四月調臺灣水師協副將五十七年升江南蘇松鎮總兵五十八年丁母憂六十年八月命署浙江黃巖鎮總兵十二月洋匪紀夢奇等搶劫官米全謀統領舟師自定海駛至台州偵知匪船寄碇大陳山外洋乘風雪往剿

擒獲首犯多名下部優敘嘉慶元年二月服闋實授八月洋匪陳阿寶在潭頭洋行劫全謀帶兵剿捕礮擊之殪下部優敘十二月擢廣東提督二年全謀密遣遊擊黃標等剿盜於蒲臺外洋生擒六十餘人賞喜字玉牌及黃辦大小荷包仍敘其功五年以川陝楚三省教匪滋事命調廣東官兵赴楚協剿徐添德股匪大敗之諭曰廣東官兵調赴楚省初次打仗卽能奮勇殺賊該提督平日尙知整飭操防而於檄調時亦能認真挑選甚爲妥協孫全謀著交部議敘七年九月博羅縣會匪陳爛展四等聚衆謀逆全謀督率將弁兩路進剿擒斬三千餘人十月陳逆竄伏羅浮山全謀攻克沖虛觀及藍坑山兩處賊巢擒之並殲斃夥匪一千餘人諭曰此次剿辦逆匪皆由孫全謀身先士卒奮勇殺賊故能攻得兩處賊巢迅速奏捷厥功甚偉著加恩賞給騎都尉世職八年二月攻克永安縣鐵籠嶂賊巢生擒首逆黃亞程等得旨嘉獎七月以失察兵丁窩賊部議革職上加恩改降二級留任九年新會縣有洋匪登岸劫掠村莊諭曰廣東洋匪向來不過在外洋劫掠此次膽敢由磨刀虎跳門潛行登岸劫掠村莊該省武備廢弛以致洋匪肆行無忌非尋常疏忽可比孫全謀著交部嚴加議處尋命以都司降補並褫花翎十一

年剿捕洋匪吳亞保擊沈其舟擒賊犯七十餘名殲斃無數諭曰孫全謀前經降補都司近來出洋捕盜尙知奮勉著加恩以都司銜署理澄海協副將十二年正月閩匪蔡牽黨朱濱在卡山尾外洋滋擾全謀帶兵追剿駛至長山尾外洋生擒黃阿朵等十二名九月蔡逆竄入粵洋全謀以緝捕不力降三級留任十三年隨提督錢夢虎等剿賊於黑水洋奪獲賊船擒錢亞文等百餘人賞三品頂帶擢廣東左翼總兵十四年二月加二品頂帶復授廣東提督五月洋匪張保仔等聯艘百餘在香山縣洋面寄碇全謀以官船四十四號連戰克之諭曰官兵以少勝多實屬不遺餘力孫全謀奮勇可嘉前已施恩補放提督倍當感激朕恩益加奮勉十一月總督百齡圍攻張逆於大黃埔檄令會剿全謀遷延失期賊遁上以其失機玩寇命革職拏問十二月洋匪郭婆帶投誠並擒保仔夥黨以獻上宥全謀命立功自贖十五年五月因殲擒洋匪多名並搜獲積年土盜以守備起用六月洋匪烏石二等在儋州洋面滋擾全謀進擊烏石大幫船躍過賊舟生擒之復賞戴花翎命以遊擊用八月署香山協水師副將十六年升署陽江鎮水師總兵十九年實授二十一年遷廣東水師提督尋卒孫雲鴻由廕生襲騎都尉官江南福山

鎮總兵

彭承堯

彭承堯湖北松滋人乾隆二十五年武進士授藍翎侍衛二十八年分發四川以都司用三十三年補督標中軍都司三十六年隨征金川功加二等四十年四月賊匪據甲索碉卡總兵敖成分兵三路直逼碉根賊併力抗拒承堯冒矢石奮力攻之遂破賊碉殲斃無算閏十月攻克扎烏古等處山梁賞戴藍翎四十一年升貴州提標前營遊擊四十三年遷廣西全州營參將四十五年升浙江台州協副將四十七年保舉堪勝總兵引見賞換花翎四十八年補江西南贛鎮總兵四十九年調廣東潮州鎮總兵五十一年署廣東提督五十二年正月賊擾臺灣承堯率兵於黃岡彈壓五十三年丁母憂五十六年服闋引見時廓爾喀賊匪滋擾後藏奉旨候補總兵彭承堯著馳驛前往四川交孫士毅調遣委用十二月諭曰原任廣東潮州鎮總兵彭承堯起復來京經朕召見看其人尙好且曾經出師見已令其馳驛前往四川交孫士毅酌量委用若帶兵乏員卽令該鎮分帶土兵赴藏若因四川總兵張芝元等俱帶兵赴藏卽將彭承堯留於川省署理鎮篆五十七

年署理重慶鎮總兵孫士毅飭領弁兵三千名赴打箭鑪聽候福康安檄調旋因福康安奏請彭承堯人尙去得見在軍營亦須大員帶兵仍令該鎮來藏六月帶領頭起沃什黨壩瓦等官兵赴藏十一月自藏督兵回寨補川北鎮總兵五十八年擢四川提督時廓爾喀蕩平圖十五功臣於紫光閣上嘉承堯功命儒臣爲之贊曰金川從征偏裨克黽西江東粵累畀專閩陳請協剿已屆凱旋防守後路與有力焉九月調廣西提督五十九年六月奏巡閱通省營伍關隘情形凡參將以下衰老患病不能騎射者俱參革得旨所辦俱屬認真嘉慶二年正月貴州南籠府狝苗不靖與廣西西隆州毘連承堯率弁兵馳赴隆林以資救援行抵舊州聞苗匪用竹筏渡江至北樓白山等處滋擾揚言由八達渡至舊州遂率兵疾馳北樓白山剿捕斬獲甚多賊始遁舊州距南籠二百餘里上通西隆下通百色爲邊防總匯之區向無城垣遂令打華八渡北樓白山分兵設卡嚴爲防堵三月率大兵於沙犁扁牙盡力搜捕賊乃竄旋馳抵西隆州有黔苗二千餘人驟至夜襖寨屯聚遂率守備羅嘉升由小路越山直超賊營之右飭總兵尙維勳由大路超賊營之左兩路夾攻乃克之諭曰見在西隆州屬有成林尙維勳足以防堵吉慶當

與彭承堯帶領官兵前赴黔省將册亨收復四月苗匪聚集西隆州之花貢河坭洞塘焚掠各村並舍上各甲土民亦被煽惑經羅升率兵力撲賊始逸承堯督兵追捕勝之奏入諭曰八達附近之花貢地方聚集賊匪既經彭承堯馳往剿捕諒已殲捕淨盡有竄回黔省者彭承堯即可隨吉慶帶兵與勒保會合剿捕是時泗城府一州二縣村寨多被黔省賊匪煽惑脅從首逆龍登連倡率猓獠大肆焚掠必分路剿除沿江堵截始可開通道路會黔合剿八達土城賊匪亦多窺伺雖屢經殲戮其平廣亞稟等寨密山深蜂屯蟻聚出沒無常因計由八達至西隆逐加搜捕旋與吉慶分路巡查飭鎮將備弁防堵周密乃突有賊匪於粵岸山後肆出而北岸仲苗乘閒擁衆渡江右江鎮總兵王林左江道永慧聞信馳救吉慶亦率兵應援遇賊萬餘我兵奮勇爭先賊抵死拒敵適承堯與廣州協副將德昌先後馳至奮力擊之始潰奏入諭曰此次吉慶與彭承堯分路巡查督兵設法搜捕所辦尙好五月賊匪竄入渡一帶山梁百扣板雅委后等隘俱被侵掠平廣亞稟那地等寨亦爲黔苗糾結承堯與吉慶等議於卡隘稍緩處抽調勇幹鎮將派官兵二千飭都司井汲泉由口廠至祥讀山梁都司和順武修樞分兵由大雅山

後十里坡板堅兩路進攻副將王模都司李林貴前至弄江村口山梁堵截以壯聲勢吉慶於後路督兵接應承堯由中路進剿直抵八渡各路官兵會集賊不及防大兵奮力攻之承堯率兵赴百扣等處乘勢搜捕賊望風潰八渡悉平惟亞彙一寨岡嶺重複鳥道紆迴屯聚甚衆必厚集兵力開闢道路方得深入時所調東省官兵二千名俱至以隆或一寨距舊州僅七十里爲亞彙之後路乃督兵由此進剿遂撲賊於板仰山梁焚燬殆盡六月率參將劉崇慶遊擊張翊豐都司邢延泰永祿統領兵勇與吉慶分路進剿取道隆德察賊踞山抵拒大兵直撲山梁殺賊無算諭曰此次吉慶與承堯分路進攻所辦甚好西隆邊界苗寨惟亞彙隆或聚集較多今隆或既經攻克止亞彙一處諒可卽日掃蕩肅清後路帶兵渡江會黔夾擊狝苗一帶易於完竣閏六月由八達進攻亞彙行抵安那地方其山梁路口賊俱攔用木柵且於深箐中放槍隨剿羅嘉升永祿守備胡俊鴻等分兵三路斫柵前進斃賊甚衆燬寨柵二十餘尋將溝坎挖加深伏兵以待因思正路進剿急切未能剿淨乃躡覓小路一綫可繞亞彙之後隨令各兵於隘口佯放槍礮作進撲狀遂率員弁沿小路躡山而進直抵亞彙從南路進攻賊伏千人於對面

山梁滾木礮石承堯將弁鼓勇先登賊失其險吉慶由東路夾擊承堯遂由山梁下壓火其寨大兵遂擁上山梁殲斃苗匪一千餘名生擒六十餘名餘匪潰散龍登連奔逸於亞彙之附近那地小河等處奏入諭曰彭承堯首先搶上亞彙南面山梁使各路官兵乘勢入寨尤爲出力宜沛殊恩用昭賞賚著加太子少保銜賞戴雙眼花翎並賞玉喜字牌一箇玉喜字扳指一箇黃辮大荷包一對小荷包四箇二十日進攻那地小河其地四面崇山隘口賊斫木立柵累石成牆守甚堅固承堯由西柵進攻吉慶攻北柵和星額攻東柵賊奮力抵拒千總張天仲等搶踞西面山寨拋擲火彈賊多焚斃三路官兵乘勢斫柵入併力搜剿又克小河上下馬蟻石板等寨是時承堯屯駐亞彙突有賊撲營率兵力敵賊立潰首逆登連力窮投出遂選員解京西隆全境肅清惟岩蕩一寨山梁等密濱臨江水尙有黔苗藏匿承堯率兵四面圍攻投順甚衆巴結一甲亦舉境乞降因籌渡江會黔合剿緣江水泛漲亂石嶙峋湍急水涌對岸崇山壁立賊衆恃險負隅不能驟攻計八渡下游三十里之百扣地方山勢稍平屯賊亦少因令總兵德昌密備船筏由尾後暗渡繞越山梁從後攻擊知府李昉由百扣潛渡繞入渡對江山頂縱火且於

八渡江口備船設礮以備攻擊二十六日承堯與吉慶率兵江口施放火礮對江賊匪驚竄遂乘勢爭渡分搶山梁四路會剿斬獲二千餘人奏入諭曰由八渡下游密備船筏出其不意擁渡過江殲賊二千餘人實屬可嘉彭承堯著賞玉喜字扳指一箇大荷包一對小荷包四箇以示獎勵黔省冊亨永豐一帶與粵西毘連今督師渡江卽獲大勝諒冊亨永豐之圍無難立解時黔匪知粵兵進取冊亨乃自和平山至板蚌由板蚌至板塔日添賊拒守承堯乃率兵由小路圍烘寨越山而上繞板蚌之後吉慶會兵夾攻賊腹背受敵捨命奔竄遂乘勢直上山梁下克之賊夜率衆偷營又伏兵以勝之賊大潰旋竄踞新會山梁九月十八日由板塔直取新會克之時勒保已攻破洞灑賊勢甚孤遂遵諭旨剿撫兼施凡冊亨永豐所屬八果等寨計一萬二千餘口前後悉降奏入上嘉賞之二十三日抵冊亨城外分兵進剿燬賊卡斬獲甚衆遂統大兵直進冊亨州城平之諭曰吉慶奏剿除黔苗收復冊亨所辦亦好彭承堯著賞玉扳指一箇大荷包一對小荷包四箇以示獎勵十月承堯由冊亨督兵凱還行至百色染瘴病卒長子朝龍乾隆四十年乙未科一甲二名武進士授二等侍衛補福建汀洲左營遊擊緣事謫戍烏魯木

齊嘉慶元年釋回隨承堯軍營效力以攻克那地小河得功奏入得旨賞復原官留粵東補用二年隨軍凱旋以染瘴卒次玉龍以廕生授主事見任戶部郎中嘉慶三年經兩廣總督吉慶奏朝龍前在軍營著有勞績染瘴病故請予賞卹廕朝龍子紹齡監生

玉德

玉德瓜爾佳氏正紅旗滿洲人乾隆三十三年由官學生考補內閣中書三十七年遷侍讀三十九年授湖南衡州府知府四十一年遷岳常澧道四十二年九月丁憂回旗在刑部郎中上行走四十四年二月命署山東濟東泰武道俟服闋實授四十五年因前在岳常澧道任內失察沈大綬刊刻書籍狂謬降二級調用仍在刑部行走四十八年署員外郎四十九年升郎中五十一年擢山東按察使五十二年調安徽按察使五十四年遷布政使十月擢刑部右侍郎命赴湖北鞫濟陽縣民楊隆霖控案五十六年赴奉天錦州遼陽州各處查辦控案五十七年轉左侍郎迭赴直隸河間及江西浙江查辦控案六十年授山東巡撫並賞戴花翎二月拏獲劉之協同教案犯陶興諭曰玉德到任未幾卽能飭屬拏獲邪教案犯

足見留心著賞給大荷包一對小荷包四箇五月以二麥歉收未將缺雨情形具奏諭曰山東與直隸接壤本年直隸麥收已足九分而山東僅六分有餘自因該省春閒雨雪本未普霑入夏以來雨澤又復短少是以麥數收成較爲歉薄玉德身任巡撫於地方民事漫不經心並不將缺雨之處預行奏聞酌籌接濟甚屬非是見據該撫將各社倉穀出借以濟民食若再不盡心經理任聽屬員浮冒實惠不能及民則是該撫自取重戾不能仰邀寬宥也七月疏稱與兩江總督蘇凌阿札商擒捕洋盜事宜儻有賊船北竄追至鄰近卽以兩礮爲號鄰省兵船聞號礮之聲亦放兩礮接應諭曰盜船在洋面駕駛正當不露聲息設法誘之使前以便悉數擒捕若甫經望見盜船相隔尙遠輒先施放槍礮豈非使賊得聞風聲逃逸此最爲水師惡習昨已降旨通飭若云恐賊竄逸祇須嚴飭官兵常在洋面梭巡並勤加瞭望亦無難彼此會合設法兜擒十月疏稱東省水師營額設戰船十二隻體式笨重未能如商船之便捷臣前赴登萊海口目覩情形與鎮臣許世臣奏明添雇商船巡緝因思雇船多費不若將應修營船改造商船式樣俾資駕駛而收實效下部議行十二月署河東河道總督嘉慶元年正月疏稱山東糧價平減

採買穀數已足復發銀增買以裕倉儲上飭其所辦非是諭曰玉德卽欲買倉穀亦祇須按照額數量爲採辦乃於各屬已足之外復行增買必致民間糧石因地方官採辦過多漸形短絀糧價轉就騰貴是未必實於倉儲有益而小民先受其累看來竟係該撫聽信屬員之言率冀額外添買以爲藉端勒派侵肥地步除見在應行買補缺穀業已足額外其餘加買者不必辦理以期民食無礙六月調浙江巡撫二年二月疏稱洋面捕盜兵船設有旗號篷帆寫有字號賊匪望見兵船卽先行逃竄今擬撥兵船十隻假寫商船字號誘賊來劫並將各營小船形式與漁艇相似者每營撥出十隻每船派兵十名充作漁戶遇盜匪卽著一船報信十船隨行槍礮齊發可期人船並獲諭曰所辦俱見留心該撫惟當督飭所屬實力妥辦以期設法誘擒肅清洋面六月疏劾宣平縣知縣張蚤譽霉泔倉穀上以奏參遲延降旨詢問八月覆奏因該縣交代時值春雨連縣不能卽時盤量致逾兩月又因宣平縣距省較遠經兩司覈明始行揭奏諭曰此案該縣係二月初二日交印卸事該撫於六月二十九日始行奏參遲至四月有餘是該撫旣經遲誤於前又復支飾於後實屬非是玉德著交部議處部議革職奉旨從寬免其革任著

罰交養廉三年以示薄懲四年正月奉恩旨免繳養廉銀五千兩七月命赴江蘇
審辦巡撫宜興被參各款及地方官濫責生員案十月署閩浙總督五年正月實
授六月疏稱查辦漳泉械鬪情形親抵泉州出示曉諭俱各紛紛呈繳器械約束
子弟永不械鬪出具甘結並送匪經官嚴懲人人稱快又洋面艇匪往北竄逸卽
擬分配兵船選派將弁親往擒捕上嘉之六年正月署福州將軍五月奏請各鎮
總兵分年輪班入覲諭曰所奏甚是各省文武大員三年奏請陛見一次固屬定
例但必須本任見無應辦緊要事件方可循例來京亦無一省提鎮同時奏請之
理著照玉德所奏不必拘定陛見年分亦不必限以年底總視各鎮見無應辦要
務者每年酌令輪替來京展覲十一月奏參提督李長庚心粗氣浮於提調官兵
統轄全省水師之任未能負荷上以其與兩次密陳考語自相矛盾嚴飭之七年
五月疏稱營兵操演鳥槍前請除去槍上所釘星斗爲準若平素演習精熟自能便捷命
奏大屬紕繆施放鳥槍全憑槍上所釘星斗爲準若平素演習精熟自能便捷命
中今玉德因閩浙營兵放槍遲慢手顫欲將星斗除去殊不思兵丁等執槍手顫
自因演習生疎所致應卽將該兵丁等責懲豈除去星斗卽不手顫乎至所稱軍

營用箭皆係梅鍼操演布靶應改用梅鍼箭亦不成話箭枝式樣種種不同隨地異宜總在發矢有準如果將鏹箭演習純熟卽易用梅鍼必能一律命中若平日操演必須改用梅鍼方能射賊則樹侯設正亦非臨陣時所用豈有以人爲的竟將應死罪囚試演射藝之理眞所謂無知瞽說矣我朝武備整齊弓矢槍礮最爲軍中利器法制精良世守不易乃玉德輒思改變舊章此奏若出提鎮漢員內已屬不經況玉德係滿洲總督竟以本朝武備懵然不知率議更張尤爲謬妄玉德著摘去花翎傳旨嚴行申飭仍交部議處部議革任詔從寬留任八年二月因平定三省邪匪推恩內外臣工玉德降級留任各案均予開復十二月江西石城匪徒滋事毘連閩界命玉德馳往建甯一帶查辦九年正月拏獲首犯吳韜甯金鼈及聽糾滋事之匪犯溫正順等十餘名地方甯謐賞還花翎十年十二月廈門行商以洋匪蔡牽乘閒肆劫呈請捐造巡船二十隻添募兵丁八百名各行商每年公捐番銀四萬圓以爲兵丁月餉出洋口糧及燂洗船隻修換篷索之費玉德偕巡撫李殿圖以聞並請將兵丁所用火藥鉛丸令各商繳價還營諭曰該商等捐造巡船藉資保護其事尙屬可行卽燂洗船隻更換篷索捐資修整亦無不可至

添設兵丁所用火藥鉛丸令各商繳價還營則實不成政體國家設兵衛民豈有以歲支糧餉例用藥鉛取資商捐之理玉德李殿圖均著傳旨申飭是月蔡逆犯臺灣由鹿耳門竄入句結鳳山嘉義陸路匪徒滋事上命將軍賽沖阿會同玉德及提督李長庚辦理十一年二月上以玉德駐劄廈門安坐數月毫無籌畫降三品頂帶拔去花翎三月李長庚率水師剿敗匪船賽沖阿渡臺埽清陸路蔡牽仍乘閒由鹿耳門竄出玉德自請革職治罪諭曰玉德任總督有年並不整頓水師認真緝捕其養癰貽患之罪已無可寬其蔡逆滋擾臺郡既不渡洋親往又不多派官兵寬備糧餉種種貽誤此時應行革職治罪之處何待奏請但見在軍需緊要若遽將伊交部治罪轉得置身局外著先行革去頂帶仍將見在軍需責令經理五月因患病請假調理並奏言拏獲蔡牽逆黨洪致等供稱蔡牽幫船原有八九十隻被官兵節次攻毀僅贖大小船三十餘隻前在臺灣時每船給火藥一二百斤自臺竄回後每船給火藥三四十斤其米糧係隨時打劫商船所得諭曰玉德於海疆事務不能隨時整頓以致洋匪蔡牽竟敢句結陸路匪徒竄赴臺灣滋擾此皆由該督平素因循玩誤咎無可辭卽據該督此次所訊賊供蔡逆原有幫

船八九十隻每船給發火藥一二百斤統計已不下一萬數千斤試思盜船火藥至如許之多豈在洋面所能率辦前蔡牽竄擾臺灣時玉德因局存火藥不敷撥用曾咨江西巡撫備辦協濟是官署火藥較少而盜匪轉多有積存若非內地奸民私運接濟卽係營汛不肖弁兵牟利營私可見沿海一帶非特視詰奸爲具文竟以通盜濟匪爲常總督統轄文武所司何事乃玩誤一至於此今該督復以肝氣病發奏請賞假一月調理玉德卽著革職回旗調理俟病痊之日再降諭旨是月李長庚奏參前年札商玉德因兵船低小情願借廉捐造大船玉德以爲有需時日窒礙難行又蔡牽在鹿耳門竄入時篷索破爛火藥缺乏見回內地在水澳大金地方裝篷燂洗盜船無一非新火藥無不充足諭曰玉德於李長庚札商時任意駁飭賊船回至水澳大金地方卽能裝換新篷火藥充足可見該處必有奸民及不肖弁兵等平日積慣通盜此亦玉德廢弛貽誤之罪命速赴刑部審訊治罪並諭福州將軍楊春密查玉德聲名款蹟九月楊春覆奏玉德在廈門公館時每日需用洋銀二百八十圓其家人等每日每人需用洋銀二十圓玉德先在蘇州開有當舖今知事將敗露潛遣人赴蘇將當舖售賣又在廈門置造免死金牌

欲招致洋盜朱濱上命留京王大臣親赴刑部監提玉德詳悉研究尋訊明勒索供應一節並無其事蘇州開當一節僅止存寄玉器銀兩委無合夥之事惟誤聽人言往招賊首朱濱並打金牌旋經銷燬及辦理洋盜事務種種廢弛錯誤應請發往伊犁效力贖罪奉旨依議十二年十月賞給三等侍衛作爲烏什辦事大臣十三年四月因病恩准回旗調理十二月卒子斌良江南候補道桂良禮部員外郎岳良理藩院員外郎徵良大理寺司務法良候補筆帖式

梁冒堂

梁冒堂浙江錢塘人乾隆二十一年順天舉人補直隸欒城縣知縣二十八年丁父憂三十一年丁母憂三十三年服闋補寶坻縣三十六年升薊州知州四十年調深州四十二年補保定府知府四十三年升清河道四十六年擢山東按察使四十七年五月以山東巡撫國泰縱情婪賄未能據實奏參部議革職奉旨加恩以道員降補時豫省河工需員命冒堂前往河南交富勒渾差遣委用十二月補直隸通永道四十八年調清河道擢直隸按察使五十年授直隸布政使五十二年運弁張廷儒被劫親赴蒲溝審訊得旨梁冒堂所辦甚好著將伊失察段文經

及司監人犯越獄處分准其開復五十三年七月命署理山西巡撫旋命署河南巡撫以嚴督屬縣漕糧迅速開運得副冬兌冬開定制交部議敘五十四年正月擢河南巡撫五月奏報豫省情形諭曰各屬雨澤未經一字提及朕念切雨暘無時或釋梁冑堂不能仰體朕懷遲延若此豈以擢用巡撫遂爾自滿不以民爲重耶又言河南舊河身兩岸沙壓田畝不能耕種奏請蠲免得旨允行七月請將月隄加倍高厚以爲重門保障上是其請命繪圖以進五十五年二月升直隸總督賞戴花翎賜黃馬褂五月奏添建海河閘座七月奏留順德府同知嵇瓚奉旨梁冑堂奏順德府同知嵇瓚前經擢升知府因兩耳重聽以知府銜仍留同知原任今又屆三年限滿例應甄別乃梁冑堂猶復奏請留任其意不過以嵇瓚爲大學士嵇瓚親弟瞻顧情面曲事姑容梁冑堂著交部嚴加議處十一月以鉛礦試採無效奏請停止十二月奏阿布噶卓哩克圖王進京在宣化縣被竊請將該縣議處諭外藩入覲經過州縣向無派人護送之例若一一賠償或致捏報詐冒之弊前多倫諾爾遺失銀兩該督請賠曾經敕諭梁冑堂復有此奏實屬不曉事體五十七年閏四月奏拏獲越獄之瞿紀瞿套兒恭請王命正法奉旨辦理稍過各省

情形雖距輦轂甚遠然皆朕率土之民此後各省不得任意從嚴九月奏查辦直省蝗蝻上以甯堂不將三河一路提出轉將該縣李培榮升擢通州回奏仍稱三河有蝗之時在李培榮交卸之後始終回護曲爲開脫著革職從寬留任又以直隸省順德廣平大名及河間景州旱災先後截漕五十萬石命甯堂督率給賑嗣因直隸京南一帶貧民紛紛就食京師諭曰該省早經截漕辦賑當此嗷嗷待哺之時豈得拘泥成例待至九月始行散賑梁甯堂以防汛爲名駐劄長安城養尊處優置地方賑務於不辦何不知輕重緩急若此傳旨申飭五十八年命在紫禁城內騎馬五十九年上巡幸天津甯堂迎鑾賜御製七言詩一首詞傍琴高蹕小停前行旋復返舟舫從心已自加八歲較我猶然少六齡僕僕可稱清且健肫肫恆藉理而經望霖意苦同斯際歌管仍陳卻懶聽六月奏廣順等府得雨奉旨梁甯堂自春閒至今往來各屬朕殷憂已閱半載今通省得雨實堪慶幸著賞給大荷包一對小荷包四對爛餅一匣以誌喜慰七月奏正定等屬河水驟漲田禾淹沒得旨務當實力經理又奏永定河伏汛漫口得旨趕緊堵築諭曰梁甯堂年逾七旬駐劄河干督辦工程朕甚憐之特賞大荷包一對小荷包四箇以示眷注又

奏馳赴固關查勘災區奉旨該督年逾七十精力稍減應善調攝以資料理旋奏覆勘分別撫卹事上覽奏甚慰八月奏正定等處積水漸消分別借助籽種請帑二十五萬糧二十萬石以賑被水州縣又請將通州等三十三州縣未完糧銀八十一萬五百穀六十三石豆六百九十五石酌豁免一半得旨全行豁免六十年大計劾州縣左爲鑽才力不及奉旨該員經梁冑堂奏請調繁何僅閱三年又以才力不及填劾左爲鑽著照部議降調該督忽行調繁忽行參劾並未據實聲明既於政體不協且易啟督撫任意軒輊之漸及經飭令明白回奏反含混其詞不自引咎殊屬非是嘉慶元年恭與千叟宴賜御製詩如意靈壽杖大緞荷包帽緯等物十月奏隨征出力人員仍輪缺升補奉諭不應拘泥若此著申飭十一月冑堂年八十奉召入京特賜御書耆壽宣勤扁額封圻著績徵嘉瑞節鉞升猷引大年對聯紅絨結頂貂帽藏佛如意朝珠蟒袍補服帽緯大緞荷包等物二年六月諭曰工部奏此次巡幸熱河沿途橋道查對丈尺多有不符直省辦差官員通弊朕所素知念梁冑堂在總督任多年辦事勤慎諒不冑因此細事有所染指務須秉公查奏若該督有心袒庇是失察於前復欺罔於後朕不得不加以懲儆懍

之慎之七月奏永定河上游水勢暴長東壩新作埽工衝塌合龍稍緩奉旨該督更當加意督率堵禦剋期合龍用副朕眷注並賞給荔支一匣又奏風雨交作工所危險當督率工員搶護平穩奉旨該督年逾八旬尙屬奮勉特解小荷包兩箇以賜用昭眷注又奏永定河漫口堵築合龍上覽奏欣慰又奏黑龍江兵丁全出直境諭曰該督悉心調度不辭勞瘁甚屬可嘉著賞嵌碧霞弘帶環三塊大小荷包等物另旨優敘三年正月諭曰直隸總督梁冑堂年已衰邁於地方吏治不能整頓伊任臬司於刑名自尙諳悉卽著補授刑部尙書七月授漕運總督四年以尙書銜守護裕陵六年以年老原品休致回籍是年八月卒奉上諭原任尙書梁冑堂由知縣擢任封疆在直隸多年內用刑部尙書旋經簡畀漕督後派守護裕陵本年春閒因其年老准以原品休致茲聞病故殊堪軫惜事下禮部賜祭一壇子如升候選郎中孫甯吉一品廕生候補郎中

徐績

徐績正藍旗漢軍人由乾隆十二年丁卯舉人捐納通判揀發東河二十二年補山東兗州府泉河通判旋升濟甯知州二十七年因查拏逆犯楊塾辦理迅速引

見以知府用尋補曹州府知府三十年調濟南府知府三十三年擢濟東泰武道三十四年二月擢山東按察使三月丁父憂十月命以按察使銜前往哈密辦事賞戴花翎三十五年擢工部右侍郎調烏魯木齊辦事大臣三十六年奏瑪納斯在伊犁塔爾巴哈臺之間地甚寬廣該處若添駐滿兵於聲勢可以聯絡上是之是年擢山東巡撫三十八年三月聖駕巡幸天津召對賞穿黃馬褂御製詩賜之曰新疆宣力數年更簡授濟東安撫行詎曰繭絲惟保障況茲路熟就車輕小廉大法視斯率察吏安民篤以誠風化休言夙所悉務知則闇學知明四月奏請嗣後山東藩司到任委各府盤查所屬常平倉穀定限三月題報五月奏查東省各屬今春出借及向來民欠常平倉穀例應於麥秋二收之後分別徵還但民間見穫者麥應完者穀若令糶麥易穀還倉難免輾轉虧折或因此輸將不前應請乘茲麥秋豐稔卽令民戶將應完穀石交麥六斗抵穀一石還倉如有情願還穀者仍聽其便庶農民易以完納倉貯日漸充盈惟麥性不耐久貯而明春出借仍可徵穀還倉一轉移間民無糶糶之煩倉有實存之數洵屬公私交益疏入均報聞三十九年三月京察各省督撫諭曰徐績宣力封疆克稱厥職著交部議敘六月

奏改齊河在平爲衝繁難兼三要缺在外揀選昌邑爲繁難中缺曲阜爲簡缺均歸部選從之九月壽張逆匪王倫滋事績統兵赴剿被圍於臨清城南總兵惟一引兵救援敗之上慮績未嫻軍旅遣左都御史阿思哈率兵往會之隨大學士舒赫德等分路進剿諭曰徐績爲封疆大員地方有此奸民作亂不能早爲覺察自不爲無罪但此際賊勢鴟張該撫已心存惶懼儻再加以嚴飭恐其愈無主張轉於事無補且因賊匪滋事卽將巡撫更換治罪適足以長刁民頑獷之風俟事定後其功過自不能掩十月解山東巡撫任命緝捕餘黨自效績擒王倫弟王柱王林等正犯二十餘名上以績咎止失察邪教平日辦事頗能阻勉授爲河南巡撫仍帶革職留任所有從前賞給之孔雀翎亦不准戴用以示懲儆四十年奏雲貴二省文報向由襄城至許州入新鄭行走查襄城另有由長葛縣石固鎮至新鄭一路較至許州實爲便捷嗣後雲貴文報請改由石固鎮行走酌撥許州襄城新鄭各驛馬匹責成長葛縣經管下部議行四十二年奏按察使趙銓健忘精神不能周到諭曰徐績旣知該臬司不能勝任自應據實具奏勒休乃於應否去留不置一辭殊屬非是徐績著交部嚴加議處部議革職上從寬留任尋以辦理巡撫

事務時形竭蹙命來京候旨四十三年授禮部左侍郎四十七年因雩祭安設禮器錯誤褫革命自備資斧前往和闐辦事十二月賜三品頂帶五十二年奉旨回京署正紅旗漢軍副都統五十四年授正黃旗漢軍副都統五十九年擢正紅旗漢軍都統六十年召見詢問前任都統弘旻事蹟於其聲名狼籍之處未經實陳上責其隱飾褫職仍賞六品頂帶前往和闐辦事嘉慶三年擢三等待衛調烏什辦事大臣四年五月奏和闐產玉之哈拉哈什桑谷樹雅哈琅圭塔克四處請停止採辦十一月奏請烏什裁撤屯兵地畝賞給伯克均允所請五年奉旨回京賞戴花翎授大理寺少卿遷光祿寺正卿六年擢宗人府府丞十年以老乞休上允之十二年丁卯科重與鹿鳴宴恩加二品銜十六年子鏡任福建建甯鎮總兵陛見時恩准回旗終養績以精力尙健願就養任所鏡復據情具奏諭曰徐績曾任大員勦勸伊子辦公報效不令終養尙屬能知大義但念徐績年逾八旬南方炎熱風土不宜徐鏡著調補直隸正定鎮總兵俾得就近迎養是年卒子鏡見任直隸古北口提督孫達充阿二品廕生見任九江府通判達興阿恩賞六品筆帖式

閔鶚元

閔鶚元浙江歸安人乾隆十年進士授刑部主事二十一年擢員外郎二十三年擢郎中二十四年授山東學政二十七年由學政改授山東按察使條奏懲辦竊匪事宜一偷盜倉庫錢糧之犯宜照積匪猾賊問擬一窩藏積匪之犯宜照本犯罪名問擬一失察積匪窩匪之地方官宜加處分一拏獲鄰封積匪之地方官宜加議敘下部議行二十八年調安徽按察使三十一年擢湖北布政使三十二年以緬甸軍興籌辦驛務奏荆門州兼轄四驛計程三百里其麗陽一驛地屬鍾祥驛屬荆門請改隸鍾祥爲便並請酌添各驛跑夫得旨允行三十五年調廣西布政使三十六年調江甯布政使四十一年擢安徽巡撫四十二年奏鳳潁二郡節年災賑皆就安慶池州遠途撥糧不若就地建倉貯糧以備急需而省運費請於鳳陽郡城壽州鳳臺各貯糧三萬石壽州所屬正陽關貯糧一萬石潁州屬之亳州阜陽霍邱各貯糧一萬五千石蒙城太和各貯糧一萬石潁上貯糧五千石共建倉四百間糧二十萬石又奏泗州舊城自康熙十五年淮湖並泛淪沒水中州治寄居盱眙縣而所轄七十二堡皆在其北風浪阻隔官民咸以爲未便請裁鳳陽府屬之虹縣歸併泗州卽以其城爲泗州治並下部議行四十四年雲貴總督

李侍堯以贓敗上命尙書和坤鞠實論斬下大學士九卿議請從重立決復下各省督撫議咸請如大學士九卿所擬鶚元獨奏侍堯歷任封疆勤幹有爲中外推服請援議勤議能之典稍寬一線不予立決上從之事詳李侍堯傳四十五年調江蘇巡撫四十六年甘肅布政使王亶望捏災冒賑事發上以鶚元胞弟同知鶚元亦有冒賑餽送情事鶚元隱忍瞻徇知而不舉降三品頂帶停止廉俸示懲四十七年偕總督薩載請於金山對岸之錢家港內師古灘濬成新河百五十里直達樓霞以避江險兼資灌溉上允其請賜名便民港又以京口江面遼闊請挑深江北之跨城河渡江較近從之四十八年正月仍復原品頂帶又領廉俸如故七月劾青浦知縣楊卓於收漕時任聽劣監蠹書勾通舞弊請褫職嚴鞫上嘉其實力整頓交部議敘五十年五月江南旱甚鶚元以淮徐海三府所屬得雨二三寸奏言農民猶可趕種雜糧諭曰得雨二三寸未爲霑足焉能趕種雜糧所奏情形恐有不實地方雨水民瘼攸關閔鶚元何得含混入告耶旋請截漕十萬石平糶十二月又奏准徐海江揚五府屬被災較重分別碾賑常鎮二府屬分別借給籽種口糧如所請行五十一年八月命偕大學士公阿桂赴浙覆訊平陽知縣黃梅

貪污得實上以不將阿桂等原審未實之處奏參飭之五十五年四月高郵州巡檢陳倚道以查獲書吏假印僞申知州吳瓌沈擱不辦歷稟上司不爲批發揭報戶部上命尙書慶桂侍郎王昶往鞠之先命總督書麟及鶚元據實覆奏鶚元陳奏多袒庇吳瓌語而書麟又爲鶚元等巧詞開脫上怒其欺罔嚴飭書麟逮鶚元等治罪五月新授江蘇巡撫福崧劾鶚元任內瞻徇署句容知縣王光陞詳報糧書花戶完納錢糧拆封侵那一案諭曰閔鶚元於高郵州一案始則有意消弭繼復飾詞迴護罔上行私罪無可道乃今於句容一案又不親提嚴審僅批江甯府查辦了事句容係江甯所屬該府自有失察處分豈肯認真查訊亦必至如高郵一案上下通同徇隱使鄉愚小民屢受蠹役劣書之累冤抑莫伸朕又安用此大吏司牧爲耶閔鶚元惟知養尊處優於地方官吏作奸犯科之事一切付之不理玩視民瘼徇情骫法設封疆大吏皆如此居心行事國計民生尙可問乎著大學士九卿於定擬時問以重辟用示懲儆獄具以斬立決請命改爲斬監候五十六年釋回籍嘉慶二年故

陳淮

陳淮河南商邱人由選拔貢生捐納知府乾隆二十六年選授廣東廉州府知府時因改廉州爲沿海要缺撤留本省三十六年七月補韶州府知府三十七年七月調廣州府三十八年十月大計薦升十一月擢浙江鹽法道四十三年七月擢安徽按察使先是任浙江鹽道總督陳輝祖查鈔王賈望貲財有抽換那掩情弊陳淮於上年七月俸滿引見時曾奉面詢此事陳淮諉爲不知至是命其據實具奏九月奏入上以陳淮身在事中知而不言難辭欺飾徇隱之罪著革職發往豫省河工效力贖罪四十八年河工告竣改發山東運河差遣四十九年四月諭曰陳淮前因陳輝祖案內革職獲咎尙輕且在運河工段亦能奮勉著補授山東青州府知府九月遷甘肅肅州道五十年正月升甘肅按察使五十一年十月升湖北布政使五十三年七月荆州江溢陳淮招募船隻分救兵民並酌借倉穀以資接濟上甚嘉之五十四年三月荆州萬城隄暨石磯各工完竣得旨議敘五十六年十二月擢貴州巡撫五十八年五月奏查辦鎮遠府邛水橋十八洞地方錢糧採買倉穀報聞六月調江西巡撫五十八年二月飭屬緝獲黔省淫惡逃兇李老五審明正法奉旨交部議敘五十九年十月拏獲兇犯吳相子飭屬究出淫兇實

情奉旨交部議敘並賞給大小荷包以示獎勵六十年正月因上年贛州等衛漕運抵通及回空俱能迅速奉上諭陳淮所辦尙好著交部議敘是月奏稱長甯縣雙橋堡地方鐵砂旺盛距圍子坳等處老廠甚近請募商設廠添置四鑪得旨允行三月黔員領運京鉛在德化縣遇風沈溺陳淮督率各員旬日間全數撈獲上嘉其認真奮勉交部分別議敘五月閩省因米價昂貴奏明來江西採買陳淮恐市僧居奇奏令各屬卽於常平倉內碾米十萬石交閩員運回上從之又閩米運道奏請卽從內河運往較海運爲安便上以陳淮能酌量情形又且江西各屬倉穀充裕糧價亦不至因此增昂著交部議敘嘉慶元年十一月光祿寺少卿初彭齡劾奏陳淮居官貪濫上命署兩江總督蘇凌阿會同欽差戶部右侍郎台布審辦二年正月諭曰此案初彭齡奏參陳淮摺內所稱歌詞有中缺八千大缺一萬之語自非無因隨命蘇凌阿等查審昨據奏稱陳淮信用首縣徐午任其倚勢驕縱以致人皆嫌怨編造歌詞而於貪婪營私等事並無確據僅以與首縣評論字畫忘分結納將陳淮徐午均擬發遣新疆效力贖罪經軍機大臣會同該部覆擬陳淮雖訊無別項劣蹟但罔顧大體殊屬卑鄙僅發新疆不足蔽辜應令罰繳巡

撫養廉銀五年示儆陳淮棄瑕錄用之員經朕加恩復用至封疆如果潔已奉公爲屬員表率何至不孕輿論有傳播歌謠致招物議此等卑鄙事情僅罰繳養廉五年尙不足以示懲陳淮除已革職照擬發遣新疆效力贖罪外著照軍機大臣等所議罰繳養廉五年之處再加一倍罰出此朕於懲創之中仍留不爲已甚之意餘著照擬完結三年十二月贖罪回籍十四年九月上諭本年朕五旬萬壽覃敷愷澤陳淮見在京祝嘏伊已年老著賞給六品頂帶回籍十五年九月故子崇本編修官至宗人府府丞傅霖山東候補知縣

姚棻

姚棻安徽桐城人乾隆十五年順天鄉試舉人考補國子監學正二十六年中式進士授湖北宣恩縣知縣引見授甘肅靖遠縣靖遠民不善治田棻造水車教之灌溉興義學使讀書開金石峴以利行旅又立興靖堡集場通貨物民便之二十九年調臯蘭縣時有盜殺鹽茶廳民王洪訓盜不獲廳役執張舉教之誣服廳不察定讞總督楊應琚令棻覆訊盡得其誣服張舉乃得釋三十二年鹽茶廳巨窩馬得鼈養無賴子四出爲盜總督吳達善令棻偕遊擊董果往捕得鼈窩盜久家

益富居無定所蔡蹤蹟獲之並其黨闕進才等十一人事聞諭曰姚蔡一經派委卽兼程探獲巨窩頗屬能事十月調固原州知州三十三年遷湖北安陸府知府三十四年調知武昌府三十五年隨吳達善至古州獲兇苗多人得旨議敘三十九年上以施南府民情糅雜訟獄煩多非強幹廉潔之員未能區畫調蔡知施南府知府四十一年改福建漳州府知府四十三年巡撫德保調蔡知福州府諭曰漳州一郡濱海刁悍民俗最爲難治其緊要數倍於福州朕素知蔡能事特從湖北調任該郡實因地擇人豈可輕於更調四十六年擢汀漳龍道四十九年授廣東按察使五十年陞見上詢之蔡母年過八旬苦節六十年賜柏貞萱壽扁額一大緞二貂皮四諭令回任時順道省視迎母就養五十四年授江西布政使八月蔡詣熱河行在陳謝復賜其母大緞貂皮如前數五十五年命署江西巡撫疏言江西錢文模糊發局另鑄令局員賠經費又言豐城爲章貢下游衆水匯注境內石隄四十丈餘皆土隄春夏水漲甚爲民田之害應於險要改建石隄五十丈俱如所請行是年上八旬萬壽蔡至京賜服物瓜果以其母手繪羅漢冊進賜其母大緞二貂皮六五十六年疏言建昌府屬界閩省請於要隘設卡以絕私販從之

五十七年六月以母憂去官五十九年六月上以棻將服滿命署廣西巡撫六十年二月授貴州巡撫旋改雲南巡撫時軍務未竣諭福康安如貴州省城需大員駐劄可留姚棻在彼遂留貴陽三月授福建巡撫先是棻任汀漳龍道所屬虧官帑至是事覺解任候質上以棻非入己仍命署巡撫事嘉慶元年諭曰姚棻自護理以來尙知湔悔仍護理如故又以海盜張表率衆投首恩賞黃辦大荷包一對小荷包四箇閩中沿海民捕魚爲生無賴者卽藉捕魚通盜爲之銷贓濟糧與海上盜狼狽爲奸棻編保甲凡魚船舵水令澳甲指名保任容隱則坐之獲銷贓匪王安等五十餘人抵罪汀州民陳觀德娶婦漳州途遇外委汪國生等奸盜建陽役梁高游江中詐取余章貴錢章貴憤溺死事俱在乾隆五十八九年間棻檢積案盡捕得之二年以痺病乞休許回籍調理四年奉高宗純皇帝哀詔棻以手足不仁未能匍匐赴闕奏諭曰覽奏具見悃誠可嘉之至緩爲調理就痊爲國家出力勉之六年四月卒於家

慶桂

慶桂章佳氏滿洲鑲黃旗人大學士尹繼善之第四子尹繼善自有傳乾隆二十

年慶桂以廕生授戶部員外郎旋充軍機章京三十年五月調顏料庫員外郎旋擢內閣學士兼禮部侍郎三十二年命往庫倫辦事尋遷理藩院右侍郎三十五年授正白旗滿洲副都統三十六年命在軍機處學習行走三十八年閏三月充四庫館副總裁四月授伊犁參贊大臣七月調塔爾巴哈臺參贊大臣四十年六月哈薩克巴布克自稱經阿布勒畢斯將伊授爲圖爾屯鄂什克之阿克拉克齊偕阿布勒畢斯之子博普前來貢獻馬匹慶桂以巴布克並未與博普同來不可深信飭駿以聞諭曰巴布克爲人狡詐若不飭駿伊回去必又謊告阿布勒畢斯慶桂自抵塔爾巴哈臺以來辦理諸事各就條理無不慮到伊係尹繼善之子不比他人能如此辦事朕又得一能事大臣矣嗣後尤當勉力學習以副朕眷愛之至意九月調鑲黃旗滿洲副都統四十二年二月授吏部右侍郎四十三年四月哈薩克台吉薩尼推斯因失馬遣來卡倫尋覓慶桂並未明白究問將其逐回辦理失宜部議降調上從寬改爲留任四十四年轉左侍郎四十五年十一月調烏里雅蘇臺將軍遷正黃旗漢軍都統十二月諭曰前經降旨將慶桂授爲烏里雅蘇臺將軍令其由彼前往但慶桂在外年久伊母年高慶桂在烏里雅蘇臺將軍

游牧事務與巴圖辦完時令巴圖暫署將軍印務伊卽來京陛見俾得奉養伊母數日俟慶桂回任後巴圖再回游牧四十六年以病命來京調理四十七年四月授盛京將軍八月奏巨流河城工業於上年八月告竣查巨流河新建城垣東西北三面緊接山坡每逢雨水俱沿城基南路入河城基不無受損擬於城外東西北三面開挖洩水溝三道城內南北亦挖水溝一道水由溝行城垣得以堅固並建石橋四座以便行旅共需銀一千二百兩歸入城工案內覈銷報聞九月調吉林將軍四十八年七月奏獲私挖濬犯一百餘名上以封廠停採原期護養濬苗今私挖人犯至一百餘名之多有封閉之名而無其實不如仍准開採命慶桂一面嚴拏一面放票開採十月續獲偷挖人犯六百餘名濬二百兩奏入上嘉之四十九年閏三月調福建福州將軍入覲五月擢工部尙書仍直軍機旋調兵部尙書正藍旗滿洲都統十一月充經筵講官十二月山東巡漕御史佛喜保奏濟甯州知州王道亨承審旗丁于士祥一案意存開脫及巡撫明興迴護該州並虧缺倉庫苛斂地方各款上命慶桂往鞠惟該州失察差役私受使費並馬號採辦料豆辦理不善屬實餘坐誣請分別交部嚴議五十年二月署黑龍江將軍五月帶

管理藩院印務九月命陝甘總督福康安帶總督印赴阿克蘇一帶安輯回衆上以慶桂前在塔爾巴哈臺辦事頗爲歷練調度軍務悉所熟習命帶欽差關防馳往甘肅暫署總督印務十二月復授塔爾巴哈臺參贊大臣五十一年回京補兵部尚書五十二年十二月湖北省監生羅正榜控漢川縣知縣王蕙元侵蝕賑銀命慶桂偕侍郎汪承霈往讞之尋奏該縣辦理遲延致招民怨又於書吏勒索票錢調息事實屬故_在餘屬虛誣兩造均定擬如律報聞十二月署盛京將軍五十二年署吉林將軍五十四年四月署烏里雅蘇臺將軍十月侍衛齊巴克札布控察哈爾總管伊勒庫剋扣俸餉苦累兵丁慶桂奉命勘訊屬實律以重辟五十六年丁母憂五十七年九月廓爾喀平上以慶桂在軍機處承旨書諭夙夜宣勤交部議敘列十五功臣內圖形紫光閣御製贊曰所謂故國賴有世臣量材授職非卑逾尊本兵習政元長之子跨竈是乎圖形始爾十二月兩淮鹽政全德奏參運司柴楨那移商課銀二十二萬兩解補浙江鹽道庫內虧項上以浙江巡撫福崧兼管鹽政柴楨虧空庫項豈毫無聞見恐有通同染指情弊命慶桂同調任浙江巡撫長麟赴浙查辦訊出柴楨在鹽道任內福崧曾婪索金銀及派辦物件不發

價銀十一萬五千餘兩又福崧侵用掣規值月差費等項銀六萬六千餘兩請將柴植於犯事地方正法福崧亦擬斬下軍機大臣大學士九卿議從之並命將福崧毋庸解京卽令慶桂於押解所帶地方會同該督撫監視正法五十八年授荊州將軍五十九年二月調正紅旗蒙古都統四月兼鑲藍旗滿洲都統十一月河督蘭第錫奏高家堰一帶風損石工段落較多水底根腳難於估計請築壩戽水俾根腳顯露以便勘估興修命慶桂往勘奏稱祇按段拆補勿庸戽水查驗上是之十二月回京奏今歲夏秋雨多淮水盛漲兼西北風甚大以致浪拍堰工幾致滿溢幸而風勢斗轉得以搶護平穩誠爲神佑理宜重新廟貌以答靈庥得旨允行六十年二月管宗人府銀庫九月調鑲黃旗漢軍都統嘉慶元年五月仁宗睿皇帝奉高宗純皇帝駕幸熱河命慶桂留京辦事二年三月調鑲紅旗滿洲都統十一月復調正藍旗滿洲都統三年四月山東武生戴雲龍控齊河縣知縣侵蝕舞弊各款命慶桂同大學士劉墉往讞之惟修倉勒派及車輛漕糧折價三款事屬有因餘坐誣問擬如律四年正月高宗純皇帝龍馭上賓仁宗睿皇帝命慶桂恭理喪儀調刑部尙書協辦大學士入直軍機尋授內大臣充國史館正總裁二

月恭纂高宗純皇帝實錄命慶桂充監修總裁官加太子太保銜三月授文淵閣大學士總理刑部事務賞海澱寓園四月充殿試讀卷官九月奉安裕陵禮成命偕大學士董誥恭點高宗純皇帝神主晉太子太傅尋管理吏部及理藩院事務六年正月調正黃旗滿洲都統二月管理戶部三庫事務三月三省邪匪賊首王廷詔就擒上以慶桂贊畫軍機夙夜不怠加軍功一級七月奏每年應賞御前乾清門侍衛軍機章京並三庫官員養廉共需銀八萬餘兩因各省所解飯銀不敷支給請將戶部寄存捐納飯銀歸入銀庫借支備用諭曰此等賞項從前原因三庫飯銀爲數較多是以每年格外分賞各處原非正俸及養廉可比年來外省應解錢糧俱因撥給軍需隨解飯銀短絀除三庫官員養廉動支外其餘應賞各處之項自當酌量撙節俟軍務告蒞各省飯銀解部充裕仍著照前例給賞十一月充會典館正總裁賞黑狐端罩遇有祭祀慶賀大典准其服用七年六月參贊大臣德楞泰剿斃賊首上嘉慶桂等承旨書諭周到勤勉交部優敘十二月上以川陝楚剿捕逆匪大功勘定特沛恩綸諭曰軍機處行走之大學士慶桂經皇考簡用多年克盡忠悃自用兵以來承旨書諭勤慎小心朕敬惟皇考之恩著賞給騎

都尉世職八年七月賞戴雙眼花翎九年十一月上以慶桂年屆七旬御書濟美延禧扁額賜之並御製詩曰龐眉皓首冠朝紳大雅雍容德業醇名重三朝三相國勳隆一代一賢臣蟠根深固天香遠調鼎平和庶政均喜屆古來稀有壽祥徵麟趾頌振振十一年授領侍衛內大臣十二年三月高宗純皇帝實錄告成上以慶桂在館八年終始其事賞用紫韁九月仍管戶部三庫事務十四年正月晉太子太師七月充崇文門正監督十五年十二月纂輯平定三省邪匪方略告成加一級十六年八月扈蹕熱河上念慶桂年逾七旬見在骸疾命不必隨進木蘭旋以骸未愈賞假先期回京並賜醫調理十七年正月加太保銜九月諭曰大學士慶桂荷蒙皇考高宗純皇帝簡用在軍機處行走朕親政以來復令入直內庭十有餘年夙夜在公奉職勤慎今年近八旬步履遲鈍每日樞直內廷朝入暮歸高年精力殊非所宜慶桂著不必在軍機大臣上行走輪班赴內閣閱本其所兼文淵閣事管理戶部及正黃旗滿洲都統均仍其舊伊所兼領侍衛內大臣見已開缺著仍授爲內大臣嗣後遇所管部旗引見人員均無庸帶領每屆值日奏事呈遞膳牌亦無不可慶桂所管事既簡庶得頤養延齡用副朕體卹老臣之至意十

八年九月上以慶桂年老多病命原品休致給予全俸十九年十一月上以慶桂年屆八旬特予優賚二十一年六月卒諭曰休致大學士慶桂自乾隆年間蒙皇考高宗純皇帝簡用外任將軍內管部務朕親政後復擢贊綸扉在樞廷行走多年小心謹慎前因年老休致嗣值伊年屆八旬經朕賞坐生日優加寵賚茲聞溘逝軫惜殊深著賞給陀羅經被派奕紹帶侍衛十員前往奠醊照大學士例給予卹典尋賜祭葬諡文恪子福同原任刑部員外郎孫培成見任二等侍衛

書麟

書麟滿洲鑲黃旗人父大學士高晉自有傳乾隆二十三年授鑾儀衛整儀尉累遷冠軍使三十六年五月授西安副都統三十八年以金川逆酋僧格桑索諾木滋事命爲領隊大臣七月領滿洲兵二千赴軍營十一月隨參贊大臣豐昇額攻剿沙壩山碉卡超衆先登賞戴花翎三十九年隨豐昇額帶兵二千由卓克采至薩爾赤鄂羅山將南面雪山占據攻開要隘復隨豐昇額率侍衛瑪爾吉等領兵一千五百進抵凱立葉山根遇賊三百餘人潛出迎擊之殺六十餘人餘皆竄四月隨參贊大臣五岱等領兵五千守羅博瓦山梁以牽賊勢旋管達爾扎克莫爾

敏山等處駐兵九月十一日夜賊潛擾莫爾敏山營卡千總嚴倫都司袁敏擊走之十三日夜賊侵達爾扎克北山溝營卡前鋒校德興擊走之十一月同副都統福珠里總兵特成額等分攻榮噶博最高峯頂及薩康爾山半賊碉四十年三月同福珠里副都統倭星額等攻木思工噶克碉卡四月同侍衛格勒爾德等攻木思工噶丫口碉卡時副將曹順等分四路進攻書麟偕福珠里倭星額特成額等帶兵爲各路援應五月二十二日克之七月進克巴占之石碉九月同五位侍衛彰靄等攻科布曲山碉座科布曲山與勒烏圍前相對中隔大溝崖礮陡峻書麟等分兩隊從正面進攻復於山坳設伏以斷賊援潛率兵躡水而過搶上山梁先得碉前大卡一座石碉分三層賊番用梯上下並無門戶我兵進抵碉前拋入火彈挖掘根賊衆來援我兵分頭迎擊斃賊甚衆十二月與特成額等攻克爾古什拉斯在科布曲山側我兵合力取峰頂兩碉及山峰西而碉卡隨進攻勒隈勒木通山脊石碉三座又克在後之兩大碉石卡九座尋奪據則耶噶克山梁四十年正月大兵攻圍噶拉依逆酋索諾木等乞降金川平加三等議敘尋授廣西提督命圖形前五十功臣於紫光閣御製書麟贊日本非習戰遇戰卽奮恐孤父

名偉哉後進功成事定提督鬱林攻則壯志守則小心四十三年丁父憂來京四十四年四月署兵部左侍郎十二月調署倉場侍郎四十九年授安徽巡撫五十年安徽旱奏請截留漕糧五萬石留關稅銀三十五萬兩有奇備賑從之並命酌借籽種口糧尋奏以安徽秋成歉薄請將乾隆五十一年輪免漕糧改於本年蠲免從之十一月請設法清釐荒地疏曰查阜陽縣賦役全書開載荒地六千餘頃僅據報墾三千餘頃其餘已墾未報自必不少屢次飭查未經清釐斷無任其以熟作荒不行查辦之理臣再四思維惟有稍寬年限立法清釐俾令漸復舊額庶事不煩而民不擾查阜邑民間買賣田地率多照契開界過戶納糧並不施弓查丈間有丈交者亦不過相沿舊例以繩索縱橫經丈往往與糧額不符致啟爭訟而該縣悉皆旱地更非水田有塍畔可比其毗連荒地之處未必無逐漸侵墾以熟包荒者日久無稽職此之故應請將部頒官弓丈明畝數載入契內如有多餘之地照議定價值減半加增仍以所增之價一半入官一半給主則賣戶照額升科亦得糧清地實以免糾纏自所樂從其有自行清丈據實報升者免其已往之罪並獎以花紅儻過割時不用官弓丈量私自成交一經察出卽照欺隱律治罪

如此則民間有所勸懲無不自圖保業樂於首報升科以杜後患仍於每歲年底將清出報升頃畝應徵錢糧彙冊題報數年之後自可漸復舊業於國課民情兩有裨益奏入上嘉獎之五十一年正月上以書麟悉心經理旱災飭部從優議敘尋部議加一級紀錄二次三月上以兩江總督李世傑於河工未悉命書麟於伏前往淮安靖江一帶與李世傑河道總督李奉翰熟商河防事務加意料理閏七月黃運兩河漫口書麟同李世傑李奉翰等奏曰本年江省黃河漫口共有四處內墩口門雖寬而水勢尙緩即可堵合李家莊水勢亦緩逐漸挂淤口門下深處不過七八尺亦易於辦理湯家莊漫口雖不免分大河之溜而正河水深無虞奪溜至司家莊漫口溜勢流入口門較多先經臣等於對岸抽引挑河引溜北趨並於西壩先行進占挑溜歸入正河則大河水勢自見增長口門既有分洩壩工亦不至著重已飭各廳州縣購辦料物分段興工其毛城鋪天然峰山等閘並茅家隄引河已次第堵閉務使黃流併力東趨以冀刷深河底其束清禦黃兩壩頂用柴鑲作以期堅實俾資攔蓄復奏請培高黃運兩河卑矮隄工修整臨湖浪掣石工皆從之十月同李世傑李奉翰等奏江省桃源境內河形從前由高家灣折至

玉皇閣卽由東南直至惠濟祠下會清東注近年以來順黃壩西北生有淤灘大河溜勢至玉皇閣隄前卽偪向南崖直抵順黃壩迤上木龍之前復向北折至陶莊新河始自西而東會淮歸海水勢紆折流行不能暢利查玉皇閣下河勢有向東北坐灣之處若於該處迎溜抽挑引河一道俾黃河從此直注歸入陶莊新河東注會清形勢較爲徑捷上年伏秋黃水長發惟桃源境內存水較高未必不因玉皇閣一帶河勢紆迴所致自應於該處抽挑引河預備明年開放儻開放後大河溜勢全掣由茲東注則順黃壩一帶埽工盡可淤閉卽一時未能全掣而有此分洩之路可免存積過高之病且中河隄工以南又有縷隄一道將來加高培厚作爲黃河北隄亦不大滋勞費報聞旋奏司家莊湯家莊漫口合龍復以安徽五河等十七州縣水災請賑得旨允行五十二年二月薦舉知府錢金殿臧榮青二員堪勝道員諭曰朕召見錢金殿見其才具中平年已衰老臧榮青亦屬拘謹並非出色之員書麟平日小心謹慎是以於屬員中亦擇其謹慎者加以甄拔不知地方官有察吏安民之責必須才猷出衆通達事體方稱特令保薦之意若循分供職之員設遇地方要務豈能措置裕如且督撫鑒別人才不宜預存偏見如專

取謹飭則巧詐者皆有心迎合貌飾醇謹以邀識拔書麟在巡撫中尙堪造就其查辦賑務協理河工亦能實心實力是以降旨教導開其識見嗣後不可以一格取人以副朕訓勉飭勵至意十一月擢兩江總督五十三年六月諭曰朕聞各督撫內惟李世傑書麟於出巡時輕騎減從尙能不累地方各督撫受朕重恩養廉優厚何不以李世傑書麟爲則倣而必踵不肖督撫之覆轍乎十一月兼署江西巡撫五十四年二月京察加一級六月同河道總督蘭第錫奏睢甯南岸周家樓漫口二百餘丈自請治罪上特免之旋以江西糧船行走遲誤交部嚴議部議革職得旨改爲降三級留任十一月周家樓漫口合龍交部議敘五十五年四月高郵州巡檢陳倚道揭報查獲私描假印填給串票重徵之書吏具稟府州撫藩俱未批發經欽差尙書慶桂侍郎王昶鞠實上以書麟瞻徇朦混交部嚴議並革去翎頂五月又因失察句容縣書吏侵用錢糧命革職交刑部治罪七月發伊犁效力八月起爲山西巡撫十一月內閣學士尹壯圖奏州縣虧空督撫派累惟李世傑書麟獨善其身奉諭李世傑書麟尙能督率屬員留心民事五十六年仍授兩江總督五十七年閏四月同江蘇巡撫長麟奏曰海州暨所屬沭陽縣地勢極爲

著書麟於家信中諄切教誡勉令時加檢束改過自新以觀後效十月調雲貴總督兩江總督費淳奏參雲貴總督富綱任總漕時貪婪各款諭交書麟嚴審尋鞫實將富綱解京治罪又雲南巡撫初彭齡奏參前任巡撫江蘭諱匿鹽井被淹命交書麟查辦五年正月奏江蘭有心諱災上以書麟辦事素稱公正所奏皆實奪江蘭職又奏確查江蘭於猓匪一案奏事不實辦理草率臣不敢稍有袒護亦不敢意存附和文致江蘭之罪奉硃批所奏甚公二月馳抵黃草壩剿捕猓匪親督將士分兵兩路進攻猛白山巔焚燒大小賊寨數處殺賊六十餘人奉上諭所辦奸摺內所稱因探聞賊匪於山梁下紮營書麟卽馳回北路策兵冒煙進剿一節書麟前在金川帶兵時正在壯年其爲勇力朕所夙知見在任重封圻爲通省領袖而年逾七旬亦非少壯可比且賊匪俱於深林密箐中藏匿窺伺書麟於督剿之際自當持以慎重切不可稍涉冒昧致有疏虞旋經官兵攻克猛白南路山梁並剿洗賊寨潰匪竄丙別街場屯聚書麟分派提督烏大經蘇爾相等帶兵將丙別街房屋概行剿洗攻破賊寨三大小賊營五殲斃賊匪無數奉上諭所辦可嘉書麟著賞給黃辮大荷包四鑲寶石玉火鏢一鑲玻璃銅盒一至摺內有親身督

陣之語書麟係協辦大學士不值因此等么麼躬冒矢石惟在調度得宜仍於奮勇之中寓持重之意勿致稍有疏失爲要是月官兵剿洗壩卡生擒起意句結之賊目李文明李小老及丁小八等分別正法示衆奉上諭所辦甚屬可嘉書麟著從優議敘尋議軍功加一級四月官兵南北兩路會合圍攻焚燒草寮寨二百餘間傷斃賊匪甚衆又令曉事順猱入箐招諭曉以利害旋據魯猱羅黑二老羅成才等率領稔恩蠻糯數木等五十二寨八百四十餘戶男婦老小來軍營叩頭乞命並呈繳槍弩器械書麟受降並查明土司前此苛派緣由立碑申禁奉上諭所辦甚好書麟辦理此事剿撫機宜均爲得手見將官兵營卡歸併所辦俱是閏四月奏謝恩賞奉硃批卿老成持重爲國宣猷蠻煙瘴雨之鄉切勿過勞加意珍攝佐朕治理勉之又奏降裸等隨同委員安插降寨清查地畝搜繳器械頗爲出力其和尚銅登銅金俱悔罪投誠並曉諭銅登等安分焚修奉上諭所辦甚是尋加太子太保七月奏封茂隆銀廠從之九月請將黔省總兵以下官照浙江之例交巡撫節制從之十月調湖廣總督時教匪未平諭將徐添德一股竄匪迅速剿捕殲除淨盡十二月書麟抵襄陽聞賊匪情形馳往剿辦並請暫留江西撥運陝省

兵米一萬石以備接濟從之奉 上諭書麟甫到軍營卽以防堵爲見已得要領其勸諭居民築立堡寨更替疲兵均於軍務有裨摺內所稱無分疆界併力合擊深得大臣之體是月書麟會同倭什布前抵竹谿帶領吉林索倫兵兜剿青藍黃三號賊匪先經長麟明亮孫清元在瓦房口分兵夾擊大獲勝仗書麟因東川保豐一帶爲糧運要路虞賊匪折回親往截剿敗之諭曰書麟係協辦大學士湖廣總督非從前出師金川僅爲領隊可比且年已七十尤當持重惟應遵照節降諭旨將團勇築堡安撫難民及善後等事悉心經理毋令川陝竄匪闖入楚境卽爲不負委任摺內所稱山勢險峭僅有仄徑一綫書麟扶掖步行覽奏深爲懸慮賊情詭詐深山窮谷之中難保無賊匪藏匿伺間竊發書麟領軍之人惟在調度得宜指示策應不必以帶兵殺賊見長冒險輕試書麟以徐添德等大股在竹山邊界泉溪一帶縱火逃竄飭鎮將分路搜捕均有斬獲六年正月書麟同明亮倭什布孫清元等由竹山房縣進剿徐添德三路合擊先後殺賊八百餘人生擒五十餘人賞鑲寶石帶頭玉扳指大小荷包疏言剿賊之法先以固結民心培養民氣爲第一要務撫輯得宜則賊卽是民任其失所則民卽是賊奉硃批此數語包括盡

矣卿如此忠勇必能成功勉之又奏楚省被賊擾害民力拮据請將截存漕米暫緩搭解以備賑卹從之二月川匪苟文明李彬由陝西平利縣越老林欲竄房縣書麟與長麟明亮督兵倍道進擊與賊遇於獅子崖大敗之殲偽總兵興昂偽先鋒魏鍾鈞旋分兵伏余家溝高尖山伺徐添德張允壽來襲營起擊之殺賊千餘人適房縣北境別有賊三千餘人攻撲寨礮令孫清元等分隊進剿斃五百餘人生擒賊李魁聖等百餘人奉旨交部議敘尋奏請於襄陽添設提督並移駐防協鎮於鄖陽竹山二處從之三月徐添德苟文明等在茅倫山一帶屯聚經孫清元吉林泰等督率將弁分爲六隊奮勇攻擊斃賊無算奉上諭書麟雖未帶兵打仗其一切調度均合機宜著賞給四喜玉扳指金盒黃辦珊瑚豆大荷包是月京察加一級四月以病軀委頓恐誤軍務疏請解任調理上命乾清門侍衛孟住帶同太醫並書麟子吉郎阿馳往看視並諭令緩程回京初九日卒於軍以剿賊未盡囑身後以行衣入殮遺疏入諭曰書麟老成練達體國公忠敷歷有年久著勞績本係宣力舊臣精神未形衰邁設不調任湖廣尙不致因勞成疾茲聞溘逝深爲軫惜著加贈太子太傅賞給一等男爵令伊子吉郎阿承襲准再襲十次仍令孟

住前往賜奠卽令吉郎阿迎柩回京俟人城時再行加恩尋禮部議卹上予諡文勤七月諭曰據額勒登保德楞泰前後奏參倭什布辦理湖北糧臺遲誤書麟正在總督任內深知其事並不陳奏未免心存徇隱於末路稍覺模稜見在靈柩到京因此不親往奠醊但念書麟平日居官清廉公正聲名久著節次辦理軍務均有成勞仍加恩派孟住帶領侍衛十員前往賜奠以示朕軫念舊臣之至意子吉郎阿襲一等男見發兩廣以副將委用

福崧

福崧烏雅氏滿洲正黃旗人祖碩色湖廣總督自有傳福崧於乾隆三十六年授內閣中書尋升侍讀三十九年京察一等授四川川北道四十四年擢甘肅按察使四十六年三月遷廣東布政使時循化廳屬撒拉爾逆回蘇四十三等爭立新教與舊教回人互相攻殺福崧隨總督勒爾謹剿之四月調甘肅布政使七月逆回平賞戴花翎尋以勒爾謹等冒賑事覺命福崧隨總督李侍堯清查倉庫錢糧四十七年三月查明虧銀八十八萬餘兩糧七十四萬餘石責令歷任各員賠補無力完繳者令現任督撫司道府廳州縣攤賠上以福崧辦理清查尙屬實心免

之十月擢浙江巡撫十一月諭曰浙省吏治自王直望以來廢弛日久陳輝祖接任後又復營私謀利其通省倉庫錢糧難保無積壓虧缺抑勒交代等弊著傳諭福崧等徹底盤查如有虧短情弊責成各屬速行彌補總期不動聲色而國帑倉儲皆歸實貯尋查明虧銀一百三十餘萬兩請分別勒限彌補報聞四十八年正月桐鄉縣劣衿錢徵書等糾衆鬧漕緝獲首從各犯定罪如律上嘉其實力整頓五月疏陳嚴除漕弊章程一遵例十月開倉分別村莊遠近收穫早晚使糧戶按日交納一縉紳巨戶有倚勢擅交醜米者揭參并飭印官駐倉監兌嚴禁折色納錢諸弊一收漕積習每擇書吏有家計者承值倉廩開徵時暗點漕總更名疊充又辦漕幕友長隨一經書薦不必到倉卽分餘潤俱應嚴行革禁下部議行先是福崧奏浙江范公塘埽工矧蟄用船沈石保護諭曰暫時防護補救目前非一勞永逸之計將來是否一律改築石塘俟明歲南巡時朕親臨視指示機宜再行定奪四十九年正月上南巡三月以兩浙商人公捐銀六十萬兩請於范公塘改建魚鱗石塘赴行在具奏允之五月條奏石工各事宜一柴工易蟄應用竹篔石塊擁護並建石壩一木限二年辦齊石限四年運足遲誤參處一急工分四限緩工

分六限統限五年完竣一料價銀藩司親發工員承領卽由工員轉發該商不經胥吏如所請行七月以范公塘添建石塘汛兵不敷請於撫標兩營酌撥弁兵駐守從之八月請將福建臺灣械鬪人犯停發新疆上責其越俎部議革職命留任五十年以秋審應擬情實案犯誤入緩決上以其寬縱飭之五十一年二月奏浙省虧項未能依限完繳懇請展限並稱於新正傳齊司道等官公同立誓共砥廉隅諭曰浙省地方向無虧缺之事四十六七年王亶望陳輝祖貪贖之案相繼敗露經富勒渾等將倉庫虧缺據實奏時勒限彌補乃歷三四年之久竟未全完尙覲顏奏請展限且稱率同司道各府公同立誓尙復成何政體耶此而不嚴加懲創各省紛紛效尤伊於何底著派尙書曹文植侍郎姜晟伊齡阿前往盤查究竟虧缺若干彌補若干並將因何遲延之處查明具奏三月奏籌柴塘歲修坦水經費諭曰海塘工程關繫民生甚重是以於老鹽倉范公塘舊有柴塘後一律添建石塘仍留柴塘爲重門保障自無須另砌坦水也今據福崧所奏是添築石工後仍須歲修柴塘坦水則前後所建石塘竟屬無益卽云老鹽倉工程係王亶望陳輝祖任內之事而范公塘則係該撫任內之事雖係朕意如此果知其不可何妨

執奏乃依違不言徒增此勞民傷財之舉著曹文植等親往履勘據實籌辦旋命福崧來京候旨四月文植等奏言柴塘坦水受潮汐汕刷勢不能無蹲踞若不隨時修補不能抵禦大溜坦水卽有歲修則作爲坦水之柴塘自應一律辦理上允所請又奏查明浙省虧空已未彌補實數詳覈定議並酌立善後章程諭曰福崧尙無貪黷敗檢情事其咎在於不能實力督催以致逾限不完失之柔懦又復公堂設誓有乖政體其咎尙輕現在山西巡撫員缺著加恩暫令福崧署理八月奏太原駐防滿營成丁閑散現有三百餘名請添設馬甲六十名步甲四十名挑補所有錢糧於各州縣支領繁費銀兩裁減支給如所請行九月浙江學政寶光鼎劾平陽縣知縣黃梅貪黷營私諸款鞠實上以福崧前在浙江巡撫任內未經參奏褫翎頂命來京候旨尋賞二等侍衛充和闐幫辦大臣五十二年調阿克蘇辦事大臣五十四年二月調葉爾羌參贊大臣六月召來京五十五年二月授安徽巡撫四月調江蘇巡撫五月前任巡撫閔鶚元因高郵州書吏假印重徵案革職逮問福崧復查出句容縣糧書侵蝕錢糧鶚元瞻徇知縣王光升不爲究辦上以福崧不避嫌怨持正可嘉下部議敘復諭曰無識之徒或以該撫乘人之危謬爲

嘗議想亦不免但江蘇爲錢糧繁重之地官吏等易於滋弊福崧卽受此惡名不
必再存邀譽之見務須徹底清釐如尙有此等官吏舞弊立即嚴參不可以得邀
優敘心存懈玩思博寬厚之名旋署兩江總督八月以安徽宿州等處水災籌辦
撫恤得宜得旨嘉獎十月查拏長洲等二十八州縣充當漕總蠹吏七十餘名嚴
懲之上嘉其辦理妥協是月仍調浙江巡撫十一月以海洋不靖命駐温州會同
提督陳杰剿捕五十六年十月外委陳學明巡洋被刦捏傷具報福崧未能究出
實情部議革職上加恩改爲留任十二月奏向來巡洋弁兵遇盜退縮僅將該管
洋汛查參嗣後應將原派不慎將備等官並予革職仍令自備資斧效力三年方
准回籍該管總兵亦請交部議處從之五十七年二月奏請補修海塘石工與前
任巡撫琅玕改築柴壩異議命江蘇巡撫長麟往勘請如福崧議得旨允行五月
民人與漁戶互爭網地干總林鳳鳴等受賄袒助福崧失察部議革職上加恩寬
免十二月調任兩淮運司柴楨私挪鹽課銀二十二萬兩彌補浙江鹽道虧空經
兩淮鹽政全德參奏上以福崧兼管鹽政恐有染指情弊革福崧職調山西巡撫
長麟代之並讞其獄復命尙書慶桂赴浙會訊五十八年究出福崧婪索柴楨金

銀及派辦物價銀共十一萬五千餘兩復侵用掣規及值月差費等項銀六萬六千餘兩獄具擬斬諭曰福崧係碩色之孫伊家世受國恩自應廉隅謹飭勉力圖報乃向鹽道婪索多贓營私亂法莫此爲甚此而不嚴辦示懲何以肅官方而儆貪黷著毋庸解京令慶桂於押帶所到地方如在江南境內卽會同書麟監視正法如已行抵山東卽會同吉慶監視正法爲封疆大員辜恩亂法者戒

清史列傳 卷二十八

大臣傳次編三

董誥

董誥浙江富陽人父邦達官禮部尙書自有傳乾隆二十八年進士改庶吉士三十一年散館授編修三十二年命入懋勤殿寫金字經爲孝聖憲皇后祝嘏三十三年四月御試翰詹時誥以寫金字經未與試上嘉其學問優長特予加一級三十四年正月擢詹事府右中允七月丁父憂三十六年服闋命入直南書房先食俸候補右中允三十七年正月轉左中允五月遷翰林院侍讀充日講起居注官三十八年十一月遷詹事府右庶子旋授翰林院侍讀學士三十九年四月充經筵講官六月充江南鄉試正考官十二月遷內閣學士兼禮部侍郎四十年十一月擢工部右侍郎兼管錢法堂事務四十一年三月充四庫全書館副總裁並命接辦四庫全書薈要兼充武英殿總裁四十二年六月調戶部右侍郎兼管錢法堂事八月命輯滿洲源流考十一月轉戶部左侍郎四十三年四月兼樂部事務

四十四年十二月命在軍機大臣上行走四十五年三月賜第西直門新街口五月命紫禁城騎馬四十九年七月甘肅石峯堡逆回平上以誥勤勞懋著交部議敘五十一年正月擢戶部尙書五十三年臺灣逆匪林爽文就擒上以誥等夙夜宣勤交部議敘並命列二十功臣內圖形紫光閣御製贊曰舊例軍務多用清文茲或用漢綠營海濱治以馬上亦頗效勤堪同福將閣表書勳五十四年二月命管理稽察上諭事件處五十五年十一月加太子少保銜五十六年十月刊石經於太學以誥充副總裁五十七年九月廓爾喀平交部議敘列十五功臣內圖形紫光閣御製贊曰儒雅摺紳本不識兵樞機久參習以盡誠地官掌職度支是司軍儲萬里調撥合宜六十年九月充國史館副總裁嘉慶元年十月授東閣大學士總理禮部仍兼戶部事務二年二月丁生母憂特旨賞陀羅經被飾終遣御前侍衛額附豐紳殷德帶侍衛十員奠茶酒並賜祭葬三年三月誥葬母畢詣闕謝恩諭曰刑部尙書缺出見當辨理秋審之時一時未得其人董誥見在守制已逾小祥計明年春夏間卽屆服闋暫行署理董誥接奉此旨亦不必來行在謝恩惟當悉心辦理秋讞及軍營紀略等事此係朕不得已用人之苦心當亦人所共諒

也四年正月高宗純皇帝賓天仁宗睿皇帝命總理喪儀仍在軍機處行走二月
充實錄館總裁晉太子太保五月服闋授文華殿大學士充國史館正總裁管理
稽察上諭事件處仍兼刑部尙書九月奉安裕陵禮成命誥恭點高宗純皇帝神
主加太子太傅六年二月三省邪匪首逆王廷誥就擒詔加誥軍功一級十一月
充會典館正總裁賞黑狐端罩一襲尋加軍功三級七年大兵戡定三省邪匪上
以誥自用兵以來書諭慎勤特予騎都尉世職八年七月搜捕三省邪匪全境肅
清諭曰董誥之子淇本由廕生任戶部員外郎著加恩以郎中用九年充順天鄉
試正考官十一年九月管理戶部三庫事務十二年三月高宗純皇帝實錄告成
諭曰董誥前後在館八年始終其事允宜特加優獎董誥之父董邦達從前未經
入祀賢良祠著加恩准其入祀十三年三月充會試正考官九月賞密雲縣房屋
一所十四年正月諭曰本年朕五旬萬壽已頒恩詔覃敷闔澤因思大臣中有平
素恪勤尤著者亦宜特加優獎大學士董誥在軍機處行走有年夙夜敬慎著加
恩晉加太子太師三月以誥七十生辰御書贊樞錫慶額賜之賚予甚渥復御製
詩曰久任樞廷政教宣兩朝知遇一身肩聖人早鑒才猷博碩彥今資輔弼賢大

衍歲逢古稀紀期頤瑞合八旬年浙西二老同黃閣壽算絲長福履延十五年六月以粵洋巨匪烏石二等殲擒淨盡上以誥自剿辦洋匪以來甚屬勤慎命開復降罰處分仍加軍功一級七月充上書房總師傅十六年三月充會試正考官子淇病故時原得一品廕生子誥次子淳承廕以示體卹十七年正月晉加太保十八年九月逆匪林清等就誅上以誥晝夜宣勞賞加二級十二月攻克滑縣賊匪飭部優加議敘十九年二月諭曰自上年九月逆匪林清勾結豫東教匪聚衆謀逆剿辦甫竣其時南山匪徒因陝甘兵將徵調遠出乘虛劫掠復飭凱撤官兵分路剿除見已一律肅清軍務全行報蒞軍機大臣贊襄樞務夙夜勤勞宜沛恩施以昭優獎董誥之子候選員外郎董淳著加恩以郎中用二十年十二月因病乞假尋以病未能痊懇請開缺諭曰董誥向有氣喘胸痛證前閒兩年每屆冬間或受風寒卽行舉發一交春令旋卽就痊見距封篆日期不遠此一月中並無要務董誥著在家調養毋庸開缺計至開春時天時融和病當仍愈再行銷假當差尋上以誥因病請假復念誥年逾七旬精神不能周到軍機事務繁多不能兼管刑部命改管兵部事務二十一年上恭謁東陵諭誥不必隨扈八月充順天鄉試正

考官二十二年正月命偕莊親王繇課等留京辦事六月復命管理刑部事務七月命管理行在刑部事務兼佩吏部印鑰二十三年二月因病劇乞休諭曰大學士董誥自乾隆年間仰蒙皇考高宗純皇帝簡用供職內廷嗣於嘉慶元年擢授大學士襄贊樞廷綜理部務宣力多年近歲以來屢以老病乞休朕降旨給假慰留令其安心調養茲復以氣體衰憊兩日昏花奏請開缺情詞懇切朕實不忍遽允所請但察其宿疾未痊若令勉強趨公轉非以示體恤董誥著加恩以太保大學士致仕在家支食全俸俾資頤養用示朕眷懷耆碩恩禮優加至意十月病益篤經留京辦事王大臣英和等奏聞特派御前侍衛載銓帶同御醫馳驛前往看視是月卒諭曰予告大學士董誥自其父邦達供職內廷渥承皇考高宗純皇帝知遇擢至禮部尙書嗣董誥通籍詞垣仰荷皇考眷注尤隆入直南書房供職書畫最勤且久洊登卿貳用爲軍機大臣以軍務兩經繪像賜贊褒嘉朕御極後晉擢綸扉仍襄樞務宣力垂四十年奉職恪勤且聞其邸寓清貧原籍並無田宅伊服官年久家無餘資亦足徵其持躬端謹前以老病乞休經朕再四慰留今春病體增劇方開缺准予致仕俾資頤養伊仍在京居住七月間朕詣盛京恭謁三陵

啟蹕時董誥尙力疾至朝陽門外送駕朕優加慰勞諭令善自調攝計回蹕時必仍於道旁迎鑾再加存問遽聞溘逝深爲悼惜業已賞陀羅經被著加恩晉贈太傅入祀賢良祠派定親王繇恩帶同侍衛十員卽日前往奠醑十六日朕親臨賜奠酒飯賞給廣儲司庫銀二千兩經理喪事其原任內降革處分悉予開復所有應得卹典仍著該部察例具奏董誥見祇董淳一子著於服闋後以四品京堂卽補以示朕篤念耆臣至意復御製詩曰世篤忠貞清節堅先皇恩眷倍寅虔騎箕仙苑九秋杪染翰樞廷四十年自有文章傳子姪絕無貨幣置莊田親臨邸第椒漿奠哀挽盡臣考澤宣並命戶部右侍郎姚文田傳諭其家刻詩墓次尋賜祭葬謚文恭誥自擢內閣學士後凡閱殿試朝考並御試翰詹及考試差卷皆與焉巡幸秋獮諸大典罔不扈蹕值京察俱獎諭有加嘉慶七年上諭曰董誥經皇考簡任多年克盡忠悃知無不言言無不盡蓋褒其實也誥進呈諸畫高宗純皇帝仁宗睿皇帝皆有題詠並收入石渠寶笈三編子淳候補四品京堂

朱珪

朱珪順天大興人乾隆十三年進士改庶吉士十六年散館授編修十七年大考

二等擢侍講二十二年充日講起居注官二十三年大考二等擢侍讀學士二十四年三月京察一等記名八月充河南鄉試副考官十月以平定回部奉命告祭南嶽衡山二十五年三月充會試同考官七月授福建糧驛道二十八年十月升福建按察使二十九年九月丁父憂三十二年二月服闋補湖北按察使時大兵征緬甸奏言滇省軍報由楚省南境經襄陽縣之漢江呂堰等驛出楚省北境臣逐站選驗夫馬度量遠近分設腰站十六處並查勘南北大江及小溪渡河共九道分設船隻於渡口晝夜輪候並飭各站較驗時刻明立賞罰俾緊件隨到隨遞得旨嘉獎三十三年三月調山西按察使三十四年二月升山西布政使七月奏保護城工事宜略言晉省土性不一宜修築者爲粘土黃土立土不宜修築者爲礧土沙土黑土又取水有遠近或近水有礧遠水無礧承辦不力不得辭咎查原辦官保固三十年立法至爲詳盡而各員多已易任接任之員以爲責有攸歸漫不經意漸致隕朽嗣後責令見任各員勤加葺護按季報明上司如有因循玩愒將原辦官及見任地方官一體參處分賠奏入下部議行三十六年十月命護理山西巡撫旋以入覲時上諭巡撫鄂寶居官如何奏對失實虛詞延譽傳旨申飭

十二月奏平陽府屬之霍州路當孔道政務衝繁直隸州吉州一缺所屬鄉寧一縣僻處山陬民淳事少請將吉州改爲散州與鄉寧縣並隸平陽府管轄又奏籌土默特當差官兵盤費並新開牧地米石請改准折色以便民除弊均得旨下部准行四十年五月命來京陛見尋授翰林院侍講學士充明紀綱目纂修官復充日講起居注官四十一年五月命在上書房行走侍今上皇帝學時初置文淵閣直閣事以珪充之四十三年三月充會試同考官四十四年二月充四庫全書館總閱五月命爲福建鄉試正考官四十五年京察一等記名八月授福建學政進五箴於今上皇帝其目曰養心曰敬身曰勤業曰虛己曰致誠四十七年九月升詹事府少詹事四十八年命稽察右翼覺羅事四十九年扈從南巡授內閣學士兼禮部侍郎命閱召試卷四月充殿試讀卷官十月充武會試總裁五十年三月升禮部右侍郎六月充江南鄉試正考官八月授浙江學政五十二年五月轉禮部左侍郎五十三年八月調吏部右侍郎五十四年十月命充經筵講官五十五年三月充會試副總裁七月授安徽巡撫五十七年二月以安徽民人程菊刀傷胞兄程紹章身死案律應擬斬立決聲請從輕諭曰此等不過刑書開脫故智最

爲外省陋習各督撫皆所不免但朱珪本係書生尤好爲此迂闊多活一人積陰德之見遇事從寬所謂婦寺之仁實屬非是朱珪著交部議處七月奏請修臨淮鄉土壩埂添建五孔石橋一座宣洩水勢奉旨派山西巡撫長麟由驛前赴鳳陽會同朱珪確加履勘尋查出橋工經知縣墊銀修竣前任巡撫何裕城批飭不准橋壩同時修辦故未經據實申報珪誤認尙未興工冒昧具奏自請交部治罪部議降一級調用得旨從寬留任五十八年十二月諭曰昨日安徽巡撫朱珪進御製說經文閱其後跋以朕說經之文刊千古相承之誤宣羣經未傳之蘊斷千秋未定之案開諸儒未解之惑頌皆過當但歷舉朕敬天法祖勤政愛民各大端見諸設施者與平日闡發經義實有符合語皆紀實並非泛爲諛詞朱珪於御製古文紬繹推闡能見其大跋語尤得體要殊屬可嘉著賞給筆墨等件以示獎勵五十九年四月諭曰朱珪進御製論史古文後跋以朕論史之紬繹推闡有用史成經紹六爲七之語朱珪跋語固非鋪張揚勵泛爲諛詞究屬稱頌過當觀其文義尙爲典覈著賞給紗扇筆墨等件以示獎勵此冊並著皇子皇孫各繕一部豫備觀覽五月調補廣東巡撫九月諭曰朱珪進御製紀實詩十二函內編排門類列

敘案語具見用心審密所撰進書表文摛詞比事亦屬典覈惟過於頌揚於朕兢業自持維日孜孜之意尙覺歉然觀其屬辭命義尙爲雅則茲賞給御筵扇一柄紗匹筆墨等件以獎其勵學十二月諭曰朱珪進呈御製幾餘詩一部朕略加披覽係繕錄御製詩章分門別類編輯成帙可謂用心細而措詞當該撫應辦地方要務甚多若專用心於筆墨之事恐致政務轉不免疏漏豈朕簡畀封圻之意除頒賞荷包筆墨鏤錠外著傳諭朱珪務須盡心政務以察吏安民爲重不可緩其所重用心於無用之地嗣後亦無庸再行纂辦進呈惟當悉心民事以期無負委任六十年二月上釋奠文廟禮成臨幸辟雍御製詩四章特命珪恭和進呈又以辦理盜案認真得旨交部議敘尋命兼署兩廣總督四月授都察院左都御史暫留巡撫任八月升兵部尙書仍留巡撫之任十二月奏英吉利入貢使臣有送總督禮物一分告以天朝大臣例不與外夷交接得旨嘉獎嘉慶元年恭值授受禮成珪撰進詩冊諭曰朕閱朱珪所進詩冊措詞冠冕得當其頌揚處不忘箴規尙得大臣之體且二十五有韻內難押者居多今百韻成篇不致牽強是其學問素優著賞給願繡蟒袍大小荷包以示優眷二月諭曰朱珪奏擊獲洋盜審明定擬

二案既引立斬梟示之例而於文昌縣拏獲之犯僅將陳阿養一犯先行立決其餘四犯及另案三犯皆擬斬決聽候部議以致往返稽遲朱珪近日督緝洋匪屢獲多犯朕方喜得人曾加獎勵何以此二案辦理拘泥又不脫書生習氣著傳旨申飭六月擢兩廣總督兼署廣東巡撫尋奉旨朱珪著來京另候簡用七月諭曰昨據和琳奏孫士毅在四川西陽州病逝將來大學士缺意欲卽以朱珪補授但此缺須一月後方始題請特先降旨諭知朱珪不必因有來京之旨心存疑慮見在京中並無應辦之事朱珪不必急於來京兩廣總督仍應朱珪署理朱珪在廣東巡撫任內辦理一切本爲熟悉今復奉有恩旨尤應感激奮勉倍加認真不可存五日京兆之見有負委任一切洋盜更應嚴辦大學士員缺除俟屆期明降諭旨外將此先行傳諭知之八月諭曰前因大學士缺出朱珪科分較深學問素優人亦端謹是以降旨令其來京原欲將伊補授大學士乃節據魁倫奏到粵東艇匪駛至閩浙洋面肆劫是朱珪於署總督任內不能認真緝捕咎實難辭本當治以應得之罪姑念其操守尙好前任安徽巡撫辦理尙無貽誤茲特加恩仍令補安徽巡撫十一月諭曰吉慶奏緝捕洋匪設立章程俱合機宜朱珪等從未見似

此之奏鈔寄閱看並將在粵時何以不照此章程之處明白回奏嗣奏言臣兼署總督辦洋盜粵閩夷匪同案同船者不少俱奏明正法前督臣長麟製米艇九十隻分作東西中三路配足兵械於冬令委員駕巡臣以米艇纜索桅篷日久不能堅固趕修驗明連幫出洋此臣辦理之大略也又臣於本年五月因調修出洋米艇曾捐銀五千兩茲請再捐養廉一萬五千兩解交廣東藩庫爲隨時修理之用報聞二年三月升兵部尙書八月調吏部尙書均仍留安徽巡撫之任三年諭曰本年京察屆期朱珪以尙書署理巡撫有年且學問尙優著交部議敘四年正月諭曰朱珪著來京供職珪行抵王莊卽馳奏曰竊臣於正月十一日接奉諭旨召臣還京見封面標用藍筆手掉心搖不知所措因未奉明文不敢冒昧謹將交印起程日期馳奏忍泣銜哀見星奔路十七日行抵王莊臣齋摺差官回跪閱諭旨詢實太上皇帝龍馭上昇膽裂呼天角崩投地欽惟大行太上皇帝十全功德五福考終傳器愜心於昭在上我皇上純性超倫報天罔極竊聞定躬行三年之喪此舉邁千古而行萬世至於郊壇宗社越紉行事禮有明文並行不悖然而以繼志述事爲大親政伊始遠聽近瞻默運乾綱滂施渙號陽剛之氣如日重光惻

但之仁無幽不泱刻刻以上天之心爲心祖考之志爲志思修身嚴誠欺之介於
觀人辨義利之防君心正而四維張朝廷清而九牧肅身先節儉崇獎清廉萬物
昭蘇天佑民歸自然盜賊不足平而財用不足阜也臣早蒙先帝特達之知擢遷
中外舊侍皇上承筆之側親切光輪十載睽離五中鬱勃聲隨淚涌忱豈言宣惟
願我皇上恆久不忘堯舜自任之心臣敢不隨時勉行義事君之道既至召見於
永思殿命直南書房管理戶部三庫事務賜大行皇帝遺服四團龍褂四開楔袍
一件奉旨在紫禁城騎馬賜第一區於西華門外加太子少保銜充實錄館正總
裁兼國史館副總裁三月命充經筵講官會試正總裁五月命教習庶吉士八月
命管理武英殿御書處事務以編修洪亮吉投遞書札語涉狂悖未卽呈出奉旨
詢查自請嚴議得旨朱珪平日人品端正從寬交部察議議上降三級調用奉旨
從寬留任十月調戶部尙書時屢奉諭旨清釐漕政嚴禁浮收等弊外省俱以旗
丁運費不敷需索州縣州縣不得不取諸民於是江督有上江加增贈銀下江加
增耗米之請事下部議珪以小民未見清漕之益先受加賦之害力議主駁上是
之十二月命爲上書房總師傅五年三月議駁長蘆鹽政奏請加增鹽價閏四月

議駁廣東藩司奏請將濱海沙坦地畝照上中二則民田一律升賦均奉旨依議
五月尙書彭元瑞下直墜馬珪與同行徑命人昇輿入西華門乘坐而出經御史
周枋奏參奉旨交部議處是月署兵部尙書八月兼署吏部尙書九月諭曰順天
鄉試尙書朱珪之孫朱涂入場應考未經中式朱珪前在上書房行走曾授朕詩
文且敷歷有年恪共厥職見在伊孫祇朱涂一人其試卷文理亦尙無大疵著加
恩賞給舉人一體會試朱珪當益勤課訓俾伊孫力學上進以副朕恩施造就至
意是月失察轎夫與門兵爭毆奉旨交部嚴加議處議上諭曰朕惟敬勝者自古
訓昭然朕寅承大寶於天人交感之際朝乾夕惕以主敬爲本卽接待臣工猶時
存敬大臣之念況人臣奉上恪恭佐理尤當各循止敬之道不可稍有疏忽年來
屢降諭旨整飭朝儀申嚴門禁初非欲過示尊崇實以堂廉之分本自秩然近年
過於忽畧幾不知君臣之辨若不判以等威何以爲萬世子孫臣民法守朱珪前
在上書房行走小心恭謹於在書房之皇子皇孫無一不出於敬上年內召來京
朕疊施優眷朱珪亦深以謙抑自持惟本年夏閒因彭元瑞在禁城內墜馬跌傷
將彭元瑞所乘之轎喚入西華門昇出彼時朱珪見彭元瑞墜馬昏迷難以扶掖

又因其驕祇數武遽行喚入雖一時倉卒不暇詳思殊不知咫尺禁門不容稍越究難辭疎忽之咎旋經御史周栻劾奏其言甚正是以將朱珪交部議處今朱珪復有驕夫在西闕門禁地酗酒爭毆截打護軍擻斷槍杆之案卽由伊驕夫滋事而西闕門禁地僅距西華門咫尺可見平日恪謹如朱珪者造次之際稍不自檢不數月閒遂有此事未必非默倣其疎忽轉爲朱珪之福此據感應之理而言非徒神道設教之謂大小臣工可不共知懍惕收斂身心斯須不忘恭敬乎部議將朱珪降二級調用本屬咎所應得惟念朱珪平日爲人謹飭此案祇因約束不嚴致罪吏議其驕夫向銀庫廚役折給飯銀亦屬失於查察朱珪著革去太子少保不必管理三庫事務仍加恩改爲降三級從寬留任尋以部議粵東省歷任督撫司道捐廉成造米艇巡緝洋匪得力遵旨分別議敘查得珪任兩廣總督時捐銀二萬兩以上准加三級奏上奉旨朱珪著加三級留任六年四月充會典館副總裁十一月賜元狐端罩七年充殿試讀卷官八月奉旨以戶部尙書協辦大學士仍加太子少保銜八年二月上謁陵命留京辦事六月兼翰林院掌院學士並以原銜充日講起居注官七月上幸避暑山莊復命留京辦事九年正月晉太子少

傅二月上幸翰林院聯句賜宴御書天祿儲才額賜珪並摹刻懸院中七月暫攝
管理國子監事務十月命進所刊知足齋詩集二十卷十年正月授體仁閣大學
士管理工部事務上以是命也實遵高宗純皇帝諭命叩謁裕陵謝恩並賜題知
足齋集四首詩曰丙歲承恩手敕傳待時考澤敬敷宣科名翰苑推元老學業綸
扉倚大賢定卜示慈千載久執經蒙訓十年先調羹贊化資師相一德臨民體昊
乾三天受業邁恆榮廊廟班聯冠六卿黃閣新春開黼座絳帷昔日共書城德崇
益勉虛能受任重彌思寵若驚名選金甌早簡在亮工熙績總無營新築沙隄董
庶官七旬碩彥願加餐惟公常勗爲君要顧我深知莅政難無欲神全三壽永有
容德大九霄寬蒼生竚待施霖雨啟沃推誠求治安健筆千章涅不緇雄詞夙荷
聖人知日新三德新宣室時進五箴舊講帷學杜師韓言有物說經詠史論無私
精研六義諧風雅游夏誠難贊一辭旋充國史館會典館正總裁三月充會試正
總裁旋以奉命帶管二阿哥師傅不應具摺謝恩退出上書房行走十一年七月
上幸避暑山莊奉旨留京辦事九月賜玉鳩杖並頒御製詩云憶昔丙申年三天
從函丈身心受益多識見資開廣舊承講論功今賴絲綸掌鶴髮望飄蕭丰神倍

清爽始近下壽旬康強久培養健步固未妨視履應策杖入朝領班聯佳話羣欣
仰廊廟多老臣啟沃善日長碩彥冠瀛洲純嘏期頤享旋奉旨以天氣漸寒朱珪
俟日出後入直遇臨幸離宮不必復來卽御門句到奏事日期俱不必侍班閒二
三日入直書房候召對十一月上在乾清宮將御座珪忽病眩暈不省人事御前
大臣恐其失儀命太監等扶出太監等卽用木凳自月華門昇出上遣醫官診視
旋經領侍衛內大臣奏參交部嚴議部議革職奉恩旨念其衰病趨直一時昏迷
從寬畱任並賞假兩月調養十二月初五日卒奉上諭大學士朱珪持躬正直砥
節清廉經術淹通器宇醇厚受皇考高宗純皇帝特達之知由詞垣補授道員洊
歷兩司內用爲侍講學士特命入直上書房朕講貫詩文深得其益嗣以卿貳出
任封圻有守有爲賢聲益懋迨擢至正卿皇考卽欲用爲大學士朕親政後召令
還朝在上書房侍直有年簡任綸扉深資啟沃凡所陳奏均得大體服官五十餘
年依然寒素家庭敦睦動循矩法不愧爲端人正士倚畀方殷本年入秋以來因
患病稍久氣體就衰朕優加眷念賜杖賜輿時加存問朱珪感戀彌殷時時力疾
進內朕鑒其誠悃特行給假兩月俾得安心調養屢遣御醫診視冀得就痊正擬

日內親至伊邸宅視疾茲遽聞溘逝深爲悼惜朕於初六日親臨賜奠先派總管內務府大臣阿明阿齋賜陀羅經被並著慶郡王永璘帶領侍衛十員前往奠醑追維舊學良用軫懷著晉贈太傅入祀賢良祠賞給內庫銀二千五百兩經理喪事其任內一切降革處分悉予開復所有應得卹典著該部察例具奏次日聖駕親臨哭奠既旋宮復諭曰昨因大學士朱珪溘逝業經降旨加恩因思乾隆年間惟故大學士劉統勳蒙皇考高宗純皇帝鑒其品節賜諡文正易名之典備極優隆顧劉統勳於總督任內曾經獲咎褫職復蒙皇考施恩錄用至朱珪在朝六十餘年外而敷歷督撫內而洊直綸扉身躋崇階從未稍蹈愆尤絕無瑕玷靖恭正直歷久不渝猶憶伊官翰林皇考簡爲朕師傅爾時朕於經書已皆竟業而史鑑事蹟均資講貫其所陳說無非三代唐虞之言不特非法弗道卽稍涉時趨之論亦從不出諸口啟沃良多揆諸諡法實足以當正字而無愧毋庸內閣擬請著卽賜諡文正本日朕親臨奠醑見其門庭卑隘清寒之況不異儒素矐念遺風愴懷未已著於本月初九日由內務府備辦飯卓派二阿哥前往代朕賜奠俟殯送時派慶郡王永璘前往祖奠日送以示朕眷懷舊學哀榮備至之至意並御製詩十

二韻曰丙歲從函丈相依三十年清風常晉接正誨日敷宣先帝褒忠直百僚仰
俊賢贊襄期永弼啟沃願長延抱疾猶趨侍養疴冀速痊忽驚千古別難遣寸衷
悃攀馭朱邱表騎箕絳闕邊棄予辭禁苑隨聖麗霄躔德化銘心久良猷篤志堅
半生惟獨宿一世不貪錢述實五言挽抒悲三爵連臨喪虛設醴痛結淚傾泉命
南書房翰林黃鉞敬錄於初九日往靈前焚之先是珪病亟時作芻獻詩二首歿
後上召對諸大臣詢珪臨終有何遺言諸臣以芻獻詩對上卽命以手書草藁呈
覽並詢年例應貢冊葉向有跋語令進呈賜祭葬十二年三月諭曰朕展謁西陵
道經畿甸原任大學士朱珪之墓距蹕路數里追維哲輔逝已三月瞻眺松阡中
心愴惻著派侍郎英和於本月初五日前往賜奠以達朕懷御製詩曰碩彥嗟頽
壤臨風歎奈何經邦言總正論道益誠多代奠心隨往躬行禮實過雲煙結神想
西嶺望嵯峨是月高宗純皇帝實錄告成諭曰前大學士朱珪在館八年懋著勤
慎著加恩賜祭一壇伊長子朱錫經原任戶部郎中俟服闋後以四品京堂用二
十年二月諭曰明春朕恭謁西陵回鑾時蹕路總由北惠濟廟拈香因懷故大學
士朱珪墳塋在該處附近面諭那彥成查明如距御道五里以內卽親往茲據那

彥成覆奏在御道四里以內屆期朕由黃新莊至北惠濟廟紆道親行賜奠用達眷懷舊學之意二十一年三月二十一日上臨珪墳園賜奠御製誌感詩曰講帷昔年共五箴誨早垂入閣贊機務輔治惠澤施方期久論道豈料身騎箕永別倏十載路便親酌危荒村不封樹儉德後代遺灑淚乘騶去回望縈悲思篤念舊學光及泉壤恩遇之隆古所未有也子錫經洊官太僕寺少卿十五年卒孫涂江蘇候補道

紀昀

紀昀直隸獻縣人乾隆十二年第一名舉人十九年成進士改庶吉士二十二年散館授編修洊擢詹事府左春坊左庶子充日講起居注官昀官編修於二十六年京察一等以道府記名三十三年二月補貴州都勻府知府上以昀學問優外任不能盡長命加四品銜留庶子任四月擢翰林院侍讀學士六月前兩淮鹽運使盧見曾獲罪有旨籍其家昀與盧爲姻漏言於見曾孫蔭恩革職逮問戍烏魯木齊三十五年釋還三十六年上幸熱河十月昀迎鑾密雲御試土爾扈特全部歸順詩立成五言三十六韻以進得旨優獎復授編修三十八年二月命儒臣校

覈明代永樂大典詔求天下遺書開四庫全書館選翰林院官專司纂輯大學士劉統勳以昫名薦充纂修官後又奏全書浩博應斟酌綜覈以免挂漏參差舉昫及提調官郎中陸錫熊爲總辦搜輯大典中逸篇墜簡及海內祕笈萬餘部釐其應刊應鈔應存者依經史子集部分類聚撮其大凡列成總目爲提要二百卷上之諭曰四庫全書處將大典內檢出各書陸續進呈朕詳加披閱閒予題評見其考訂分排具有條理而撰述提要粲然可觀則成於紀昫陸錫熊之手昫學問本優校書亦極勤勉甚屬可嘉著加恩授爲翰林院侍讀以示獎勵十一月補侍讀三十九年七月上以總目提要卷帙繁命紀昫輯簡明書目一編上求遺書凡中外所獻擇其珍本製詩弁於首昫進書部凡百御題所進孫覺春秋經解有邵張珍弄今歸紀汲古深心有足多之句十月以子汝傳詰逋負聖議降詔改降三級留任故事降留官遇升缺不予開列四十年吏部請除翰林院侍讀學士無昫名上以昫於四庫全書盡心衷輯命一體列名四十一年正月擢侍讀學士充文淵閣直閣事九月復充日講起居注官四十二年館臣校書錯誤應議昫以特旨免四十四年三月擢詹事府詹事四月擢內閣學士兼禮部侍郎四十六年提要

成進御上嘉其詳覈命優敘四十七年擢兵部侍郎四十八年轉左侍郎四十九年上南巡行在發御製濟水考寄昫命據各說經家及輿地家詳考之五十年正月擢都察院左都御史四月員外郎海昇毆斃妻吳雅氏詭言自縊死事覺命昫鞫其獄覆檢不實部臣議鐫職詔改革職留任五十二年遷禮部尙書充經筵講官五十四年賜紫禁城騎馬五十六年再調左都御史五十七年畿輔歲歉饑民多就食京師昫奏言直隸河間等府二麥歉收命截漕五十萬石備賑而領賑百姓有極貧次貧之不同次貧之戶可以支持待賑不甯輕去其鄉至極貧之戶一聞米貴不能不就食他方近京之處多先赴京城傭工餬口恐聚集日多未必能人人得所又業已扶老挈幼拮据得至勢難卽返就糧是此項流戶以極貧之故離其鄉井轉不能同沐皇仁似爲可憫定例每年自十月初一日起至次年三月二十日止五城原設粥廠十處每日領官米十石由坊官煮粥外來流戶原可同霑但自夏至冬爲期尙遠恐貧民迫不及待且人數較多米數亦未必能敷伏思偏災不過四府賑米有餘請於原額五十萬石內酌撥京城數千石自六月中旬爲始每廠煮米三石至十月初一日後則於原額十石之外加煮米二石仍均以

三月二十日爲止其米先於京倉支用將來於截漕數內撥還庶貧民就食者得以在京存留不致閒關遠去明春易於還鄉不誤耕作卽各處聞有此信來者較多伊等本係應賑之人此閒多一人領粥則本地少一人領米計人數米數仍屬相當亦不慮本處給散之不足如此一轉移閒所需賑米仍在截漕原額之內而貧民在鄉在外皆得均霑於賑務更爲周到疏聞下廷臣議從之八月復遷禮部尙書仍署左都御史十二月奏考試春秋向用胡安國傳而胡傳一書中多有經無傳出題之處不過數十卽如本年鄉試竟有一題而五省同出者其三四省相同不一而足士子不讀全經不知本事但記數十破題便敷入試之用且胡安國當宋南渡時不附和議作是書以諷高宗而斥秦檜其人品正而借經立說與孔子意不相比附恭讀聖祖仁皇帝欽定春秋傳說彙纂駁胡傳者數十百條皇上御製之文亦多駁其說而科場所用以重複相同之題習偏謬失當之論殊覺無謂請嗣後春秋題俱以左傳本事爲文參用公羊穀梁之說在三傳親承聖教旣較千年後儒學家之論爲得其真而士不讀左傳不能成文亦足以勸經學而裨文風疏入得旨允行六十年與千叟宴嘉慶元年六月調兵部尙書十一月復調

左都御史二年遷禮部尙書四年充高宗純皇帝實錄館副總裁七年昀年八十八生日命署上駟院卿賞賚珍幣至昀家賜之六月署兵部尙書七月上孝淑皇后奉安事宜陳奏失詞部臣議鐫職詔改革職畱任又以咨送議處司員祇宋其沅一人爲御史鄭敏行所劾部臣如前議詔改降三級畱任其後孝淑皇后奉安禮成命再予量減有差十月奏定例凡婦女強姦不從因而被殺者皆准旌表其猝遭強暴細縛受污不屈見戕者則例無旌表伏思此等婦女舍生取義其志本同徒以或孱弱而遭獲悍或孤身而遇多人此其勢之不敌非其節之不固卒能捍刃捐生與抗節被殺者無異譬如忠臣烈士誓不從賊而紮縛把持強使跪拜可謂屈膝賊庭者乎請敕交大學士九卿科道公議與未被污者略示區別量予旌表尋議如兇手在兩人以上者顯係孱弱難支與強姦被殺者一體予旌令各督撫勘明奏請上裁報可是月昀有疾命軍機章京富綏率醫官王詔恩視之十年正月以禮部尙書協辦大學士加太子太保管國子監事二月卒諡曰紀昀學問淹通辦理四庫全書始終其事十有餘年甚爲出力由翰林洊歷正卿服官五十餘載甫經擢襄綸閣遽聞溘逝深爲軫卹加恩賞陀羅經被著散秩大臣德通帶

侍衛十員前往祭奠並賞廣儲司庫銀五百兩經理喪事其任內降革處分悉予開復應得卹典該衙門察例具奏尋議賜祭葬如例予諡文達昫官庶吉士時應制圓明園及扈蹕熱河行圍皆與賡和天章泊纂輯四庫全書賞賚同內廷翰林又以侍讀特召入重華宮賦詩與宴後乃歲以爲常其兼文淵閣直閣事自侍讀學士至尙書皆如故所纂輯如熱河志歷代職官表河源紀略八旗通志暨方略會典三通諸館咸總其事子汝傳江西九江府通判嘉慶十二年高宗純皇帝實錄告成敍昫功恩賞汝傳同知後補江南江甯府同知汝似分發廣東縣丞孫樹馨一品廕生官刑部雲南司郎中見任宜昌府知府

劉權之

劉權之湖南長沙人乾隆二十五年進士改庶吉士二十六年散館授編修二十七年充順天鄉試同考官三十二年丁父憂三十五年服闋三十六年充貴州鄉試正考官三十七年三月充會試同考官五月擢左春坊左中允十二月遷司經局洗馬三十九年充江南鄉試副考官四十二年提督安徽學政四十三年丁母憂四十六年服闋四十七年四庫全書總目提要告成議敍以侍講借補四十九

年五月補翰林院侍講九月轉右春坊右庶子五十年大考二等五十一年正月擢大理寺少卿二月遷大理寺卿五月遷都察院左副都御史五十二年三月奏大挑各直省舉人上屆派出之王大臣係於十日之前豫行奏派爲日既久恐外間有借名指騙等事請令承辦衙門於前一日奏派並令王大臣等聞命後卽至朝房住宿不得攜帶多人以杜弊竇諭曰大挑舉人原爲疏通寒峻俾得及時自效必當秉公揀選以杜夤緣撞騙情弊其如何定立章程嚴防弊竇之處著軍機大臣會同該部議奏尋奏將大挑各直省舉人之王大臣於前一日奏派惟朝房在午門之外官員人等出入必經不能概行禁止轉恐滋弊請照驗看月選官例奏派滿漢御史各二員監視稽察並令步軍統領衙門會同五城御史一體嚴密訪查從之復諭曰此次大挑舉人著在午門內挑選並添派護軍統領一員稽察所有派出之王大臣俱著在內閣住宿以昭嚴肅五月提督山東學政五十六年擢禮部右侍郎五十七年轉左侍郎五十八年充殿試讀卷官六十年六月充江南鄉試正考官八月提督江蘇學政嘉慶三年二月調吏部左侍郎仍留學政任九月還京四年正月遷都察院左都御史三月充會試副考官八月奏採買倉穀

地方官奉行不實往往藉端肥橐各情諭曰據劉權之奏買補倉穀宜赴鄰邑採辦以免派累一摺所奏自屬可行採買倉穀向來原有定例今據奏地方官輒在本地派買不論市價貴賤祇發銀四五錢不等並勒令出具照市價領票兼之差役需索使費以致領票花戶皆不願上納穀石惟求繳還原封銀另外加倍交價較交穀尤爲省事甚至有力富戶賄囑書吏將本名下之穀飛灑零星有田之戶富戶轉得少領竟至善良之貧民衣食難周深受採買之累地方官祇圖折價入己遇當平糶之年仍無存貯之米一旦協濟鄰省則著米鋪倉猝購辦照時價尤有剋扣及起運收米押運之家人胥役又向鋪戶百端勒措等語種種弊端實所不免特此通諭各督撫嗣後遇應買補倉穀年分務飭令所屬在豐稔鄰縣按照市價公平採辦不許向本地派買並將向來胥吏等串通舞弊積習嚴行查禁隨案重懲以期倉穀皆歸實貯小民不致擾累至社倉原係本地殷實之戶好義捐輸以備借給貧民之用近來官爲經理大半借端挪移日久並不歸款設有存餘管理之首士與胥吏亦得從中盜賣儻遇歉歲顆粒全無以致殷實之戶不樂捐輸老成之首士不願承辦是向來良法徒爲官吏侵肥自應一律查禁並著各該

督撫等將各省社倉仍聽本地殷實富戶擇其謹厚者自行辦理不必官吏經手以杜弊端而裕民食各該督撫務須董飭所屬實力奉行如有前項弊端卽行據實參奏儻仍視爲具文復蹈前轍一經訪聞或被科道參奏必將該督撫重治其罪將此通諭知之尋以編修洪亮吉投遞書札語涉狂悖未卽呈奏降旨查詢權之自請嚴議上以權之人品端正節次陳奏之事尙能切實著加恩改爲議處旋議降三級調用上從寬改爲留任十月轉吏部尙書賜紫禁城騎馬五年八月充順天鄉試正考官九月以前在江蘇學政任內保薦知縣黎誕登失實自請嚴議諭曰黎誕登於劉權之保奏後朕降旨詢問費淳等該員平日居官聲名如何該督撫亦經保奏並請升署太倉州知州至黎誕登在任虛博聲名自敘實政令紳衿等具呈勒石等事該督撫近在省城尙未深知況劉權之係在學政任內接見數次其官聲得自傳聞焉能究悉底裏若因其採訪未確卽加以嚴議恐將來大臣等心存顧慮不卽舉薦人才但竟置之不議又恐開濫保之端劉權之著加恩改爲議處旋議降調命留任六年充會典館副總裁七年四月派閱庶吉士散館卷六月命在軍機大臣上行走賜宴海淀十二月三省剿捕逆匪大功戡定上以

權之素日陳奏時有所見敕部議敘八年三月派閱大考翰詹卷六月充國史館副總裁七月三省餘匪剿捕淨盡復交部議敘九月管理戶部三庫事務九年二月京察諭曰尙書劉權之在軍機處行走小心勤慎著交部議敘六月調兵部尙書十月調禮部尙書協辦大學士加太子少保銜六月因保奏軍機章京瞻徇情面欲將中書袁煦列入經戶部侍郎英和劾之命廷臣嚴議尋議革職諭曰此次軍機處保奏章京袁煦係於挑入後奏補實缺業經邀恩劉權之卽欲將伊保奏亦當向慶桂等會同商酌乃輒以袁煦係房師紀昀之壻紀昀在日曾經託過爲詞師生誼屬私情部院大臣僉同辦理公事本不應心存私見何況揚言於衆罔顧公議劉權之屢次瞻徇情面實屬溺職本應照議革職第念劉權之在各部院供職有年資格較深且在軍機處行走業已三載尙無錯誤著加恩降爲編修仍帶革職留任遇有國史等館纂修缺出令其充補十二月諭曰劉權之於保奏軍機司員一事並未舉行祇係空言念伊科分較深本日御門所出翰林院侍讀員缺加恩著劉權之補授尋遷侍講學士十一年三月遷光祿寺卿四月命充國史館總纂官五月命偕侍郎瑚素通阿往勘通州官剝船隻虧損數目並嚴禁封雇

民船之弊會正定縣生員王之選以知縣盛安徇縱吏役包攬車輛折收草料等情赴京具控仍諭權之偕瑚素通阿往按之鞠實官吏依律擬罪有差六月擢內閣學士兼禮部侍郎九月遷都察院左都御史十二年正月轉兵部尚書十月仍賜紫禁城騎馬十四年巡視濟甯漕船御史英綸受贓伏法權之以濫保英綸干議因無級可降部臣請革任上加恩寬免十五年正月擢協辦大學士五月再充會典館副總裁七月上行秋獮禮命偕儀親王永璇尚書明亮勒保留京辦事八月充順天鄉試正考官十六年正月充國史館副總裁上幸五臺派留京辦事王大臣權之復與焉四月充殿試讀卷官五月授體仁閣大學士管理工部事務充國史館會典館正總裁六月復加太子少保銜十七年二月派閱大考翰詹卷五月管理戶部三庫事務十八年二月京察上以權之襄贊綸扉夙夜匪懈交部議敘九月權之患目疾賞假調理並賜醫診視旋以亂民林清滋事諭曰大學士劉權之年老多病著以原品休致給予半俸二十三年七月卒於家諭曰休致大學士劉權之於乾隆年間通籍詞垣歷升卿貳經朕用至協辦大學士緣事降調復經洊擢卿貳簡任綸扉管理部務嗣因老病休致回籍賞給半俸俾資頤養茲聞

溘逝殊爲軫念著加恩照大學士例給予卹典該部察例具奏所有任內一切處分悉予開復尋賜祭葬諡文恪子若璫廕增生貴州直隸州知州若珪見任工部員外郎

費淳

費淳浙江錢塘人乾隆二十八年進士分發刑部學習三十二年補主事三十四年升員外郎旋升郎中在軍機章京上行走八月充順天鄉試同考官三十六年京察一等記名外用七月補江蘇常州府知府三十八年丁父憂四十一年服闋補山西太原府知府旋經巡撫巴延三以費淳初到晉省人地生疎奏請調蒲州府四十三年復調太原府四十四年擢冀甯道四十六年四月升山西按察使四十七年升雲南布政使四十九年以母老奏請開缺歸養五十二年丁母憂五十四年服闋仍補雲南布政使六十年四月升安徽巡撫五月調江蘇巡撫嘉慶二年奏准徐所屬及揚州府屬之高郵等州縣窪地見屆隄工合龍之後水勢已定應委員逐一履勘除水勢稍平尙堪種麥者毋庸置議外如實係極窪爲水所占卽責成該管州縣勸諭農民改種蘆葦以收地利其納錢糧卽照葦課改則徵輸

得旨下部議行七月調福建巡撫尋偕總督魁倫奏海濱巖疆民俗素稱慄悍所設地方文武巡緝防守必須控制得宜聲勢連絡方足以資整飭至水師營務亦宜隨時籌辦請以建寧府同知改駐福州府屬福清縣之平潭裁撤平潭縣丞移駐南日澳漳州府南勝同知移駐漳浦縣之雲霄盤陀巡檢一員改爲同知衙門照磨兼司獄事務海澄縣丞改爲平和縣丞分駐南勝雲霄縣丞移駐車田之象牙莊延平協右營都司移駐泉州府屬南安之洪瀨鄉酌撥邵武左營千總一員陸路提標後營外委一員汀州鎮標右營外委一員並於陸路提標各營內抽撥兵丁三百名統歸都司管轄再閩省水師提標各營戰船舵工水手僅在各營所管汛地洋面往來巡哨若至隔轄洋汛卽不能熟悉海道沙線近時巡捕出洋均係另雇商船緣該船舵工水手熟悉洋面管駕得法今各營戰船旣照商船造辦所配舵工自應另募商船熟悉各洋之人以利巡緝而商船所用舵工雇價較厚應請每船舵工除前定本身名糧炊糧外再加給守兵糧餉二分如果追捕有功並卽量與超拔用昭鼓勵均奉旨下部議行九月仍調江蘇巡撫三年因奏請暫留丁憂之知府李逢春幫辦淮徐等屬放賑減則諸務上以所奏非是交部議處

降二級留任四年二月授兩江總督以兩淮鹽政徵瑞係兒女媼親奏明請旨奉諭總督雖有監察鹽務之責但費淳居官公正朕所深信徵瑞著不必回避六月上聞江蘇有訐告常州府胡觀瀾一事諭令查奏尋奏胡觀瀾與江陰縣知縣楊世綬勒派縣民出資修寺擾累閭閻請旨革職永不敘用諭曰費淳於胡觀瀾派累之事豈無聞見乃直待朕指出情節詢問始行補參本有應得之咎姑念其平日操守廉潔聲名尙好此事一經傳詢卽行徹底查明參奏並不徇隱尙屬可寬費淳著免其交部議處七月參奏江甯鹽巡道彭翼蒙奢侈糜費上命革翼蒙職尋以審訊革令甄廷輔擅責生員一案不將案內緊要情節及同知李焜肆意濫刑巡撫宜興學政平恕辦理失當之處據實參奏上以其瞻徇同官情而嚴飭之並交部議處議降二級調用得旨從寬改爲降三級留任十一月奏徐州府屬食城河一道坐落銅山豐沛三縣境內上承豐境各路之水歸入微山等湖係宣洩要津河道淤塞應請借項挑疏以利農田得旨允行五年正月偕漕臣鐵保奏就漕糧項下量爲調劑以濟疲丁查原徵隨漕項下應給州縣耗米錢文尙有款項可以撥出在有漕州縣分支無幾亦無大損而聚少成多頗於運丁有裨又有旗

丁應領本色行月米石一項擬令州縣照定價改給折色並旗丁應領運費責令糧道親身放給免層層剝削丁力庶臻寬裕得旨允行七月偕河臣吳璥奏請將蕭南通判一缺改設同知邳北同知一缺改爲通判得旨允行九月因秋汛安瀾上嘉其保護安穩賞戴花翎並交部從優議敘十一月因邵工合龍河歸故道恩賞太子少保銜並紓倫馬褂大小荷包六年三月因跌傷左足醫治未愈奏懇回籍調理上允之仍諭毋庸開缺旋覆奏左足見已消腫步履漸可照常若因奉恩旨卽解任回籍轉似涉於欺蒙見已咨明起復不交卸以免展轉遞署之繁上以淳並不拘泥遵旨解任回籍能以地方公事爲重深得大臣之體仍賞給內府丹丸俾資調治五月奏請將徐州府屬簡缺之碭山縣改爲繁缺在外揀選調補下部議行九月奏川楚教匪指日蕩平邊界甯謐所有壽春鎮標駐防固始縣二道河及六安州防禦英山縣金家寨之官兵請撤回歸伍以重差操上是之七年五月因上年徵收漕糧辦理不善及旗丁藉端需索上以費淳係統轄大員漫無覺察交部議處降一級留任十月偕吳璥奏報秋汛安瀾得旨交部議敘因碭汛唐家灣民堰漫塌奉諭申飭並將前次議敘撤銷尋奏引河堵閉報聞十二月偕吳

璫奏請將淮徐道所管之桃南北二廳淮安府所屬之桃源縣海州暨所屬之沭陽贛榆二縣改歸淮揚道管轄淮揚道所管之江防揚糧廳改歸常鎮道管轄宿虹南岸應添設通判一員其宿虹同知改爲宿北同知另設宿南通判一員豐碭南北兩岸添設縣丞千總各一員蕭南廳之天然閘應改銅沛廳就近管理均得旨下部議行是月因宿州匪徒王潮名等糾衆戕官費淳飛咨鎮將等帶兵剿捕並親赴督辦旋即撲滅八年二月吏部將文職三品以上大員從前所得降革處分摘取案由開單具奏奉旨總督費淳降級留任六案著加恩開復六月請於宿州之南平集地方設立撫民同知將事務較簡之甯國府總捕同知裁汰移設南平集鳳陽府司獄改爲撫民同知照磨兼管獄務歸於府經歷兼管並應酌立營汛移撥弁兵以資巡緝擬於徽州城守營內酌撥千總一員馬步守兵一百四十名歸壽春左營都司管轄以四十名添駐宿州以一百名隨撥調千總駐劄新設南平集地方得旨允行是月授兵部尙書旋因會題大功全竣之本鈔錄諭旨於應行敬謹擡寫之處書寫錯誤降一級留任時河南衡家樓地方黃水漫溢山東張秋迤南黃水橫穿大溜直達鹽河入海有妨漕運上命費淳赴山東查勘河道

并督辦要工尋奏張秋西岸舊有裏頭應幫鑲寬大東岸舊有長隄應加高培厚以防溜勢北掣南口則趁汝水北注之勢引歸河身北口則自大溜迤北分導餘流以資挽運其淤沙淺阻之處應做河南刷沙之法製混江龍鐵筴船及一切挑淤等具至張秋之北岸隄經水汕於縉道有礙者水退後分段培築報聞九年二月偕巡撫鐵保奏南糧首幫於正月二十四日俱已挽過張秋駛行極爲妥速上嘉之賞給珊瑚扣帶黃辮大小荷包仍交部議敘六月調吏部尙書九月賜紫禁城騎馬十年四月充殿試讀卷官六月授協辦大學士十一年五月充國史館總裁官八月命偕尙書長麟審辦直隸藩司書吏王麗南等私雕假印侵冒錢糧案研鞫得實懲治如律十月命稽查欽奉上諭事件處十二月充經筵講官十二年正月授體仁閣大學士管理工部事務二月京察屆期諭曰大學士費淳平日辦理部務均屬勤慎著交部議敘八月兼國子監事務十三年管理戶部三庫事務十四年二月因失察三庫兵丁偷竊銀兩奉旨嚴加議處尋議以降三級調用上以費淳究係兼管加恩改爲革職留任三月充己巳恩科會試正考官五月上以本年五旬萬壽臣工等祝嘏臚歡內外一二品文武大臣降革留任之案交軍機

大臣查奏得旨費淳著開復山西臬司任內秋審失出降四級留任及在兩江總督任內失察屬員勒派同官革職留任二案十二月因失察工部書吏王書常等私雕假印捏款冒領戶部三庫銀兩物件事覺奉旨交部嚴加議處尋諭曰費淳前因管理三庫時係兼管工部有失察冒領之案業經交部嚴議茲又於本年書吏冒領三庫銀兩失察至五次之多咎無可辭著先拔去花翎不必兼管工部事務再行交部嚴加議處部議革任奉旨革去宮銜降爲侍郎卽命署兵部右侍郎仍兼國子監事務改充國史館副總裁官十五年正月補兵部右侍郎五月授工部尙書十六年三月卒諭曰工部尙書費淳持躬端謹辦事老成中外宣猷勤勞匪懈前經擢任大學士贊理綸扉嗣因失察書吏王書常等舞弊之案降爲侍郎費淳感激朕恩倍殷報效復經升任尙書方資倚畀茲聞染病遽爾溘逝深爲軫惜著加恩賞還大學士照尙書例賜卹所有任內一切降罰處分悉予開復又諭曰本日披覽原任大學士費淳遺摺知伊子費履升見係工部主事費淳宣力有年殊堪軫念伊子費履升俟服闋加恩以員外郎補用尋賜祭葬予諡文恪子履升舉人二品廕生見任刑部員外郎

戴衢亨

戴衢亨江西大庾人父第元由編修官太僕寺少卿乾隆四十一年上巡幸天津衢亨以舉人應召試欽取一等授內閣中書四十二年任軍機章京上行走四十四年以一甲一名進士授修撰四十四年充湖北鄉試正考官四十六年六月承辦熱河志告竣交部議敘十月仍命在軍機章京上行走四十七年秋彌扈蹕於阿濟格糾圍場獲麕以獻上賜詩曰圍合山原飛走充儒臣扈蹕詠車攻拈毫倚馬本多秀入帳執禽乃獨雄獵騎訝看非等類文班喜語共和融狀元端是讓前輩大鹿小麕獲則同並命和韻四十八年充江南鄉試副考官四十九年提督山西學政五十年奏山西朔平府屬右玉縣文風平常學額向係取進十五名爲數過寬未免人思僥倖代州所屬五臺縣文風素優屢蒙翠華臨莅多士踴躍觀光較前更甚而舊額止有十二名請將右玉縣學額裁汰三名撥入五臺縣學其武童額數照文童一體裁撥下部議行旋受代回京五十二年以山西學政任內失察武生裴泰祥戕斃多命部議降二級調用上從寬改爲革職留任五十三年二月剿辦臺灣亂民軍功告蒞大學士阿桂等奏修撰戴衢亨在軍機處行走有年

素爲勤慎此次剿辦臺灣亂民查檢檔案交發文報俱能奮勉出力請將革職留任之案開復得旨允行五月命督學湖北衛亨以親老患病無次子侍奉請留京供職上允之十二月丁母憂五十六年服闋五十七年充湖南鄉試正考官尋提督廣東學政五十八年擢右中允五十九年遷翰林院侍讀六十年擢右庶子回京供職充日講起居注官遷侍講學士嘉慶元年轉侍讀學士二年閏六月恩賞三品卿銜隨同軍機大臣學習行走九月遷少詹事三年正月擢內閣學士兼禮部侍郎二月命閱考試翰詹各員卷尋授禮部右侍郎七月調戶部右侍郎管理錢法堂事務八月因官軍掃蕩四川省安樂坪賊巢生擒賊首王三槐上加恩軍機大臣戴衢亨交部從優議敘四年三月賜紫禁城騎馬四月命閱庶吉士散館卷五年正月轉戶部左侍郎仍管理錢法堂事務尋充武英殿總裁官二月充經筵講官六年京察屆期諭曰侍郎戴衢亨在軍機處行走勤慎稱職著交部議敘尋以官軍生擒賊首王廷詔上以衢亨盡心贊畫夙夜不息加軍功一級五月命教習庶吉士九月奏寶泉局鑪頭李照將上年六月駁回另鑄錢文私行收存夾入新鑄卯錢運局朦混交收未能早爲查出自請議處諭曰戴衢亨在軍機處行走

不克時常到局其過尙輕著加恩改爲交部察議十月以川省軍務指日告成奉旨戴衢亨數年以來承旨書諭尙能周到勤勉著加恩交部從優議敘十一月賞黑狐端罩七年六月因軍營奏報剿斃賊首樊人傑曾芝秀奉旨交部從優議敘七月擢兵部尙書兼管順天府府尹九月管理戶部三庫事務十二月川陝楚剿捕逆匪大功戡定上以衢亨克盡忠悃知無不言言無不盡自用兵以來承旨書諭勤慎小心恩加太子少保仍賞給雲騎尉世職八年三月命閱考試翰詹各員卷四月續行繕辦四庫全書命衢亨會同禮部尙書紀昀經理六月調工部尙書充會典館副總裁官七月充文淵閣直閣事尋以官兵剿捕餘匪全竣三省肅清諭曰軍機大臣承旨書諭獲與觀成尙書戴衢亨之子年尙幼穉伊姪候選縣丞戴嘉穀著加恩賞加知縣升銜仍令在實錄館效力行走九年二月聖駕臨幸翰林院用唐張說詩東璧圖書府四十字命王大臣翰林分韻賦詩衢亨分得講字是月京察屆期上以衢亨在軍機處行走小心勤慎著交部議敘六月因順天府治中趙日濂告病衢亨偕府尹閻泰和具題報部吏部以未奉科鈔不與開缺將趙日濂銓升廣東運同衢亨等參奏吏部開缺不照成例且係虛選病員有心壓

缺上命大學士保甯等會同刑部秉公查訊尋訊得治中告病應照京官五品以下據本衙門咨到之日開缺不候科鈔吏部銓升病員雖訊非官吏串弊壓缺辦理已屬謬妄又失察文選司貼寫姚承裕等句通順天府書吏豫先盜印順天府咨部揭帖撞騙候補運同王訥銀兩未成府尹閻泰和因王訥之子王宗出心疑吏部壓缺向其告知卽先行標畫文書咨催吏部將趙日濂開缺究屬任意徇情兼管府尹尙書戴衢亨雖係因聞吏部舞弊壓缺起見但未查明本管衙門弊竇率行人奏又復失察書吏盜用印信應請嚴加議處諭曰戴衢亨心爲除弊激於公忿毫無不是惟失察書吏用印實不能爲之諱著不必兼管順天府府尹交都察院議處尋議降一級調用以加級抵銷七月上御門辦事衢亨入班遲延交部議處尋議罰俸六箇月又以戶部寶泉局監督收運銅斤有得贓短銅情事衢亨管理錢法堂侍郎任內曾收銅二運命降二級從寬留任十年正月調戶部尙書二月以會典館呈進事例於世宗憲皇帝廟號擡寫錯誤偕總裁大學士保甯等自請褫職恩改革職留任三月充會試正總裁官六月入直南書房十二年正月以戶部尙書協辦大學士兼翰林院掌院學士命充日講起居注官其原充文淵

閣直閣事不必開缺二月京察屆期諭曰協辦大學士戶部尙書戴衢亨經理度支兼軍機處行走勤慎出力著加恩交部議敘八月充順天鄉試正考官十二月充文穎館正總裁官十三年三月兩江總督鐵保籌辦河湖要工請修復毛城鋪石壩王營減壩普培黃河兩岸大隄接築雲梯關外兩岸長隄培築高堰山盱隄後土坡加高智禮兩壩壩底奏入諭曰南河頻年漫工疊見河湖受病頗深關係運道民生自當妥籌經久之計著派協辦大學士長麟戴衢亨馳驛前赴南河悉心查勘鐵保等所奏各工究竟應辦與否及興築次第如何酌分緩急先後之處通盤籌畫據實奏聞查勘事竣具摺覆奏後長麟著先行回京復命戴衢亨在京供職多年著加恩賞假一月回南安原籍祭掃並看視伊叔戴均元患病情形再行回京復命四月河東河道總督吳璥條奏洪湖周圍應酌量補築碎石坦坡上命衢亨偕長麟一併籌議五月奏毛城鋪原設滾水壩因啟放日久口門寬廣一經開放黃水建瓴而下恐不能循軌前進應毋庸修復查天然開迤東之戴里屯有小石山一座中峯兩旁各有山罅兩道前河臣靳輔依此建置石閘二座壩基尙存山石夾峙可無奪溜衝決之患應請興修以減黃利運王營減壩係掣銷漲

水實屬應修之工惟見在壩基逼近黃河深塘積水施工甚難請於舊壩西土質堅厚處如式築滾壩一座並添建石壩以爲重門保障沿河大隄尤宜普律加培見在淮揚隄工最爲喫緊應將單薄較甚各處於本年伏秋前趕緊加培其餘可以稍緩之處應分定段落次第興工雲梯關外舊無隄埝之處應自八灘以上南北兩隄略做雁翅形勢酌量接築收束水勢既可杜河身散漫停淤之病並可保護兩岸民田高堰山盱隄工舊係內石外土因風掣缺石塊遂將土工刷進六七尺設有疏虞淮揚一帶關係非輕今石工旣不足深恃自不得不加築後戩土坡以資抵禦爲暫救目前之計至欲保護石隄詳詢本處居民皆以添砌碎石坦坡爲善策蓋緣坡勢迤邐漸低雖怒濤衝擊可以盪之使平以保護石工可期永遠得力惟工段綵長一時難以猝辦應請先辦土坡其碎石坦坡一項工程暫從緩議俟各工辦有頭緒再由該督酌議章程奏請辦理智禮二壩壩身過單應統較數年之水勢酌中定制將石基加高四尺察看湖而漲滿以時宣洩使有節制得旨嘉獎時御史史祐奏請清查兩淮鹽務雜項雜費賞借各款銀兩以杜官商侵冒上命衢亨偕長麟於查勘各河事竣後馳赴揚州逐款查究尋奏稱公同查覈

官商並無侵冒惟雜項各款向係公捐雖無關正課亦應據實開報自戊辰綱爲始每年巡費辛工雜項雜費分別造冊報部存案其賞借項內支用之款向無報部覈銷之例應照舊辦理報聞閏五月遵旨回籍祭埽於回京途次奉命就近赴山東將河督吳璈等所奏牛頭河各工細加查驗並查所保在工出力人員尋奏將原估丈尺逐加覈對尙無不合惟第一分第二分開有淤墊處所一一記出飭令原辦之員再行修治至奏請出力人員儘先補用一節此次工段十四分著落十四員承辦除第一分第二分應須再行修理外其餘各工多屬如式未便祇將王有熙等獨予優敘且此五員內挑工或多或少今一例奏請先補未免無所區別應請飭交吳璈等另行覈定從之六月抵京九月賞給南石槽房屋一所十四年正月上以五旬萬壽加恩中外臣工衢亨晉太子少師四月充殿試讀卷官六月戶部員外郎劉承澍將鹽法志及衙門檔冊借與給事中花杰閱看又將議彙私告花杰花杰以衢亨徇庇蘆商參奏並參殿試閱卷舞弊等款七月諭曰給事中花杰前經奏請嚴催長蘆商欠一事已交戶部議覆請交新任鹽政覈辦上月復據該給事中奏稱戶部議摺係戴衢亨一人主彙緣戴衢亨與查有圻係兒女

姻親查有圻引地最廣積欠最多是以代爲徇庇將蘆商積欠官帑未交窩價均未詳悉根究並稱戴衢亨平日於言官冒瀆聖躬者則以爲直言於干涉部臣者則以爲多事等語朕當卽召見花杰面加詢問以所奏關係甚大辦理必須實據如所奏不實亦有反坐之罪花杰除叩頭之外默無一言昨日復據該給事中具摺覆參戴衢亨與查有圻結姻之後查有圻餽送往來鑽營甚巧蘆商惟查有圻是望查有圻惟戴衢亨是倚以致鹽務廢弛言之鑿鑿而另摺又言戴衢亨於本年殿試閱卷顛倒舞弊將洪瑩援引爲一甲一名進士該給事中曾令一同鄉庶吉士周除釗向戴衢亨私宅查閱門簿探問管門之人得其交通情狀又黃中模策寫俱佳不列入十卷之內黃旭行楷相聞竟置二甲之中指爲舞弊實據等語朕因特派大學士慶柱董誥祿康尙書蘇楞額傳旨向戴衢亨詢問令其明白登答戴衢亨回奏之摺陳辨甚明所有長蘆商欠一事係交該鹽政統覈通綱情形併限辦理窩價亦並令該商上緊湊繳皆屬嚴催辦理與花杰所奏不符至戴衢亨因司官辦彙未妥並恐書吏等有招搖情事是以與衆堂官商定主見之後卽令司官等在圓明園改辦奏彙期於密速亦並非戴衢亨一人定議花杰所奏均

屬不實惟戴衢亨欲辦理慎密亦儘可令司官等在署內封閉辦理何必令其在圓明園此一節究屬不合致招物議見據戴衢亨自認疏率懇請處分自有應得之咎戴衢亨著交部議處至於戴衢亨與查有圻聯姻之處查有圻本係宦家與戴衢亨向有世誼並非門戶卑微不可爲婚之人安得謂之有心援繫至於嫺戚往來歲時餽送本屬情事之常人孰能免如果因有公事囑託納賄行私確有證據則亦無論其爲嫺戚與否皆當繩之以法今戴衢亨於議覆長蘆積欠毫無護庇且先議駁加價以二文入官一文入商一節於查有圻無大利益公事公辦又何能禁其嫺戚之不往來至於此外如戴衢亨因蓋造房屋查有圻幫助木料借用几案以及在南城外置買房屋數處尤爲瑣細不足置問花杰逞其筆端輒稱查有圻鑽營結納戴衢亨納賄徇私指查有圻爲倚勢把持之奸商坐戴衢亨以負恩誤國之重罪連篇累牘極力詆謗甚至謂戴衢亨於言官冒瀆聖躬者以爲直言此尤關係重大今確加根究訊據花杰指稱嘉慶十一年在御史吳榮光家與戴衢亨之姪嘉穀同席談及吳榮光有請暫緩巡幸天津之摺係奉旨申飭者戴嘉穀曾云伊叔甚爲欽佩此語並非出於戴衢亨之口入於花杰之耳而見傳

訊戴嘉穀堅稱伊因衆人稱讚亦祇隨口應酬實無有伊叔戴衢亨欽佩之語復經慶桂等傳到是日同席之朱涂切加訊問亦稱不記此言其所稱戴衢亨於言官干涉部務者以爲多事一節則云卽係伊嚴催積欠之奏戴衢亨不以爲然若果以爲多事見今據摺催欠並未駁斥原奏如此肆意撫拾茫無指證是竟欲以莫須有之事妄興大獄矣至於殿試爲掄才大典科場舞弊律有明條若果如花杰所言戴衢亨與洪瑩交結情密援引爲一甲一名進士於黃中模黃旭顛倒列置此是何等弊端何項罪名其誣告者應如何坐罪該給事中摺內且云請將洪瑩復加考試或默寫策對若實係平常請嚴究弊端而於考試舞弊則全不反而自思應否治罪殊屬荒誕無理見因該給事中稱覆考時尙恐南書房有人設法照應請旨嚴密防範因卽如其所言先向內閣查取洪瑩等殿試各原卷加封進呈一面派滿洲軍機章京將洪瑩由福園門帶至上書房命二阿哥監看令其默寫試策朕親加披閱設字策不符顯有弊竇非但戴衢亨與洪瑩獲罪甚重凡此次派出讀卷官之大學士董誥等皆當一併懲治朕豈肯稍爲寬假今洪瑩所默策對與原卷悉符閒有數字誤寫用硃筆點出者不過文義小有異同語句先後

微有參差試思尋常擬作詩文數日尙不能悉行記憶今距殿試已逾兩月之久而洪瑩竟能記憶默寫非積學有素安能如此尙有何弊且殿試前十卷進呈時洪瑩本係朕拔置第一並非讀卷官所擬花杰何得指稱戴衢亨一人援引之力至於黃中模黃旭各原卷文理皆可列二甲惟黃旭末四行字畫不能工整如前亦並無一筆行書今黃中模列置二甲黃旭置二甲之中尙皆公允此二卷亦非由戴衢亨首先校閱花杰何得指戴衢亨徇情顛倒如此妄行參奏伊自問可以脫然無事乎又花杰摺內稱本年考取南書房四人除王以銜外周系英係英和同年席煜係英和門生姚元之則係戴衢亨英和二人門生文字雖優鑽營尤甚英和平日賞識戴衢亨戴衢亨畏忌英和陰與爲附實屬結黨行奸等語本年考試南書房英和會同戴衢亨瑚圖理保舉十二員朕圈出與考八員選取四員內周系英王以銜本係講官於隨圍時朕曾屢次召對加以遴選席煜姚元之試卷本佳並非戴衢亨英和力薦若謂周系英係英和同年則是科豈祇英和一人可供文學侍從之選其餘竟無一人可用若謂席煜係其門生豈戴衢亨英和二人所取之士皆不可選用內廷乎尤爲謬妄至名節所係卽尋常一介齊民朕尙不

忍令其受人污蔑況戴衢亨任用已久經用至協辦大學士今花杰任意詆訐無所不至朕又豈肯任其甘受虛誣花杰著交部嚴加議處並著將洪瑩等殿試原卷及昨日默寫之卷均發交花杰閱看令其心服又諭曰花杰參奏戴衢亨各款業經逐一詳查毫無影響該給事中亦自認冒昧本日復據祿康奏查訊德泰錢鋪中朱姓據稱伊鋪與戴衢亨家交易數十餘年見在尙欠伊鋪內銀六百五十兩又查明源興等五處當舖查對賬簿各鋪皆係查有圻所開查有圻用銀之時均由當舖送與查有圻使用該當舖從無出過銀票之事是戴衢亨家自與錢鋪易錢與查有圻何涉查有圻自問伊家當舖取銀又與戴衢亨何涉全係捕風捉影空談豈能科以交結行賄實罪且戴衢亨家見在尙欠錢鋪銀兩可見花杰所奏全係虛誣不辨自明見在將此摺給花杰閱看伊更無可置喙至於戴衢亨議覆鹽務加價伊昌阿被長蘆商人懇懇會奏懇每引加價三文以二文歸官一文歸商如果戴衢亨有曲庇查有圻之心照議准行查有圻每年獲利甚厚而部臣先後兩次俱經詳悉議駁毫不任其含混是以朕不但依議辦理並將伊昌阿降調示懲此實共見共聞尙有何弊至議覆花杰追完商欠繳納窩價一摺亦係議

令併限嚴追詳查歸繳並無寬緩是戴衢亨於辦理部務委無絲毫錯誤惟戴衢亨前於伊叔戴均元補放倉場侍郎時卽據陳明戶部有交涉事件朕特令不必迴避今花杰平空指劾以事關嫺戚率意誣讎經朕洞悉情僞降旨通諭然此亦幸戴衢亨與議二事均屬從嚴無可指摘設遇有應行從寬辦理之事若戴衢亨有意從嚴豈不有妨公事若準情酌辦又難不卹人言一切轉多窒礙且倉場與戶部旣多交涉自應迴避以符體制戴衢亨著以協辦大學士調補工部尙書並諭將劉承澍交部嚴加議處尋吏部奏花杰降三級調用劉承澍革職戴衢亨於議駁長蘆加價飭催商欠一事令司員在園寓辦彙致招物議應降二級調用諭曰朕每日召見軍機大臣伊等皆兼管部務自卽以該部應辦事件向其咨詢此外部院各大臣亦更番召見無不問以各該管衙門事務伊等遇有公事自應彼此熟商卽或意見不符亦儘可兩議並上乃部院諸臣每先向軍機大臣探問方行定彙以致司員等得以從中播弄及議妥後輒稱係軍機大臣主見實屬近來惡習卽如戴衢亨議駁長蘆鹽價不許加至三文該商等積欠飭令併限完交均係從嚴定議與蘆商毫無利益而花杰轉謂戴衢亨庇護伊戚查有圻甚至撫拾

瑣屑細故逞其筆端有心污蔑並以科場大弊壞人名節試思所參屬實不獨戴衢亨獲罪甚重凡閱卷大臣皆當得何罪卽朕亦不忍出諸口乃花杰率行列入彈章此何等事可云得自風聞乎此而不加懲治轉非朕開通言路諸事覈實之本意矣至劉承澍身爲部員以鹽法志及衙門檔案交與花杰閱看後又將部中議藁故爲漏洩致花杰得以極力排擠其居心尤不可問本日吏部議處奏上花杰著照議降三級調用劉承澍著照議革職至戴衢亨與各堂官公商定議後催令在園辦藁不將司員封閉在署辦理致招物議部議降二級調用尙覺過重著改爲降一級留任九月上以萬壽慶典加恩臣工命開復衢亨會典擡寫錯誤革職留任處分十月衢亨呈獻詩冊上嘉其詞意尤雅特加優賚賞大卷八絲緞二端及荷包筆墨硯紙十二月以失察書吏王書常僞造印文冒領三庫銀兩物料交部議處尋議降一級調用奉旨從寬改爲降二級留任十五年正月授體仁閣大學士上賜詩曰知遇先皇早欣看器晚成予申三錫命汝矢一心誠鳳閣隨雙彥龍頭冠衆英荷天作霖雨江右操臺衡命管理工部事務仍掌翰林院充會典館正總裁六月以粵東海洋肅清加軍功一級十二月以纂輯平定三省方略告

成開復失察冒領三庫銀物降級留任處分賞加一級十六年三月扈從巡幸五臺閏三月因病命先回京給假調治旋命懋勤殿首領太監帶御醫診視四月卒諭曰大學士戴衢亨持躬正直學識淹通體用兼優忠勤懋著初由翰林院學士仰蒙皇考高宗純皇帝鑒其器能特賞三品卿銜擢任軍機大臣用爲卿貳朕親政後見其心地坦白辦事認真日加委任由侍郎擢授尙書優給世職復令兼直南書房簡用至大學士屢經晉錫宮銜親信之篤不啻股肱戴衢亨感被厚恩竭誠圖報一切用人行政知無不言言無不盡朕每加採納克副贊襄伊雖仰邀隆眷而益加謹飭清慎自持從無因事譴謫實爲國家得力大臣此次扈從五臺於途間染患病證猶復勉強入直朕察看其精神疲憊派御醫診視賞假先行回京方期調理就痊詎意數日之內遽聞溘逝深爲悼惜著加恩晉贈太子太師入祀賢良祠賞給陀羅經被先派榮郡王綿億帶領侍衛十員前往奠醊朕於初七日親臨園寓賜奠仍准入城治喪並著賞給廣儲司庫銀一千五百兩經理喪事其應得卹典著該部察例具奏所有任內一切處分悉予開復賜諡文端上親臨賜奠

成德

成德葉赫氏滿洲正藍旗人由文生員於乾隆十九年考取內閣中書二十六年升侍讀二十九年授銀庫員外郎三十一年調戶部員外郎三十二年擢江西道監察御史四十三年晉吏科掌印給事中四十八年奏言臣查辦赴任違限官員各案接准督撫展限咨文開或限期將滿將原案之員撤回改委別員署理卽以改委之員接署之日起另扣限期度其情節非於原委之員操縱之閒別生意見離任之員任內有牽掣事故因藉改委以寬時日其中難保必無情弊嗣後不得託故改委以致輾轉遲緩如此交代旣嚴而州縣更加警惕矣奉旨此奏似有所見又奏云京察填註四格考語理當詳慎覈對以定等第此次有二等四格一等考語者一員有二等四格三等考語者十六員經吏部依所開四格俱改列二等辦理誠恐照格更改勢必高下混淆請嗣後吏部預將一二三等定例四格考語式樣分錄清單咨送各衙門如移送冊籍有四格考語不符將承辦之員附疏題參下部議行五十七年擢通政司副使五十八年授太僕寺卿五十九年四月轉通政使十月授都察院左副都御史六十年九月擢戶部右侍郎十二月授鑲紅

旗漢軍副都統嘉慶元年七月調工部左侍郎九月充經筵講官時長蘆商人范光震以商衆欺隱窩價呈控命刑部侍郎張若淳偕成德前往查辦奏入諭曰張若淳成德審訊范光震呈控商總欺隱窩價分別定擬一摺所辦殊屬含混且案據俱未明確不足以服該鹽政運司及商衆之心著該侍郎等即將案內人證及案卷等項帶京並令方維甸阿林保一併來京交軍機大臣會同該部另行審擬具奏旋翰得實諭曰張若淳等審辦此案當於鹽政運司有無請託賄囑情弊及商總等有無欺隱窩價審明方爲正辦而一切俱未能審訊明確於鹽務民食是否窒礙情形概置不問輒將所運鹽斤先行查抄變價以致沿途停運俾州縣無鹽接濟是何理耶且四商內惟楊秉鉞係被告之人其查善和查世延衛素昌三人並無應得罪名乃一併議令變價入官更屬乖謬張若淳成德辦理此事實屬錯誤著先行交部嚴加議處十月諭曰此案方維甸阿林保如有聽受賄囑情事不特發往軍臺尙當重治其罪乃張若淳成德並未審明案情率將方維甸阿林保問擬軍臺不足以成信讞而其辦理不善之處卽質之方維甸及阿林保亦俯首無辭至張若淳成德辦理此事並不查明情節率行定擬本應照部議降調但

念伊二人亦祇糊塗不曉事體尙無他弊本日吏部議已加恩將該侍郎所得處分從寬改爲革職留任所有軍機大臣等定案摺內請將張若淳成德嚴加議處著加恩寬免以示勸懲惟允宥過施恩至意十二月調鑲黃旗滿洲副都統二年三月兼署理藩院侍郎八月調吏部右侍郎十一月擢都察院左都御史兼鑲黃旗蒙古都統四年三月擢刑部尙書調補鑲黃旗漢軍都統五月賜紫禁城騎馬五年充崇文門副監督六年二月授戶部尙書命在軍機處學習行走四月調鑲藍旗滿洲都統時軍務將竣諭曰成德本年甫令在軍機處行走亦著加恩交部議敘尋議給軍功加一級紀錄三次七年三月因病請假諭以不必開缺旋卒奉特恩晉贈太子少保應得卹典如例予諡恪慎子嵩安任戶部員外郎岳安任工部員外郎

傅森

傅森鈕祜祿氏滿洲鑲黃旗人由監生於乾隆三十一年考取內閣中書三十五年補缺四十四年升內閣侍讀四十五年京察一等引見奉旨記名因親老呈請留京旋命在奏事處行走四十七年兼公中佐領五十三年奏事八年期滿仍回

內閣侍讀任五十四年升內閣侍讀學士九月擢內閣學士五十六年授盛京工部侍郎五十八年四月奏盛京工部所屬四品官一員承辦永陵工程物料並兼辦城內各衙署歲修甄瓦銀兩之事祇設有領催八名幫同催辦伏思永陵工程最關緊要四品官自應常川在陵敬謹經理永陵距省二百餘里儻遇同時興工勢難兼顧若竟將城內歲修銀兩委之領催承管不足以昭慎重仰懇將四品官屬下領催裁汰一名改設外郎佐辦差務以專責成奏入奉旨允行五十九年調盛京刑部侍郎嘉慶元年七月因秋審錯擬情實部議降一級調用奉旨改爲降三級留任二年正月調兵部左侍郎三月授公中佐領旋授正黃旗滿洲副都統閏六月奉旨在軍機處學習行走十月調戶部右侍郎尋命兼管光祿寺事務三年二月以內閣學士邢彥成入軍機行走命傅森回戶部辦事是年京察奉上諭傅森准其加一級四年正月轉戶部左侍郎旋調刑部左侍郎二月調鑲黃旗滿洲副都統又調倉場侍郎三月奏以京通十五倉向例每年各倉以科道一員稽察由都察院將科道各員帶領引見欽派分倉往查一年期滿會同倉場衙門將各倉米石收放數目咨部彙覈具題後再行更換乾隆五十九年戶部改議由都

察院自行掣籤科道按月一倉一員監放在輪放米石之科道不過催令依期放竣其每倉放米若干新陳存米若干及該倉是否遵照戶部指定廩坐開放之處概不能稽覈而監督等因無定員巡視遂致通融私開廩坐出放米色不勻倉場侍郎在通州兌運南糧勢難按期赴各倉分查應請循照舊例簡放十五員分倉稽察其每季關領俸米甲米及發交五城出糶土米均令隨時監放至每年由通運京之新糧一併查覈各倉以免臨期那移偷漏得旨允行是月授都察院左都御史五月授兵部尙書旋授鑲藍旗蒙古都統七月授總管內務府大臣八月調鑲紅旗漢軍都統十月復命在軍機處行走恩賜紫禁城騎馬授崇文門副監督五年二月奏請派員出洋嚴禁代巡以統巡一官乃總兵專責儻遇事故以副將代巡尙屬可行今或以參將遊擊代之且以千總代參遊以把總外委代都守甚至以巡哨兵丁代千總及遇失事參送職名又係代巡之員請嗣後以總兵爲總巡偶遇事故以副將代之其餘不准轉代至派員出洋亦以副參遊爲總巡以都司守備爲分巡均令親身出洋不准代替奉旨上諭著通諭沿海省分各督撫嗣後不得濫行代替以杜借端規避之弊三月命偕晉昌往盛京查辦事件盛京將軍

衙門私添番役索詐辦理裁革一案因言番役一項藉資緝捕請仍照舊額補二十名應用奉旨著照所請於州縣保甲中擇其循謹畏法挑補二十名以資巡緝此外不得私有增添又奏提訊奉天府尹恩明家人烏春及太監馬德慶於盛京地方沿途需索使費一案請將烏春擬徒在犯事地方枷號一月示衆奉旨諭所辦尙是惟馬德慶與烏春厥罪維均何以不將伊一同枷號未免輕縱又奏審訊委員恆福等查勘牛莊葦塘捏指界址隨意繪圖呈覆一案分別酌定斷結恆福等請交部嚴加議處奉旨此案張耀所控牛莊葦塘情節從前審辦各員因無四柱冊檔並不妥爲查辦以致日久不能斷結今經傅森晉昌等將鹽廠界址逐加丈量繪圖呈覽酌定地方以免牽混卽著照所請辦理七月調鑲藍旗滿洲都統賞戴花翎八月因葉縣擒獲首逆邪匪劉之協奉旨加軍功一級紀錄三次九月管理戶部三庫事務十一月因奉旨議奏京營總兵移駐事宜錯誤交部嚴加議處六年正月調戶部尙書旋患病賞假調理二月卒奉旨諭戶部尙書傅森在軍機處行走謹慎小心阻勉供職前月染患痰證賞假調治曾派乾清門侍衛軍機章京等帶同太醫屢往診視並賜內府丸藥方冀日就全愈今聞溘逝殊堪軫惜

著派軍機章京玉甯前往賞給陀羅經被所有應得卹典該衙門察例具奏其任內降罰處分俱著加恩開復又諭尙書傅森見在溘逝遺子英林甫及五歲並無差使著賞給護軍錢糧傅森之姪福克精阿前任銀庫迴避調轉尙未得缺著仍作爲銀庫員外郎行走遇缺卽補

瑚圖禮

瑚圖禮完顏氏正白旗滿洲人由舉人於乾隆四十六年考授國子監助教五十二年成進士改庶吉士五十四年散館授檢討五十六年四月升侍讀五月遷祭酒九月考試滿洲科甲出身京堂翰詹各員瑚圖禮名列第一奉旨在南書房行走十月授公中佐領五十七年八月充順天鄉試副考官十月擢內閣學士兼禮部侍郎五十九年三月授鑲藍旗漢軍副都統是年恩科充江南鄉試正考官十月調鑲白旗漢軍副都統六十年二月充文淵閣直閣事三月充會試副總裁官因將膚泛之卷拔置第一下部嚴議部議革職奉旨以四品京堂補用八月提督山西學政嘉慶三年授河南按察使四年二月授刑部右侍郎尋轉左侍郎授鑲白旗蒙古副都統五月調盛京兵部侍郎九月調盛京刑部侍郎兼管奉天府府

尹及威遠堡六邊事務五年二月丁母憂回旗閏四月百日期滿命署廣東巡撫八月兼署兩廣總督六年十月偕總督吉慶奏請粵東省公捐銀三萬兩粵西省公捐銀二萬兩以備川陝大兵凱旋賞賚之用諭曰教匪滋事以來所發餉銀已不下萬萬兩此時大功將次告蒞凱旋賞犒需費幾何奚待外省捐資備用且伊等藉捐需之名勢必層層派累朘削閭閻假公濟私於言利之中尤爲卑鄙著傳旨嚴行申飭七年六月實授廣東巡撫先是上聞博羅縣有重犯越獄知縣匿不詳報臬司陳文及該管知府扶同徇隱復告藩司將典史調補煙瘴示罰又前任臬司吳俊借贓罰爲名收受陋規於升任起程時又派此項作路費等事命瑚圖禮密查具奏瑚圖禮覆奏事皆屬實陳文吳俊等皆治罪如律瑚圖禮照徇庇例降四級上特改爲革職留任九月博羅縣會匪陳爛屐四等糾衆滋事總督吉慶帶兵往剿瑚圖禮留省辦理軍需奏將惠州府倉及歸善縣倉所貯穀石令承辦糧餉之臬司邱庭澁就近碾支又趕造鳥槍火藥鉛子等項運往惠州并調兵分往博羅交界之東莞增城龍門等縣協防一面飛咨江西閩浙督撫各於鄰近州縣飭屬會營堵緝以防賊匪他竄均得旨允行十月署廣州將軍時總督吉慶以

辦理博羅縣會匪一案謬誤奉旨解任交欽差內閣學士那彥成會同瑚圖禮審訊卽命瑚圖禮兼署督篆十二月奏督臣吉慶由惠州府回省自戕身死上以前此吉慶摺內稱伊患病月餘恐瑚圖禮作賤惟願病不能痊兼有瑚圖禮因太平關盈餘歸公深恨吉慶等語命那彥成就近訪察嗣據那彥成覆奏吉慶因辦理會匪未將首犯正法被害之家怨聲騰沸愁畏交并兼之病後糊塗遂爾自尋短見諭曰那彥成旣查明吉慶係畏罪自盡與瑚圖禮無涉其所稱作賤之處自係病中妄語毋庸再行查奏八年正月那彥成奏失察會匪滋事請將瑚圖禮交部察議諭曰瑚圖禮身任巡撫於所屬地方匪徒勾結毫無覺察以致釀成巨案察議未免過輕著交部議處議上奉旨瑚圖禮著降一級留任二月回巡撫任閏二月因率准農耐國長阮福映貢船回國攜帶違例貨物得旨交部嚴加議處議上奉旨瑚圖禮著革職留任八月以病解任回京九年正月授鑲藍旗漢軍副都統五月授工部右侍郎管理錢法堂事務六月充江西鄉試正考官七月調正黃旗滿洲副都統十月授湖北巡撫十年六月署湖廣總督因前在廣東任內失察南海番禺二縣私設班館押斃多命下部嚴議部議罰俸二年奉旨瑚圖禮在任有

年其咎較重著罰俸三年閏六月奏修鍾祥縣尹家廟隄潛江縣新豐隄垸請毋庸定限保固經部議駁上嚴飭之並命交部議處部議革任諭曰瑚圖禮於鍾祥潛江二縣民修隄垸例應保固之工並不查明從前議定章程率照藩司台斐音所稟奏請毋庸保固實屬錯謬瑚圖禮本有革職留任處分例應革任但該撫究係轉據司稟著再從寬改爲革職留任九月奏參武昌鹽法道海昌在任四年任聽岸商擡價病民又寶武局鼓鑄錢文亦係該道經管邇來所鑄卯錢缺邊漏縫字畫不清斤兩亦不足請解任查辦上命將海昌革職欽差吳熊光托津審訊嗣審出鑪匠黃銘仁等在局舞弊按律懲辦瑚圖禮以失於覺察自請議處部議降二級留任十一年十一月擢吏部尙書十三年管理戶部三庫事務十四年署翰林院掌院學士十五年二月調刑部尙書兼鑲紅旗滿洲都統六月調吏部尙書十六年六月監督崇文門稅務八月御史劉奕煜奏參吏部銓選兵部主事員缺錯誤上命吏部明白回奏瑚圖禮偕各堂官覆奏自認錯誤未經更正旋據兵部候補主事程同文等以吏部奏明錯誤後仍將此缺扣歸卽用班選補以致兵部屢次出缺不能留補一人具呈申訴由都察院奏聞特派大學士勒保等秉公查

覈嗣勒保等覆奏意存偏袒復派令大學士慶桂兵部尙書劉鏞之覆查慶桂等奏弊竇之滋在於舍例言案請將吏部堂司各官交都察院分別議處諭曰此次吏部任聽司員將久應註冊之塵案牽引枝梧而各堂官亦不詳察瑚圖禮係吏部尙書不能虛公定議以致曲庇混淆庸碌無能不勝尙書之任著降爲副都統職銜補放阿克蘇辦事大臣仍交部議尋議降二級調用以先有革職留任之案無級可降應行革任得旨瑚圖禮業經降爲副都統職銜所有此次部議應行革任之處著改爲革職留任帶於新任旋調西藏辦事大臣十七年奏免死發遣之布魯克巴夷人策忍敦柱一犯先因患病未經監禁見在逃走俟拏獲時再行發遣上以所辦失於輕縱傳旨申飭仍交部議處十八年三月授正白旗蒙古副都統八月授理藩院右侍郎九月調禮部左侍郎十九年三月調鑲黃旗滿洲副都統四月擢兵部尙書八月調戶部尙書九月調禮部尙書十二月卒

沈初

沈初浙江平湖人乾隆二十七年聖駕南巡召試一等賜舉人授內閣中書二十八年一甲三名進士授編修三十一年散館一等三十二年入直懋勤殿命寫經

爲孝聖憲皇后祝釐旋充日講起居注官三十三年四月御試翰詹等官諭曰編修沈初學問優長因司內廷有承辦事件未得一體考試著加一級十二月擢侍講三十四年八月丁本生母憂三十五年十二月服闋仍直懋勤殿諭曰向來候補人員例不食俸至內廷行走之員雖未得缺應准支俸以資贍給候補侍讀沈初著加恩食俸三十六年六月入直上書房九月提督河南學政未赴任丁祖母承重憂三十九年服闋仍直南書房一體食俸旋擢右春坊右庶子仍充日講起居注官四十年正月遷侍講學士尋轉侍讀學士十二月擢詹事府少詹事四十一年正月擢詹事六月擢禮部右侍郎充四庫全書副總裁四十二年提督福建學政四十四年丁本生父憂四十五年服闋授兵部右侍郎仍直南書房四十六年充三通館副總裁三月充會試副考官六月以母疾篤請假回籍省視四十七年五月請終養許之十月丁母憂五十年五月服闋補兵部右侍郎仍直南書房八月提督順天學政五十一年九月調江蘇學政五十二年轉兵部左侍郎五十二年十二月奏曰臣試松江時已值納漕之期向有生監以醜米混交之弊臣出示禁約並開列人名交與各學教官嚴加管束旋聞有江陰生監在倉與書役爭

鬧臣卽令教官到倉確查係生員楊大緒不冝將米篩颺所致臣卽取米細驗果係不純因令篩颺交納時有幫同爭鬧之監生吳柏生員吳昆臣卽斥革衣頂並出示各學生監母或效尤自蹈覆轍以冀士風整飭知所懲儆報聞五十四年還京仍直南書房充經筵講官署禮部左侍郎四月充殿試讀卷官七月調吏部右侍郎八月充萬壽盛典總裁五十六年命閱廷試翰詹等官卷復命續編石渠寶笈祕殿珠林二書十一月諭曰前蔣衡進手書十三經宜刻石列於太學用垂永久著沈初隨同校勘五十七年八月提督江西學政五十九年轉吏部左侍郎六十年六月江蘇拔貢程桂芳考不入等以初前任江蘇學政時遴才未精議降一級調用詔改革職留任是年十月還京仍直南書房十二月以初失察江西阜役之子焦模泰冒考罰學政養廉三年嘉慶元年正月與千叟宴於皇極殿二月充會試知貢舉四月充殿試讀卷官六月擢都察院左都御史十月命在軍機處行走尋遷兵部尙書二月轉吏部尙書八月調戶部尙書仍兼吏部尙書三年正月京察以初勤慎稱職飭部甄敘尋議加一級八月充順天鄉試正考官九月四川官軍生擒首逆王三槐奏捷上以初趨直軍機處下部優敘旋議軍功加三級四

年正月詔以初年老退出軍機處尋命紫禁城騎馬復免直南書房二月充寶錄館副總裁三月初一日卒遺疏聞諭曰戶部尙書沈初內廷行走有年襄辦部務供職勤慎今因病溘逝殊堪軫惜應得卹典該部察例具奏其任內降罰處分准其開復尋賜祭葬如例諡文恪入祀鄉賢祠子二長蘭生以正二品廕生見官戶部額外主事次蓮生由監生遵衡工例捐納鹽運使運判分發長蘆試用

熊枚

熊枚江西鉛山人乾隆三十六年進士授刑部主事四十四年充順天鄉試同考官四十五年擢刑部員外郎四十六年揀發甘肅補平涼府知府四十七年丁母憂五十年服闋補河南汝甯府知府五十一年丁生母憂五十四年服闋補直隸順德府知府五十五年擢山東濟東泰武臨道五十八年擢江蘇按察使六十年擢雲南布政使嘉慶元年兩江總督蘇凌阿等以枚督辦劉河工未竣請暫留蘇省二年二月調安徽布政使九月擢刑部右侍郎四年轉左侍郎六年六月直隸水災總督姜晟以報災延緩逮問命枚署總督事枚歷查九十餘州縣被水輕重情形撥銀急賑先後報聞時截留漕米六十萬石貯天津北倉枚奏以漕米貯天

津將來挽運各屬不惟虛糜腳價且使距天津較遠災民未能早行領食應請分貯沿河水次鄭家口泊頭等處上從之七月疏陳賑務事宜一被災各屬除已經奏報外其續報災重者添銀急賑其災輕者令地方官酌爲撫卹並做保甲舊例責成地保造冊存記以省大賑時查造之繁兼杜愚民覬覦刁控之漸一合學貧生向無給賑之名而有資給口糧之例已飭司行學查覈資給銀兩以供館粥併令各教官諭以生員例不給賑係朝廷養其廉恥別於齊民之意一查被災定例於急賑撫卹之後災輕者統歸十一月大賑災重者先於八月內普賑一月此次直屬被災較早災民較衆國家經費有常應將災民若干需費若干應賑幾月通盤籌畫或照向例或不拘成例另行請旨一救災有平糶之法已飭州縣禁止鋪戶囤積居奇並禁書役藉端滋擾至自行捐賑之戶少則酌賞多則咨部題請獎勵不願捐施者各從其便一綠營兵向不給賑查衝途營兵差使較繁其住房坍塌未便聽其棲身無所應請給價修理其偏僻各營兵仍不准濫邀以昭限制一衙署令地方官自行捐修其監獄倉廩尤關緊要應卽查明確估動項興修兼可以工代賑奏入如所議行尋奉命會同侍郎那彥寶等籌辦永定河工堵築事宜

奏言各工所需料物由附近地方被淹百物昂貴例價不敷請照市價購買並請發帑銀一百萬兩應用均得旨允行新任總督陳大文將抵京諭曰熊枚俟陳大文接印後不必留工著卽周歷直隸辦賑各地方詳細查勘如果地方官有實心辦賑民情甯帖者卽將該州縣存記以備升調儻有將賑饑銀米侵牟入己卽當明正典刑或任聽吏胥中飽致小民不得實惠者亦應嚴參懲治此事專交熊枚查辦儻有徇隱咎無旁貸八月赴東安訊僧人演亮控教諭查賑需索又赴文安訊匿名帖控知縣減賑私徵均鞫得誣狀報聞並奏請清查賑戶不得拘每戶大口不過五小口不過三之例下部議行九月上以枚查辦災賑認真擢都察院左都御史枚巡閱數十州縣舉辦賑實心者五員劾辦理草率者四員分別以聞十二月諭曰有人在朕前奏稱熊枚自九十月後卽不免有騷擾驛站需索供應之事甚至騎馬多至百餘匹州縣中有馬匹短少往往以錢文折交等語朕卽於奏事摺內硃批密詢旋據熊枚覆奏陳辨甚力復密諭令陳大文督同臬司瞻柱據實查覆茲據陳大文覆奏熊枚經歷各站尖宿所需飯食俱自行發價隨帶司員及僕從人等騎馬不過三十餘匹係照常應付頗屬安靜不特臬司瞻柱體訪相

同卽詰問熊枚所參各員僉稱委無需索情事所論猶爲公允是熊枚此次周查賑務實屬盡心妥協而沿途行走安靜尤可確信著加恩在紫禁城騎馬以示優獎七年充會試正考官四月未撤閣命署直隸總督奏言直省米麥高粱已議定減價平糶見在糧價日增應按市價再爲遞減以益民食五月奏沿河應辦要工或因隄埝殘缺或因河渠淤塞應援照以工代賑之例動用銀米及時興修先後奏入均如所請行六月失察新城縣匿蝗不報奏請察議上免之尋卸總督事赴河閒景州霸州等處查勘蝗蝻情形據實入奏報聞七月授刑部尙書九年仍調左都御史管理戶部三庫事務十年正月授工部尙書兼署刑部尙書二月審錢局監督五臨泰缺收銅斤案於司員辦理錯謬未經駁查交部嚴議尋議降三級調用恩予革職留任六月命署直隸總督率同藩司裘行簡清查各屬虧項奏言初二兩次清查案內未完之項應按限監追如無力完繳再議攤賠三次清查經藩司覆覈實虧銀一百八十六萬有奇其餘七十八萬餘兩多係捐雜各款應俟分清款目追賠至六年以後截至九年止冊結未齊亦俟覈明續虧銀數該員離任者卽提解來直押令完繳見任者卽奏請革職暫予留任勒限嚴追儻逾限不

清除將該員治罪外卽著各上司賠繳奏入得旨允行旋赴永定河工防汛奏言查河水驟長北岸二工漫溢三十餘丈北岸下頭工隄埽衝刷九十餘丈見飭工員趕緊鑲埽裹頭應請於司庫正款內撥銀五萬兩備料興工上以所請恐不敷用令造辦處撥銀十萬兩發往備用閏六月回工部尙書任十一年五月工部議外省販賣鐵斤漫無限制奏請官爲定額及召對時枚以官爲查辦恐滋流弊與摺內異詞諭曰鐵斤爲民間日用所需多寡本難懸斷儻責各省酌定額數易啟胥吏勒措之弊熊枚亦不爲無見但伊旣見及此卽應向同官阻止乃先旣隨同畫奏直至召對之時忽異其詞實屬非是若各衙門已經畫奏之件俱不足爲憑焉用列銜畫諾爲耶熊枚年逾七十近覺重聽恐於辦理部務非宜著調補左都御史六月左副都御史陳嗣龍以山東民婦盛姜氏控案應奏枚意未決嗣龍稱其模稜並劾枚平日居官聲名平常上命大學士慶桂等查訊無據諭曰朕君臨天下卽治匹夫之罪亦必覈實定案況熊枚爲一品大員斷無不加察實卽予褫黜之理因將陳嗣龍原摺用硃筆標出交慶桂等向伊詢問旋據陳嗣龍繕片奏陳於熊枚有何款蹟之處仍不能確指一事竟係近日見熊枚左遷私心揣測謂

朕意或有憎厭因而搜求其短連章劾奏殊不知朕於諸臣工權衡黜陟一秉大公豈因伊一言細過遽將熊枚罷斥乎熊枚身爲臺諫領袖遇有公事自應和衷商榷乃因陳嗣龍有譏伊模稜之語輒於公署負氣爭辨亦屬不合著交部議處尋議降二級留任九月直隸藩司書吏王麗南僞印虛收庫銀事覺以枚署總督時失察下部嚴議部議革職奉旨以四品京堂用十一月補順天府府丞十二年充順天鄉試提調官以所辦冊卷遲誤部議革任諭曰熊枚本係棄瑕錄用之人伊職司提調於文闈大典倍宜認真經理乃不能先事督催以致所辦試卷遲延舛誤且年已衰老本應照部議革任但念伊曾任大員著加恩賞五品職銜休致十三年卒子墀見任掌湖廣道監察御史孫常鐸見任翰林院編修

吳省欽 弟省蘭

吳省欽江蘇南匯人乾隆二十二年南巡召試賜舉人授內閣中書二十八年成進士改庶吉士三十一年散館授編修三十三年大考一等擢翰林院侍讀旋充貴州鄉試正考官三十四年充會試同考官三十五年充廣西鄉試正考官三十六年充會試同考官又充湖北鄉試正考官十一月充日講起居注官三十七年

充會試同考官十二月提督四川學政三十九年九月值學政更換之期上以吳省欽任事未滿三年無庸更換四十年擢右庶子四十四年遷侍講學士充浙江鄉試正考官四十五年提督湖北學政旋轉侍讀四十六年奏請將舊領湖廣學政關防換給湖北學政關防以符名制四十九年擢光祿寺卿五十年二月命在上書房行走十一月遷順天府府尹十二月同兼管順天府尹尙書曹文植奏言順天府學樂舞生例由童生挑充尙未足額請准令生員兼充嗣由樂舞生入學者仍不開缺其有鄉試中式者再另選補下部議行五十一年六月奏言京城糧價漸增而米豆二價尤爲翔貴請將京員秋俸先支十分之六以冀民間流通諭曰京員秋俸向例以中秋前後起支今年遇閏又遲一月米石不能及早流通價值未免日漸昂貴自應設法調劑但該府尹所請先支十分之六則京員須作兩次支領多費腳價非所以示體恤所有八旗及在京文武俸米俱著移前於閏七月初一日一體關支所稱黑豆一項每倉石例價八錢定於市價見昂時此次官豆酌量增作二兩四錢之處著交戶部將見在存倉豆石通盤查奏足敷官用之外所餘豆石卽照該府尹所定價值儘數照例官賣一面奏聞一面辦理仍行令

盛京買補運京還倉並著步軍統領衙門會同順天府嚴加訪察務使米豆流通糧價平減而市儈無所施其伎倆官民兩有裨益最爲妥善八月監臨順天鄉試五十二年十二月奏陳軍流子孫入軍籍應試之例未定年限且不論原籍有無可歸與配時之是否隨行請嗣後軍流子孫除係到配所生成丁在十三四歲以上者准作軍籍外其在本籍所生必須發配時本籍驗明實係隨行俟其隨配十年方准入軍籍仍咨明本籍備案以杜捏冒詭詐之風從之五十三年三月奏陳親試防弊事宜請將白摺試卷各放長三幅以便起草嗣後不得另紙起草以杜替潤之弊又請於士子官員考試之日頒一內府圖書令監試王大臣於午未未初膳真之頃將卷面鈐一圖記以杜掣換之弊又以散館大考日例於西廂領賞午飯出入往來員役雜選請停止酌散茶餌以歸簡便諭曰吳省欽奏殿試朝考散館大考俱請給發內府圖章鈐記但內府所貯寶章乃御用之件卽係閒散圖篆亦不值於試卷紛紛鈐用已有旨令監試王大臣逐卷畫押以作標記矣所有條奏試卷添用稟紙停用恩賞午飯仍照所請行又奏請將江蘇安徽江西浙江廣東山西六省丙午以前三科由俊秀貢監生中式舉人俱行覆試下部議行尋

有旨停止五十四年二月諭曰舉人覆試必須於揭曉後舉行方可以鑒別優劣若將舊科舉人補行覆試則相隔日久舉業荒疎亦所難免且此等舉子皆係上數次會試落第之人其文藝平常可知如果舉業不進卽此次會試仍難入彀是以上年秋閒曾降旨將鄉試覆試之例停止惟於會試後舉行覆試吳省欽條奏於未經會試以前將上三科由俊秀中式者先加考試殊覺多此一舉所有此次覆試之舉人等均著准其會試五十六年擢禮部右侍郎卽兼順天學政五月調工部右侍郎五十七年充江西鄉試正考官五十八年充會試副總裁五月會試覆試停科甚多原卷復又磨勘四名吏部議處考官各按舉子停科名數罰俸至十餘年奉旨嚴行申飭九月轉工部左侍郎五十九年充浙江鄉試正考官十一月命署經筵講官六十年充浙江鄉試正考官八月復任順天學政嘉慶二年七月奏承德府平泉豐甯向各廩生三四名不等而灤平建昌赤峯朝陽四屬各僅一名設此人復有事故勢必仍用地鄰保結似非體制應請照新設府學准照州學額之例於原額十六名外再添十四名承德平泉豐甯文風較盛定六名灤平建昌赤峯朝陽各三名其增生亦請添足三十名尋部議承德平泉豐甯各四名

餘俱照所請行八月補吏部右侍郎十二月轉吏部左侍郎三年三月遷都察院左都御史四年正月奏請將賊首王三槐卽行正法又稱候補知府李基曉諳兵法有手車火雷列卦圖舉人王曇能作氣按掌辟易多人請加試看諭曰吳省欽摺奏內請將監禁賊首王三槐卽行正法一條何待爾言前此未及辦理之故欲俟川北逆首羅其清解到一併交軍機大臣會同刑部審辦豈有將此等首逆重犯釋放令其招降同夥之理至所稱候補知府李基曉諳兵法有手車火雷列卦圖又舉人王曇能作氣按掌辟易多人請加試看等語殊屬大謬前此特頒諭旨廣開言路吳省欽爲風憲之長於和珅福長安二人無一言舉劾自係畏其聲勢及將和珅福長安革職鞫問後伊尙心存畏怯緘默不言茲見科道等紛紛密封陳奏伊任總憲不能不一奏塞責所言竟屬荒謬試問伊所稱李基所著手車火雷列卦圖說較本朝訓練之九進連環孰爲得用其作氣按掌之語卽稗官野史所謂掌心雷者是也係屬邪教見當剿辦教匪之時正應將妖言左道痛絕根株方嚴禁之不暇豈可轉引而試驗吳省欽身爲臺長不知政體惑於邪言妄行瀆奏與學習邪教者何異耶吳省欽著交部嚴加議處議上諭曰吏部議處左都御

史吳省欽條奏摺內語多不經以伊平日學問而論尙不至如此迂誕蓋伊自揣係和珅私人且在學政任內聲名平常恐被人列款彈劾故爾避重就輕先爲此荒謬之奏藉得罷官回籍遂其田園之樂其居心取巧大率不出此但此係誅心之論吳省欽劣蹟旣未敗露朕亦不爲已甚姑免深究卽論其陳奏荒謬已難勝臺長之任吳省欽著照部議革職回籍八年六月故弟省蘭乾隆二十八年由舉人考取咸安宮官學教習三十二年考補國子監學正三十六年升助教三十九年充四庫全書館分校官八月鄉試屆期省蘭未成進士例不開列特命充順天鄉試同考官是年京察一等四十二年京察復列一等引見均得旨記名四十四年戊戌會試未中式諭曰國子監助教吳省蘭學問尙優且在四庫館校刊羣書頗爲出力著加恩准與本科中式舉人一體殿試尋列二甲改翰林院庶吉士四十五年四月散館授編修十二月充文淵閣校理四十八年充順天鄉試同考官以四庫館第一分書成交部議敘五十一年充浙江鄉試正考官是年大清一統志成恩敘儘先升用五十三年四月擢右春坊右贊善五月命提督湖北學政九月轉左春坊左贊善十二月擢右中允五十四年轉左中允差旋擢侍講五十五

年充日講起居注官五十六年大考一等擢詹事府詹事命在南書房行走纂辦石渠寶笈時省蘭之兄省欽以工部侍郎督學順天因病奏請回京調理上卽以省蘭代之五十七年二月劾奏督臣梁冑堂保薦教職並未會商輒行具題上嚴飭梁冑堂並通諭各省督撫於保薦甄別地方官員有似此並不會商輒以一人專主卽會銜具題者必重治其罪八月各省更換學差屆期省蘭奉旨留順天學政十月擢內閣學士兼禮部侍郎具摺謝恩諭曰吳省蘭謝升授內閣學士恩摺內有宣批諾之謨一語其意以內閣學士職司批本故用批諾二字但史冊所載如後漢之南陽宗資主畫諾係太守不事事而言南齊江夏王蕭鋒學畫鳳尾諾係屬藩王典故均與批本無涉卽朕批閱奏摺用硃筆批寫覽字亦不得謂之批諾是諾字雖係用古此處殊欠切當朕從不以語言文字責人因該學政尙稱讀書人摺內用字未妥降旨訓示伊亦不必稍存畏懼也十二月充文淵閣直閣事六十年回京仍入直南書房九月命稽查中書科嘉慶元年四月充殿試讀卷官九月充會試副考官三年正月擢工部右侍郎命閱大考翰詹卷旋充浙江鄉試正考官復奉命任浙江學政四年正月調禮部右侍郎大學士和珅以罪伏誅諭

曰吳省蘭係利珅引用之人雖無人列款參劾但未便俾列卿貳著降爲編修撤去學政不必在南書房行走五月擢右中允復充日講起居注官尋奉命提督湖南學政七月擢侍講十二月奏庶民伏闕上書類多希冀恩榮未必實有忠愛迨奉諭旨輝耀還家稱雄鄉里把持公務在所不免其甚者聚衆釀金代倩作稟共推一人來京爲嘗試之計皇上以誠求而宵人以詐應將來遇地方正事深恐挾制窒礙乞防其漸上是之旋舉發江蘇同知李焜開列胞姪等名寄稟請託事諭曰李焜在蘇州總捕同知任內審理生員馬照等一案妄拏拖累衆怨沸騰降補知縣是本以陵辱斯文獲罪今又欲使子姪濫廁士林以致敗露可見天理昭彰絲毫不爽著將李焜發往軍臺効力贖罪吳省蘭據實具奏甚屬公正著交部議敘六年奏苗疆永綏廳於乾隆二十五年設學今請照乾州鳳凰二廳一體選拔貢生一名又奏衡永寶辰沅郴靖等府州屬搖童向例另編字號每學各取三名查邵陽縣五屆無人應考而芷江縣搖童赴試者在二百人內外應將邵陽縣減額二名撥芷江縣定爲取進五名仍留一名於邵陽爲將來取進之額若有遷易再爲因時制宜均下部臣並撫臣議行八年擢侍講學士九年二月聖駕幸翰林

院與分韻賦詩尋吏部以京察三四五品京堂官帶領引見奉旨吳省蘭年已就衰才力不及著以原品休致十五年卒

趙佑

趙佑浙江仁和人乾隆十五年舉人十七年成進士改庶吉士二十二年散館授編修二十五年充順天鄉試同考官二十六年充會試同考官十月改京畿道監察御史二十八年命稽察豐裕倉二十九年四月署掌湖廣道監察御史八月署掌江南道御史三十一年四月署戶科給事中八月丁母憂三十四年服闋補福建道御史十二月命稽察通州西倉三十五年正月擢工科給事中九月充武會試同考官十月命監視黃村賑廠三十七年遷鴻臚寺少卿六月轉光祿寺少卿三十九年轉通政司參議八月充順天鄉試同考官十月擢太常寺少卿四十一年稽察左翼宗學四十四年十月轉大理寺少卿四十五年六月擢太僕寺卿旋充山東鄉試正考官四十六年授山東學政奏請重修曲阜縣沂河旁先賢有子墳墓並肥城縣西北七十里有莊祠廟以七十二世孫守業承襲五經博士奉旨允行四十八年六月遷太常寺卿五十一年六月轉大理寺卿五十三年充江西

鄉試正考官復稽察右翼宗學五十四年二月佑以翻車傷手上特命太醫院官診視尋愈六月充江西鄉試正考官旋授江西學政五十五年十二月奏曰江西人文較盛而考試弊竇亦較多士子以積習爲安臣於歲試嚴行整飭各生童頗知行險作奸之有害無利不敢輕圖僥倖而外來招撞棍徒亦就斂戢惟生員有越號犯規之人其意固以生員錄科有棄取無下等遂至積玩不悛臣查出後雖訊無別情仍分別四五等停廩戒飭至武生習尙健訟甚於文生皆由武生例係歲科併考三年僅赴學院衙門一次其平日玩視月課教官復庸懦無約束以致違抗多端臣於每府科試取齊時飭將歲取新舊武生到棚面課一次使教官得循教奉行臣亦觀察其邪正詳加訓飭有弓箭合式者准作錄遺以示鼓勵奏入上曰毋久而懈可也五十六年十二月署江西巡撫姚棻奏曰學政趙佑性情耿直待士頗嚴批閱文字亦少許可所到之處懲懷挾拏槍冒斥劣生凡生童傳遞代倩等弊查出立予重懲均知斂跡聲名甚好士子輿論俱爲畏服報聞五十七年擢都察院左副都御史調安徽學政五十八年調福建學政六十年以福建吏治廢弛入奏諭曰趙佑由安徽學政調任福建已及三年該省吏治廢弛自必早

有見聞趙佑係副都御史職司糾察三年之久何並無一字奏聞及朕降旨查辦始爲此奏以爲見長地步大負委任著交部議處尋部議降二級調用得旨改降三級留任嘉慶元年正月命稽察右翼覺羅學充武殿試讀卷官旋授工部右侍郎二年八月轉左侍郎十二月調吏部右侍郎三年三月轉左侍郎八月充順天鄉試副考官尋授順天學政四年十月擢都察院左都御史五年二月卒遺疏聞諭曰左都御史趙佑服官有年勤謹供職茲聞溘逝殊爲軫惜所有應得卹典該部察例具奏尋賜祭葬如例入祀鄉賢祠子日熙正三品廕生前任江蘇長洲縣知縣

汪承沛

汪承沛安徽休甯人父由敦官吏部尙書協辦大學士乾隆二十五年奉上諭汪承沛賞給廕生著授爲額外主事十一月籤掣兵部車駕司學習旋在軍機章京上行走二十七年七月補戶部廣西司主事三十一年四月擢戶部江南司員外郎三十二年二月簡放坐糧廳三十三年十月記名以繁缺知府用十一月升刑部江西司郎中三十四年授山東武定府知府時倉場總督奏請以升銜暫留坐

糧廳任三十五年正月授貴州平越府知府呈請親老改補近省八月授福建邵武府知府嗣經軍機大臣轉奏伊母年近八旬懇請留京供職上加恩以戶部郎中用十月補廣西司郎中三十六年九月上命戶部侍郎桂林前往四川軍營辦事汪承沛馳驛隨往三十七年八月以阿爾泰奏宋元俊會參桂林乖張欺妄一案革職拏問上命福隆安馳往勘問旋鞠實其發銀贖取兵丁係司員汪承沛及知州曹焜等以巴底巴旺十兵尋覓緣營迷失之兵頗爲出力向糧員取銀備賞曾稟桂林支發並非欲賞金川之人奏入諭曰汪承沛不過隨往辦事司員其與曹焜相商取銀備賞一節如果向金川贖取不特桂林罪無可寬卽汪承沛亦當從重治罪今訊明實係備賞巴底巴旺之人且經宋元俊與汪騰龍屢次教令串供汪承沛不實扶同諉卸傾陷桂林尙屬具有本心著從寬免罪復還其郎中帶革職留任仍在軍機章京上行走四十一年金川軍務告竣議敘軍功加一級是年十二月丁母憂回籍四十四年十二月服闋赴京四十五年四月奉旨令先行食俸遇有郎中缺出卽行補授七月扈從熱河記名以三四品京堂用八月擢都察院左副都御史四十七年二月升授刑部右侍郎六月調工部右侍郎時甘肅

參辦冒賑案議西監一款省費取巧著行禁革毋許應試及別途出身汪承沛奏稱人數甚多乞開以自新之路請令加足京監之費另易部照准其考試出身得旨允行四十八年正月上較閱射連發中的賞戴花翎四十九年七月山海關副都統果星阿奏參臨榆縣凌世御於民占衙門官地袒護不辦各款上命往查辦十二月轉工部左侍郎五十年六月調戶部右侍郎管理錢法堂兼署兵部右侍郎五十二年十月武會試奉派知貢舉十一月漢川縣監生羅正榜控書吏張志忠侵賑一案上命兵部尙書慶林偕汪承沛前往審訊旋鞠實奏聞奉硃批是不必欲速只要得真五十四年二月偕兵部右侍郎伊齡阿奉派會試知貢舉八月復同派順天鄉試監臨以失察頂冒代倩等弊下部嚴議諭曰伊齡阿汪承沛派辦鄉試監臨並會試知貢舉業已三次因伊二人在侍郎中尙能辦事乃伊二人一味邀衆舉子之譽並未實力查察以致士子串通胥吏作奸犯法見於萬治庭等舞弊一案交部嚴加議處著先解任聽候部議尋議降二級調用五十五年五月命署理通政使五十六年正月授順天府府尹十一月擢左都御史五十九年因戶部侍郎任內管理錢法堂失察所鑄錢文輪廓字畫模糊部議降三級調用

上加恩改爲革職留任嘉慶四年正月授刑部右侍郎十月調工部右侍郎十二月奉上諭汪承沛之子汪本申係承沛任副都御史所得之廕昨經帶領引見內用照例以七品小京官選補但念汪承沛從前曾任侍郎見又擢用侍郎伊子汪本申加恩作爲一品廕生著以主事用五年正月轉補工部左侍郎二月擢都察院左都御史五月命在紫禁城騎馬六月補授兵部尙書兼管順天府府尹事務九月奏萬年吉地工程仍懇照向例加增銀兩上以前次奏請節省之處殊屬冒昧草率下部議處尋議銷去尋常紀錄二次十一月兵部議奏京營左右翼總兵移駐各事宜因錯會移駐二字將所有分汛管轄及衙署關防養廉等項概行議駁汪承沛初有異議後復隨同畫彙交部議處尋議銷去尋常紀錄一次六年正月奏稱近京地面民多土少私典旗產旣干例禁而民置民業又無地可售欲求近京州縣民力寬裕惟有官田變價始能有益上令軍機大臣會同戶部議奏尋議以例禁久嚴未便遽行更張遂寢六月永定河水漲發居民多被淹沒上命汪承沛偕副都御史陳嗣龍劉濱順天府府尹閻泰和同該城御史於戶工二部錢局內領出制錢二千串帶赴永定門右安門外一帶按名撫卹尋奏以各村災民

見俱搭蓋窩篷居住俱可給米造飯酌擬每日日給米三合三勺小口減半得旨
俞允七月又奏稱散賑約計日需米八十七八石原領米二千四百石不敷一月
之用請再賞撥京倉稜米二百四十石得旨俞允尋奉上諭汪承沛等率同該城
御史及承辦官員等實心經理五十餘日放散稽察俾災黎均霑恩惠所辦尙屬
妥協均著交部議敘尋議加紀錄三次時大興縣所屬馬道村等處民人進城求
賑已據順天府府尹衙門查係勘不成災例不應賑之區汪承沛奏請發銀一萬
五千兩賞給求賑民人諭曰勘不成災地方向只有蠲無賑章程本屬一定若遽
將不應給賑之人例外加賞誠所謂惠而不知爲政焉得人人而濟之儻各省紛
紛效尤又將如何辦理朕非於賑貸稍有靳惜但國家惠下之舉自有等差若於
例外曲爲施恩則例得邀恩者轉不免心生缺望汪承沛等所請實大不知事體
矣十一月以辦理順天鄉會試供應於內城添設肉行經紀事交部議處七年六
月上將幸木蘭汪承沛奏請停止行圍奉旨申飭八月奉旨調補都察院左都御
史不必兼管順天府府尹事務八年七月署兵部尙書十二月以辦理萬年吉地
工程加二級准於前所降二級留任之處抵銷九年九月以北城橫街地方賊夥

摺縛事主一案未經奏聞經副都御史陳嗣龍奏參諭曰汪承沛上年奏請停止行圍不顧國家習勞肆武大典其偷安好逸之情已可概見朕是以將伊罷退尙書授爲左都御史臺垣職司言事遇有控案尤應據實奏明伸冤理枉以冀下情上達若總持風憲者遇事顛預消弭何以稱朝廷耳目之官諸臺臣復何所效法乎汪承沛年就衰邁眼目昏花若自揣精力不勝卽應早爲引退乃經朕屢次詢問尙云勉力供職並無請告之意及辦理公事毫無振作見在北城摺縛事主一案著傳到汪承沛及審辦此事之京畿道滿漢御史交軍機大臣將陳嗣龍所奏情節令其一一登答旋詢實奏聞諭曰汪承沛性耽安逸已於前旨明白宣示至伊總持風憲於此案報到時意欲化有爲無以致屬員迎合其意改供蒙詳且伊年老衰邁眼目昏花實不勝臺長之任本應褫職姑念伊係原任尙書汪由敦之子舊臣後裔著加恩以二品頂帶休致十年四月奏請回籍六月於中途卒諭曰汪承沛之父汪由敦前在內廷供職宣力有年汪承沛由廕入官洊擢卿貳亦著勤勞因其年老目花諭令休致今聞溘逝殊堪憫惜著加恩照尙書例給予卹典子本申嘉慶元年廕生蒙恩賞給主事十三年七月以辦理萬年吉地工程草率

各員分別治罪一案奉旨汪承沛見已病故卽將伊子汪本申所賞廕生著卽革去十四年九月恭獻萬壽詩冊恩賞七品京官

周廷棟

周廷棟初名元良順天大興人由乾隆三十七年進士以刑部主事用四十六年補奉天司主事四十八年升廣西司員外郎五十年升浙江司郎中兼總辦秋審五十一年改福建道監察御史五十三年轉掌雲南道監察御史五十八年升兵科給事中五十九年轉刑科給事中嘉慶四年疏請停大員罰繳養廉之例以肅官方而杜科派得旨下部議行六年命巡視天津漕務七年擢光祿寺少卿軍機大臣傳旨元良名未協著自行酌改尋更名廷棟補通政司副使八年三月升太僕寺卿七月命同署侍郎那彥成赴永平讞樂亭民人韓義琦控命案及宗室西靈額控爭地畝案得實奏聞九年授大理寺卿八月升左副都御史提督四川學政時川省軍務告竣閭閻復業廷棟奏言體察時宜亟須整頓四事一裁汰冗役以省擾害一清理詞訟以免拖累一嚴治奸匪以安良善一舉劾州縣以示激揚從前軍務旁午不得不多設差役地方控案勢難依限完結義民鄉勇踊躍從公

者固多其中劣監豪衿把持衙門者亦不少州縣賢否亦未暇詳細甄別均宜逐一清查以符政體上躋之十年擢刑部右侍郎十一年轉左侍郎六月以研鞠迷拐案稱旨恩加紀錄三次十二年正月授都察院左都御史二月命同侍郎廣興馳往河南查辦糧道孫長庚被控貪私款蹟及嵩縣令王光治被控虧欠社倉淨收錢糧二案並赴山東讞獄經步軍統領及都察院奏東省民人京控共十餘案先後咨交廷棟等鞠實問擬如律報聞又李臨控李瀚霸產不分居喪聽戲一案廷棟等訊臨瀚之祖已經析產本無不均李臨以見任通判捏病開缺覲產結訟李瀚以六品職銜制中觀劇均請革職解交刑部質訊以免再滋訟端諭曰此案既經周廷棟等提訊明確各予褫革均屬情真罪當不必解交刑部以省拖累九月事竣回京十月疏言健訟積弊請詳覈情詞除實係冤抑難伸及官吏骫法有據者方准奏聞外餘咨回本省審辦按期行催開單彙奏其有主使挑唆及挺身包攬挾嫌誣陷逞刁翻控等情通飭禁止以杜訟風又言大宛兩縣童試冒考甚多請查辦以肅學政並照例清查冒籍諸生已中鄉會試及見任職官勒限改歸原籍均得旨允行十三年十二月廣興以奉差劣蹟逮問諭曰周廷棟與廣興同

赴東省審案閱時半年之久於伊需索受贓各款竟毫無聞見近日屢經召見垂詢周廷棟不但力言其並無騷擾營私情事並以廣興辦事才具明敏竟似外間物議冒加以不韙之名若謂伊實未聞知則係形同木偶儻竟知而不言則係有心徇飾且伊在東省供應亦需日費十餘兩咎有應得周廷棟著交部嚴加議處議上諭曰朝廷風憲大臣專司糾劾遇有營私骫法本應隨時奏參方爲盡職前此周廷棟與廣興同赴山東審案於廣興需索騷擾之處自必確有見聞乃復命後竟無一字提及近因廣興緣事革職仍不直陳並以廣興才具明敏支吾掩飾昨據吉倫查訪具奏有周全天下事廣聚世閒財之謠周廷棟雖未隨同婪索而其庸懦無能卽此可見復令軍機大臣傳詢伊亦稱曾聞此語並廣興排斥供應空池唱曲等事伊亦有所知何以經朕詢問尙不據實奏聞是其瞻徇友誼而事上轉不以誠周廷棟總司風紀尤不應出此部議降四級調用固屬照例辦理但周廷棟人本平庸年亦衰邁且又扶同隱飾豈可再邀錄用周廷棟著賞給五品頂帶卽予休致十四年正月諭曰據山東查明覆奏廣興審辦李瀚一案得銀至數萬兩之多廷棟於廣興所得贓款竟無見聞該省供應廣興極其繁華周廷棟

照常預備伊卽不加挑斥甯不疑及廣興之任性作威爲婪索地步且於朕詢問時猶以廣興尙屬敢言廣興盜弄威福恣其慾壑奇貪奇酷品行卑污獲罪在此朕豈因廣興敢言加之罪戾乎是其庸懦無能奏對又復顛倒失實本應發往新疆姑念其年已衰邁免其遠戍但周廷棟如此辜恩亦何顏再膺章服之榮著革去五品頂帶永不敘用十五年二月故

錢樾

錢樾浙江嘉善人乾隆三十七年進士改庶吉士四十三年散館授編修四十五年充陝西鄉試正考官四十八年提督四川學政五十三年上書房行走五十四年三月以曠直部議革職上改爲革職留任八年無過方准開復尋改四年開復給半俸六月充江西鄉試副考官六十年二月京察一等擢右贊善六月充江西鄉試副考官九月轉左嘉慶元年二月提督廣西學政洊升左庶子二年遷侍講學士三年五月轉侍讀學士十二月遷少詹事四年正月差旋仍在上書房行走二月遷詹事尋授內閣學士三月升禮部右侍郎五月轉左侍郎七月提督江蘇學政先是吳縣知縣甄輔廷以錢債細事擅責生員吳三新諸生不服誼訴同知

李焜用刑酷訊波累無辜學政平恕曲徇所請斥革生員二十五人上聞之解平恕任命樾馳赴蘇州先復諸生衣頂樾將首先滋事之馬照等三人並予開復上飭之下部議處五年調吏部右侍郎六年轉左侍郎回京調戶部右侍郎兼管錢法堂事務仍兼署吏部左侍郎八年調吏部右侍郎九年失察書吏舞弊將告病治中趙曰濂虛選運同命革去左侍郎交都察院議處旋降補內閣學士越數日樾復陳奏趙曰濂告病因科鈔尙未到部不曾開缺其虛選運同本循照舊例辦理至書吏撞騙係經承轉雇之藁工貼寫堂司各官均不知其名上以其曉曉置辯強詞奪理下都察院嚴議革職上念樾向在內廷行走有年尙屬勤慎加恩賞給編修十年四月擢鴻臚寺少卿六月提督山東學政十二年回京遷大理寺少卿命仍在上書房行走十三年補內閣學士丁母憂歸服闋因疾陳請給假命俟病痊時來京另候擢用十九年入覲具陳病體不能供職狀諭令回里養疴二十一年六月卒於家二十三年十一月江西浙江兩省督撫先後奏請以原任侍郎萬承風內閣學士錢樾入祀鄉賢祠諭曰伊二人平日居官不過循分供職並無傑出謀猷祇以官登卿貳本籍紳士私相稱譽遂得崇奉鄉祠豈合古人表里旌閭

之義除已往毋庸追論外嗣後各省督撫遇有呈請入祀名宦鄉賢者務覈明其人生前居官政績確有裨於國計民生臚舉事實方准具題禮部秉公覆覈再行具奏請旨遵行如僅以人品端方學問優長空言譽美並無實蹟者該部卽行議駁以昭慎重時萬承風先經禮部議准入祠奏奉俞允錢樾正在覈議尙未具奏部臣因請欽定遵行上以該部堂官取巧推諉嚴飭之仍令覈實定議尋議錢樾並無實在事蹟有裨國計民生未便以鄉曲私譽遽准入祠奏入奉旨依議子焯東河候補同知熙東河候補通判孫堦四川候補鹽場大使

萬承風

萬承風江西義甯州人乾隆四十六年進士改庶吉士四十九年散館授檢討五十年充順天鄉試同考官五十三年正月命在上書房行走五十四年三月以上書房曠課部議革職得旨改爲革職留任八年無過方准開復八月充順天鄉試同考官五十五年二月丁父憂回籍五十七年服闋入都供職仍在上書房行走六十年充雲南鄉試副考官嘉慶元年十一月擢右贊善二年二月轉右中允三月遷侍講五月轉侍讀三年三月大考四等上以萬承風文理尙屬清順祇係

謄寫題目次序違式著從寬降爲檢討仍罰俸四年六月充江南鄉試副考官四年正月提督廣東學政十一月諭曰萬承風前因大考試卷繕寫違式降爲檢討但其文字俱屬工穩不過偶錯格式其咎尙輕所有右贊善一缺著加恩以萬承風補授五年四月轉右中允五月奏海口白港外有盜船二十餘隻停泊並無營弁緝捕上命兩廣總督吉慶查明具奏尋吉慶覆奏請將管轄該處洋面之總兵西密揚阿領兵船搜捕之遊擊魏大斌何口交部議處時有韶州府之仁化縣民人葉茂對赴京控粵東應考生童學書索取紅案陋規等款上命吉慶查訊尋吉慶奏紅案陋規已經學政萬承風出示革除臣復遵旨會同萬承風詳切出示將陋規概行禁革報聞十月升侍講六年五月遷右庶子十月升侍講學士十二月入京供職命仍在上書房行走七年充日講起居注官八年三月轉侍讀學士十二月充文淵閣直閣事九年四月擢少詹事尋充山東鄉試正考官升詹事提督山東學政十年三月授內閣學士兼禮部侍郎仍留學政任六月授禮部右侍郎閏六月命來京供職九月充武會試知貢舉十一年十一月因上書房退直過早並不將散直時刻告知管門太監登記奉旨罰俸半年十二年充浙江鄉試正考

官尋提督江蘇學政十一月轉禮部左侍郎仍留江蘇學政任十四年五月奏請開缺回京祝嘏諭曰萬承風奏懇請開缺回京祝嘏一摺實屬冒昧不諳體制本年朕五旬萬壽前於直省督撫將軍副都統提督各派出數員來京隨班慶祝並早降明諭原恐未經派出各員紛紛瀆請至學政係三年更替之差向無陳請入覲之例從前皇考高宗純皇帝五旬六旬七旬八旬萬壽聖節其時俱未聞有學政開缺來京慶祝者萬承風所請不准行著傳旨嚴行申飭並著交部從嚴議處不准以罰俸了事部議於降四級調任本例上加等降五級調用諭曰朕於內外臣工恩均一體從無歧視本年各省祝嘏大員經朕派定之後其餘概不准妄行瀆請萬承風係在內廷行走之員況係阿哥師傅尤當敬謹遵循乃輒稱入直有年栽培逾分鋪敘依戀之語以見其恩遇獨厚更屬非是吏部議以降五級調用咎實應得姑念其人本糊塗著加恩改爲實降一級以內閣學士補用仍帶降四級留任處分改補安徽學政九月上以萬壽慶典加恩內外臣工諭曰內閣學士萬承風著開復奏請開缺來京降四級留任一案十一月仍授兵部右侍郎十五年正月轉左侍郎二月考試鳳陽因定遠縣童生李希文被鳳陽縣役所辱生員

張廷籥以無辜被縛呈控承風據實具奏上命安徽巡撫廣厚秉公確查嚴訊定擬具奏尋經廣厚翰實將逞兇衙役及不安分童生各懲治如律十月安徽學政任滿疏上諭曰萬承風具題學政任滿一本朕詳加披閱其年月未經另葉書寫已照擬飭行矣至其所書前銜有內廷供奉字樣尤爲不合會典所載官職本無此等名目萬承風何得任意形諸章奏著交部察議伊原係上書房行走本欲俟到京之日仍令在上書房行走今觀其近日情形念念不忘內廷殊屬躁妄著不必在內廷行走十六年五月署經筵講官四月命閱庶吉士散館卷充殿試朝考請卷官六月諭曰萬承風本係二阿哥師傅著仍在上書房行走同二阿哥講習十二月命充經筵講官十七年二月命閱考試翰詹各員卷九月因病請假奉旨俞允十一月奏請開缺諭曰萬承風著准其開缺調養俟病痊之日另候簡用十八年十二月卒二十三年十月兩江總督孫玉庭等據呈題請入祀鄉賢祠經禮部奏准十一月諭曰直省名宦鄉賢必其人實有嘉言懿行方可俎豆馨香使後人知所則倣若以碌碌無所表見者廁名其閒則賢否混淆轉不足以興士民景仰之思卽如近日原任侍郎萬承風內閣學士錢樾皆經禮部奏准入祀鄉賢伊

二人平日居官不過循分供職並無傑出謀猷祇以官登卿貳本籍紳士私相推獎遂得崇奉鄉祠但似此濫竽凡居官通顯者身後人人得登祀典豈合古人表里旌閭之義除既往者毋庸追論外嗣後各直省督撫遇有呈請入祀名宦鄉賢者務覈其人生前居官政績確有裨於國計民生臚舉事實方准其具題禮部秉公覆覈再行具奏請旨遵行如僅以人品端方學問優長空言譽美並無實蹟者該部卽行議駁以昭慎重承風子方雍見任刑部主事

劉鳳誥

劉鳳誥江西萍鄉人乾隆五十四年一甲三名進士授編修五十六年大考二等超擢侍讀學士五十七年命提督廣西學政嘉慶元年丁父憂四年四月服闋時恭修高宗純皇帝實錄派充纂修官六月補侍讀學士五年充湖北鄉試正考官六年二月署國子監祭酒旋遷太常寺卿諭曰劉鳳誥前派充實錄館纂修均屬妥協見升太常寺卿官職較大著授爲總纂遇陳奏事件列名在副總裁之後七月充山東鄉試正考官旋命提督山東學政鳳誥疏謝諭曰衡文取士汝所優爲整飭士風咸歸雅正尤爲要務至於年歲豐歉大吏賢否皆應隨時密奏不可緘

默亦不必存見長之念撫拾細故諸宜得中辦理勉之七年二月遷內閣學士兼禮部侍郎銜四月奏濟甯州屬金鄉縣童生張敬禮等以阜役曾孫冒考爲生員李玉燦等所訐知縣汪廷楷並未詳查率准送考及州試時知州王彬復不據控審明扣除致闔邑人心不服幾至罷考命解汪廷楷任交巡撫和瑛秉公審辦尋給事中汪鏞奏承審官員將原告刑偪誣認武生李長清亦赴都察院具控上以此案劉鳳誥曾奏參於前命據實查奏鳳誥旋奏承審官有心黨庇並不追究被告人證轉將原告刑求挫辱並株連械繫多人且以奉旨解任之汪廷楷不行質審竟借捕蝗爲名令其回縣同署任提拏多人報復搜求士論沸騰衆情冤抑疏入上命侍郎祖之望往鞫得實鳳誥以不早陳奏傳旨申飭九年六月遷兵部右侍郎七月轉左侍郎八月任滿回京命充實錄館副總裁專勸彙本十一月兵部職方司漢主事員缺鳳誥等欲以京察調部之李鼎元擬補尙書劉權之以係題缺應用候補主事盧坤令咨查吏部吏部定例凡京察調部人員專補選缺一切留部人員題選兼補及纂例時誤入此條於滿官例冊遂誤以例文係專指滿員指駁並以漢官別有專條咨覆權之欲取閱專條聲敘復令敘彙行查鳳誥等益

疑其有私遂偕侍郎成書等聯銜劾奏謂盧坤爲權之中式門生明知違例妄希設法變通以曲遂其瞻徇之私實爲有心弊混并劾同官縉布等附和調停上命大學士董誥等查詢旋查明權之係照例辦理吏部亦將前後歧誤緣由自行檢舉命詢問鳳誥等自認冒昧並云見權之始終堅執不能無疑諭曰參劾事件必須查有確據方可形之章奏若以私心疑揣遽將瞻徇弊混等詞砌列彈章試思此等情弊如果詢明確實被劾之人應得何罪顧可取快筆端輕於誣捏乎且兵部覆查之彙係將李鼎元擬補祇於彙內咨取吏部漢員專條豈得謂之堅執有心攻訐此風斷不可長劉鳳誥等著交部議處尋部議降三級調用上加恩改爲降一級補授內閣學士充實錄館總纂官專司纂辦十年正月署經筵講官以恭進實錄纂本中誤刪謁陵儀注與歷年所載不同上召詢總裁知意出鳳誥交部嚴議尋議降一級留任從之六月命偕吏部侍郎恩普修輯國朝宮史十一年五月復升兵部右侍郎充實錄館副總裁十月調吏部右侍郎十一月以宮史續編內恭載聖製文法脫誤罰俸一年十二年正月以館書告成期近命鳳誥專辦館事俟畫一事竣再行辦理部務三月高宗純皇帝實錄告成以鳳誥纂辦彙本敬

恭戴事賞加太子少保銜開復修書降一級處分六月充江南鄉試正考官八月命提督浙江學政先是鳳誥偕尙書瑚圖禮奏翰林院官告病起俸與各衙門迥殊上命大學士董誥等查奏翰林官告病銷假例須一年會典所載各部院俱同而瑚圖禮覆奏於例文別無指實仍執前說上責其牽引附會率欲更易舊章並鳳誥下部議處尋議降三級調用上改爲降四級留任十四年四月巡漕御史英綸以贓敗鳳誥以濫行保送部議降二級調用上改爲降三級留任八月御史陸言劾鳳誥情性乖張終日酣飲每逢考試不冠不帶來往號舍橫肆捶撻上年鄉試該學政代辦監臨徧往各號與熟識士子講解試題酌改文字餽送酒食以致衆士子紛紛不服將生員徐姓等刊刻木榜徧揭通衢並造爲聯句書文又於上年將舉人章堃竹園闌入署內建造住房致附近民居人人惴恐上命戶部侍郎托津刑部侍郎周兆基光祿寺少卿盧蔭溥往按究出鳳誥於代辦監臨時聽受請託代素識士子徐步整印用聯號但訊無受賄情事其將章堃竹園闌入署內亦查勘屬實請比照官吏未接財物枉法杖一百流三千里律加重問擬請旨發往伊犁效力贖罪上以鳳誥疊荷恩施極爲優渥乃敢於科場大典聽受人情印

用聯號托津等擬發伊犁尙覺稍輕命革聯拏問交刑部覆審定擬尋大學士慶桂等覆按無異以加罪不入於死仍照原擬具奏十月諭曰劉鳳誥蒙皇考高宗純皇帝特達之知優加簡擢朕親政後復由學士用至卿貳又因恭修皇考實錄錫以宮銜論其平日學問優長原可當大省校士之任乃不自檢束竟敢於代辦監臨時爲應試生員印用聯號若徐步整一經中試則夤緣賄結當得何罪今劉鳳誥尙止聽囑徇情並無得贓實據擬以遣戍伊犁實屬罪所應得但伊犁路途雖遠而地方近成繁庶轉得在彼安處著改發黑龍江效力贖罪十八年釋回二十三年諭曰劉鳳誥恭纂皇考實錄曾有微勞學問亦可著加恩賞給編修來京供職道光元年因病呈請回籍調理十年卒子元齡四品廕生江蘇吳江縣知縣元恩山東冠縣知縣候補兩淮鹽運判

錢棨

錢棨江蘇長洲人乾隆四十四年鄉試中式第一名舉人四十六年會試中式第一名進士殿試一甲一名授職修撰臚唱日御製詩云龍虎傳臚唱太和曉日瞰國朝經百載春榜得三元文運風雲壯清時禮樂藩載咨申四義敷奏近千言詎

止求端楷所期進讜論王曾如可繼違弼我心存五十一年八月充順天鄉試同考官五十二年九月奉旨在上書房行走五十四年三月充會試同考官是月奉上諭朕閱內左門登載上書房阿哥等師傅入直門單自三十日至初六日所有皇子皇孫之師傅竟全行未到殊出情理之外因召見皇十七子同軍機大臣並劉鏞等面加詢問據皇十七子奏阿哥等每日俱到書房師傅們往往有不到者皇子等年齒俱長學問已成或可無須按日督課至皇孫皇曾孫皇元孫等正在年幼勤學之時豈可稍有閒斷師傅等俱由朕特派之人自應各矢勤慎卽或本衙門有應辦之事亦當以書房爲重況見在師傅內多係閣學翰林事務清簡並無不能兼顧者何得曠職誤公懈弛若此均著交部嚴議議上槩等奉旨俱著革職留任八年無過方准開復五十八年擢右贊善五十九年充廣東鄉試副考官六十年擢中允洊升侍讀充日講起居注官嘉慶二年擢右庶子尋轉左庶子三年三月擢侍講學士尋轉侍讀學士五月充雲南鄉試正考官七月命提督雲南學政四年三月擢內閣學士兼禮部侍郎仍留學政任尋以按試澂江臨安等府觸受瘴溼成蠱疾七月旋省猶力疾視事八月卒總督富綱奏槩考試各屬拔取

公平輿論翕服因病身故並無親屬隨帶在署臣親往視殮妥爲料理送回原籍
上憫之子喬雲見官四川候補縣丞

清史列傳 卷二十九

大臣傳次編四

勒保

勒保費莫氏滿洲鑲紅旗人父溫福太學士定邊將軍自有傳乾隆二十一年勒保由監生充清字經館謄錄二十四年議敘以筆帖式用二十七年九月補中書科筆帖式十一月充軍機章京三十三年京察一等三十四年授山西歸化城理事同知三十七年因延案不結被劾部議革職上念溫福征金川有功特原之以主事用仍在軍機處行走三十八年三月補兵部堂主事六月丁父憂四十年三月遷武庫司員外郎五月兼公中佐領九月服闋十月充寶泉局監督四十二年二月京察一等五月遷武選司郎中四十三年二月授江西贛南道三月調安徽廬鳳道六月丁母憂回京七月賞銀庫郎中銜充庫倫辦事章京四十五年五月擢辦事大臣六月遷太僕寺少卿九月服闋十二月擢內閣學士兼禮部侍郎銜四十六年七月授正藍旗漢軍副都統八月賞戴花翎四十八年調正藍旗滿洲

副都統尋遷兵部右侍郎均留庫倫辦事五十年召來京命仍在軍機章京上行走五十一年五月充右翼監督九月授山西巡撫五十二年七月署陝甘總督十一羽奏烏魯木齊巴里坤存營兵丁每歲操演僅有四月閒曠日多技藝難臻精熟請照內地例歲以八箇月爲率火藥鉛斤加倍備辦上可其奏五十三年七月寶雞縣民雷得本等傳習邪教僞造悖逆經卷訪獲首從各犯治罪如律上嘉之十一月實授五十四年十一月奏沔縣界連漢陰地廣難治請分隸漢陰通判管轄裁黃沙驛驛丞改設漢陰巡檢十二月奏嘉峪關外花海子地方緊要請撥兵駐守均下部議行五十六年大兵征廓爾喀道出西寧勒保以辦理駝馬軍裝口糧及口外安設臺站諸事妥協賞太子太保銜五十七年京察以稱職下部議敘五十八年奏涼州鎮屬莊浪營所轄俱沿邊扼要舊設參將不足以資彈壓查延綏鎮屬波羅協副將事務較簡請移駐莊浪改爲莊浪協副將卽將莊浪營參將移駐波羅改爲波羅營參將如所請行五十九年十月奏巴里坤鎮屬穆壘營牧廠弁兵向在安西河州靖逆三營內派撥查三營駐劄口外管轄十一營堡一經抽撥稽察難周請於附近之瑪納斯濟木薩二營內改撥從之先是安徽奸民劉

松以習混元教戍甘肅隆德縣復倡立白蓮教惑衆與其黨湖北樊學明齊林陝西韓龍四川謝添繡等謀不軌是月勒保訪獲劉松及其子四兒置之法各省傳教者亦先後就獲上命誅其首惡餘赦免六十年二月京察以勤職下部議敘四月奏安康縣麻柳壩沿河兩處距城窺遠應設營汛請移延綏鎮屬響土堡都司駐麻柳壩漢鳳營屬草涼驛千總駐沿河下軍機大臣議行六月調雲貴總督時閩浙總督福康安統兵剿湖南逆苗石三保貴州逆苗石柳鄧等勒保赴軍營安撫正大銅仁鎮遠降苗並督辦軍需嘉慶元年七月以經理糧餉得宜下部議敘八月雲南威遠廳屬黑猓札那等擾邊境諭勒保酌帶湖南軍營所調滇兵馳回剿辦勒保奏雲南兵丁見值攻圍平隴擒拏首逆之時未便遽撤俟到滇後察看情形如必需兵力再爲檄調上是之九月抵滇會巡撫江蘭已平猓匪而湖南軍營統兵大員福康安和琳相繼卒上命勒保仍赴湖南偕將軍明亮提督鄂輝等接辦軍務十月行次貴州適青谿縣教匪高承義等聚衆戕官勒保奉旨順道往剿十一月攻克大鬼壘賊巢擒高承義及賊目姚世高等餘黨悉就殲獲下部優敘十二月緬甸國遣使呈請入貢勒保以非貢期卻之諭曰所辦大錯緬甸遠在

荒徼聞本年舉行授受大典欣逢國慶備物申虔自不應拂其來意況事關外藩瞻覲勒保卽不得主見亦應將來使留關暫候請旨辦理乃竟率意徑行將表貢仍交來使帶回阻其向化之誠除已明降諭旨將勒保交部嚴議兼令軍機大臣擬寫檄文將勒保辦理錯謬緣由交江蘭知會該國王外勒保仍著傳旨嚴行申飭見在湖南苗匪剋期擒獲無須勒保再赴湖南著卽帶兵馳赴湖北黃柏山與福寧等會同剿賊立功自贖尋部議革職上加恩改爲留任初劉松等雖誅餘黨猶盛潛往來川陝楚三省煽亂於是湖北邪匪首作不靖延及川陝林之華覃加耀聚衆踞長陽縣黃柏山署四川總督福寧攻之不克勒保旋往會剿連戰敗之二年二月乘勝薄坡頭卡俘馘甚衆毀其卡賊巢垂破而貴州南籠府狎苗王囊仙等叛復命勒保回黔討之王囊仙者故洞灑寨苗婦富丈寨苗韋七結髮以囊仙有幻術羣苗信之推爲首以作亂分遣賊黨大王公李阿六王抱羊等圍南籠府及府屬之永豐黃草壩捧鮓新城册亨安順府屬之永寧歸化各城册亨旋被陷滇黔道梗三月勒保率兵五千至以關嶺爲進剿南籠要路卽分剿永豐等處亦所必經定議由關嶺進兵又防賊苗竄逸令總兵德英額扎郎阿袁敏分堵東

西北三面南面界連滇粵咨兩廣總督吉慶雲南巡撫江蘭撥兵防守勒保率臬司常明副將施縉等由鎮寧進擊關嶺凡兩晝夜達關嶺對面之大坡嶺密分兵爲左右隊閒道抄至關嶺後自統大兵由中路進賊數千人方拒戰嶺後兵突登嶺賊驚卻大兵乘之殲千餘焚兩旁苗寨殆盡遂克關嶺得旨獎賚四月分兵攻巴隴聖下之降葫蘆聖菜子河螞蝗等等寨一百五十二關嶺後路肅清乃統兵進克安籠堡抵永寧州城時副將巴圖什里已解永寧圍都司周廷翰往援歸化廳圍亦解進抵安南縣提督珠隆阿總兵張玉龍七格以師至勒保令珠隆阿率偏師從花江募復司擊永豐賊自率張玉龍七格由安姑排沙口趨新城道經下山塘賊築卡拒冒雨夜攻之立毀卡奪高伍坪等寨八賊退踞新城外海河橋勒保命縱礮遙擊陽作進攻勢潛遣兵從下游躡渡襲其後賊大潰新城圍解疾引兵向南籠南籠城西北碧峯山郡扼要處前爲望城坡賊於坡上樹木城二遏我師夜襲破之焚山下賊寨七賊奔山巔負嶠守山後魯溝卡子河普坪等處羣賊蠢聚勒保所部兵除分防外僅二千餘度難猝克珠隆阿亦以兵少阻花江不得渡因檄令前來會剿五月與珠隆阿謀取碧峯山戒諸軍毋動聞礮聲則迎擊別

遣將設伏以待賊果糾數千人下山犯大營礮發伏兵起營中兵出夾擊大破之
焚山上賊寨二十三乘勝奪羊腸山梁轉戰至新店焚賊寨十四復攻克水煙坪
以後路排沙口涼風坳及新城有賊苗窺伺慮其牽綴令珠隆阿帶兵截剿親統
大軍攻阿捧賊千餘匿八角崗中火熬之悉斃阿捧寨破六月克魯溝又克卡子
河前後俘賊以萬計師次普坪降南籠東鄉阿伍等等寨四十三西鄉那利鎖關
等寨六十一南鄉木咱牛角山等寨四新城後法泥等寨亦乞降奏入賞戴雙眼
花翎旋攻克普坪大王公中槍斃師由壩弄五孔橋抵南籠城解其圍上以南籠
士民被圍久能同心固守賜名興義以旌之嘉勒保功下部議敘閏六月駐軍興
義遣常明施縉攻黃草壩檄前所調滇兵由黃泥河進伺便夾攻大軍從後策應
克九頭山及馬鞭田擒李阿六洛美學莊等寨賊皆遁解黃草壩圍與滇兵合滇
黔之路始通賊聞官軍雲集且距洞灑當丈近恐破其巢也悉衆分屯各要隘爲
死守計圍捧鮓永豐益急七月勒保令德英額扎耶阿援捧鮓袁敏援永豐自率
常明施縉等擣賊巢連克李景寨安有山二龍口等處賊各要隘盡失於是困守
洞灑當丈兩寨中無敢出者八月德英額等解捧鮓圍以兵來會因分隊八五隊

向洞灑扎郎阿等領之三隊向當丈常明等領之同時進剿勒保率副將那麟泰往來督戰賊不能支縱火自焚都司王宏信千總洪保玉冒烈燄人擒首逆王囊仙韋七結鬢以出遂克洞灑當丈兩賊巢斬級千俘二千六百燒斃者萬餘獲器械牛馬米糧無算諭曰勒保督率調度悉合機宜用能生縛兇渠埽蕩巢穴所辦實屬可嘉著加恩封爲侯爵用昭懋賞此時首逆旣擒附和各苗寨望風震懾永豐册亨之圍自可不攻而解但王抱羊一犯與王囊仙韋七結鬢俱係起事首逆切不可使之漏網致留餘孽勒保旋率兵剿興義北鄉擒王抱羊於額老寨由北鄉趨永豐督袁敏等攻解永豐圍吉慶亦從廣西帶兵克板蚌板塔一帶賊卡復册亨與勒保軍合分飭諸將搜剿花江募復等處餘匪狃苗平上嘉永豐官民堅守州城賜名貞豐如興義例勒保以功晉一等威勤侯九月調湖廣總督十月偕貴州巡撫馮光熊陳苗疆善後四事一隨征鄉勇分撥就近營分充補兵丁一招集難民酌給農具銀兩俾資復業一籌備倉糧以利兵民就食一清釐田土以靖苗漢分爭下軍機大臣議行是時川楚賊氛正熾有青黃藍白線等號又設掌櫃元帥先鋒總兵等僞稱勒保旣調任湖廣四川總統軍務宜綿遂請以勒保代其

任許之十二月勒保自貴州由敘永入川三年正月至梁山縣接辦總統事值梁山賊曾柳等新起於石壩山而白號王三槐青號徐添德與藍號林亮功等股匪均聚開縣臨江市勒保計進剿王徐諸逆則石壩山賊躡其後先遣兵擊破之斬賊首曾柳郭長俊伍一凱諭曰此勒保入川第一功可嘉之至調四川總督王三槐等聞石壩山破懼而宵遁勒保督兵襲擊連敗之於豐城寨白沙河等處賊北竄入達州與藍號賊冉文儔合惟林亮功仍踞開縣之開州坪勒保令副都統銜六十七總兵富森布剿之親率大軍追王三槐等二月師至達州九戰皆捷賊走巴州又敗之於鬪智坡及蓋茶寺賊循巴州境掠閬中蒼溪而西三月追及之於李子觀逼賊東入儀隴勒保以賊蹤往來靡定川中居民散處易於裹脅乃畫堅壁清野之策令百姓各依山險紮寨屯糧並團練鄉勇以自衛由是賊至居民多獲全四月賊由儀隴茨菇頂趨孫家梁欲與白號賊羅其清合勒保兵踵至偕尙書惠齡將軍恆瑞分路截剿賊屢敗王三槐等南竄渠縣冉文儔遁入羅其清寨中勒保留惠齡恆瑞剿孫家梁賊仍帶兵緊躡王三槐等五月三槐等自渠縣折竄杜市街犯大竹縣我兵奮擊大破之賊分竄梁山墊江及新寧復由新寧東奔

開縣我兵沿途追襲疊有斬獲開州坪賊林亮功偵知王三槐等至出屯陳家場爲犄角勢勒保分兵擊走之追至梁山荆竹園斬其僞元帥林定相以六十七富森布剿賊遲延又縱令出巢奏褫其職六月剿王三槐於開縣陳家山聞蘭芽場有新起賊徐添德潛往句結爲王三槐聲援因亟率兵掩擊擒賊首張洪鈞餘匪潰散徐添德奔新寧王三槐失援乃率其黨冷添祿遁入雲陽安樂坪大兵圍之七月克安樂坪擒王三槐械送京師冷添祿退保祖師觀諭曰勒保前平黔苗已錫通侯之爵茲剿辦川匪調度有方埽穴擒渠膚功克奏著加恩晉封公爵八月進圍祖師觀賊據險守閱數月弗能拔屢奉嚴旨申飭十一月黃號賊龍紹周龔建樊人傑聞冷添祿被圍急分路來援我兵擊卻之冷添祿仍堅守祖師觀十二月官軍奪魚鱗口山梁進逼賊巢冷添祿率數百人從後山雞公梁竄新寧上切責勒保趣速往新寧剿辦四年正月勒保至新寧適徐添德爲副都統銜額勒登保所敗竄踞新寧仁市鋪與黃號王光祖等合勒保偕額勒登保夾擊之敗其衆於石竹坪及老鷹場徐添德等走墊江冷添祿知新寧有重兵亦折竄入忠州勒保令額勒登保赴墊江截擊徐添德等總兵百祥取道忠州追冷添祿自率大軍

向梁山策應兩路並飛咨惠齡與副都統銜德楞泰以兵來會是月上以前此各路軍營事權不一致歲功需時特授勒保經略大臣節制川楚陝甘豫五省軍務命其弟藍翎侍衛永保齎經略印赴軍中副都統銜明亮與額勒登保均授副都統爲參贊大臣二月勒保奏歷次總統與各路分兵剿賊往來馳逐僅祇偏師茲臣仰仗天威授爲經略大臣事權歸一自應通行籌畫除將陝楚兩省實存兵數分駐何處另爲調度外川省大局臣督率額勒登保惠齡德楞泰等以合剿徐添德冷添祿等大夥賊匪爲正路餘則視賊所向隨時督剿查賊勢既重在四川臣應於川省暫駐梁山大竹一帶地尙適中可以就近督辦尤之尋督諸路兵大破徐添德等於沙平關斬首千餘級賊分竄鄰水長壽各縣官兵復追敗之三月大軍移駐達州遣額勒登保殲冷添祿於廣安州城頭堰又殲林亮功分股掌櫃蕭占國僞元帥張長庚於營山縣譚家山疊奉恩旨獎賚時被脅難民多有自賊中來投者上命勒保安議安撫章程勒保以紮寨團練一法行之川省已著成效而陝楚豫等省尙未通行因奏言近來被脅良民逃出不少自應詳求綏輯惟賊匪未平往來無定凡鄉村場市屢遭焚掠田畝旣已汗萊房屋悉爲灰燼如官爲授

糧則日久恐其不繼官爲修屋則賊來又被焚燒迨至無食無居復爲賊擄所辦仍屬無益是以臣曾通飭川東川北各州縣令百姓依山附險營結寨落將糧食器具移貯其中賊去則下寨而耕賊來則守險而避此不但爲百姓全身保家之計並可杜賊匪擄人掠食之謀請嗣後凡有解散黨與除能殺賊立功者另請加恩外其餘或潛行散出或臨陣投降卽由各路隨營糧員及地方官訊明所隸州縣按道路遠近酌給銀米回籍歸入附近民寨仍給搭蓋草棚之費俾資棲止如此安插則從賊之民知解散可得生全其心自不致固結旣散之後有寨可居不致再爲賊擄於綏輯似覺有裨請通行湖北陝西河南等省一體遵辦諭曰所辦俱爲周到朕以此事委卿必不遙制總之邪匪不可不誅良民不可不撫而受撫者必使之畏威懷德出於至誠方爲盡善勒保又奏川楚秦豫四省今歲應徵錢糧請將被賊之區普行蠲免近賊州縣暫緩輸將此安良卽所以散賊又兵丁從征三年傷亡病故覈之原調數日日益減少陝楚豫三省見有堵剿事宜缺額者請咨令補足留於各本省調遣山東雲貴兩廣等省應令補派來川川省卽由臣就近調補命軍機大臣議奏尋奏兩廣距川較遠緩不濟急請先儘四川雲貴酌

調餘如所請從之四月官兵追剿徐添德龍紹周龔建樊人傑及冷添祿分股僞元帥張子聰等屢敗其衆賊盡遁入開縣東鄉境內旋分竄竹峪關渡口場等處意圖入陝諭曰勒保不趁賊匪聚集之時爲一鼓殲擒之計又任其紛紛四竄稽延月日咎實難辭著傳旨申飭五月張子聰句合藍號賊冉添元北竄勒保遣額勒登保由老官山兜擊逼回南江德楞泰亦自太平進兵連敗龍紹周等於麻柳壩雙合場將竄陝之賊全數截回川境賊隨分股奔竄張子聰冉添元竄通江藍號包正洪竄雲陽青號王登廷竄東鄉徐添德龍紹周龔建樊人傑與線號龔文玉白號張添倫等先後竄入大寧老林勒保檄調諸將分往剿辦上慮川省賊衆兵單諭令添調新兵勒保奏添兵必須一二萬庶敷攻擊之用而命將旣難其人籌餉亦慮莫繼與其調兵而多費莫若鼓勵見在軍心此後如得一大勝仗竟當加以重賞自無不振作奮興臣惟有儘此兵力策勵將士以期迅速成功諭曰所見似有把握若能於兩三月內兵不增而功速戡此誠日夜所盼望者也六月令總兵朱射斗殲包正洪於雲陽小毛坪七月令德楞泰擒龔文玉於大寧瓦房溝又擒其僞元帥龔其位於香衝僞先鋒卜三聘於巫山羊溪河八月令提督七十

五擒龔建於開縣火峯寨賊勢稍沮會督辦糧餉副都統銜福寧疏劾勒保一路兵餉月需銀十二萬餘兩視諸路獨多而所辦各股賊匪有增無減上方以勒保安坐達州虛糜厚餉又堅執不必添兵之說致賊蔓延疊降嚴旨詰責而徐添德等復率萬餘衆由大寧闖入楚疆湖廣總督倭什布飛章告警上乃褫勒保職命吏部尙書魁倫入川勘問加額勒登保都統銜代爲經略大臣魁倫署四川總督勒保旋奏川省賊股雖多總係舊有之賊並非新起從前各號多至萬人或數千人近惟四五千至千餘人及數百人不等福寧謂有增無減臣實信其有減無增至不必添兵一說曾與面商福寧亦深以爲然並未敢稍存粉飾上責其狡詞迴護仍飭魁倫嚴訊十月魁倫奏勒保自到川統兵共用餉銀二百餘萬兩查係按名給領并無不均所辦賊匪見實較前大減福寧以新分賊股姓名多於從前勒保則覈其大數尙無諱飾至駐守達州雖未親歷行陣然辦理文檄調遣兵將亦非一無所事惟此次賊衆犯楚勒保接到倭什布咨會未卽馳奏又明亮恆瑞不聽調度副都統訥音所帶兵丁誼鬧生事亦未據實參辦實爲昏憤錯謬罷輒瞻徇請照統兵將帥玩視軍務貽誤國事律擬斬立決諭曰勒保昏憤錯誤問擬斬

決實屬罪所應得惟春間委任經略時朕曾有令其居中調度之旨原以經略大臣惟在決機制勝不責以衝鋒陷陣之事非令其安坐軍營不一親臨行陣也乃勒保半載以來惟在達州株守竟成一彙報軍情之員任闕寄者豈宜若此究念其係誤會前旨尙可稍從末減且勒保自總統軍務所有首逆王三槐冷添祿包正洪龔文玉等犯以次就獲雖非親往督拏究係伊所派調又前剿貴州狝苗一手辦竣至今安靜無事其功亦尙足錄勒保著從寬改爲斬監候魁倫接奉此旨卽派員將勒保解交刑部監禁五年正月經略額勒登保赴陝剿賊以川省軍務移交總督魁倫接辦賊首冉添元張子聰合黃號徐萬富青號汪瀛線號陳得俸等共五萬人乘間由定遠搶渡嘉陵江魁倫退守潼河事聞起勒保爲藍翎侍衛馳驛赴川協剿三月抵金山驛聞賊已由射洪縣王家嘴越潼河西岸欲趨成都遂偕魁倫馳赴中江縣截剿連敗之於梅子埡象龍寨等處魁倫以失守潼河逮問賞勒保四品頂帶及花翎授四川提督兼署總督四月賊分擾遂寧安岳樂至各縣境勒保偕參贊德楞泰奮力夾攻殲賊數千賊始東竄邀擊之於嘉陵江口俘斬及淹斃者又三千餘脫難民一千四百餘汪瀛尋爲勒保所擒潼河兩岸肅

清上嘉之四月勒保旋引兵西擊敗白號高二馬五等於龍安鐵籠堡賊退入甘肅番境五月白號賊復犯龍安上以勒保縱賊褫花翎罷提督專署總督六月賊北走甘肅遣副都統阿哈保追之遂提兵東渡嘉陵江剿川東川北賊七月白號苟文明鮮大川等由陝入川圍渠縣高寺寨勒保疾往解其圍追至太平寨與德楞泰軍合賊走墊江長壽循嘉陵江而北覲渡西岸官軍追擊百餘里至岳池之新場殲擒四千餘人鮮大川逃入巴州爲寨民鮮文芳誘斬上嘉勒保功賞二品頂帶實授總督八月偕德楞泰剿白號賊於東鄉太平縣境白號與青號賊趙麻花合我兵扼之於茅坪倒流水殲其僞副元帥湯思舉九月趙麻花復率其黨王珊欲向陝境迎徐添德至川勒保由江口截剿至雲陽大水田殲趙麻花王珊亦爲德楞泰所誅下部議敘十月樊人傑等由楚竄入川東勒保偕德楞泰會剿小有斬獲賊尋北竄陝境而徐添德一股又由陝入川旋由川入楚上責其堵賊不力降四品頂帶仍留總督任十二月藍號李彬白號楊開第黃號齊國謨等賊衆數千自巴州南竄勒保邀敗之於渠縣境賊奔儀隴遇德楞泰兵復大敗齊國謨死餘竄營山柏林場勒保追及之斬楊開第先後殺賊四千李彬僅以數百人遁

得旨嘉獎賞三品頂帶並御書福字賜之六年正月移師川東敗羅其清餘黨楊步青於大寧白馬廟會樊人傑徐萬富令藍號賊王士虎冉添士股匪竄擾廣元蒼溪勒保檄阿哈保等往援賊僞東竄儀隴陰率衆沿嘉陵江南下爲搶渡計勒保親馳至南部碑灣寺與阿哈保等合擊殲徐萬富與藍號僞總兵鮮奇林僞先鋒陳上達及賊黨二千餘人賞還二品頂帶及花翎仍下部優敘二月藍號張士龍竄巴州後河嶺遣提督七十五擊斬之復移師川東督剿藍號陳朝觀白號魏學盛等敗之於巫山雲陽各縣境賊由太平北竄入陝勒保追之不及遂駐南江分剿楊開第及藍號張漢潮餘黨疊奉嚴旨申飭四月復回川東剿白號湯思蛟劉朝選等股匪檄七十五由太平前來會剿奏入諭曰摺內全係浮詞伊在川帶兵時稱馳往川北時稱馳往川東非止一次東奔西逐不特師老力疲抑且虛糜餉項看來勒保總欲因人成事所稱趕赴川東並非認真剿賊不過因德楞泰在楚剿辦徐添德距川境不遠一經到川即可聯銜奏事藉以邀功且七十五一路兵力昨已據額勒登保奏追剿陳朝觀入陝今勒保尙稱知會七十五由太平就近進剿是川省帶兵大員追賊出境勒保尙不知信息猶望其確探賊蹤奮勉剿

捕耶至樊人傑一股在川日久不知去向勒保節次摺內總未提及豈竟任其潛匿置之不辦日下麥已成熟賊匪掠食飽颺勢必裹脅多人復成大股何時始能蕨事勒保曾獲重愆經朕棄瑕錄用乃不知力圖報效勉贖前愆一味遲滯本應革職拏問姑念該省總督屢行更換又將另易生手勒保著從寬革去翎頂暫留四川總督之任以觀後效五月師次大寧敗湯劉二逆於萬古寺賊合青藍黃三號股匪分竄陝楚邊界勒保遣兵追黃號賊至湖北竹山縣境殲擒九百餘人六月青藍號賊回竄東鄉我兵遇之於華尖壩擒青號偽元帥何子魁殲藍號偽元帥苟文明及鮮倖先諭曰勒保前因剿賊遲延革去翎頂此次既知奮勉著加恩先賞給四品翎頂俟川匪全行掃蕩後再加懋賞七月廣安州有新起匪徒張老五等聚衆焚掠勒保撲滅之又遣阿哈保等擊敗青藍黃三號餘匪於東鄉石瀟山擒徐添德弟添壽王登廷弟登高賞還二品頂帶八月白號高見奇句合魏學盛竄廣元邀擊之於大茅坡賊敗走追至通江盧家灣適藍號冉學勝自東面老林竄出與之合勒保乘夜攻之殺敗賊九百餘擒冉學勝賞頭品頂帶封三等男爵九月高魏二逆分竄南江及陝西之西鄉勒保師抵南江聞李彬股匪方掠巴

州及蒼溪恐其踰嘉陵江而西亟率兵往賊已東竄通江遂請移兵大竹剿湯思蛟劉朝選諭曰前此勒保剿辦高魏股匪所贖無多因李彬在川北竄擾卽舍高魏而剿李彬及馳回川北並未與李彬接仗又稱湯劉股匪緊要趕往川東似此東奔西逐總未痛剿一次辦竣一股豈不徒疲兵力此時勒保旣已趕赴川東惟當堅持定見將川東之賊迅速辦竣再酌量移師他往以次肅清十月剿湯劉二逆於大竹鄰水長壽各縣境先後俘斬千餘拯難民二千追至太平八臺山擒老教掌櫃蕭焜與德楞泰軍合十一月偕德楞泰奏言重慶川北兩鎮所轄營汛界連陝楚自巫山至廣元互二千餘里兩鎮駐劄較遠鞭長莫及請於太平營添設副將一員駐城內原設都司移駐城口通江縣竹峪關廣元縣黃楊堡大寧縣徐家壩巫山縣大昌等處地居萬山中爲三省要路請各添建城堡設守備一員兵二百五十名又達州爲教匪起事之地民俗刁悍撫馭綦難請升爲府治並升太平縣爲太平直隸廳卽以太平縣缺改爲府治附郭之達縣上從之賜府名曰綏定十二月分飭諸將剿李彬湯思蛟劉朝選等股匪均有斬獲因偕額勒登保德楞泰奏言剿辦教匪大局已爲戡定請酌撤官兵上以巨賊未除遽思將就了事

嚴飭之七年正月奏川省自築寨集團以來賊勢十去其九擬將官兵分段駐劄搜剿餘匪仍激勵鄉團協力搜捕然無官統率終覺散而無紀見遴委熟悉軍務之道府及正佐各員指定段落各專責成每寨首一人管領團練若干名每佐雜一員管領寨崗若干處每正印官一員管領佐雜若干員均以各該路道府總其事兵力所不能到則以民力佐之民力所不能支則以兵力助之庶幾偵探易周賊無潛匿之地得旨允行是月督兵擒王登廷餘黨何贊於忠州白石鋪殲除天德餘黨楊掌櫃於綏定木頭市二月李彬與黃號辛文竄南江鐵廠坪遣建昌道劉清剿擒之三月白號張添倫率其黨魏學盛等擾川北勒保遣總兵田朝貴往剿親督大軍繼之大敗賊於巴州土地堡殲張添倫及其僞元帥陳國珠僞總兵魏學盛五月令副都統銜達斯呼勒岱剿白號餘匪於東鄉古佛崗擒首逆度向瑤令總兵張績等剿青號餘匪於太平沙礮場擒首逆徐添培六月令田朝貴剿藍號餘匪於通江貓兒壩殲首逆楊步青屢奉恩旨獎賚下部議敘七月劉朝選糾青藍黃號殘匪竄大寧鞏底山勒保擊擒之并擒黃號賊目伍余元於大寧仙女溪晉一等男爵是月遣達斯呼勒岱剿龍紹周餘黨賴飛隴於雲陽閻王壩箭

瘡之下部議敍九月白號僞元帥張長青黃號掌櫃李學坤率二百餘人乞降奏免其死十月遣遊擊羅思舉等剿白號殘匪於東鄉陳家坪擒僞元帥張簡湯思蛟逃至縣屬之包口被獲十一月又遣羅思舉等擒黃號唐明萬於大寧石柱坪以勒保衝寒帶兵賞貂皮馬褂時川中著名首逆率就殲擒餘匪分竄老林或百餘人爲一起或數十人爲一起不復成股陝楚賊匪亦多爲額勒登保德楞泰兩路大兵所殲遂以十二月偕額勒登保等馳報歲功諭曰勒保自復任總督以來倍加奮勉督兵連獲首逆已封一等男爵見當大功戡定著加恩晉封一等伯並加太子少保銜尋又諭勒保伯爵仍用威勤名號八年正月額勒登保德楞泰移師入陝勒保留川省辦零匪擒白號賊日苟文富於墊江冷家壩招降黃號賊首王國賢等閏三月擒白號僞元帥張順於太平三溪子青號賊日王青於萬縣孫家漕四月擒白號僞元帥宋國品於大竹柏楊溝竄匿零匪搜捕殆盡七月與額勒登保德楞泰會軍於太平飛章奏報肅清得旨嘉獎下部議敍旋奏撤東三省馬隊雲貴官兵並本省隨征兵勇報聞嗣以陝西南山餘孽苟文潤等復起潛越漢江擾及川界額勒登保德楞泰先後統師剿辦勒保派兵防堵至九年八月賊

始悉平十年四月偕德楞泰疏稱善後十事一籌變各屬支贍兵糧一查撤近年新添塘站一民間見存尙寨責成地方官稽查一州縣散貯軍裝撥歸各營汛備用一歷年積欠兵勇糧餉清釐找領一太平等協兵米折銀按年豫支一百姓自製槍礮器械及時收繳一被賊焚毀城垣營堡擇要估修一零星土匪飭屬嚴拏一出力紳士量予獎勵命軍機大臣議奏尋奏找領積欠兵餉易滋弊混應分晰查辦餘如所請從之五月入覲諭曰嘉慶四年三月間勒保奏通飭川東川北各州縣令百姓依山附險各結寨落章程井井有條彼時賊匪正被官兵四路兜剿以窮奔鋌走爲能往往於所過鄉村擄人掠食肆其兇殘久而滋蔓自結寨落後不特賊匪無由焚劫且居民等憑依險固心膽旣壯賊至卽合力攻擊斬獲甚多其後陝楚一律倣照賊勢日形窮蹙始能將無數兇渠以次掃蕩今三省肅清閭閻安堵如常揆厥所由實得力於堅壁清野之策勒保首先倡議洞悉機宜得以歲功完善允宜懋賞酬庸勒保著加恩賞太子太保銜並賞戴雙眼花翎七月回任先是教匪旣平解散鄉勇令其入伍爲兵十一年七月陝西寧陝鎮新兵陳達順等倡亂欽差大臣德楞泰檄川兵會剿勒保遣總兵唐文淑等率兵六千應之

十一月從賊蒲大芳等縛首逆乞降德楞泰受之勒保奏言叛兵罪案較教匪尤甚德楞泰率行納降令其復歸原伍該匪不知畏威安能悔罪始以兵而爲賊復以賊而爲兵起滅自由視同兒戲且恐各處兵心因此驕縱日增益難鈴束上躋其言諭令赴陝會辦善後事宜十二年正月抵漢中聞綏定新兵滋事亟馳回川遣副將桂涵羅思舉帶兵剿捕擒首逆王得先孔傳仕劉金定磔於市餘黨悉抵罪如律二月陝西西鄉瓦石坪新兵周士貴等叛復同德楞泰遣兵討平之疊奉恩旨嘉獎是月京察以勤能諳練下部議敘十三年五月馳赴馬邊廳督剿涼山夷匪涼山夷先於嘉慶七八年間乘大兵方剿教匪出擾峨眉雷波馬邊各境勒保疊遣提督豐紳總兵張志林往剿賊聞兵至卽遁入夷界並縛獻首犯六兒普色求罷兵未大創也至是羅回熟夷烏卜復糾趕山坪等十二支嶺夷犯峨眉縣歸化汛又潛由山後繞至太平堡焚劫分遣賊黨擾馬邊廳閏五月勒保率兵至賊退踞土曾村挖黑等處我兵連擊破之槍斃賊目業貴進克六拔寨殲賊首神丈降賊目二蟲黑娘阿二惟烏卜逃入大木桿六月大軍移駐太平堡督總兵馬元由平夷嶺進攻豐紳兵從月兒坪擣其後連克趕山坪瓜家岡牛心山等處賊

巢將十二支滋事嶺夷全行掃蕩得旨嘉獎下部議敘七月師至膽巴大木桿夷目挖海等縛烏卜以降涼山夷平奏入獎賚有加十四年四月以勒保七十生辰賜御書宣勤介景扁額十二月擢武英殿大學士仍留總督任十五年二月京察以辦事鎮靜下部議敘是月召來京供職五月給事中胡大成參奏勒保任四川總督時有匿名揭帖指訐督藩款蹟命勒保明白回奏勒保奏當時實有所聞因查詢無據遂寢其事上以其匿不陳奏迨奉旨詢問復不自請議處降工部尚書六月調刑部尚書兼正白旗蒙古都統賞紫禁城騎馬七月充崇文門監督上秋彌木蘭命留京辦事八月授內大臣十一月偕戶部侍郎英和光祿寺少卿盧蔭溥馳赴涿州房山縣一帶查辦災賑事竣回京十六年正月授兩江總督閏三月以趨運糧艘安速得旨獎賞六月召來京復授武英殿大學士管理吏部兼鑲藍旗滿洲都統九月御史劉奕煜參奏吏部銓選兵部主事員缺錯誤命勒保偕大學士劉權之等詳查勒保等援引舊案謂部選無誤上察其與例不符復派大學士慶桂尚書劉鐸之查明部誤屬實以勒保舍例言案降二級留任改管兵部十七年正月充經筵講官五月管理武英殿御書處九月授正白旗領侍衛內大臣

十月賞海淀寓園十八年正月授軍機大臣充國史館總裁官二月京察以恪勤供職下部議敘六月兼管理藩院事務七月上幸木蘭命留京辦事八月以病乞假允之時其子內閣學士英綬扈蹕木蘭命回京侍疾並遣御醫診視十九年閏三月復以目疾求解任命解所管各項差使仍留大學士任在家食俸勒保疏辭上慰留之八月目疾增劇命開大學士缺仍在家食威勤伯全俸二十一年諭曰勒保之女著指與四阿哥爲福晉二十四年四月以勒保八十生辰賜御書延年養福扁額八月卒諭曰予告大學士勒保自乾隆年間由軍機章京內用侍郎外任督撫剿辦黔楚逆苗川陝逆匪教匪皆曾統領師干著有勞績洊封公爵嗣以軍務日久懈弛褫職逮問因其久歷戎行仍令統兵自效勒保與額勒登保德楞泰齊心協力三省教匪一律殄平實伊三人之功朕懋獎成勞仍錫封爲一等伯爵由總督調任尙書擢贊綸扉入直樞禁方深倚任旋以目疾乞休特令在家食俸歲時存問方冀優游頤養安享遐齡茲聞溘逝深爲軫惜著加恩晉贈一等侯卽照一等侯爵例給予卹典將來伊子承襲時著襲封三等侯派四阿哥卽日前往代朕賜奠茶酒其原任內降革處分悉予開復一切賍項俱行寬免著卽予諡

應得卹典該部查例具奏尋賜祭葬予諡文襄弟永保兩廣總督自有傳子英惠英德英綬英奎英秀英德頭等侍衛英綬工部右侍郎英奎吏部郎中英秀廣西慶遠府知府孫文厚襲二等威勤侯文俊江西巡撫

明亮

明亮富察氏滿洲鑲黃旗人曾祖米思翰官戶部尙書以孝賢純皇后祖追封一等承恩公祖李榮保一等承恩公各有傳父廣成正黃旗蒙古都統明亮由文生員乾隆十八年指爲多羅額駙十九年授整儀尉累遷鑾儀衛鑾儀使三十年授伊犁領隊大臣隨將軍明瑞等平烏什逆回三十一年四月旋京授正白旗漢軍副都統六月授吉林副都統三十三年調寧古塔副都統三十四年大兵征緬甸明亮在事有功三十六年小金川逆酋僧格桑攻圍鄂克什土司地抗拒官軍金川逆酋索諾木陰與通謀上命先討小金川大學士溫福出西路四川總督桂林出南路三十七年二月命明亮以護軍統領率侍衛官音吉圖等往南路隨剿三月至達烏軍營四月桂林使參將薛琮等潛師由墨壘溝襲取僧格宗至甲爾木爲賊所要截薛琮戰歿兵練三千人死亡殆盡桂林匿不以聞前四川總督散秩

大臣阿爾泰劾之命尙書福隆安往援以明亮世臣勳親於桂林乖張欺罔隱忍不言並褫職候訊旋賞頭等侍衛銜帶兵自效時參贊大臣阿桂代總桂林軍七月令明亮出賊不意仍自墨壘溝潛襲甲爾木奪其第一道山梁以地勢高寒難駐守不俟令輒撤兵還阿桂劾奏降職銜一等十月復攻甲爾木山梁山延袤數十里中兩峯尤峻險明亮乘雪夜直上山巔盡克其木城碉卡移兵駐守補二等侍衛賞還原銜遂進攻眞登梅列築卡斷賊糧道十一月克之遷頭等侍衛加副都統銜尋督兵由都恭進破噶察丹嘉諸寨降番民六百餘與阿桂會於僧格宗遷副都統復進克古嚕收服僧則諸寨十二月阿桂授副將軍命明亮爲領隊大臣官軍旣克僧格宗由科多渡河而東直擣美諾侍衛德赫布等爲前隊明亮繼進敗賊於池木追至美都喇嘛寺力戰克之遂圍美諾賊衛巢死拒相持一晝夜明亮俟其稍懈突前奮擊破美諾官寨及其旁碉卡溫福之軍亦自明郭宗來會小金川地悉平捷入下部優敘大軍未至前一日僧格桑由美臥溝遁入金川因分兵三路進討金川將軍溫福自功噶爾拉入爲西路以海蘭察哈國興爲參贊副將軍豐昇額由綽斯甲布攻宜喜爲北路以舒常爲參贊副將軍阿桂由當噶

爾拉人爲南路以明亮爲參贊三十八年正月兵抵當噶爾拉其山爲金川界址
緜亙二十餘里賊自西至東築十四碉中聯以木城石卡防守甚堅二月明亮乘
閒攻奪第五碉三月又克第四碉修營設卡橫截賊衆之間相拒數月會溫福攻
功噶爾拉扼險不得進改攻昔嶺駐營木果木六月逆酋索諾木遣其黨自美臥
溝潛出煽結小金川降番擾我軍後木果木師潰溫福陣亡底木達美諾明郭宗
相繼陷參贊海蘭察退駐日隆阿桂聞變使明亮盡戮降番之爲內應者賊衆屢
窺伺後路皆擊敗之全師出駐翁古爾壘上以阿桂爲定西將軍赴日隆別籌進
取調滿洲索倫勁旅及各省兵會剿八月授明亮廣州將軍旋授定邊右副將軍
駐師南路以富德爲參贊十月整兵進復小金川阿桂自西路連克資里阿喀木
雅五晝夜直抵美諾復之明亮南路亦剋期同發自思紐順河攻取得里得木甲
諸寨惟河南宅壘未下遣守備張芝元往諭降乘其未定襲破之進取僧格宗與
阿桂會於美諾盡復小金川地上以成功迅速豐旨嘉獎賜御用黑狐冠十二月
偕阿桂奏聲討金川更籌進兵之路阿桂改由谷噶明亮改由巴旺布拉克底土
司境內進攻馬奈馬爾邦上是其議三十九年正月各路訂期會剿明亮以馬奈

山勢險惡必分兵夾攻方得勢而河南斯第博堵之上地名思覺爲賊境克舟九寨屏障尤當扼其要害乃令參贊富德以兵六千由駱駝溝繞出馬奈後領隊大臣奎林以兵四千攻河南斯第博堵而自攻馬奈之前乘夜進兵克其碉卡富德之軍已截出山後與明亮合馬奈中山梁五碉之賊皆潰其拒守西山者次日攻克之合軍前奪絨布寨移營駐之奎林以皮船渡河而南至斯第山梁亦克其木城二二月明亮進攻卡卡角選銳兵循絕壁而登據其地卡卡角之前曰庾額特爲賊南境第一險隘其西危峰壁立千仞正面山址直插河流惟山半羊腸一線賊左右扼以石碉其後復以一碉護之屢攻不能下乃於山西河灘連築五碉以衛河南糧道而東南攻穆谷諸寨欲截出其前賊拒守益力上以奎林所據山梁下臨克舟九寨河北旣不能進或迅趨河南合剿屢諭明亮籌辦時奎林以山雪漸消軍行乏水移師暫駐深嘉卜分土兵據守山梁三月明亮探聞斯第之上班得古地有暗泉可資汲爨令富德奎林等先據水泉以兵六千分三隊直取斯第將至斯覺賊前後並出斷我兵爲數處復據險以阻援軍奎林等鑿戰逾時合而爲一侍衛阿爾都從險絕處逾山入火其卡賊亂官軍遂破圍而出得旨獎慰明

亮以河南北之師皆阻於險欲由正地進攻五月留富德駐絨布寨而自統兵渡河六月至正地使人哨賊深入數十里寂無所見而山谷迴互慮其設伏於險以要我駐兵不進上深是之先是阿桂之攻谷噶也移豐昇額之軍夾攻凱立葉留舒常於宜喜以綴賊豐昇額旋赴阿桂軍至是明亮以正地無罅隙可乘欲移師往攻凱立葉會舒常在宜喜攻得賊卡阿桂以西路無俟增兵而宜喜有可乘之隙札明亮由彼進取明亮遂至北路七月攻達爾圖山梁賊於東北堅立四碉以拒其下連築十四碉西南直接俄坡明亮列兵前敵督衆力戰而潛師直取中七碉令諸將各攻其一冒雨進戰同時摧破其下七碉派屯土兵練分攻亦以次克獲移營駐守上以達爾圖要隘明亮能迅獲全勝特旨嘉獎予優敘時逆酋增衆來援達爾圖東北四碉我兵攻得其一餘猶堅拒不下明亮欲自西南進兵八月攻木克什克數碉九月別攻日旁山由周叟繞出山坳圍前山拒守之賊殲之進軍帶石十月分兵東取谷爾提碉卡十一月西攻沙壩山潛軍深入焚碉卡寨二百餘賊據險斷我歸路官軍覓別徑撤出時阿桂大軍已逼勒烏圍賊穴上以功屆垂成諭令慎重復諭以從達爾圖下壓日旁之賊必當不攻自潰明亮旋奏達

爾圖木克什本進兵正路但達爾圖前敵堅礮林立既難致力而木克什以下籌深林密左右皆可抄截非兵多不敷分布惟自帶石攻過隘要下至臨河與阿桂軍相去甚近自可勢如破竹奏入報聞是月復攻沙壩焚其山半礮寨十二月聞正地之賊多調守他處分土兵乘虛往襲路與賊遇乃還四十年正月逆酋索諾木令頭人斯丹增獻被擄官兵及軍械至營投稟乞恩明亮不拘留嚴訊縱之使還上降旨切責二月阿桂奏明亮一路因帶石山脊險窄賊衆拒守難於直入而宜喜山梁正與西路大營相對若增兵數千繞路直截其後可期必克擬分調富德之兵往攻宜喜上然其策諭富德速抽兵往並以明亮自克達爾圖總未籌剿得利嚴飭之命馳赴宜喜迅速進攻三月明亮自至阿桂軍面籌機宜旋回日旁阿桂令參贊海蘭察等率勁兵千往助所調兵亦次第至四月明亮合兵萬餘攻宜喜偵知甲索僅餘老弱使總兵敖成率二千五百人往攻克其十四礮宜喜之兵分十餘路奮攻得楞以下諸礮卡明亮與海蘭察舒常往來督率諸將人自爲戰殲賊數百人盡奪其地進攻薩克薩谷克其山梁於是達爾圖得楞沙壩山之衆爲我兵圍截於中先後奔潰并得日旁溝測斯年木咱諸寨捷聞授內大臣得

楞東南曰基木斯丹當噶山勢迤邐直至臨河賊於其前連築五卡我兵攻克之
焚茹寨以前各寨落賊又乘雨雪接築戰礮復爲官軍所奪海蘭察旋回西路明
亮由基木斯丹當噶進剿賊棄壘而逃奪茹寨麥田十餘里進至札烏古其山上
連甲索下至沿河賊憑險死拒勢難仰攻五月別攻曲碩木未下明亮以基木斯
丹當噶之前山趾兩分西爲額爾替東爲石真噶得之皆可轉出札烏古山前乃
攻額爾替破其山前石城而礮卡累攻不得入六月改攻石真噶賊抵禦愈力明
亮以軍中運礮人聲誼雜賊習聞之不爲備適礮成輓運密令奎林等率兵繼進
賊不之覺遂破石真噶七月盡克山半礮卡攻破沙爾尼諸寨乘勝奪據札烏古
第一山梁賊之屯聚各寨者猶衆明亮患兵不敷調遣欲北取琅谷直壓納木迪
官寨以清西南後路八月克琅谷移師駐其地攻斯第葉安及克爾瑪履賊又於
其上連築城卡相爲犄角明亮復至阿桂軍請兵助攻阿桂已克勒烏圍賊遁守
噶拉依老巢阿桂謂宜徑擣腹心不當復分力於枝節乃約河東西同時進兵自
攻達思里而令明亮攻礮占以分賊力九月自甲索進攻礮占賊守甚嚴別攻巴
札木亦無路可入明亮請自率精銳赴西路併力上以將軍參贊責有專司自應

就本路調度熟籌以期集事斷無舍己從人之理降旨切責命加意嚴防切不可輕離北路九月復自琅谷進攻克什札古及烏岳木城列柵而前直逼納木迪寨下閏十月阿桂調美諾防兵千餘來助明亮計賊并力於納木迪札烏古之備必疏乃率兵於山下分路仰攻而令奎林等閒道襲之深溝一線夾於兩山之底將士皆蛇行而前直出山頂上賊方與山下軍拒見之驚潰合軍奮擊盡奪札烏古碉卡復分兵爲二上至日斯滿下至阿爾古山梁二十餘里悉攻克之納木迪之賊焚寨潛遁乘勝破斯第葉安明亮以日斯滿高據山巔賊立十七碉隔我甲索兵路擬先取之日斯滿之南曰得耳谷又名上巴布里爲日斯滿後路分兵襲據其地斷日斯滿之衆於中賊恃其險猶潛匿不去令副都統和隆武等夾攻破之遂自巴札木上通甲索與敖成兵會曲碩木諸寨之賊至是亦遁官軍下至臨河肅撤達爾圖得楞諸防兵列營攻碾占碾占爲乃當山頂其北爲中巴布里下巴布里及阿爾古地其南爲甲雜又其南爲獨松明亮先攻碾占賊併力來拒十一月督兵襲破阿爾古出對河科布多之南十二月進兵達撤谷礮毀其堅碉夜遣兵縋峭壁奪據山梁分埽東南諸碉及沿河寨落遂攻乃當乃當之賊皆潰進圍

甲雜缺其臨河一面賊潰逸我兵自後蹙之多斃於水頭人思達爾結等率衆降
俘賊日庸中旺嘉勒及邁布星根上嘉其調度有方屢戰克捷下部優敘時西路
兵已圍噶拉依明亮乘勝直前取獨松降卡拉爾舍斯滿之衆發兵趨正地正地
番衆乞降馬爾邦之賊亦降於富德河西賊境皆平明亮令奎林等營於巴布朗
谷隔河會圍噶拉依自至西路偕阿桂奏言官軍合圍噶拉依布置已極嚴密逆
酋之母阿倉姑阿青及其姊妹均已自歸見令招賊酋兄弟出降如能生致更爲
妥善否亦可計日克取四十一年正月諭曰金川賊境均經大兵剿洗所餘噶拉
依葛爾彈丸自可卽日掃蕩征剿金川之役已屬蒞功褒績酬庸宜頒渥典副將
軍明亮抒誠勵勇協力宣勞著封一等襄勇伯賞戴雙眼花翎二月官軍克噶拉
依索諾木出降盡獲其母子兄弟僧格桑已前死先於遜爾克宗獲其屍大小金
川底定圖功臣像於紫光閣明亮列第三御製贊曰獨統一路頗有斬獲嫺威少
年世承恩澤建績抒忱是用褒嘉俾司將印永靖箝巴時議設成都將軍駐雅州
統轄番地文武三月特命明亮補授留川經理善後事宜尋奏將軍總督時有會
籌之事不宜兩地相懸而雅州地勢逼仄於滿兵挈眷亦不相宜請移四川提督

往鎮其地將軍仍駐成都又言大小金川留兵六千五百名駐守增設副將參將各員安插各降番於河東西與官兵相錯而處復奏屯種各番應設頭目擇土弁等之出力者給以職銜隸於綠營之下皆從之四月大兵凱旋上郊勞筵宴賜明亮及將軍阿桂副將軍豐昇額等銀幣鞍馬五月奏金川通藏大路增兵駐守巡哨八月奏番地屯墾牛種艱難陸續由內地購買可以無誤春耕並籌運鹽鐵應用上嘉之十月奏成都將軍有統轄地方之責文案需承辦專員請於綠營調撥設軍標副將都司守備等員撥兵六百餘名以資操防差遣命軍機覈議如所請行十二月率各土司入覲賜紫禁城騎馬命在軍機處行走四十二年二月回將軍任四月兼署四川提督十二月奏四川省提督前議移駐雅州雅州去省三百餘里距西路較遠提督統轄番夷遇邊要機宜必須面議請仍駐省城下部議行四十三年二月以特成額爲成都將軍改授明亮四川提督五月以在將軍任內失察土守備阿忠強奪屯田侵蝕卹賞銀兩得旨嚴飭九月奏兩金川駐官兵屯練六千五百鎮將弁備一百七十餘員今番夷傾心向化彈壓無事多兵請裁減官兵二千名改阿爾古總兵爲副將其餘將弁以次酌減從之四十四年奏屯防經

費情形每歲約需銀六萬餘兩諭兩金川俱經蕩平新設鎮營屯駐足資控制自應將川省腹地各營兵數酌裁以抵新疆兵費卽行詳晰妥議速奏旋奏酌定長駐兵三千名於內地各營裁撥卽以額餉移給其每年各項經費尙需銀三萬餘兩擬裁內地額兵一千五百名並酌減新疆駐兵馬乾銀可敷抵補部議如所請行四十五年率土司入覲四十六年三月甘肅撒拉爾回匪蘇四十三叛據河州城進犯蘭州省城陝撫畢沅札明亮帶川兵自鞏昌堵剿官兵旋克復河州賊衆攻省城者爲我兵所敗退保城西華林山憑險自固明亮至軍營欽差大臣阿桂留令協剿四月敗賊於水磨溝斬獲二百五月偕海蘭察等攻奪賊卡直逼其營四面合圍賊衆惶急六月冒死出突明亮等督衆力戰斬首惡蘇四十三等得旨議敘七月殲餘匪於華林寺時上幸木蘭明亮赴行在旋授烏魯木齊都統九月劾承辦糧務各員侵吞浮冒鞠實均治罪如律四十八年六月命署伊犁將軍九月以在都統任內爲屬員蒙蔽私釋永遠枷號官犯開泰致令自戕逮問入京擬絞監候四十九年四月甘肅固原回民復聚衆滋事攻破通渭縣城踞守石峰堡命大學士公阿桂往剿釋明亮於獄賞藍翎侍衛隨往效力七月大軍攻破石峰

堡擒首逆張文慶等賊黨悉平阿桂奏明亮奮勉授頭等侍衛五十年五月擢鑲黃旗護軍統領八月調正紅旗護軍統領授伊犁參贊大臣十二月調烏什參贊大臣五十一年十二月移駐喀什噶爾五十三年遷鑲紅旗蒙古都統五十五年正月以緝獲劫奪安集延回民馬匹要犯特旨嘉獎八月授刑部尙書仍留原任九月喀什噶爾遣犯珠德彌什越獄潛逃明亮仍擬以改遣上嚴飭之五十六年八月以失察遣犯王子重在配傳習邪教與內地隱通信息下部嚴議部議革職恩予留任十二月改授黑龍江將軍五十七年授內大臣五十八年授伊犁將軍六十年二月調正紅旗漢軍都統賞戴雙眼花翎九月黑龍江總管舍爾圖控將軍舒亮等令兵丁交納貂皮減值市物各款欽差福長安按翰得實明亮任內亦有賤價購買之事革職留烏魯木齊效力是年黔苗石柳鄧楚苗石三保等煽結爲亂攻陷乾州雲貴總督福康安四川總督和琳先後奉命督剿嘉慶元年二月命明亮往湖南軍營效力會湖北教匪聶傑人等於正月倡亂陷當陽鄖縣鄖西匪徒相繼起陝督宜縣自商南來剿路遇明亮留於軍四月偕宜縣破賊於孤山大寨獲賊首王全禮等授頭等侍衛領隊大臣賊衆窺襄樊宜縣令明亮往援至

樊城與總統大臣永保等合擊賊退據雙溝移營東竄明亮等進至棗陽時孝感賊匪楚金貴等蠢動屯聚胡家寨明亮率兵往剿六月命以副都統銜署廣州將軍七月至孝感營於潼川鋪去賊巢二里許賊屢來擾明亮分兵堵禦乘虛襲據西面山岡擊破賊伏兵於黃金廟進攻賊寨破其重城縱火焚廬舍殺賊衆略盡餘賊千人逸出皆獲之捷聞予輕車都尉世職八月移師與永保會剿鍾祥之賊永保以兵九千軍其北明亮率三千餘人軍其南營於土門衝賊屢來犯逆擊大破之擒賊目張家瑞等得旨恩賚下部敍功賊移營西北走明亮等追及雙溝復敗賊衆賊分爲二一東由棗陽赴唐縣一自白河而西欲由襄陽呂堰驛趨鄧州明亮等兼程先扼呂堰賊至永保遏之於前而明亮從旁夾擊大敗賊衆餘黨竄匿山林中悉爲官軍所殲永保等遂移兵追東竄之賊會大軍征苗匪已復乾州進圍平隴苗寨總統福康安和琳相繼卒於軍上命明亮馳往湖南接辦十月攻克平隴苗寨首逆石柳鄧先遁糾合餘匪於山後扼險拒守十一月連奪養牛塘剛息衝諸險進逼平隴後山別遣兵通保靖永綏之路降諸苗五千餘戶上嘉賚之十二月圍平隴後山攻破馬頭衝餘錦坡苗衆聚守石隆官軍四面蹙之陣梟

首逆石柳鄧賊之竄伏者殲戮無遺首逆吳廷義先於貴魚坡受傷潛竄旋爲降苗吳廷梁縛獻盡獲石柳鄧家屬苗境蕩平復封二等襄勇伯仍賞戴雙眼花翎是時川陝楚教匪不靖達州逆匪徐添德等乘閒蠢起攻破東鄉勢頗猖獗命以勝兵赴四川與督臣宜縣併力滅賊二年二月明亮由永綏赴川宜縣已克復東鄉賊衆退據金峩寺分屯清溪場姚家壩連營數十里三月明亮偕宜縣攻克寺後馬伏山賊卡分兵襲奪清溪口姚家寨四月破清溪場擒賊目王學禮進奪冉家壩口焚金峩寺賊首徐添德王三槐遁踞重石子香鑪坪五月明亮偕德楞泰等攻克分水嶺火石嶺諸卡三而進臨賊巢賊出數千人佯欲南渡而王三槐等率其醜類分五路直衝北面營卡我軍併力剿殺賊衆大敗王三槐中槍逸擒其義父賀宗盛及賊目鄭文禮盡奪重石子香鑪坪諸寨殺獲萬餘人賊走陳家壩進軍圍之得旨嘉獎是月命宜縣爲總統以明亮德楞泰副之六月敗賊於精忠寺擒僞總兵熊泳明及徐添德王三槐之母賊棄其眷屬西走會襄陽首逆姚之富齊王氏等先後渡漢江入川分擾大寧西鄉通江太平巴州境旋與徐王二逆合賊勢復熾姚之富齊王氏稱黃號徐添德稱青號王三槐稱白號設掌櫃元帥

先鋒總兵諸僞稱分屯肆擾齊王氏姚之富據開縣南天洞明亮等攻破之賊等走雲陽萬縣追敗之於大涼山雲陽教匪高名貴聚衆應賊明亮與宜縣等計擒之殲其黨於徐家山七月賊自雲陽向夔州屢攻白帝城明亮等赴援賊東竄入楚擾歸州巴東破興山縣治欲向襄陽明亮順江而下直趨宜昌與德楞泰分路夾剿敗之八月賊趨荆門州官軍截擊折而旁竄直犯宜昌明亮等敗其衆追至獨樹塘會湖廣總督景安等率東三省勁旅自北來扼其去路明亮等與合剿斬獲甚多逼賊入南漳山內上嘉賚之時屢獲賊諜言賊欲誘官軍入山而乘閒渡漢江北走豫省明亮令總兵長春循漢江南岸赴穀城防堵自統兵由隆中進截其前賊果北出茨河鎮明亮偕德楞泰東西夾擊賊衆敗潰退屯穀城縣南上嘉其調度合宜賞用紫韁九月賊由穀城西走均州屢爲官軍所敗不能北渡自房縣竄陝境平利楚匪李全先自川入陝至是與齊姚二逆合折而南竄明亮等追至界嶺聞賊欲由雞心嶺入川先令掘斷山路賊折回鎮坪與官軍遇明亮連戰克捷逼至樹河口設伏奮擊先後殺六千餘人賊復北走紫陽明亮追至白沔峽齊姚二逆偕其黨張漢潮又合白號高均德股匪西奔漢中分爲四股入川省通

江太平齊姚二逆竄入廣元寧羌高均德之衆遂由南鄭渡江而北三年正月偕德楞奏言高均德既已渡江恐其東竄與安迫近西安省會帶兵入漢中迎截上以明亮舍大股賊匪於不問輒帶前隊勁兵追剿高均德調度失宜命拔去雙眼花翎奪世職及所賜紫韁留本任戴罪圖功齊王氏姚之富旋相繼渡江與高逆合東走漢陰廳李全亦竄入城固南鄭詔褫職逮訊子二等侍衛德倫藍翎侍衛鄂倫並革職遣戍旋以軍務急命留營作爲領隊帶兵三月偕德楞奏窮追齊姚二逆自山陽直至鄖西急擊敗之二逆窮迫投崖死恩釋德倫鄂倫罪仍令敍用諭明亮速剿高均德予副都統銜賞戴花翎四月高均德遁入秦嶺明亮等由華州截剿賊西向五郎與李全同走漢陰入寧羌山後六月德楞奏追賊入川明亮軍於西鄉杜高均德入陝之路時黃號逆匪張漢潮與藍號詹世爵白號李槐合衆萬餘由竹谿入平利旋至太平七月明亮入川追剿敗之於池子山斬詹世爵李槐張漢潮走南鄭欲過漢江官軍邀擊累有斬獲賊往來奔竄復入西鄉石泉疊奉旨嚴飭命拔去花翎十一月張漢潮渡江入陝明亮自後追襲賊由商州入河南攻盧氏縣城明亮督兵截剿賊復回陝境竄伏五郎四年正月上申明軍

紀特授保爲經略大臣以明亮素諳軍旅著有勞績授副都統與額勒登保並爲參贊大臣二月張漢潮西入甘肅兩當縣界旋折而東竄明亮追至進口關殺獲甚衆擒賊目李淮復敗之於涼沁河因兵力單咨勒保增兵協剿四月勒保令永保至陝與明亮夾擊成都將軍慶成與永保合軍五月永保失利於華林山賊東西竄走乘間復入盧氏尋折回陝境得旨嚴飭七月以川匪肆擾楚境逮問勒保命明亮接任經略事遷正紅旗漢軍都統上旋聞明亮與永保不和恥居勒保之下挾私玩寇并在湖北軍營得受餽送密旨查詢改用額勒登保爲經略大臣革永保慶成職遣尙書那彥成往按九月明亮奏永保自八月駐兵大山岔總未移營永保自陳兩次移兵均奉明亮札止上命那彥成訪察虛實尋革參贊大臣都統任降副都統銜十月那彥成鞠訊永保呈出明亮手札並訐明亮奏報軍功詞多不實命革職交陝甘總督松筠嚴訊時明亮追賊入子午谷斃張漢潮於張家坪生獲賊目李潮十一月松筠奏提訊明亮等質對明確其奏參永保及前後移書因兩路不相關會彼此參差並非有心傾陷所報殺賊名數因總彙入奏故未能詳細分晰至收受餽送實爲分賞兵勇之需尙非入己明亮之罪在布置乖

方耽延貽誤依失誤軍機律擬斬解京候旨五年正月諭曰明亮帶兵著有勳績征剿大小金川曾任副將軍功成受賞辦理湖南苗匪係伊接手歲事剿辦湖北孝感賊匪亦能迅速殄除嗣在陝境因辦理遲延降旨拏問明亮旋將張漢潮殲斃雖餘匪尙未淨盡而辦理遲緩不獨一人明亮功多罪少況係宿將必應保全著加恩釋放賞給金頂領催往湖北隨松筠帶兵剿賊三月授藍翎侍衛領隊大臣四月敗青號徐添德之衆於穀城石花街遷三等侍衛閏四月賊東趨當陽遠安敗之於斑竹園復戰於遠安鎮明亮親冒矢石督勵將士上嘉之以五品翎頂補宜昌鎮總兵五月賊窺荆襄明亮敗之於斑竹鋪賊復走當陽爲河水所阻自荆門折而西北六月至穀城七月渡黃龍灘西走吉陽關至陝西洵陽白河明亮扼七星關賊復東竄明亮自保康南漳逆擊大敗其衆於朱家嘴擒僞總兵熊方青獲牲畜器械甚衆賞加三品頂帶八月賊渡黃龍灘復走陝境明亮奏言聞川匪唐大信苟文明等先後入楚請至房縣與撫臣倭什布合剿上嚴旨切責命姑如所請九月黃號樊人傑藍號冉添士及白號線號各匪由川接續入楚擾至遠安總兵李紹祖陣亡上累飭明亮愧勵圖功十月擊賊於房縣上龕大敗之賊衆

俱竄回川省旨嘉賚之命赴川剿辦明亮旋奏陝匪高二馬五等漸近竹谿馳往迎剿諭曰徐逆竄往陝境明亮以川匪竄楚爲詞置徐逆於不問今四股賊匪折回川境又以陝匪竄楚爲詞置四股賊匪於不問巧於趨避負朕矜全重恩著革去總兵降爲藍翎侍衛隨長齡防堵不必再具摺奏事並諭長齡如明亮尙知愧懼立功自贖卽行具奏若尙不實認真出力或實因年力衰邁不能振作亦據實奏聞明亮旋敗高馬二逆於竹山縣之保豐殲獲甚衆擢三等侍衛作爲領隊大臣十一月徐添德復東趨入楚高二等旋與合營明亮偕長齡等分路攻擊殲擒千餘人扼其東竄之路遷二等侍衛恩賜佩囊賊尋復分竄明亮追躡高逆敗諸陝楚之界賊遁入平利書麟以徐添德屯聚西南山內慮其蔓延爲患奏令明亮回楚剿辦上允所請六年正月徐逆爲官軍所敗折而東趨明亮等敗之於壽陽坪賊衆大潰命仍准列名奏事二月川匪苟文明由陝入楚明亮敗之於獅子巖因徐逆欲竄均穀兼程扼剿伏兵余家河擊破其衆下部議敘復授宜昌鎮總兵三月敗賊於南漳房縣時參贊德楞泰移師入楚諸逆合衆西奔楚氛略靖上念明亮年老五月諭令回京授二等侍衛在乾清門行走六月以前在烏魯木齊都

統任內有應繳賠項請於俸銀內坐扣恩予寬免十二月明亮患病上溫旨慰諭加副都統銜令安心調理七年正月病痊授正紅旗漢軍副都統五月調正藍旗滿洲副都統七月授烏魯木齊都統十二月以三省教匪戡定論功行賞上追念明亮前勞特封一等男爵九年四月內授鑲藍旗蒙古都統六月轉兵部尙書九月賜紫禁城騎馬十一月兼內大臣十年五月晉封一等子八月調鑲白旗漢軍都統十二年京察特旨交部議敘十三年以保送寶泉局監督徇情部議降調上改爲降四級留任十四年正月上以本年五旬萬壽恩加太子少保銜九月晉封三等伯十二月調鑲藍旗滿洲都統十五年二月賞還雙眼花翎五月授協辦大學士十六年六月以失察驍夫賭博有旨詢問陳奏復迴護欺飾削太子少保銜盡革協辦大學士尙書諸任留三等伯爵單眼花翎降補正黃旗蒙古副都統七月調鑲藍旗滿洲副都統十七年授西安將軍十八年三月回京授正白旗漢軍都統旋調鑲白旗蒙古都統九月授都察院左都御史十一月轉兵部尙書十二月復賜紫禁城騎馬十九年二月調鑲藍旗漢軍都統復授內大臣三月加太子少保復賞還雙眼花翎調都察院左都御史以御門典禮入直遲誤交部嚴議部

議降五級調用恩予留任八月復授兵部尙書協辦大學士二十年七月上幸木
蘭命明亮偕王大臣留京辦事二十二年六月授武英殿大學士管理兵部事務
尋晉太子太保二十三年諭曰大學士明亮屢歷戎行著有勞績簡擢綸扉見年
八十有四精神矍鑠步履強健若令節勞頤養必更益壽延齡長資倚任明亮著
不必分日赴內閣閱本亦不必進內直班所管兵部遇有奏事閒一二次不到亦
可引見官員毋庸承旨用示朕優眷者臣之至意二十四年正月上以本年六旬
萬壽復加恩中外賞還紫韁十一月晉封三等侯二十五年正月復諭令於本旗
直日照常來園餘加班奏事引見之期俱在本衙門辦事三月兵部遺失行在印
信部臣均降罰有差明亮亦議革職詔改降五級留任道光元年以老病乞休上
溫旨褒獎命以大學士三等侯致仕恩予支食全俸二年卒年八十有七諭曰予
告大學士三等襄勇侯明亮屢歷戎行仰蒙皇祖高宗純皇帝擢置崇班懋膺封
爵並繪像紫光閣以旌勳績至嘉慶年間皇考仁宗睿皇帝優加倚任特簡綸扉
載錫恩綸晉封侯爵宣力垂七十餘年資深望重寵眷優隆二十五年冬閒陳奏
衰老情形籲請開缺朕再三慰留上年四月復以老病乞休特降旨准其致仕仍

令支食全俸並頒賞釐斤俾資調攝以冀獲享期頤遽聞溘逝深爲悼惜著賞給陀羅經被派鄭親王烏爾恭阿帶同侍衛十員前往奠醊朕於本月二十三日親臨賜奠加恩入祀賢良祠賞廣儲司銀一千五百兩所有任內降革處分悉予開復應得卹典該衙門察例具奏尋賜祭葬予諡文襄孫聯順見官禮部左侍郎正紅旗護軍統領曾孫恩昌見襲三等襄勇侯世爵

和琳

和琳滿洲正紅旗人鈕祜祿氏父常保副都統兼三等輕車都尉乾隆四十二年和琳由文生員補吏部筆帖式以兄和珅署吏部侍郎調工部筆帖式累遷郎中五十一年署杭州織造五十二年三月擢湖廣道御史九月命巡視山東漕運五十二年五月上令江西湖南各造船百隻備東省剝運和琳請以一百船工料分造三百緡挽旣輕并可經久尤之八月疏言運河定例一年小挑用銀二千餘但挑工多寡當視受淤之厚薄爲準請不必拘定大小挑工原案總以二年用銀不得出二萬五千兩之數諭曰所奏斤斤計較尙未周到當於每年回空時確加履勘認真辦理亦不必拘於銀數責成總河巡撫及巡漕御史互相稽察以杜浮冒

而利運行嗣後並以爲例五十四年閏五月劾奏湖北按察使李天培私交湖北糧船分帶桅木尋訊出兩廣總督福康安寄書索購狀天培坐褫職遣戍十月疏陳東省開河南旺分水口爲水脊稍北劉老口迤南濟寧塘河地並高仰彭口一帶尤淤應挑土方請如例支給五十五年正月授吏科給事中二月疏言東豫二省及通州天津兩幫協運舊雇民船易滋弊竇請改用直隸北河官造剝船得旨允行十一月奏履勘運河上河泃河三廳屬各河淤沙較厚工段較長應挑土方請於額設兵夫外循例支給五十六年二月擢內閣學士和琳自五十二年至是皆命留山東巡漕之任四月疏請於滕縣濰河所經之皇甫村修築舊土壩攔水歸獨山湖以免挾沙淤運從之九月授兵部右侍郎十月命往勘陝西潼關廳城工同巡撫秦承恩覈實辦理尋覈減銀七十萬餘兩令承修各官賠償再請水關改立木柵泊岸築挑水壩責成潼商道德明經理疏下部議行十一月兼署工部左侍郎五十七年正月授正藍旗漢軍副都統二月廓爾喀侵擾後藏將軍福康安等統師進剿命和琳馳驛往理藏庫督前藏以東臺站烏拉等事四月疏陳運送軍糧分五十四站險阻限日行八十里平坡九十里並分加獎責可期迅速上

敕其善爲招集勿過嚴滋事閏四月諭曰軍行需用糧餉等事自察木多以西由前後藏至濟隴以內地方和琳與鄂輝二人輪往照料不可稍分畛域和琳隨疏報由江下至丹達一路設法督催切實曉諭營官喇嘛等咸知畏懼上諭令妥爲駕馭又諭曰和琳平素敬佛此次到藏見達賴班禪自必照常瞻禮其辦事原與達賴班禪平等應加意整飭力矯從前積習五月予都統銜八月擢工部尙書疏報馳赴宗喀濟隴催償接濟軍食方是時大軍深入賊酋拉特納巴都爾悔罪乞命得旨令福康安軍前受降善後事宜會同和琳熟商妥辦尋授鑲白旗漢軍都統九月疏言私往廓爾喀搆毀之巴故沙瑪爾巴財物籍沒入官其陽八井廟僧房令歸濟隴呼圖克圖管理紅帽喇嘛改爲黃教分交前藏大寺堪布約束十月又疏言凱旋事宜俱已籌備至廓爾喀貢使親來謝過恐達賴不諳事體應對失宜請仍回前藏料理報聞十一月諭同孫士毅惠齡覈辦察木多以西銷算事宜仍兼理藏務十二月會奏唐古忒訓練番兵藏內鼓鑄銀錢各事五十八年正月陳善後十八事詳福康安傳四月奏言廓爾喀酋長拉特納巴都爾以立結撒儻兩地本係該部落所屬因該處營官不許管理求仍給還前經勘明俱在熟隴橋

鄂博外已飭總轄營官聽歸該部落管理又底瑪爾宗亦廓爾喀舊地應自行接管毋許薩迎呼圖克圖私議收受諭曰和琳接到拉特納巴都爾來稟應將不聽管理之營官懲處使之畏懼何以未經想及辦理尙未周到若因營官係藏內所派之人稍存歧視轉不足以示公允宜勿存迴護之見六月予雲騎尉世職九月疏言噶布倫戴琫係請旨改補之員請分別給與三四品頂帶以崇體制嗣後噶布倫亦無庸給札薩克名號十月疏言唐古忒自去年改鑄乾隆寶藏銀庫三品試行迄今其重一錢五分者停積難行請嗣後祇鑄重一錢重五分兩品與巴勒布舊錢通用並允行十一月疏言廓爾喀酋長以哲孟雄作木郎二部不遵約束稟請剖斷並官爲定界緣二部落本非藏屬久被廓爾喀侵踞當諭令弗過窮追欺凌弱小亦不復代爲定界十二月請將前藏新設監鑄局員照糧員例減半支給口糧公費五十九年三月諭曰和琳奏阿足地方差員被掠一案摺內倉儲巴字樣沿舊時承襲之語藏內管倉庫人稱爲商卓特巴遇有陳奏應按照譯正和琳卽未能諳悉何妨轉詢講求一一通曉也七月授四川總督八月西藏新建御製十全記碑亭成恭進四體書墨搨并爲廓爾喀呈進貢表六十年二月貴州逆

苗石柳鄧糾衆擾正大嗅腦二營及松桃廳湖南逆苗吳半生偕石三保等圍永綏廳特命雲貴總督福康安統兵剿捕諭和琳馳赴西陽堵禦和琳方自藏來京至邛州聞警卽由川東赴秀山時松桃道阻該境當黔楚之衝閏二月督參將張志林都司馬瑜連戰皆捷復率先到兵廓清後路三月攻礮木山黃坂通道於松桃賜戴雙眼花翎時福康安已解正大嗅腦松桃圍將黔兵逕攻石柳鄧大塘汛和琳率川兵會於滿華寨是時軍營攻戰之事皆統於福康安和琳則隨參議八月克蝦蟆碛烏隴巖降羣苗七十餘寨敍功封一等宣勇伯九月克巖碧山捷聞賞上服貂尾褂又以降吳半生功賞黃帶十月以龍角碛及鴨保天星諸寨大捷加太子太保銜賞上用黃裏元狐端罩嘉慶元年四月由連雲山克結石岡廖家衝連峰坳諸隘賞用紫韁五月福康安卒於軍敕以軍營調度機宜交和琳一手督辦時石三保就擒石柳鄧尙踞平隴六月由馬鞍山渡河克尖雲山踰礮臺收復乾州賜戴三眼花翎七月疏陳苗疆善後六事清釐田畝歸併營汛酌改土弁修理城垣收繳鳥槍器械安插被難民人上以收繳鳥槍一條尙須斟酌仍敕和琳籌辦妥善八月大軍進圍平隴維時上軫念戎行以苗疆水土惡劣敕和琳於

攻破賊巢後卽與統兵大員移至辰州弁兵以次徐撤越五日軍營奏入和琳卒於軍晉贈一等宣勇公以子豐紳伊綵襲給治喪銀五千兩並賜陀羅經被予諡忠壯賜祭葬命配饗太廟並入祀昭忠祠賢良祠准其家建蓋專祠四年正月和琳以罪賜死大學士九卿文武大員翰詹科道等以和琳藉勢邀功議請撤出太廟削除公爵拆毀專祠諭曰和琳本無功績祇因奏參福康安木植一案得以屢邀擢用此案並非和琳秉公劾參實係聽受和琳指使爲傾陷福康安之計今和琳籍沒家產查出所蓋木房屋僭妄踰制較之福康安託帶木植之咎孰重孰輕且和琳同福康安剿辦湖南苗匪亦因和琳從中掣肘以致福康安及身未能辦竣是和琳於苗匪一案有罪無功所有和琳公爵自應照議革去至配饗太廟尤爲非常鉅典和琳何人乃與開國功臣同列著卽照議撤出太廟並將伊家所立專祠一併拆毀伊子豐紳伊綵著革去公爵斥退侍衛不准在乾清門行走仍加恩賞給雲騎尉豐紳伊綵兒襲三等輕車都尉

姜晟

姜晟江蘇元和人乾隆三十一年進士授刑部主事洊升郎中三十六年丁父憂

服闋補貴州司郎中四十一年擢光祿寺少卿四十三年擢太僕寺少卿仍兼刑部行走四十四年授江西按察使四十五年擢刑部右侍郎四十七年轉左侍郎四十八年十一月奉命赴直隸會同總督劉峩鞠魏玉凱控南宮縣民李在仁傳習邪教案赴山東鞠王慎典控鄆城官役藉差濫派案並得實以聞嗣以審辦尙書額駙福隆安家人富禮善命案未能究出頂兇實情降三品頂帶革職留任四十九年正月赴湖北鞠徐萬年控伊兄徐萬全被傷身死案得實九月以秋讞妥協特旨復還原品頂帶五十年二月赴江西鞠鉛山縣隸役冒考案並赴湖北鞠雲夢縣倉書苛徵勒派孝感縣客民江雲漢違例盜葬等案九月赴直隸永平鞠鄧甫清被責身死案旋以在刑部審訊海昇致死伊妻吳雅氏裝點自縊一案檢驗傷痕失實奉旨降四品頂帶革職留任五十一年秋讞覈議妥協奉旨復還原品頂帶是年二月偕尙書曹文植赴浙江盤查倉庫虛實會勘海塘應否修築事宜並赴江南鞠盱眙縣書吏侵用籽種口糧案十二月赴山西代州鞠孟本城被誣殺人案雪其寃五十二年三月充會試副考官旋授湖北巡撫時臺灣剿辦逆匪偕總督舒常奏動支倉穀碾米十萬石由長江順流出口海運達閩以濟軍需

上嘉晟不分畛域先事預籌交部議敘五十三年六月荆江水漲決隄府城被淹上命大學士阿桂侍郎德成勘係江面窄金洲漲沙偪溜以致上游壅高所潰決晟到任一年未能體訪籌辦荆州被水時監犯不帶刑具致有隨水漂散者又以淮商鹽引在楚省積壓由地方官需索匣費未經查參奉旨嚴議革去頂帶尋授刑部左侍郎十二月赴直隸鞫交河縣甲長劉東山誣報漏稅案賞還原品頂帶五十四年充殿試讀卷官五十五年充會試知貢舉殿試讀卷官屢奉命鞫直隸宣化縣鋪戶常懷恆寶坻縣民劉玉先控案五十六年四月授湖南巡撫時芷江縣境餉鞘被竊案懸未定晟抵任拏獲正犯唐占哇起出原贓奉旨交部議敘旋以錯擬夥犯唐開泰等罪名部議降二級調用奉旨從寬改爲革職留任五十七年二月奉命赴雲南鞫民人那耀空控謀占家產案並貴州民人楊秀錦控折色加徵案鞫實報聞六十年正月楚苗石三保句合黔苗石柳鄧叛陷松桃永綏等廳晟檄提督劉君輔帶兵剿辦自駐辰州儲備軍械糧餉添設運道臺站派兵於保靖瀘溪等處要隘堵禦搜獲奸匪百戶楊國安楊清父子解京上以晟籌辦軍務秩然有序鎮靜得宜交部議敘三月自辰州馳赴鎮筸稽查邊備撫恤難民諭

以辰州地方緊要仍令回辰州督率經理旋奉旨賞戴花翎十月首逆吳半生就擒恩予優敘嘉慶元年二月湖北枝江來鳳等縣邪匪滋事晟飛飭地方文武先期團練堵截賊果有犯湖南龍山縣境者副將慶溥截殺千餘名偪回來鳳賊遂不敢復窺湖南五月逆苗石三保就擒石柳鄧尙踞平隴總統福康安和琳先後病卒晟卽馳赴軍營偕都統額勒登保護軍統領德楞泰督辦剿撫諸務時降苗人數衆多諭姜晟妥爲安置因奏言苗匪真心投順者固多而其中先經糾結抗拒及見官兵攻剿緊急自知無路求生始行乞命並願縛獻首賊希圖免罪邀賞將來剿捕事竣自應酌量移徙以杜萌孽復生見在剿捕緊急之時未便預行洩露致令先生疑慮上是之九月諭曰姜晟見在軍營幫同辦理著卽賞給總督銜以資彈壓晟偕額勒登保等四路合兵攻克黃土坡社神堂等處木城石卡抵山家坳直逼平隴賊巢上又命將軍明亮提督鄂輝馳往會剿連克巖人坡養牛塘等險要賊卡十一月克平隴擒吳老華疊賞玉鞞荷囊煙壺等件有差十二月官兵殲斃石柳鄧於黃魚坡晟自軍營回辰州籌辦善後事宜二年正月奏請安插降苗展賑復業民人清釐軍需並因貴州南籠狝苗滋事以楚省撤回官兵移黔

協剿均得旨俞允七月兼署湖廣總督九月官兵盡殲恩施利川等縣邪匪並擒獲習教匪徒郭貴山等八十餘名優旨獎賞三年二月京察交部議敘八月監臨鄉試榜發訪聞榜首傅晉賢闈墨係彭珉原卷究出書吏勾串掉卷中式各情弊自請交部嚴議嗣奉旨姜晟據實查辦其咎尙可稍寬著改爲革職從寬留任四年四月布政使鄭原璫加扣平餘事發晟奉命研究得實並自請交部嚴議部議降三級革任諭曰姜晟平日居官聲名尙好且辦理軍務亦有勞績從寬免其革任七月永順被水晟馳往撫恤並奏請籌撤苗疆防兵及酌移兵糧吏調營汛修建乾州鳳凰廳城垣從之十月奉命赴湖北審辦監利安陸兩縣控案會鎮筸鎮右營舊司坪曬金塘一帶逆苗吳陳受率衆撲卡事諭晟速赴鎮筸籌辦務獲首犯正法嚴堵卡界勿使逸入內地亦不必深入苗境十一月晟偕提督王柄總兵富志那分派兵勇五股安設要隘互爲聲援飭鳳凰廳同知傅鼎以計擒斬吳陳受事定奏入諭曰吳陳受糾合衆匪搶奪滋事實屬不法經姜晟帶兵馳赴該處會同王柄等一面示以兵威一面傳集苗弁面加曉諭苗衆畏懼遞呈求救該督等卽傳集衆苗將爲首糾衆攻卡之吳陳受一犯擒縛按律凌遲處死梟示餘

匪釋令回寨辦理妥協實屬可嘉姜晟著加太子少保銜仍交部從優議敘五年正月擢湖廣總督十月調直隸總督仍留楚督辦軍需清釐積案六年二月旋直隸任六月京師霪雨爲災永定河漫口四處盧溝橋東西隄岸衝塌姜晟奏報延緩奉旨逮問諭曰京城自六月朔日起大雨五日四夜水勢驟漲節經朕派令乾清門侍衛等馳赴城外查勘被水情形設法將各路軍報齎遞又命衆卿員分路查災衆臣均能奔走不辭勞瘁而自初一日至初八日地方大吏杳無音信殊出情理之外及本日姜晟奏到一摺祇據河道稟報內稱本年永定河河流未斷汛前節次長水實爲嘉兆又稱大雨疊沛田禾尙無妨礙真如在夢中矣姜晟辜恩尸位昏愒錯亂此而不加懲辦何以整飭官聯姜晟著革職拏問解交軍機處會同刑部嚴審具奏經部議發往軍臺奉旨改發永定河工次效力九月工竣賞主事銜刑部行走七年五月命以刑部員外郎用八月賞四品頂帶授刑部右侍郎十月命赴江西輸巡撫張誠基冒功案卽署江西巡撫嗣以湖南軍需報銷事竣賞還二品頂帶八年正月回京轉刑部左侍郎九年六月兼署戶部左侍郎七月調署戶部右侍郎九月上以江南清口淤淺有礙運道命晟查勘晟馳詣清江浦

會同總督陳大文河督吳璥徐端勅明河口受病之故由河身淤墊黃水增高清水不能暢注致形阻遏因啟放祥符五瑞等閘以減黃添築運口蓋壩以蓄清并刻期挑濬引河運道通暢十月擢刑部尙書賜紫禁城騎馬十一月奏回空糧艘埽數渡黃卽赴江寧會鞫江西民人熊明中控朱暉光奪地釀命案因乞假回籍省墓允之十年四月回京供職十一年四月以老疾乞假調養六月奏懇開缺諭曰姜晟風溼舊疾復發先後賞假調理尙未就痊茲奏請開缺情詞懇切因思刑部爲刑名總匯事務殷繁姜晟年逾八十卽調理就痊於綜覈讞獄恐精神亦難周到著調補工部尙書仍加恩賞假數月在家安心醫治俟病愈再行供職八月復奏懇開缺諭曰姜晟敷歷中外四十餘年茲因部務緊要未能刻期就愈懇請出於至誠著准其開缺仍令在京安心調治俟伊全愈再行賞給差使九月以直隸總督任內失察藩庫虛收銀兩部議革職奉旨姜晟僅止失察情節較輕著加恩俟病痊以四品京堂補用先賞給四品頂帶十二年六月陳情乞休奉旨准其以原四品京堂休致回籍十五年四月卒子廷燦見任安徽候補通判廷璵河南試用通判

花連布

花連布蒙古鑲黃旗人姓額爾特德乾隆三十九年二月由健銳營前鋒擢藍翎長累遷火器營鳥槍護軍校委署鳥槍護軍參領四十四年十一月揀發湖廣以參將用四十八年十一月補湖北武昌城守營參將五十一年八月調湖廣提標中軍參將五十二年十月擢湖南辰州協副將五十五年八月擢貴州安籠鎮總兵六十年二月雲貴總督大學士忠銳嘉勇公福康安征黔省逆苗疏通松桃銅仁兩路餉道飭花連布率兵以先福康安既抵銅仁令花連布分路趨正大營解其圍斃賊百餘獲糧二千餘石奏入諭曰黔省苗匪與楚省苗匪勾結蔓延滋擾梗塞道路福康安不待兵齊卽帶見在官兵分路進攻立解正大營之圍總兵花連布打仗殺賊亦爲得力並著加恩賞戴花翎交部議敘部議軍功加一級紀錄二次閏二月從啞喇塘進經阿寨營安靜關諸處沿途剿賊復由巖板橋進連奪碉寨奉旨花連布著再交部議敘部議軍功加一級紀錄二次又從上麻洲下麻洲高坡塘上下長坪進攻嗅腦至松桃兩旁賊寨堆木石阻路花連布拆填坑壕福康安統兵進擊斃賊甚多上以花連布奮勇出力賞給剛安巴圖魯名號仍如

例賞銀百兩三月奪長衝塘山卡落塘斃賊無算生擒十人時永綏城被圍八十餘日花連布繞道往援擊賊於梁帽寨且戰且前抵永綏解其圍上嘉賞之又擊賊於小排吾剿巴茅汛鴨西黃瓜寨諸賊巢連破大寨五獲糧五百餘石四月由滾牛坡翻山下剿腊夷寨槍傷左腋上獎勵之又諭曰花連布此次帶兵打仗雖受槍傷幸俱不重此時是否傷已平復殊爲廬念五月由葫蘆坪進攻黨槽三家廟諸苗寨克之奪卡七擊上竹排下竹排各苗寨燬之上疊加獎賚又諭嘉獎交部議敘部議軍功加一級紀錄二次六月剿桿子坳賊匪七月據古哨營山梁上以花連布節次攻解圍城極爲奮勇命補授貴州提督時偵得首逆吳牛生往來馬鞍山塔金盛華哨孺塘蝦蟆峒古雙坪諸處糾衆苗計拒官兵花連布偕內大臣額勒登保率兵會總兵那丹珠等翼兵於爆木林山梁三路合撲連克苗寨十餘處沿途追剿深入數十里自成光寨至下狗腦坡山勢愈險賊匪嘯聚甚衆福康安派額勒登保及侍衛綸布春分兵兩路抄上狗腦坡花連布一路抄下狗腦坡花連布率屯番身冒賊槍攀藤附葛直上山頂賊漸卻分兵下壓會額勒登保綸布春繞出賊後之兩路兵夾攻之福康安焚狗腦坡上下苗寨花連布攻伐竹

木隨處薰塞沿途大小巖峒匪冒火爭逃擊斃者十七八又偵得吳半生竄匿古雙坪一帶八月福康安率花連布等冒雨搶占山梁斃賊千餘又令由貓頭進連克茶林礪上麻衝下麻衝諸寨甫下黃毛山坡賊數千從對面山沿坡接衝下額勒登保促兵奮壓花連布繞賊後夾攻殲斃無算九月由長坪齊集粵西官兵會將軍興肇率滿漢各兵隨剿隨進連克馬腦寨豬革寨殺苗坪竹子寨諸寨落復分兵攻巖板井灤水沱溪頭綠樹衝關鑲坪一帶全克之是月二十日吳半生至高多寨福康安督同花連布等分路競進四面嚴密攻圍吳半生詣軍投首奏入得旨花連布著從優議敘部議軍功加二級時將乘勝擣賊巢以龍角峒爲鴨保緊要門戶二十七日福康安派花連布分兵三路繞道進攻共克鷓洛下水壩重寨扣堡斗沙斗恩科峒霧露等寨二十四處次日黎明齊聚龍角峒山梁迎面攻寨賊衆乞降不許仍奮擊自辰至酉賊潰亂官兵躍入石城殺賊無算其附近未剿之黃毛坪蜡爾關鄧款臥黨溝沙做基大窩等十五處寨落相率來投十月初七日分剿大坡腦得勝山雷達山磨水山大小高巖喜鵲坡尖頭山清平山大小木城石卡三十餘處連克之又分花連布等爲四路於二十二日四更由鴨保

山撲鴨保寨西南兩面是夜朔風大作徧山樹木震動山溝路窄於黑暗中覓徑
凡遇溝濠各攀援跳越而上拋擲火彈焚賊窩棚俄而各山坳賊卡火光齊發槍
聲駱駝惟時風益猛窩棚竹木著火俱飛各卡苗匪惶駭無措官兵撲開木城七
石卡五斃賊無算隨舉垂藤董羅諸苗寨全克之十一月初一日抵賊巢初二日
暮密圍賊自吳八月於臥盤寨縛之二十日攻小天星寨翌日克之分兵中天星
大天星各寨繞道進攻黃衝口巖窠山騎馬山上寨坡大地坡小峰各賊卡一十
三處連克之抵得盤山梁十二月初四日撲木營山梁賊向山後遁暮雨雪冒雪
進圍地良坡焚其寨初五六日復冒雪進攻八荆桃花諸寨全克之初十日克高
斗山梁十三日攻曾定寨斃賊甚多生擒賊匪四十餘賊目二名十八日克馬峒
坡腳山兩汾河川峒各山梁燬苗寨三百戶獲大礮二器械無算二十七日撲金
嶺衝木城據其山梁嘉慶元年正月初二日克吉吉寨山梁十五日撲上連雲山
相持竟夜天明賊始退進攻巖峒大寨三十餘戶賊匪盡克之二十七日擊賊於
猴子山蛇退嶺諸處兩晝夜二月十三日抵壁多大山連夜進剿殲斃無數生擒
賊五十七要犯二二十四日抵高吉垵抵巴金灣盡焚諸賊寨三月初一日撲高

吉坵對面山梁斃賊數十兩岔溪伏苗盞起迎擊之抵平逆坳奪卡三初六日擊賊於擒頭坡相持一晝夜斃賊無數乘勢搜剿初九日抵禾粟山據頂下壓賊衝突才餘次連擊之賊潰竄二十三日據共三連克貴道嶺七星坡苗家坵槽石岡諸處石卡四十餘焚山下苗寨三百餘戶抵長吉山據石城左右大小山包木卡石卡三十餘處競上山梁舉茶山茨巖等有名大山平隴一帶緊要屏障全克之又據捷定坪筆架山勒兆堵瀑水源堵山梁連日獲賊三十七四月二十八日大雨後克蠻溪嶺紫泥山油麻灣茶坳諸處賊卡八九處撲廖家衝山梁據之又進據山梁七座五月十三日雲貴總督大學士忠銳嘉勇貝子福康安卒於軍總督一等宣勇伯和琳督兵於二十八日撲全壁嶺賊卡令花連布率將弁鼓勇截賊各路兵往來追剿斃賊無算斬級三十餘六月由馬鞍山赴乾州將渡河慮桿子坪泡水賊匪抄襲花連布等分路剿附近周圍苗寨七月初旬徧搜鴉溪大坡壘黃茅田狗兒寨梨樹七方橋三世猪湯家寨吳家寨施金坪雙塘夯陀大壩坪諸處民村苗寨抗拒者盡戮之攻至大莊八月由強虎哨分兵進攻後坡新寨麻里灣諸處大小賊卡十餘座斃賊甚多是月三十日四川總督一等宣勇伯和琳卒

於軍上命湖南巡撫姜晟與花連布熟商妥辦統計花連布以征苗軍功疊蒙恩
賚二十次九月清溪縣高承德等以邪術聚衆知縣王懋德被戕貴州巡撫馮光
熊奏入諭曰此等教匪倉猝糾合人數諒屬無多易於辦理見在花連布帶兵往
捕伊係本省提督且久歷戎行而馮光熊又調撥附近兵勇親往查辦想不難剋
期撲滅但必須將戕官之犯嚴拏務獲詳悉問明從重辦理方足以儆兇頑而申
國憲將此傳諭知之旋偕馮光熊奏攻槐花坪四寨報聞嗣又攻破小竹山賊巢
奏曰小竹山路分歧恐賊匪四出滋蔓撥官兵就各要口集鄉勇堵禦十八日賊
匪二三千分擁撲卡官兵分擊槍礮並發斃賊三百餘人斬級百三十二斫斃逆
渠高承芳並賊目五賊衆竄山梁堅拒連日偵得賊黨脅附之衆漸生離異駱驛
遁出二十二日乘機進攻賊衆仍死拒官兵奮擊奪卡直入小竹山賊巢礮斃無
算槍斃首逆高承德及戕知縣王懋德之犯陳仰瞻賊匪乘夜潛由雙岔山溪鐵
礮坪竄入大小鬼壘官兵跟蹤進逼尾追見在兜擒務盡根株得旨嘉獎鬼壘距
小竹山三十餘里壘在高岡之上陡坡深澗迂迴險峻官兵旣於各要隘派兵嚴
堵二十五日巳刻賊匪搶夏家衝鄉勇營卡花連布派副將海格參將施縉等兩

路攻山梁擊散之奪卡四壘上賊匪千餘復由衝內攢擁撲拒海格施縉兩邊追壓花連布由中路進追賊至壘邊督兵奮攻賊見攻甚急俱於半坡擲石以拒又賊別黨從澗內突出堵截我兵花連布已上坡未及數丈頭中石滾跌巖下半坡及澗內賊合撲之諸將併力殺退而花連布傷重旋歿於陣馮光熊奏入諭曰花連布因賊匪搶奪夏家衝督兵攻擊被賊匪擲石身故雖係冒險輕進但究屬歿於行陣深堪憫惜著加恩賞給太子少保銜仍交部議卹並入祀昭忠祠伊子侯承襲世職後帶領引見以示軫念部議給予騎都尉兼一雲騎尉世職襲次完時給予恩騎尉世襲罔替卹銀八百兩賜祭葬如例諡壯節子富慶承襲

仙鶴林

仙鶴林山東滋陽人由行伍於乾隆三十八年補臨清營把總三十九年逆匪王倫滋事大兵圍賊於臨清舊地探知王倫遁踞汪姓大宅鶴林隨頭等待衛音濟圖等直入搜捕鶴林手捽王倫辮髮被夥賊突出搶奪身受刀傷經大學士舒赫德奏請以千總升補四十年三月補東昌營千總十月調壽張營千總四十五年以盜犯王二在壽張等處潛匿鶴林不實力查拏降兗州營把總四十八年升兗

州營千總五十二年五月升德州營守備十二月偕遊擊王文雄擊獲汝上縣肆竊拒捕兇犯李得朋魏寅等經山東巡撫長麟奏入命送部引見以都司升用五十三年五月授廣西潯州協都司五十六年調右江上林營都司五十九年擢右江隆林營遊擊嘉慶元年擢廣東督標參將調赴湖南剿捕苗匪十二月隨廣州將軍明亮都統額勒登保攻賊於馬頭山奮勉出力賞戴花翎是月大兵由馬頭山進攻貴魚坡連克險要苗寨鶴林與有功二年二月調赴鎮筵乾州一帶辦理降苗事務先是鎮筵乾州瀘溪河溪等百餘處皆係漢民田地自逆苗滋事以來民人各棄本業逃往他處所遺田畝遂爲無業窮苗占踞至是明亮等命鶴林偕千總滕一鵬徧歷各寨開導降苗將所占田畝退還俾民人各歸本籍復業耕種時苗疆大功甫經告蒞應留駐官兵分路防範湖廣總督畢沅湖南巡撫姜晟請將鶴林熟悉苗情諳練營務與參將阿林布遊擊五十一等俱奏請留楚管帶防兵五月擢湖南永綏協副將五年丁母憂姜晟請將鶴林留任守制諭曰湖南見非辦理軍務省分該副將祇係在苗疆留防彈壓並無帶兵之事且該省苗疆地方不止永綏一處若遇有丁憂之員俱以熟手爲詞紛紛請留在任守制成何政

體仙鶴林著卽回籍守制八年三月服闋授河南河標副將尋擢甘肅河州鎮總兵十一月調湖南鎮筵鎮總兵九年擢湖南提督十三年閏五月鶴林呈遞皇上慶育皇長孫賀摺措詞謬妄諭曰提督仙鶴林所奏之摺以誕降重熙承華少海玉質龍姿前星拱極本支百世派衍東宮等詞填寫滿紙一派狂言謬妄已極仙鶴林著革職鎖拏交景安嚴行審訊並將代擬奏摺之人一併鎖拏質審仙鶴林是否通曉文義此摺或係伊自出臆撰抑係伊本無主見祇倩人撰擬均須詳細鞫訊俟審有大概情形景安一面奏聞一面將仙鶴林及代擬奏摺之人派員押送進京交軍機大臣會同刑部嚴審定擬具奏六月湖南巡撫景安奏查訊仙鶴林於五月內恭聞皇上喜得皇長孫伊係武職大員例應具摺陳賀因行伍出身素不通曉文義先令營書郭裕昆代擬奏稟後送交常德府知府薛淇閱看囑其改定是日薛淇感冒暑熱未及翻閱隨交幕友石先幾代爲酌改石先幾不諳體裁卽摘原稟數句又摭拾類書成語數行衍成一稟送與繕奏應將薛淇革職同仙鶴林郭裕昆石先幾一併解京七月軍機大臣會同行在刑部覆審屬實仙鶴林石先幾應比照上書詐妄不以實律杖一百徒三年鶴林係屬大員請發往烏

魯木齊效力贖罪郭裕昆擬杖一百徒二年薛淇擬杖六十徒一年奏入諭曰仙鶴林自行陳奏事件並不詳加檢點致多謬妄其咎較重本應照議發遣姑念伊前屢經帶兵打仗身受重傷著有微勞著加恩免其發往烏魯木齊仍與石先幾一律問以滿徒十四年二月上以本年五旬萬壽加恩釋放廢員鶴林回籍九月奉旨以營守備卽選十一月選山西平垣營守備十五年擢江西南昌城守協副將十六年閏三月授河南河北鎮總兵八月因染患骸疾奏請解任回籍調理諭曰仙鶴林曾經出師著有勞績茲因病奏請開缺著加恩以原品休致十八年卒子殿寧江寧候補縣丞

額勒登保

額勒登保瓜爾佳氏滿洲正黃旗人世居吉林烏拉乾隆三十三年以馬甲隨征緬甸三十八年隨征金川三十九年以功授藍翎侍衛四十年擢三等侍衛四十八年二月金川平追敘攻取噶拉依功賜和隆武巴圖魯名號移駐京師四十八年命在乾清門行走四十九年五月隨尙書福康安領侍衛內大臣海蘭察攻逆回田五等於石峯堡六月至隆德海蘭察率之偵進兵路徑擒牧放牲畜賊回四

獲馬牛刀矛無數旋以攻復底店賊巢功授二等侍衛事定回京五十年隨駕射鵠中的賜黃馬褂五十二年授頭等侍衛隨福康安海蘭察征臺灣逆匪林爽文援嘉義解其圍賊退據大埔林中林大埔尾三莊其剽悍者多據中海海蘭察率額勒登保攻克之餘賊潰福康安奏令押解賊目蔣挺等回京五十三年二月俘林爽文臺灣平圖形紫光閣列後三十功臣中命儒臣製贊曰中林效績健捷過人星馳飛鏃操刺罕倫直前披擊衝壘奮身龍驤備衛是謂虎臣遷御前侍衛以奏對錯誤降二等侍衛五十六年廓爾喀賊匪擾後藏命爲頭等侍衛馳赴軍營會駐藏大臣舒濂病卒四川總督鄂輝奏令額勒登保駐前藏攝其事上嘉鄂輝爲知人五十七年五月隨福康安海蘭察攻克擦木賊寨七戰七勝直抵帕朗古河賞加副都統銜賊酋納款撤師福康安等奏以額勒登保督兵殿後十月又先令回京面奏軍營事宜圖形紫光閣列前十五功臣中御製贊曰石碣木柵鱗疊賊防勢如捲籜捷似頽牆將軍所示無不領略率領精兵埋根卓鑠尋授鑲紅旗蒙古副都統五十八年授鑲白旗護軍統領調鑲黃旗護軍統領五十九年調正藍旗滿洲副都統六十年正月擢鑲藍旗蒙古都統黔苗石柳鄧叛於松桃廳楚

苗石三保叛於永綏廳陷乾州上命雲貴總督福康安督兵因奏以額勒登保及護軍統領德楞泰率巴圖魯侍衛往二月抵辰州單騎馳赴大營上嘉之時福康安先已解松桃圍石柳鄧逸入石三保黃瓜寨中額勒登保由松桃迤西進攻三月解永綏圍四月克黃瓜寨又攻克首逆吳半生蘇麻寨吳半生遁踞西梁寨石三保等遁踞鴨保寨爲援額勒登保設伏敗賊於雷公山克西梁五月賊退守大烏草河水漲軍不得渡先攻沿河各賊寨克之七月福康安令額勒登保等以計渡河乘勝克苗寨無數九月破高多寨獲吳半生下部優敘十月與德楞泰同授內大臣又獲乾州起事賊日吳八月於臥盤寨計將收復乾州賊踞平隴阻遏官兵福康安令額勒登保等奪踞禽頭坡驛馬峒各山梁以破平隴門戶嘉慶元年三月賊伺我兵采入由禽頭坡抄截後路我兵擊敗之進抵長吉山安營未定賊苗數千撲營額勒登保身自擊退均得旨嘉賞五月福康安病卒軍務統於四川總督和琳時石三保就擒石柳鄧及賊日吳廷義方踞平隴六月和琳奏平隴險固請先趨乾州賊踞河堅守額勒登保率兵渡河先登直入乾州復其城賞戴雙眼花翎命署領侍衛內大臣八月屢克險要苗寨未至平隴和琳卒於軍額勒登

保亦染瘴病痢上命移駐辰州調攝九月以病痊帶兵奏入上喜慰並嘉其遇事鎮靜合機宜疊加賞賚是時統兵大員惟額勒登保及內大臣德楞泰湖南巡撫姜晟三人上因命將軍明亮提督鄂輝馳往接辦十月偕明亮等攻克平隴石柳鄧遁踞養牛塘山梁分兵克之命補授鑲黃旗領侍衛內大臣賞銀一千兩是月連克馬頭山餘錦坡各寨十二月梟石柳鄧於貴魚坡諭曰額勒登保自用兵以來首先帶兵殺賊此次賊從山溝衝突而出復經痛加截殺殲戮無算尤爲奮勇可嘉額勒登保著封爲威勇侯賞銀一萬兩二年正月降苗縛送賊目吳廷義並石柳鄧石三保等家屬分兵搜捕餘匪疏通鎮筸保靖永綏等處道路大功告歲先是元年春湖北邪匪滋事延及川陝各省額勒登保以苗疆軍務未之赴也至是命由鎮筸趨襄陽偕湖廣總督福凝剿林之華覃加耀二逆於長陽縣黃柏山賊據四方臺恃險負嵎三月額勒登保馳至軍攻克之追賊至芭葉山賊於入山之大壠口二壠口築卡掘濠固拒六月克大壠口賊竄宣恩建始等縣分兵三路追捕十月始斃林之華於長陽縣之大茅田覃加耀仍未就擒十一月賊復由黃柏山回踞朱里寨屢奉嚴旨申飭十二月賊踞歸州終報寨上以終報寨周圍十

餘里覃加耀夥黨不過百餘額勒登保統兵四五千兼以鄉勇不能立就蕩平降三等伯爵戴單眼花翎三年正月擒覃加耀上責其不能早竣不但無功而且有過褫爵予副都統銜是時賊匪有青黃藍白線等號又設掌櫃元帥先鋒總兵等僞稱上命赴陝協剿襄陽白號高均德黃號姚之富齊王氏股匪會賊日李全張添文自整屋至藍田欲與高齊股匪合額勒登保率兵截擊之姚之富齊王氏失援遂爲副都統銜明亮德楞泰所殲三月偕明亮追剿高均德於鳳凰觜兩岔河賊南竄商州鎮安一帶四月襄陽藍號首逆張漢潮由川被剿入楚命帶吉林黑龍江兵赴荊州會剿五月賊欲潛渡漢江及竹山之官渡河我兵擊卻之六月追賊入陝境平利縣又由陝追入川境太平縣上以任賊奔竄蹈尾追結習降旨切責七月奏感患暑溼留太平醫治時巴州白號首逆羅其清踞營山縣之箕山卡寨林立曉夜鼓角與大營相對諸賊多恃爲聲援九月尙書惠齡副都統銜德楞泰攻破箕山會額勒登保病起自太平至廣元追剿高均德李全股匪聞張公橋有賊迎擊之大捷生擒張漢潮之子正澁與惠齡等合兵十月羅其清退踞大鵬山分遣賊衆伺劫軍餉額勒登保先督兵疏通儀隴巴州運道十一月合兵圍剿

大鵬山克之殲羅其清之父從國其清遁入巴州方山坪額勒登保分兵兜剿七晝夜生擒其清並其弟其書其秀子泳福等賞還花翎十二月馳赴合州追剿達州青號徐添德東鄉白號冷天祿股匪四年正月上以前此軍營事權不一致歲功需時特命四川總督勒保爲經略大臣額勒登保與明亮同授副都統爲參贊大臣二月涪州有賊詐稱良民投入鶴遊坪難民寨中爲內應賊大夥踵入額勒登保偕德楞泰擊散之寨民得全三月雲陽藍號賊首蕭占國張長更等復由閬州回擾營山賊衆八九千額勒登保力疾轉戰盡殲賊衆於譚家山斬蕭張二逆恩賞二等男爵世職時冷添祿方踞岳池額勒登保乘勝由閒道冒雨進剿追至廣安州石頭堰殲斃餘匪千人於石筍河奏入諭曰額勒登保旬日之內殲除三股賊匪實爲奮勇可嘉著晉加一等男爵從前各路帶兵大員祇圖擒拏首逆仍任餘匪竄逸以致一股未平一股復起迄無竣事之期今於旬日內連辦三股賊匪不留餘孽從此剿淨一股卽肅清一處可望成功朕佇盼捷音踵至也四月留川追剿東鄉白號張子聰股匪於雲陽縣蒲家山子聰句合襄陽黃號樊人傑太平黃號龔建等逆抗拒其分股賊目蕭焜又合奉節線號卜三聘龔文玉等逆奔

竄我兵疊敗之於寒水壩楊家山譚家壩等處賊稍解散五月張子聰復與通江藍號冉添元合欲犯陝境我兵由老官山等處兜截偪回南江六月張子聰竄通江追敗之於苟家坪敗冉添元於木老壩諭曰額勒登保每遇打仗奮勇爭先冒險進擊故所向克捷朕心實爲欣慰適據勒保奏稱額勒登保深得衆心雖疲乏之兵歸入伊隊卽能齊心奮勇兵弁無不樂從賊匪俱知畏懼但伊前任領隊侍衛時先登陷陣奮不顧身固所當然今職司參贊乃國家倚重之大臣所關緊要嗣後凡遇擊賊宜加慎重愛身相機指示不可仍前爭先冒險奮勇而輕於視敵此爲至要七月冉添元竄鎮龍關欲與達州青號王登廷合登廷屯馬鞍山遣賊黨阻我後路糧運額勒登保率兵敗之於王家壩克馬鞍山窮追賊衆於大竹鄰水東鄉各縣境值齊家營別股賊匪竄至立分兵擊殺二千餘生擒一千餘仍緊躡登廷不予以暇上嘉之八月湖廣總督倭什布以川省賊匪李淑徐添德等衆犯楚飛章告警上逮經略勒保入都參贊明亮亦被逮特授額勒登保爲經略大臣加都統銜以德楞泰爲參贊大臣先是湖北糧員胡齊崙餽送事發額勒登保獨無所受又慎重支餉偶遇缺乏卽自行籌辦從不諉咎糧員諭曰額勒登保忠

勇清公實爲難得經略之任舍伊誰屬卽不識漢字亦何難以清字繕奏朕亦降清字諭旨指示又諭曰民間聞額勒登保經過皆知其能愛護百姓無不傾心悅服地方官餽送分毫無取東三省人奮勇者多似此樹立端方實所罕見見已授爲經略大臣奮勉勇往之中還當以國事慎重爲念九月奏李淑徐添德股匪經楚境官兵剿潰折回川東勢已殘敗而王登廷一股見與冉添元鮮大川苟文明合又有襄樊首先起事之阮正澹竄至廣元覬覦入陝見在賊勢川北爲重臣未便再往川東臣向來祇係一路偏師茲奉恩命授爲經略大臣自當查明各路實情通籌全局孰緩孰急妥爲趕辦旋率總兵楊遇春等殲阮正澹等於雲霧山授正白旗漢軍都統十月奏各路出力人員應隨時鼓勵令領兵大員自行保奏以免往返咨送稽延上嘉其公又奏陝西邊界大半皆臣剿賊周歷之地俱有險要可扼然督兵之員分駐一處株守營卡竟置經過之賊於不問及賊已竄出轉以地方遼闊賊來衆多爲詞掩其堵禦不力之咎請令陝省各大員嗣後於各營卡預備出敵官兵聞有賊警一面嚴防一面迎擊蓋賊匪之奔逸卽或突然而來亦不過一路兩路官兵營卡聲勢如果聯絡彼此出而迎追互相策應賊匪旣難飛

越何至更有蔓延所謂以堵爲剿事半功倍又奏軍中馬隊最爲得力請於四川雲貴三省購馬千五百匹到營應用上從之十一月賊首王登廷徐添德冉添元樊人傑等股會合抗拒額勒登保躍馬督陣破之於巴州何家院及東君壩擒僞總兵賈正舉王用奇等追賊於蒼溪貓兒壩賊冒死突入我營將弁兵勇多有損失王登廷逸去尋爲南江縣團勇盤獲奏入諭曰額勒登保此次盤獲王登廷與所奏貓兒壩一帶官兵挫折之事相隔僅一日若從前軍營統兵之人必將官兵失利之處壓擱不奏轉將首犯王登廷作爲打仗擒獲掩敗爲功其陣亡多員分作數次含混入奏以爲支飾之計今額勒登保據實直陳並不稍存諱飾而於王登廷盤獲情節一並明白聲敘並不攘爲己功似此方不愧經略之任朕之所以嘉予額勒登保而加之賞賚者實在於此命補領侍衛內大臣十二月賊匪高戴馬羅各股由潘家山老林突入陝境城固南鄭等處肆擾額勒登保聞警督兵赴陝以川省軍務移交總督魁倫接辦五年正月川北賊匪乘虛由定遠搶渡嘉陵江分擾川西州縣魁倫退保潼河上以額勒登保不知通盤籌畫冒昧離川飭之二月追陝賊至甘境與參贊那彥成合兵旋因病暫駐秦州上遣其姪富忠阿帶

御醫馳視病起屢殲賊衆於寧遠伏羌岷州階州各處擒僞元帥陳正甲詹世貴等上嘉額勒登保與那彥成同心合力連次克捷優加賞賚三月襄陽白號賊首楊開甲等股復由甘省南折入陝其藍號賊首張漢潮先斃於陝境餘匪仍四出紛擾潼河時亦失守上逮問魁倫起勒保權成都將軍與德楞泰剿辦川賊專賚額勒登保與那彥成剿辦陝賊因請添調直省兵一萬三千名從之四月陝賊大股直竄鎮安商州雒南一帶上以額勒登保等不知東面爲重有驅賊入豫之勢革去花翎召那彥成還京額勒登保尋率總兵楊遇春馳抵商雒賊七百又追至兩岔河殲擒千餘名緊扼龍駒寨遏賊東驅盧氏大路賞還花翎賊西南奔洵陽之大小中溪設伏擒斬襄陽藍號賊首劉允恭劉開玉及僞元帥王洪儒等於

是張漢潮餘匪之在陝者淨盡恩旨晉封三等子五月追剿襄陽黃號股匪伍金柱等於漢陰廳銅錢窖斬賊首龐洪勝楊六燕老教頭王者子等殲賊五千分飭將弁追斬楊開甲於洋縣之茅坪下部優敘六月陝賊全竄甘肅徽縣兩當各境而襄陽藍號賊目陳傑仍偷越棧道欲奔南山七月分飭將弁生擒陳傑並獲僞元帥曹印斬馘三千餘八月槍斃伍金柱於成縣之峽溝屢奉旨嘉獎賊被剿回

竄陝境額勒登保移師西鄉居中督辦而賊匪不據城池惟往來川陝楚交界萬山層疊密林深溝之處潛掠村市裹脅難民狡竄疾馳趨向無定十一月賊由西鄉漁壩竄過漢江以北者額勒登保帶兵渡江迎擊奏言臣剿辦賊匪入秋以後南山業經肅清甘省漸就寧謐賊匪紛紛敗竄悉偪歸漢江以南滿擬就此次第剿除或迸入川境聚而殲旃不料賊蹤飄忽又復竄過漢江以北是甫有頭緒仍形散漫實堪痛恨辦賊之法不外防剿二端川陝楚邊界遼闊在在有路可通江水繇長處處有險可涉勢不能逐處安設重兵賊匪猝然而來雖有接應之兵率皆鞭長莫及防之不足恃如此至於帶兵剿賊既須跟追又須攔截窮數日方及其蹤官員尙有馬可乘兵丁則徒步莫及官雖至而兵未至兵甫至而賊又逃近來賊勢敗殘其潛匿多在老林之中其奔走更在無路之處追逐倍形艱苦況殺一頭目又添一頭目殺賊數人又裹脅數人官兵正辦此股他股又從旁路而來正在擊西其東而又復接踵而至各匪正聚一處一經剿殺又分股逃遁前後左右皆受牽綴我兵稍不慎密往往墮其術中剿賊之情如此至臣有總統師干之責功之所在悉皆第其等差以次遷擢過之所在亦必權其輕重以示創懲臣一

切奏牘未敢稍涉虛誣卽各路軍營報到亦必察其虛實從未敢以不實之情上干宸聽臣之辦事如此而事機不順堵剿均無速效惟有請旨將臣嚴加治罪以昭儆戒奏入上溫旨慰勞之十二月奏前此到處設防以冀攔賊去蹤便於痛剿乃所設營卡疊遭衝突雖治罪纍纍總以地廣兵單難於兼顧今請將各處防堵之兵除江防外悉撥入剿兵之內又大兵至某州縣剿賊卽將該處鄉勇之壯健者挑選一二千隨同協剿大兵過境仍留本處防堵至堅壁清野實爲制賊要著見在川省寨堡結實賊匪不敢深入此其明驗陝楚兩省結寨寥寥是以賊匪東遁西逃仍有人可擄有食可掠儻各邊界層層俱有寨堡則糧食悉歸存儲賊匪無可擄掠且可備官兵猝入剿賊支給之用賊則飢餓難行官兵則飽騰可戰斷無不克捷之理上可其奏以剿捕責諸將以防堵責疆吏並申諭各疆吏鼓勵團勇撫卹難民賊衆竄近武關意圖入豫額勒登保督兵截剿偪回西南六年正月剿襄陽賊首王廷詔白號賊首高二馬五等股於漢陰南山馘賊千餘生擒八百諭曰新正以來額勒登保遞到兩次捷報官兵於冰雪沍寒之時乘夜進發累日奔馳不遑炊爨艱苦備嘗是進剿不爲不力殺賊不爲不多朕亦不忍再加督責

但未能殲獲渠魁辦完一股於大局仍無裨益向來各路帶兵大員剿辦股匪勢已殘敗本可一鼓殄除或因他股賊匪從旁路突至不能不就近接剿以致被逃之賊沿途裹脅又成大股與未經剿殺何異此五年以來軍營通病見在高二馬五王廷詔皆係著名兇悍首逆官兵已獲勝仗卽須專注此股賊匪併力剿辦不可舍而之他致令逃竄大股除盡小股不攻而自破矣二月奏請增設寧陝一鎮爲南山一帶屏障上韙之諭將安營設汛事宜速籌妥辦是月飭提督楊遇春追剿賊衆擒王廷詔於川陝邊界鞍子溝俘至京師奉旨交部議敘三月高二馬五又與賊首王淩高竄入南鄭我兵追至百雄關先擒王淩高及老教首張什尋督楊遇春追高二馬五於寧羌州鐵鎖關擒之上嘉其調度有方晉二等子爵賞戴雙眼花翎時逆首最著名者陝省則冉學勝伍懷志等楚省則徐添德苟文明等川省則樊人傑冉添泗王士虎等尙不下十餘股冉學勝北擾甘境額勒登保督兵由漢中入棧兜剿四月偪退冉逆於渭河南岸又蹙之於漢江南岸賊遁平利而洵陽復有白號首逆張添倫等五股合夥屯高塘嶺劉家河一帶勢甚張額勒登保分飭楊遇春等冒雨剿捕殺賊二千生擒一千投出被脅難民數百獲騾馬

旗幟刀矛鳥槍無數生擒張添倫六月飭提督穆克登布擒伍懷志於秦嶺七月
飭楊遇春擒冉添泗王士虎於通江報曉埡均得旨嘉賞其起事最久之徐添德
及冉學勝亦被楚蜀官兵殲擒而姚之富之子馨佐及襄陽白號首逆高見奇辛
斗等方擾寧羌額勒登保督兵西剿徧入川北九月飭諸將格布舍楊芳等生擒
辛斗於南江倒水峒十月飭豐伸桑吉斯塔爾等生擒高見奇於紫陽三星寨又
追剿李彬股匪於達州境獲其妻子及僞元帥冉添璜僞副帥朱印阮添浩等於
是僞總兵李元受老教首閻天明及賊夥龔榮忠韓文進等各率衆數百人投首
奏奉恩旨免死安插賊勢日就窮蹙因條奏軍務戡定情形及搜捕餘匪各事宜
諭曰所奏皆與朕每日指示軍機大臣等意旨不謀而合具見額勒登保曾有把
握籌畫全局悉中肯綮深堪嘉獎著加恩晉封三等伯並賞給黃面貂皮馬褂十
一月巴州白號首逆苟文明潛與高冉各股剿敗殘匪合由廣元偷渡漢江竄入
甘境階州裹脅二三千人旋由階州回竄廣元上嚴飭額勒登保逮問逗遛縱賊
之四川提督七十五額勒登保檄德楞泰馳抵廣元協剿十二月賊竄通江殲之
於瓦山溪獲苟文明之姪僞元帥苟明獻及其弟苟文舉等賊竄開縣大寧七年

正月分兵擒斬襄陽黃號賊首辛聰於南江五寶山苟逆俄率賊衆由西鄉七星壩搶船偷渡漢江北岸額勒登保馳奏請罪上以七星壩一帶本有防兵額勒登保前因賊氛已遠遽行撤去致賊偷渡罪有應得念其屢著勞績從寬降一等男爵單眼花翎旋奉旨以川省股匪交德楞泰勒保辦理額勒登保以經略大臣兼西安將軍專辦陝賊二月奏言川陝楚三省邊界賊匪合計不過五六千人無如賊勢愈窮狡詐愈甚晝則伏而不出凡溝渠林箐隨在皆可藏身夜間潛地奔逃雖寨峒民人亦莫測其蹤跡或遇道路民人潛出剽掠或擄得男婦向寨峒換易衣履食物百姓等顧惜人口不得不遂其所欲迨我軍帶兵遄往賊早遠颺往往窮日奔馳徒勞無益臣以多兵追剿未能得力是以分派將備酌帶勁兵或數千人爲一路或數百人亦爲一路或奮力直前攻其無備或乘夜進擊使不及防較之大隊官兵逐北追奔轉爲有益是月苟文明被剿竄入南山與他股賊首宋應伏劉永受合三月賊詐爲官軍紅黃旗幟豎沙壩山頂計陷我兵額勒登保親率將弁等徒步入山搜剿而狹路險阻賊勢盛則隨地抗拒或偷撲營卡被剿窮迫則翻越陡壁藏匿老林且多分股數條東條西爲牽綴官兵之計五月上以額勒

登保任賊奔竄南山老師糜餉革職暫予留任六月痛剿賊衆於龔家灣苟文明僅以三百餘人脫去擒其妻子並搜斬峒民之通賊者賊目劉永受亦以被剿潛逃爲村民所殲奉旨開復革職留任處分苟逆由川塘河東竄額勒登保親率官兵抄擊疊有斬獲並因探聞德楞泰於楚境殲除首逆樊人傑曾芝秀等撥解賞需銀七千兩分犒兵勇諭曰額勒登保冒暑進兵無分雨夜可謂不遺餘力朕心深爲廩注又奏撥賞需銀兩解送德楞泰軍營一節額勒登保不獨無忌功之念且酌分賞項獎勵成勞足見爲國公忠深得大臣之體七月殲苟文明於寧陝廳花石巖恩旨晉封一等伯賞還雙眼花翎以所兼西安將軍缺改授興奎額勒登保奏軍務不日告竣減撤東三省及直隸廣東廣西官兵又奉命籌撤節年召募遠來之寨勇鄉勇請派員分起資送回籍並給價收繳兵械其願入伍者仍分隸各營備補兵額均報可八月窮搜南山餘匪擒苟文明之弟文齊殲斃賊目張芳卽督兵取道平利與德楞泰會剿大股楚匪凡五戰擒斬過半九月移師安康紫陽一帶東顧楚境西策川界十月殲達州青號首逆熊方青於邊界王家莊並於竹谿境內盡殲搆鼓臺老林股匪授鑲藍旗蒙古都統十一月上念額勒登保衝

寒帶兵不避風雪特賞貂皮馬褂一件是月督飭穆克登布追剿黃藍線白各號股匪於通江鐵鐙臺生擒首逆景英掌櫃蒲添香僞總兵賴大祥並獲楚省老教賊目崔連樂晉封三等侯爵時著名首逆率就殲擒餘匪分竄老林者或百餘人爲一起或數十人爲一起不復成股乃以十二月偕參贊大臣德楞泰總督勒保惠齡吳熊光等馳報歲功諭曰額勒登保總統師干公忠懋著謀勇兼優前此平定苗匪時卽經賞給侯爵嗣因剿辦邪匪遲延暫予降黜自膺經略重任運籌決勝悉中機宜躬親行陣與士卒同勞苦用能屢獲渠魁掃除苞孽業經節次加恩晉封三等侯爵茲三省全奏底平厥功殊偉著晉封一等侯世襲罔替並授爲御前大臣加太子太保銜賞用紫韁以彰殊錫餘亦論功行賞有差八年正月額勒登保留陝搜捕未盡零匪疊次殲擒首逆姚馨佐陳文海宋應伏等於紫陽縣境閏二月提督穆克登布以追剿宋應伏餘匪至南江亮埡子遇伏陣亡因言賊數愈少而賊情愈爲狡悍請發帑興築城營制賊奔竄並借此收養遊民以工代賑奏入諭曰見在零星散竄之賊不過在深山老林潛匿奔逃此時卽使擇要興築賊匪早經繞道遠避安能制其死命況將附近寨砦百姓遷徙入城是直以民田

廬舍委之賊匪賊蹤所至無人抵禦更得來往自如乃轉稱賊匪不敢由彼奔突乎至以工代賑一節地方見有興作遊民得藉此謀生設將來工程完竣亦難保遊民不仍散爲賊額勒登保又將如何安置乎又據稱川陝兩省城營各工約需銀四十萬兩如蒙恩給發督撫趕辦並可就近查覈督催等語額勒登保總統師干自應以戢暴安良爲己任乃不思辦賊轉欲監工豈經略重任僅在監督工程乎七年以來所奏之摺從無似此次不通事體之至至稱三省軍餉每月需銀三十四五萬兩懇恩鑒覈一節軍營餉項朕先事預籌源源接濟從未令有缺乏額勒登保豈不知之猶以此爲藉口乎額勒登保殊負委任著革去御前大臣並紫韁仍授御前侍衛並傳旨嚴行申飭尋以督兵殲斃賊目齊國典靳思慶等於太平廳境奉旨額勒登保自經訓飭以來甚知感奮將緊要賊目盡數殲除著賞還御前大臣並紫韁用昭優獎六月移兵入川生擒戕害穆克登布之賊目熊老八於大寧縣廟梁子又擒僞元帥趙金友奏言酌擬留防搜捕善後各章程一請全撤外省客兵及東三省馬隊以節糜費而示體恤一請酌留四川本省兵勇一萬二千名分布川東川北一帶湖北本省兵勇一萬名分布歸巴興房二竹一帶陝

省兵勇一萬五千名分布營卡常川會哨以絕川楚餘匪竄陝之路一請將隨征鄉勇有家業者聽其回家安業外其無家業願歸營者照新兵例各給守糧一分俟制兵缺出撥補約一二年即可補竣守糧亦可裁盡於安插鄉勇之法萬全無弊一請川陝楚三省分駐大員統率一請俟奏報肅清後申繳經略參贊印信諭暫留東三省馬隊官兵並止其繳還經略印信統俟善後事竣親齎入都餘俱如所議行七月額勒登保偕德楞泰勒保馳奏三省餘匪肅清蒙恩賞賚並下部優敘命德楞泰先行回京展覲額勒登保暫留川省經理善後八月奏言川陝楚三省地勢犬牙相錯東至巴巫西至廣寧二千餘里交界盡係大山向屬姦宄潛蹤之地既不可稍留遺孽又不可久稽大兵請就三省分段各派鎮將梭巡會哨使賊匪無地潛匿並圖各州縣營汛地界以聞報可是月移師陝楚查閱營卡續獲苟文明之弟文渠南山零匪搜捕殆盡惟苟逆餘黨潛結土賊數百人由鎮安偷渡漢江竄及鄖西復折而入川十月上命德楞泰回川督剿額勒登保振凱還京特派御前侍衛珠爾杭阿迎赴前途頒給賞項十二月額勒登保至京行抱見禮於養心殿御製詩曰喜見良臣面感恩望捷詩誠心不矜伐抱膝益傷悲事滯予

多咎功高汝有爲裕陵亟叩謁庶慰在天慈加賞銀五千兩大緞六十四匹派爲後扈大臣賜紫禁城騎馬命謁裕陵九年正月上念額勒登保前此剿賊緊要時毋訃不獲守制今已早逾二十七月特令於慶賀新年禮成後補穿孝服二月兵部奏請簡派大員輪閱湖北陝西營伍上命額勒登保馳驛前往兼頒欽差大臣關防入川偕德楞泰協捕零匪並籌辦裁撤兵勇安設邊防各事宜時賊衆輾轉奔竄入夏後伺我兵阻雨乘閒裹脅賊數屢剿屢增嚴旨切責降戴單眼花翎革去紫韁七月我兵痛剿賊衆於鳳凰寨殲擒僞元帥羅思蘭僞總管王宗福等多名恩旨賞還雙眼花翎並紫韁額勒登保自陳精力驟減力疾帶兵情形上命德楞泰爲欽差大臣兼成都將軍剿辦餘匪諭額勒登保回陝調理緩程進京餘匪尋亦全數掃蕩十年三月署鑲藍旗滿洲都統命總理行營事務四月充方略館總裁官七月授崇文門正監督八月上巡幸盛京恭謁三陵禮成諭曰額勒登保此次因積勞抱病不克扈從前來朕升香列聖賜爵元勳言念蓋臣宜膺殊錫著加恩晉封爲三等公是月額勒登保卒於京師年五十八奏至行在諭曰額勒登保秉志忠誠夙嫻韜略從前朕在蕃邸時充諳達有年小心勤恪曾出師緬甸金川

石峯堡臺灣廓爾喀等處久經行陣累立戰功嗣又平定苗疆蒙高宗純皇帝錫封侯爵旋因教匪滋事簡畀戎行始以遲緩獲愆終能奮勇克捷自朕授爲經略大臣實力督師屢閱寒暑身經百戰艱險備嘗將數萬兇渠掃除淨盡三省地方咸臻安輯實能爲國宣勞且其宅心公正力矢清操中外滿漢臣工及外藩蒙古等卽素不相識者亦人無閒言尤爲不可多得是以疊加恩獎仍錫爵通侯授以御前大臣晉加宮保並賜雙眼花翎紫韁用昭殊錫此次感患病證卽因積勞所致月前啟蹕時伊正當乞假不克扈從前來朕懷日切縈慮屢命留京辦事王大臣等往看病狀諭令安心調養並親解佩囊寄京賞給昨謁陵禮成特晉封爲三等公復命乾清門侍衛慶惠馳往看視齋賜荷囊玉鞮鹿雉等件方冀日就全愈長被恩光今據奏於月之二十一日溘逝披覽遺章實深震悼念其一生忠盡不禁涕泗交集允宜寵錫飾終以示酬庸至意除賞給陀羅經被外著成親王帶領侍衛十員前往奠醊並賞給廣儲司庫銀五千兩著派總管內務府大臣廣興爲之經理喪事所有歷任降革罰俸處分悉予開復應得卹典仍著該部照三等公例察覈具奏九月上回鑾親臨賜奠御製述悲詩曰家國棟梁痛摧折積勞成疾

不言功一腔心血全予願三爵椒漿酬汝忠封晉上公答勞績祠開京邑表恩崇孤兒襁抱尤珍惜淚灑空階悲鬱衷命將軍秀林修理額勒登保吉林祖墓並爲立碑命步軍統領祿康於地安門外建立專祠賜名曰襄忠歲時致祭予諡忠毅子謨爾賡額禰祿襲爵尋殤以姪哈朗阿嗣承襲一等威勇侯官御前侍衛正白旗蒙古副都統

德楞泰 子蘇沖阿

德楞泰伍彌特氏正黃旗蒙古人乾隆三十五年由前鋒授藍翎長隨征金川石峯堡臺灣俱有功累遷前鋒參領賜繼勇巴圖魯名號五十六年授健銳營翼長五十七年隨將軍福康安參贊海蘭察征廓爾喀七月以冒雨涉險攻克熱索橋等處賊寨加副都統銜事定圖形紫光閣命儒臣製贊十一月補鑲藍旗蒙古副都統管理健銳營大臣五十九年三月授正紅旗護軍統領六十年二月黔苗石柳鄧楚苗石三保叛陷松桃廳永綏廳上命德楞泰帶領巴圖魯侍衛章京馳驛赴鎮筸隨雲貴總督福康安剿辦賊掠永寧哨伺永綏後路阻運道德楞泰駐花園隆團等處禦之屢有斬獲三月福康安解松桃永綏圍檄德楞泰前赴大營進

攻賊巢時首逆吳半生與石柳鄧石三保爲聲援率衆踞大烏草河德楞泰偕都統額勒登保疊次攻克沿河寨落七月渡河抵盛華哨山半木城甚固德楞泰相度附近山梁築小石城一座安設礮位斷賊汲路遂克木城得旨賞賚八月克古丈坪九月進抵摩手寨賊搆石城於懸崖懸延數里德楞泰率兵勇降苗由閒道至寨後出賊不意奪據石城乘勝進兵遂與額勒登保生擒吳半生於高多寨特授內大臣十月由龍角峒進攻鴨保寨克木城石卡三十餘座又克天星寨木城七石卡五獲賊目吳八月於臥盤寨賊踞平隴偕額勒登保連奪險要苗寨破其門戶嘉慶元年五月福康安卒於軍時石三保就擒平隴未下六月隨四川總督和琳先攻乾州復之七月進攻石柳鄧於平隴降三岔坪苗寨奪據強虎哨山梁八月和琳卒德楞泰仍偕額勒登保巡撫姜晟進軍平隴屢克巖人坡大壩角等苗寨九月上命將軍明亮提督鄂輝馳往協剿十月克平隴命署正黃旗領侍衛內大臣仍在御前侍衛上行走石柳鄧遁踞貴魚坡復於養牛塘山梁修築石卡迫脅降苗爲抗拒計我兵攻克之諭曰養牛塘山梁地勢險要據奏情形雖係明亮等公同籌酌辦理而帶兵打仗自係額勒登保德楞泰二人親赴前敵督率進

剿著各賞銀一千兩以示獎勵十二月逆首石柳鄧就殲詔封二等子爵加賞銀五千兩旋獲吳八月之子吳廷義并各首逆家屬賞戴雙眼花翎二年正月移兵永綏擒斬張坪馬寨未降苗首石花延石花保麻普延隴長受等苗疆大功告歲二月奉命偕明亮率兵三千並滇兵三千馳赴四川剿辦邪匪時總督宜縣收復東鄉縣治賊首徐添德王三槐竄踞金峩寺明亮先結營馬耳峯緊逼賊巢德楞泰馳至合兵由冉家埡口奪險直前攻燬金峩寺殲賊無算獲大礮三十六鳥槍刀矛軍械無算徐王等賊衆二萬又竄踞重石子香鑪坪其南有分水嶺西南有火石嶺賊卡林立我兵分路奪嶺進攻王三槐率衆五千撲營德楞泰督兵敗之三槐中槍逸獲其義父賀宗盛賊目鄭文禮五月德楞泰攻破重石子明亮亦攻破香鑪坪殲賊萬計復追之於陳家壩精忠寺等處擒徐王二逆之母槍斃傳教首孫士鳳賊黨僅存千餘人會襄陽首逆齊王氏姚之富樊人傑等率衆二萬自楚入川與徐王二逆合齊王氏姚之富稱黃號徐添德稱青號王三槐稱白號設掌櫃元帥先鋒總兵僞稱屯開縣之南天洞溫陽并賊勢並熾我兵攻破南天洞賊分走雲陽萬縣雲陽教首高名貴糾衆數千欲與徐添德合德楞泰偕宜縣明

亮等以計擒高名貴盡殲其衆於陳家山優旨賞賚七月齊王氏等由奉節巫山東走楚境德楞泰明亮順江而下繞出宜昌兜剿賊復南趨德楞泰留明亮屯宜昌自趨荊州迎擊賊適攻遠安縣城解其圍上嘉之八月賊犯荊門宜城偕明亮追擊至獨樹塘會東三省勁兵自北至合剿賊大潰荆門宜城得全是月賊欲北渡襄江竄河南德楞泰偵知東面楓樹埡西面耗子溝爲渡江要隘偕明亮分路追剿殺賊千餘擒僞副帥袁萬相劉登發等截賊回湖北得旨賞用紫韁九月屢殲賊隊於房縣竹谿竹山境賊走陝境平利圖入川東大寧我兵敗之於樹河口殺賊數千馘僞元帥張世虎僞副帥李得思等賊走紫陽又合白號高均德股匪西走漢中十一月賊欲竄漢江北渡德楞泰飭副都統烏爾圖納遜率黑龍江官兵衝入江心擊殺甚衆截賊入川先是上以齊王氏姚之富爲賊首中緊要之犯諭令設法擒獲不必分心他處三年正月齊姚二逆竄聚廣元寧羌山中而高均德一股徑由南鄭渡江滋擾襄城德楞泰偕明亮奏言高逆北竄漢江以賊情而論齊姚爲各逆之魁自宜先籌剿辦以地勢而論高均德旣已渡江如東竄興安則與西安省會甚近是以臣等星夜帶兵由沔縣襄城馳抵漢中截剿酌留弁兵

於寧羌沔縣防禦齊姚二逆北竄漢江之路上以明亮德楞泰舍大股賊匪於不問輒帶全隊勁兵追剿高均德僅留弁兵數百名在後防堵茫無主見調度失宜命拔去花翎革退世職紫韁並追前所賞銀五千兩入官時大兵方追高逆於城固洋縣齊王氏姚之富遂乘虛由石泉渡江與高逆合東走漢陰廳上以德楞泰明亮二人厥罪惟均而節次所奏打仗情形皆係德楞泰帶兵在前明亮不過在後接應禡明亮職作爲領隊帶兵仍責德楞泰偕宜縣上緊剿辦三月窮追齊姚二逆由山陽至郢西日行百七十里擒斬一千八百餘賊三千衆踞郢西三岔河拒守我兵盡殲之獲賊日王如美朱正聲等齊王氏姚之富俱投崖死奏入得旨嘉獎高均德由鎮安竄雒南我兵敗之於兩岔河斬白號僞元帥高大高二藍號僞元帥宋大宋三黃林高等餘賊與李全張添倫股匪合五月又敗之於五郎廟高均德率衆自寧羌走廣元合黃號龍紹周藍號冉文儔各股二萬衆踞渠縣之大神山諭曰德楞泰縱賊竄入川境合夥迄未擒獲一名種種遲緩罪竟與明亮埒著革去御前侍衛署領侍衛內大臣都統仍留副都統職銜以觀後效七月偕尙書惠齡將軍恆瑞攻克大神山左右賊卡先後設伏斬三千餘級賊衆將竄營

山官兵蹙之於黃渡河斬級四千馘賊目禹斯珍冉文字等高均德中箭逸入營山縣之箕山與羅其清合羅其清者巴州白號首逆賊黨萬餘結寨箕山徑圍百餘里東西北三面皆陡崖惟東南有路可通八月青號徐添德王登廷黃號樊人傑等逆踞鳳凰寺阻營山渠縣運道與羅其清爲犄角我兵攻克鳳凰寺而箕山仍負固不下尋以副都統福寧查覈德楞泰所支軍需銀兩每月濫支四萬餘兩疊奉嚴旨切責十月德楞泰等分三路進兵奪賊卡七賊寨六遂克箕山羅逆退踞大鵬山適額勒登保自閩中儀隴帶兵至軍合剿十一月賊以雨夜出寨劫我營卡德楞泰潛伏賊寨之南門四布雲梯乘閒撲入焚其寨額勒登保惠齡襲破西門殺賊四千殲羅其清之父羅從國尋合兵窮追其清於巴州方山坪擒之并獲其弟羅其書其秀子羅泳福等俘斬賊六千脫被脅難民數百得旨賞還花翎四年正月冉文儔自箕山敗走至通江麻壩屯踞德楞泰偕惠齡及總兵朱射斗合兵進攻以元旦生擒冉文儔盡獲賊衆數千獲牛馬米糧旗幟軍械無算賞頭等輕車都尉世職二月徐添德及白號賊冷天祿等股由墊江鄰水分竄涪州詐稱難民入鶴遊坪寨劫掠德楞泰馳至偕額勒登保擊退之時四川總督勒保爲

經略大臣奏言各路帶兵大員中額勒登保德楞泰尤爲知兵曉事因檄令德楞泰專剿徐添德大股尋追徐逆於開縣之大梁殲擒賊目李士貴趙興宗等三月徐逆自大寧北折入陝我兵追及於太平縣修基壩又遇龍紹周唐大信等股匪俘斬各數百脫被難民三千三百餘上以其能遏賊竄陝嘉之嗣徐添德遁入大寧老山合龍紹周唐大信樊人傑龔建卜三聘張添倫辛聰各股我兵被其輾轉牽綴疊奉嚴旨申飭七月諸賊被驅出山由奉節巫山東竄楚境綠號首逆龔文玉亦自夔州八石坪踵至德楞泰分兵痛殲之追至竹谿大禾田又俘斬一千四百餘生擒龔文玉及賊目卜三聘李谷清僞元帥龔其位等賞騎都尉世職八月勒保以賊衆犯楚被逮命額勒登保爲經略大臣德楞泰督兵由房縣至興山截剿徐添德等股偪回川東擒賊目張世達旋緊躡張添倫辛聰等股入陝楚境肅清十月高均德改名郝以智率高家營賊衆萬餘由白河至五塊石欲走西鄉窺伺漢江龍紹周冉添元等又率賊衆至放馬廠欲走紫陽德楞泰聞信督副都統賽冲阿溫春等馳回破放馬廠之賊卽由心子溪至大市川進剿高家營賊衆追殺百二十里擒高均德及黃號僞元帥王臨高僞先鋒閻慎卿閻慎雄秦學順斬

藍號僞元帥曹明魁等俘高均德至京師諭曰德楞泰前因拏獲冉文儔賞給頭等輕車都尉世職嗣又生擒龔文玉加賞騎都尉世職例應併作三等男爵今加一等賞給二等男爵授爲參贊大臣十一月進兵川北殲白號賊目張金魁於通江空水河橋僞總帥符曰明僞元帥王佐銀耿向榮於廣元野人村十二月追鮮大川苟文明股匪至川東賊關大兵俱在川境遂先後入陝甘界滋擾五年正月德楞泰偕額勒登保分路馳詣秦州而藍號賊冉添元黃號賊徐萬富青號賊汪瀛綠號賊陳得俸等三萬衆及白號賊張子聰虔向瑤雷世旺等二萬衆遽乘間由定遠竄渡嘉陵江西岸分擾南部鹽亭西充各縣境總兵朱射斗沒於陣諭曰川西重慶潼川各府地方蕃庶爲賊匪素所窺伺今一旦乘閒竄往該處百姓又未築堡防守自必肆行焚掠朕心深爲憫惻寢食不寧德楞泰務須速赴川西合力剿除勿使賊匪蔓延二月冉逆等竄江油縣新店子德楞泰由武連驛閒道追及賊分四路每路馬賊各四五百步賊各二三千迎戰我兵亦分路衝入賊巢副都統賽沖阿溫春等突遇伏賊被圍德楞泰往援鏖戰一日殺賊無數重圍立解生擒賊首陳得俸上嘉其功授內大臣冉添元善用伏賊衆推爲主帥新店子之

敗負箭傷遁三月連敗之於重華堰佛耳巖冉逆因伏賊深箐中誘我兵深入德楞泰察其奸密備前進遂痛殲賊衆於梓潼馬蹏岡火石壩一帶擒徐添德及僞總兵解其順等諭曰德楞泰此次帶兵入川連獲勝仗今又五日四戰破賊奸計殲厥渠魁深堪嘉獎著加恩晉封三等子爵以示優眷尋命署成都將軍是月大破賊股於劍州李家坪石門寨等處俘斬僞總兵李斌僞先鋒董廷華等賊衆三千脫難民一千三百餘命仍授御前侍衛俄白號賊張子聰度向瑤雷世旺等率衆由射洪縣王家背竄潼河西岸屯踞蓬溪分股攻圍成谷太和仁和仁義四民寨德楞泰率賽冲阿等輕騎追及痛殲之誠賊首雷世旺俘斬僞總兵吳學周等分飭侍衛達勒精阿副將倭星額等援成谷太和等民寨圍始解奏入諭曰前次德楞泰在李家坪等處將賊衆大加殲戮復跟蹤追剿原冀前有潼河阻隔將賊匪倡投絕地以期一鼓殲除詎料該處河內船隻並未撤泊他處兵勇又不能實力堵禦以致騎馬之賊得以洶渡搶船竄過潼河西岸德楞泰帶兵踵至追擊未經渡河之步賊殲獲淹斃甚多並緊躡賊蹤擒殄首逆要犯及大小頭目多名共殲賊一千三四百名獲賊及被脅難民一千三百餘名並救出四寨被圍之百姓

一萬數千人實屬可嘉之至德楞泰爲國出力拯救良民旬日之間捷音連至自應再加懋賞用獎勤勞著晉封一等子爵實授成都將軍時四川總督魁倫以失守潼河逮問起勒保爲四川總督命與德楞泰合兵剿賊四月白號藍號賊分擾遂寧安岳樂至各縣境並徧中江有趨成都之勢德楞泰偕勒保夾擊連敗之殲級數千賊始東竄邀擊之嘉陵江口陳家渡龔家灣等處俘斬及淹斃者又三千餘脫難民一千四百餘潼河兩岸肅清民心大定上深嘉之以其子三等侍衛蘇冲阿升授二等侍衛閏四月追賊至川東達縣新寧各縣境殲藍號僞元帥劉君聘白號僞總兵苟文富等又殲僞軍師何上達於鄰水七孔溪賊敗竄川北會苟文明鮮大川樊人傑各股復由陝入川通江南江巴州各屬告警五月移師川北殲藍白號賊目鮮中等賴掌櫃等六月賊走營山梁縣窺伺嘉陵江岸德楞泰截剿之於恩陽河尋與勒保合營追擊百餘里至岳池縣新場殲擒僞總兵吳耀國僞先鋒鮮文炳賊目苟文禮大掌櫃劉崇照總旗手張文元等及餘賊四千七月賊首鮮大川爲寨首鮮文芳誘斬苟文明以數百人遁時藍號賊屯聚南江廣元蒼溪界之九龍場肆擾德楞泰襲之殺賊千餘八月偕勒保合剿白號賊於東鄉

太平境白號旋與青號賊趙麻花合我兵扼之於茅坪倒流水擒斬賊二千殲僞副元帥湯思舉九月趙麻花復合大寧老林賊王珊欲向陝境迎徐添德股匪至川我兵由江口截剿至雲陽先後殲斃趙麻花王珊僞總兵何其信十月楚境黃白藍綠四號賊股由房縣走夔巫一帶高家營賊衆及黃號龍紹周等股復由太平通江北竄兵至賊去兵去賊至樊人傑冉學勝王士虎王幗賢冉添士等股遂由川入陝徐添德一股又由陝入楚十二月諭曰樊人傑等卽係黃白藍綠股內之賊前此由陝竄入川境德楞泰勒保曾奏明赴川東截剿乃並未上緊剿辦任此數股賊匪假道竄陝德楞泰既不能在川剿淨卽當跟蹤赴陝幫同剿捕方爲無分畛域乃心存諉卸竟將大股賊衆委之陝省致竄漢江北岸額勒登保在漢江南岸督辦徐添德等不能乘閒竄楚是剿賊將有頭緒又因德楞泰堵築不力致全局又形散漫德楞泰係一等子爵本應斥革姑念今春在嘉陵江以西剿賊尙爲出力著加恩降爲一等男稍示薄懲是月藍號李炳白號楊開第黃號齊幗謨等賊衆八千窺伺嘉陵江德楞泰偕勒保合兵襲之於渠縣安仁溪又扼之於儀隴觀音河先後俘馘四千餘殲斃首逆楊開第齊幗謨僞副元帥馮中謙等命

賞給三等子爵並御書福字賜之六年正月移師入陝會白號首逆高二自洵陽偷渡漢江圖入河南德楞泰追及之於山陽縣乾溝俘斬傳教首逆龔如一僞元帥閻慎珍等二千餘衆命賞還一等子爵時高二亡命奔竄德楞泰探明賊蹤乘雪夜窮追箭斃高二於野豬坪並擒僞先鋒王儒等恩旨賞賚下部優敘並以其子蘇冲阿升授頭等待衛二月馳抵興安剿龍紹周股匪偪令西入川境龍逆率萬衆分前中後三營屯踞大寧長壩二郎壩等處我兵痛殲之馘賊二千擒僞總兵趙志成僞先鋒包萬才戴世榮等賊衆七百餘脫陝省難民千餘川省難民八百餘獲礮械旗幟騾馬甚夥奉旨交部議敘三月龍逆遁湖北之竹山房縣又敗之仍走四川之太平縣老林德楞泰勒兵就興山截剿徐添德殄擒賊衆三千脫難民八百餘得旨賞還雙眼花翎四月首逆徐添德合黃號賊樊人傑曾芝秀藍號賊陳朝觀龐士應等竄陝據白河縣黃石板分股圍天保萬安兩寨德楞泰派兵往援卽親率將弁直取黃石板賊巢擒龐士應及僞總兵方文魁蒲子榮陳添貴等馘賊二千陳朝觀尋亦就縛五月大破賊衆於西鄉獲徐樊二逆之妻徐添德由西鄉東趨紫陽德楞泰督賽冲阿温春等蹙之於仁和新灘大雨水漲添德

滿斃奉旨德楞泰交部優敘時龍紹周乘官兵追剿徐逆復糾衆闖入房竹一帶德楞泰仍督兵偪回太平殲擒僞元帥姜洪斌支茂乾僞先鋒陳文明僞總兵熊世金等并解散凡數千衆八月追龍紹周至巫山巴東獲其妻子及僞軍師王鵬老教首李天棟僞元帥張添貴僞先鋒李盈等九月又擒龍紹周之兄紹海弟紹華龍逆僅以二百餘人遁德楞泰率賽冲阿温春等冒雨窮追十月遂殲龍紹周於平利岳家坪擒斬僞總兵胡朝位曹應彪僞先鋒劉泗玉賴大魁等餘孽全數掃除諭曰德楞泰自嘉慶四年以後節次殲擒首逆加恩遞封爲一等子賞還雙眼花翎本年又將徐添德龍紹周兩股劇賊全行殲滅厥功甚偉著加恩晉封二等伯並賞給黃面貂皮馬褂又諭德楞泰曾賞繼勇巴圖魯名號著原賞名號封爲繼勇伯十一月偕勒保疏言四川重慶川北兩鎮所轄營汛界連陝楚自巫山以至廣元縣長二千餘里兩鎮駐劄較遠有鞭長莫及之勢請於太平營地方添設副將一員駐劄城內原設都司移駐城口通江縣屬之竹峪關廣元縣屬之黃楊堡大寧縣屬之徐家壩巫山縣屬之大昌等處地居萬山之中爲三省出入要路請各添建城堡設立守備一員各添兵二百五十名又達州爲教匪起事之地

民俗刁悍撫治綦難請改達州直隸州爲知府改太平縣爲太平廳直隸同知卽以太平縣缺改爲府治附郭之達縣上從之尋名府曰綏定十二月白號首逆苟文明糾合各股零匪西擾寧羌德楞泰馳赴廣元偕額勒登保夾擊賊遁回川北大敗之於通江瓦山溪賊走開縣姚成壩糧臺德楞泰派兵馳救自率輕騎赴大寧斷其入楚之路七年正月苟逆又由川入陝偷越漢江北竄會川東零匪滋擾上仍命德楞泰專辦川賊因奏言近來賊勢衰殘自苟逆外皆不成股數惟三五散行晝則改裝肆掠夜則四出摸樁致道路不通閭閻受害大兵一到又皆瓦解四散無迹可尋臣見擬由川楚交界之八石坪自東而西酌派將佐分爲多路或充團勇或充行旅或充難民或竟充零匪庶能到處殲除諭曰此等機宜只期剿捕有益德楞泰可隨時酌辦朕亦不爲遙制也二月破綠號餘匪於奉節縣之鳳凰山斬僞元帥龔其堯擒教首李世漢李國珍父子僞總兵余佐志唐大高等又剿白號張長青股匪於雲陽大水田三月長青敗走開縣時黃號樊人傑藍號崔宗和胡明遠戴四通江藍號蒲添寶各股賊匪聚楚境之歸巴興房一帶德楞泰聞信卽移師入楚諭曰德楞泰能統籌全局無分畛域且並不拘泥前次分界督

剿之旨帶兵過楚正與朕意相合深得大臣公忠體國之道殊屬可嘉楚省賊匪中樊人傑積年老教最爲狡詐務須上緊設法將該逆速就殲除則餘匪自可漸次廓清亦可消伏莽未起之患四月樊戴各逆由房縣至歸州欲合蒲添寶股匪德楞泰率精兵閒道星馳三百餘里抵東湖霧渡河繞出賊前使不得合賊以四千人踞雞公山我兵分兩路迎擊斬級五百擒僞先鋒劉應儒僞總兵熊方杰王洪桂等數百解散賊黨二千時蒲逆屯當陽河尙五千餘衆五月我兵三路冒雨進攻殲賊八百擒僞總兵王元洪馬重禮等蒲逆以僞先鋒井英冉起才張揚苟大秀四人拒戰皆負創走又敗之於穆家溝魯家壩擒斬千餘賊勢殘敗德楞泰飭副都統色爾袞總兵蒲尙佐留剿蒲逆仍自移師東趨探剿樊人傑冒雨入馬鹿坪大山出賊不意痛殲之樊逆竄至竹山平口河惶急投水死其妻子弟姪悉就獲樊人傑倡亂最久各逆僞封咸出其指揮至是全股掃蕩上偉其功晉封三等繼勇侯爵上以軍務不日告竣諭妥籌三省鄉勇七月奏言鄉勇之設起自臺灣嗣後平定苗疆及此次剿辦教匪均有招募元年二年間川省應募者有三十七萬之多陝楚兩省亦復不少陝之漢江川之嘉陵江楚之鄖西並三省邊界近

山各屬其城守卡隘臺站有兵力不敷防範者不得不藉鄉勇爲協護用以禦賊卽使之自衛身家又可制其從賊之心其隨征鄉勇藉本地之人爲之哨探嚮導故進剿抄襲較爲便捷但不諳紀律不知進退每致失機債事是以川省節年裁汰已去三十五六萬偶有一二不法之徒臣與勒保先後奏明正法嚴辦至今帖然無事此臣親歷情形也見在三省征防鄉勇尙有一萬七千數百名事竣均須安插查三省新添營制應增兵額一萬餘名請將情願入伍者散於各營挨次補額作爲新兵其不願入伍者聽仍優加賞賚遣令回籍俟遣散後各處鄉勇寧謐然後再撤官兵上是之是月蒲逆乘閒劫我營卡將弁有被害者復輾轉奔竄於興房寧巫合黃藍白號餘匪增至一二千人德楞泰率色爾袞等奮力進剿斬獲過半八月窮追至竹溪瓦屋溝蒲逆墜崖死奉旨交部優敘尋諭曰八月二十九日德爾吉行圍德楞泰之子蘇沖阿射鹿跪獻當卽賞穿黃馬褂蘇沖阿甫經挑在乾清門不過循分當差因念德楞泰在軍營帶兵勤勞懋著是以加恩伊子德楞泰當倍加奮勇速成大功永受厚恩九月藍號崔胡戴四及青號熊翠熊方青陳侍學各股竄聚竹溪巴東興山老林德楞泰聞道截剿擒熊翠妻孥及僞元帥

張書申漢等尋偕湖廣總督吳熊光奏請以次裁撤東三省各直省隨剿兵丁及豫省防江兵勇從之十月率總兵馬瑜副將尼瑪善等殲斃戴四於興山施家溝擒僞元帥趙鑒又擒陳侍學於巫山黃泡地並俘斬僞總兵李學進何從盛黃號僞先鋒何金堂等十一月殲斃熊翠於開縣銅盆溪其餘著名首逆亦多爲額勒登保兩路大兵殲除或被團練縛獻遂以十二月偕額勒登保等奏報大功戡定諭曰德楞泰前於平定苗疆時曾賞給子爵自授爲參贊後督率將士奮勇超倫所向克捷前後殲賊最多勲蹟炳然節經封至三等侯爵著加恩晉封一等侯加太子太保銜賞用紫韁伊子蘇沖阿並賞給副都統職銜卽著齎送賞件前赴軍營看視額勒登保及伊父德楞泰用示優眷八年閏二月督兵至巫山大寧剿淨青號劉渣鬍子股匪四百餘衆又殲斃黃號曾芝秀於大寧漆樹梁四月入楚擒白號僞元帥冉璠於興山白果園擒藍號首逆於黃柏鋪五月擒老教首趙鑒之姪趙聰觀於巴東白家河六月奏請將湖北巴東竹谿房山分爲三段四川巫山大寧分爲兩段劃清疆界各派將弁排搜會哨以專責成報可七月偕額勒登保會奏官兵剿捕餘匪全竣卽遵旨北上瞻觀天顏上慰悅下部優敘命蘇沖阿親

齋賞件迎交祇領八月至熱河行在御製詩賜之曰廟謨夙領久超羣屢典戎行
勇略聞功著川中安萬姓名揚闔外冠三軍襲封特建千秋業受澤毋忘百戰勳
福將來朝諸事定敕寧遵路息紛紛命在紫禁城騎馬九月解參贊大臣銜尋以
陝省南山零匪煽動偷越漢江由西鄉入川上以德楞泰係成都將軍令赴川督
剿代額勒登保還京十二月遇賊於平利大橫山梁副將張應貴都司彭家棟戰
歿賊黨內多有曾充鄉勇者我軍前敵鄉勇軍功首領魏忠才等請齋諭帖赴賊
寨招降德楞泰許之已而忠才等七人俱被害上以德楞泰不加搜剿意圖招撫
致墮賊人奸計切責之九年二月賜額勒登保欽差大臣關防赴軍營會同督剿
賊輾轉於川陝沿邊山內三月斃賊日大掌櫃苟文華僞元帥王振等於興隆坡
賊鋒稍挫遁入老林四月諭曰此起零匪德楞泰剿辦最久其貽誤之咎尤重著
降爲二等侯革去內大臣紫韁降戴單眼花翎六月額勒登保以病解欽差大臣
關防移交德楞泰專辦尋率將弁楊遇春豐紳馬瑜田朝貴等痛剿賊衆於川陝
交界之鳳凰寨殲擒僞元帥羅思蘭符廷伏李如玉周天良僞總管王宗福紀友
亨蕭昌奉王士奇得旨賞還紫韁雙眼花翎時賊勢潰散而首逆苟文潤仍率衆

入化龍山老林抗拒八月軍功鄉勇趙洪周詣賊僞降乘閒梟文潤首以獻餘匪竄老鴉絆經楊遇春伏兵截殺尋又斬獲大小頭目苟詔賢王添詔杜春陳勝魁等全股埽除先後奏入賞還一等侯爵內大臣九月諭曰上年七月閒額勒登保德楞泰以成股之賊次第翦滅地方廓清當經馳報全捷嗣緣山內逃匿之匪三五成羣復行嘯聚自當趁此大兵未撤之際嚴加搜捕以期淨絕根株特命額勒登保德楞泰先後接辦一年以來窮搜川陝一帶大山老林蹤跡殆徧復將苟文華羅思蘭苟文潤各號頭目僞總管等以次殲擒其夥匪皆悉數斬獲三省地方更無一名潰孽從此海宇敕寧永銷兵革可與率土蒼生共享昇平之福除額勒登保見已遵旨起程回京外德楞泰著加恩交部從優議敘十年六月奏會哨弁兵擊斃潛匿老林之首逆世貴等得旨嘉獎八月額勒登保卒於京上召德楞泰回京供職補正白旗領侍衛內大臣十月充方略館副總裁官十一月署鑲藍旗滿洲都統十一年三月以洋匪蔡牽犯臺灣命赴閩督剿未至蔡逆遠竄仍奉旨還京六月命爲後扈大臣總理行營事務並管理兵部及健銳營事務七月寧陝鎮新兵陳達順陳先倫向貴等叛陷新舊城戕官劫餉尋攻陷洋縣走城固石泉

鄆縣郟縣熬屋各境滋擾命德楞泰爲欽差大臣馳往剿辦九月官兵分四路困之於兩河進口關及襄城留壩等處叛賊蒲大芳王文龍等棄械乞降縛獻首逆陳達順等三人磔於軍前並將願降賊衆及被裹難民四千餘收集一處分別辦理又截回在後拔營逃竄之遊匪千餘殲爲首朱有貴等五人奏入上嘉其辦理迅速交部議敘尋奉諭以叛賊窮蹙請命人數衆多自斷無概予駢誅之理其情罪甚重除裹脅難民先行釋放外其從賊之犯仍當分別監禁請旨覈辦十月偕總督倭什布奏言遣散被脅難民三千八百餘名收繳長矛三千五百餘件其隨同滋事各營兵丁二百二十四名見擬遴選將弁分投管帶暫歸原營約束操防諭曰所辦錯謬已極賊匪罪犯不赦卽因其畏罪乞降亦不過貸其一死已屬法外施恩豈有仍令各歸原營充當兵丁之理該叛賊等本由鄉勇充當新兵自作不靖今因其悔罪投誠毫無罪譴不但該匪等罔知畏儆且與各營守分官兵無所區別何以靖人心而肅軍紀德楞泰上次奏到時朕所降諭旨甚明白當候旨遵辦今率叛賊仍歸營伍其膽大擅專尤出情理之外德楞泰著退出御前侍衛領侍衛內大臣管理兵部事務管圍大臣將上次所給議敘撤回交部議處尋命

補西安將軍部議請照溺職例革職諭曰德楞泰擅將賊中投出之民人匪犯三千八百餘名悉予資遣回籍此內并有各處軍流人犯曾經助賊抗拒者悉置不問甚至將會充兵丁叛逆滋事之二百二十四名交與將弁管帶各回原籍約束操防其糊塗錯謬壞法養奸一至如此部議革職甚屬允當姑念德楞泰前此剿辦邪匪有功特加恩改爲革職留任但此事非尋常錯誤可比仍俟八年無過方准開復十一月德楞泰會同總督全保巡撫方維甸奏請將降賊二百二十餘人與各處未動新兵三百餘名以新換防爲名分起調出凡係降賊頭目入於末起中途相機拏解到戍後撥給各回城爲奴諭曰國家明罰敕法措正施行不值於此等頑愚馭之以術今旣以換防爲名莫若加恩卽令永作新疆回城戍兵不准換回將來亦不得再有升擢以示懲創如稍不安分在彼滋事卽當從重辦理十二月偕方維甸疏陳寧陝等鎮營事宜一寧陝鎮始於嘉慶五年其時邪匪被官兵驅逐動輒竄入南山搜尋不易又因各路隨征鄉勇散遣難盡亟籌安插之法於是設立此鎮通管轄十營新兵六千八十名惟是各營相距遼闊究於統轄非宜而總兵所管額兵多至六千餘名亦與營制未協請將留壩西江口一營改歸

固原提督轄孝義營改歸陝安鎮轄並請裁減各營守兵二千二百四十名一南山內分汛弁兵及陝安興安分出各汛應分別酌留移併一漢中協存城兵丁無多請將銅廠營守備改爲漢中協守備所管兵二百歸併漢中府一裁厚畛子守備請改爲陽平關營中軍守備裁留壩都司改爲略陽營中軍守備均令經理糧餉一寧陝陝安漢中各營新置營地應一體招佃收租一衙署兵房堡城量加添置毋庸全行建蓋以節糜費下軍機大臣會同兵部議行十三年二月瓦石坪叛匪滋事德楞泰率將弁全數殲擒上嘉之時兵部奏派輪閱營伍大員命德楞泰查閱陝西四川二省尋奏請西鄉營瓦石坪汛改歸定遠城漁渡營轄以西鄉營遊擊改都司以漁渡營都司改遊擊得旨允行十二月軍政屆期上以陝省地方見在安輯德楞泰革職留任處分特予開復十三年八月查閱四川營伍事竣回陝旋以病陳請暫緩年班陛見上允之十四年正月德楞泰舊病增劇上親解佩襲並頒內府丸藥賜之特詔晉爵三等繼勇公三月卒諭曰西安將軍三等公德楞泰秉志公忠素諳韜略宣勞闕外懋著威聲前於平定苗疆以後續經派令剿辦三省邪匪身先士卒所向有功百戰辛勤備嘗艱險本日接方維甸奏報德楞

泰氣血久虧迨交三月後病勢日見沈重竟於初九日溘逝覽奏深爲軫惜著派乾清門侍衛內閣學士玉福馳驛迎至途中奠醢仍著步軍統領衙門探明德楞泰靈柩將至京師先於過西頂一二里外搭蓋棚座暫爲安置屆時朕親臨賜奠後再令入城治喪命蘇沖阿襲封一等侯爵不必待年終查辦諭頒廣儲司銀五千兩經理喪事照三等公例賜卹予諡壯果四月諭曰從前川陝楚三省教匪滋事額勒登保與德楞泰奉命出師其時額勒登保職司經略統握全機埽蕩凶麼厥功甚偉是以於京城建設專祠用昭崇祀德楞泰身爲參贊督勵戎行執誠擒渠戰功屢著而潼河一役於賊匪肆擾之際不避鋒鏑一鼓殲除生獲著名首惡保障川西數十萬生靈免遭蹂躪此其勳績最著名者至今川省士民猶爲感頌德楞泰功雖在額勒登保之次而蜀中賴其保全自當於該處省垣建立祠宇以妥忠魂著勒保相度地基鳩工營造俾百姓中知感者得慰其瞻慕之忱卽或有不肖之徒震懾威靈亦可望而斂戢是月德楞泰柩至西頂上親臨奠醢命人祀昭忠祠御製詩悼之曰將星隕落報秦州襄鄂繼亡挽不留日下共推雙俊傑川中益著大謀猷至今三省無遺孽惜昔八年未解憂賜奠靈前和淚滴入祠晉爵

舊勳酬子蘇冲阿襲侯爵見官正藍旗護軍統領鑲黃旗漢軍副都統

清史列傳 卷三十

大臣傳次編五

惠齡

惠齡姓薩爾圖克氏蒙古正白旗人父訥延泰仕至理藩院尙書乾隆二十一年補繙書房繙譯官二十六年調戶部筆帖式二十七年正月丁父憂五月奉旨以部院主事用三十一年充軍機章京三十三年補戶部主事仍兼繙書房行走三十五年五月升員外郎六月在奏事處行走三十七年兼公中佐領三十九年因太監高雲從洩漏記載案內革職在黏杆處效力行走四十年正月補戶部主事仍充軍機章京十一月賞副都統銜往西甯辦事十二月賞戴花翎四十二年諭曰副都統銜惠齡自遣往西甯以來辦事精詳且係尙書訥延泰之子著以副都統銜補授領隊大臣前往伊犁隨同伊勒圖辦事四十三年授工部右侍郎四月兼正白旗漢軍副都統十二月調吏部右侍郎四十五年八月調鑲藍旗滿洲副都統十一月授塔爾巴哈臺參贊大臣五十年回京五十一年授正藍旗滿洲副

都統五十二年兼管太常寺事務五十三年署河南巡撫旋授湖北巡撫五十四年巡漕御史和琳奏湖北幫船行走遲延查因臬司李天培私帶桅木惠齡未行查參請交部嚴議命革職留任五十五年九月調山東巡撫十月諭曰惠齡到任以後務須力加振作切不可稍涉自用五十六年奏緝獲八卦教匪徒並委員前往登州一帶查緝首犯段文經上以惠齡並不親身前往嚴飭之十一月擢四川總督諭馳赴西藏以參贊大臣會同福康安剿辦廓爾喀督理糧運事平再回總督任五十七年四月偕福康安乘雨進兵攻克擦木賊碉殲擒無數得旨嘉獎賞玉扳指大小荷包九月諭曰福康安等進剿廓爾喀賊匪連獲勝仗惠齡在濟隴一帶辦理軍需亦屬奮勉著交部議敘是年廓爾喀投誠命留藏籌辦善後事宜五十八年正月偕福康安疊奏撤兵善後章程得旨嘉獎交部議敘有大小荷包之賜尋以平廓爾喀功圖像紫光閣御製贊曰惠齡督糧至藏之西師進賊境繼運留資餉械不匱用濟武成功亦懋哉初被圖形八月諭曰惠齡謹飭自守但辦事究欠精練伊曾任山東巡撫於該省情形較爲熟悉所有山東巡撫員缺卽著惠齡補授九月調湖北巡撫五十九年調安徽巡撫六十年五月授戶部侍郎兼

正黃旗滿洲副都統時大學士福康安等剿逆苗吳半生於貴州惠齡仍留湖北協辦糧餉十月吳逆就擒上以惠齡籌餉無誤交部議敘會湖北教匪滋事命惠齡赴枝江宜都剿辦嘉慶元年四月奏奪賊卡擒賊目張正瑞周以恭等又奏分路進攻灌灣腦兩晝夜克賊卡九處殺賊無數俱奉旨嘉獎八月擒賊目張宗文等六十八名諭曰惠齡較前頗能振作務須加倍奮勉乘勝進擣賊巢將賊匪剿除淨盡再邀恩賞尋攻克灌灣腦擒逆首張正謨劉洪鐸等移師剿梁山賊賞鑲嵌寶石帶扣加太子少保銜署工部尙書予二等輕車都尉世職九月克獅子山小涼山等處十一月克涼山賊巢擒首逆覃士潮宜都枝江一律廓清諭曰惠齡調度有方所辦甚屬可嘉著賞給金盒一箇大小荷包惠齡之母年老在京居住本日報到時特傳伊弟長齡令其將惠齡此次剿賊打仗得勝情形及朕加恩之處告知伊母俾高年聞之益深喜慰至惠齡之母精神增健並著諭知惠齡令其專心辦賊不必分念以示體恤優眷至意是月賊首姚之富白黃龍壩潛渡滾河竄入豫境總統永保坐禡職命以惠齡代之馳赴襄陽辦賊十二月敗楓箱坪賊賜御用元狐冠一金盒一抵襄陽值姚之富爲河南巡撫景安所截折竄楚境惠

齡迎擊潰散分兵追殺並截賊西竄之路敗之於茅茨馭殲斃甚衆復分三路兜剿斃賊二千餘生擒二百餘奏入諭曰西北一路經惠齡等截殺賊匪俱向東南逃竄不能闖入豫境但總須嚴密不可稍存大意二年二月敗賊於鮑家馭獲賊首劉起榮搜其身有黃綾書其姓名並經文咒語自稱教首劉之協所給有棗陽貨郎趙化瓏往來通信因檻起榮送京師又敗賊於曾家店復於鄭家河新城轉戰三晝夜擒姚之富之孫姚裕及賊目陳谷保諭曰惠齡自到襄陽以來屢次剿殺賊匪今又督率將弁連日打仗殲戮多名所辦甚好著加恩賞戴花翎並大小荷包用昭優眷三月奏追剿洪山竄匪情形諭曰賊匪分路逃竄希圖分我兵力惠齡等分帶官兵欲將零星潰匪先行掃蕩以期撲滅一處卽少一處牽綴是亦下策必須探明賊首蹤跡如姚之富等見在泰山寺一路卽當帶兵前往與恆瑞等併力搜剿不可惟事分追轉墮賊計也又諭曰賊匪布散逆詞有姚張王黎四姓之語本日軍機大臣審訊劉起榮楊應邦二犯供稱姚張二姓卽姚之富張富國其黎姓名黎樹賊稱爲黎叔王姚稱爲大叔更在姚之富之上俱在隨州惠齡等務須按名拏獲又供劉之協在陝省出家係趙化瓏告知並姚狗頭廖士學張

漢潮李槐劉啓華俱係著名賊目著惠齡等一體嚴拏務獲以淨根株是月擢理藩院尙書兼鑲白旗蒙古都統五月以首逆日久未獲又任賊竄渡漢江奉旨革去宮銜世職雙眼花翎暫留本任頂帶尋命宜縣總統軍務以惠齡爲領隊大臣隨同剿賊自效六月賊竄四川通江境率精兵倍道追剿七月敗賊於大甯之田家壩又敗之於馬槽壩追殺三十餘里八月師次太平以追賊遲緩屢奉旨嚴飭十月敗平利之賊於小丰壩時襄陽黃號王廷詔白號高均德合竄窺渡漢江惠齡邀擊敗之奏入諭曰此次惠齡一路僅有兵三千餘名賊匪竟有二萬餘人惠齡以少擊衆殺賊二千餘人生擒四百餘人不使賊匪偷渡漢江實爲可嘉之至著賞還雙眼花翎加賞嵌寶石玉帶扣玉扳指大小荷包十一月齊王氏張漢潮與高姚等逆合西入漢中南岸山內自黃官嶺至新集連營二十餘里圖渡漢江惠齡截之於北岸賊不得渡竄甯羌境擊敗之賊復折竄漢中惠齡仍自北岸迎擊賊亡命肆竄入川省通江境大兵四面偪剿惠齡由西鄉太平赴大甯夔巫偵蹤兜剿有喜字玉扳指大小荷包之賜時東鄉白號王三槐達州青號徐添德竄至梁山巴州白號羅其清通江藍號冉文儔等分屯營山儀隴境三年正月惠齡

由新甯進抵梁山與總統勒保合兵會剿斃賊數千高均德一股復竄入陝陝楚諸賊多在四川邊界與冉文儔等勾結王三槐徐添德亦自太平趨通江欲合冉逆山竹峪關竄陝二月大兵敗王徐二逆於茶尖壩賊踞渠縣蟲溪白山寺惠齡復擊敗之又敗之於七里岡五月剿冉逆於孝華寺賊竄關口梁與羅逆互相應援陝賊阮正通又入川與冉羅二逆勾結惠齡擊阮逆敗之羅其清來救亦敗走於是屢破賊而未獲賊首屢奉嚴旨申飭十二月羅逆自青觀山敗竄官山惠齡督諸將追之俘其清及弟其書四年正月剿冉文儔於通江之麻壩寨克之冉逆受傷就擒予一等輕車都尉世職三月丁母憂回旗六月諭曰惠齡前在軍營止貪安逸最不出力專擒賊首置餘黨於不問以致日久未能蕝事特因羅其清冉文儔二首逆究係惠齡所獲著加恩降補兵部右侍郎九月授鑲藍旗蒙古副都統五年三月署兵部尙書閏四月復授山東巡撫六年十一月擢陝甘總督命專辦南山餘匪七年五月奏擒王作正等十一月以餘匪久未撲滅諭曰惠齡節次奏稱殲擒賊匪或三五人或一二十人任聽零星散匪肆行逃逸看來惠齡竟不實實心任事惟據將領等稟報入奏不但不能親履行陣並不能調度合宜仍係

從前在軍營蒼猾伎倆有負委任著拔去花翎降爲二品頂帶暫留總督之任以觀後效十二月偕經略額勒登保等奏剿捕三省逆匪大功戡定諭曰惠齡在陝甘總督任內剿辦南山賊匪辦理遲延降爲二品頂帶今大功底定念其從前著有微勞著加恩賞還頭品頂帶花翎八年因審辦商州匪徒滋事定擬失常奉旨申飭九年卒諭曰陝甘總督惠齡中外宣力多年剿捕教匪頗有勞績自復任總督以來辦理善後勤慎出力正資倚任前因染患喘嗽病證當經降旨諭令安心調理並賞賜丸藥醫治以冀速痊茲聞溘逝深爲悼惜惠齡著加太子少保二等男爵仍照例賞給卹典並著伊弟長齡帶領伊子桂斌前往迎接准其入城治喪屆時再行加恩遣員賜奠以示眷念勞臣至意八月命侍郎成書前往奠醊尋賜祭葬予諡勤襄子桂斌和園辦事大臣

宜縣子瑚素通阿

宜縣原名尙安鄂濟氏正白旗滿洲人由生員於乾隆二十八年考授兵部筆帖式洵升郎中四十三年授直隸口北道四十四年授直隸布政使四十五年十月護理陝西巡撫先是大學士雲貴總督李侍堯以貪縱營私逮問上命各省督撫

覈擬罪名時新授陝西巡撫雅德未到任尙安具摺議奏上責其非是諭曰此案係應雅德議覆何用該護撫急於具摺陳奏李侍堯雖負朕恩獲罪究屬朝廷大臣非兩司所能覈議尙安由部院司員不數年間用至藩司將來加恩遷擢正未可量伊祇當循分自勉豈可如此熱中欲速竟思躡遷督撫乎朕因尙安尙有出息是以諄切訓諭俾知謹飭毋負成全之意四十六年甘肅循化廳屬撒拉爾回匪滋事上命西安將軍伍爾泰剿之並諭尙安隨同辦理軍需糧餉尙安於未奉諭旨之先卽自安西馳赴陝甘交界之長武縣督飭各州縣備辦官兵車馬復至涇州籌備軍需奏入上以經理妥協嘉之交部議敘四十七年三月擢廣東巡撫四十九年正月丁母憂回旗三月因在廣東巡撫任內枉斷仁化縣監生譚體元控總商沈翼川勒派銀兩案擬譚體元以邊遠充軍部議承審官革職上以尙安心存瞻徇蒙混定案其咎較重著照部議革職俟伊百日期滿後酌派前往新疆辦事效力贖罪閏三月賞給四品職銜授吐魯番領隊大臣四月甘肅鹽茶廳回匪滋事踞石峯堡兵部尙書福康安檄尙安到陝駐守平涼八月軍務告竣抵吐魯番任事十一月奏開展舊倉存貯糧食應運至吐魯番者腳費繁多請將糜穀

糜米借給回民寬限三年交納吐魯番倉以省輓運而免朽壞下部議行五十二年十二月授烏魯木齊都統賞戴花翎五十三年三月奏烏魯木齊所屬迪化昌吉阜康綏來宜禾奇臺六州縣並濟水薩呼圖壁兩處歷年徵收屯兵民戶糧石及從前捐監收貯之糧存倉過久恐致霉變請分作三年出糶每年春季所糶卽責令州縣秋季買補還倉得旨允行四月奏烏魯木齊所屬納糧自乾隆五十二年將戶民額地外多墾餘地丈量增糧三分之一有餘民力未免拮据請將所增地糧酌減一半上命軍機大臣議行五十九年奏請陞見命經過山西時查辦原任神池縣知縣趙曾齡因痢證勒休在部蒙混呈控案六月訊明奏聞又經過固關將關內關外被水情形並督令參將知縣等給銀撫恤運糧接濟事陳奏諭曰所辦實屬可嘉著交部從優議敘並賞大小荷包又諭尙安著改名宜縣六十年五月授陝甘總督十二月西安府鋪戶收藏玉器事發諭宜縣不必來京陞見速行轉回將收藏玉器之鋪戶等嚴密搜查嘉慶元年正月奏起出大小玉器及瑣石各件係江蘇人戴傳經出口貿易乾隆六十年六月內戴傳經託大興縣民人陳茂興攜帶大小玉器五十二件來陝行抵嘉峪關被兵役查出經署蘭州府知

府應先烈查驗以作成玉器向不禁止放行上以嘉峪關爲出入門戶旣經兵役盤獲其爲私玉無疑何得以業經作成荒杯輒准放行命宜縣向該署府嚴切訊明據實奏參二月奏將盤獲私販玉石案內之李元等擬絞監候諭曰李元等如果私販玉石後又復營私納賄則其罪較重卽問擬縲首亦不爲過今該督查奏摺內未曾細問漫稱署蘭州府應先烈訊無故縱受賄情事則李元等止於私帶玉石何得遽擬絞監候宜縣著交部嚴加議處又諭曰陳茂興私販玉石署蘭州府應先烈並不查究輒准放行顯有受賄私放情弊該督自應向應先烈嚴切質訊跟究乃覆奏摺內輒據狡展之詞遽稱訊無受賄故縱情事冀圖代爲卸罪是何意見宜縣著傳旨嚴行申飭應先烈卽著革職拏問交該督速行嚴訊確情據實明白回奏尋奏種種錯謬自請罰鍰命將此案爲首之戴傳經等定擬發遣完案部議宜縣降二級調用上改從寬留任時湖北教匪滋事陝西巡撫秦承恩帶兵赴陝楚接壤要隘堵截宜縣自蘭州赴西安駐紮命卽辦理糧餉策應彈壓等事三月以商州路通鄖陽隘口十餘處賊匪俱可竄入親赴商州防堵又以鄖西縣地方均有邪教聚衆令副將百祥帶兵剿捕尋派員剿淨泥河口王全禮等賊

藪交部議敘又奏襄陽樊城爲南北咽喉派參將九十游擊常格隨同頭等侍衛明亮前往堵剿上以籌辦甚合機宜嘉之五月奏查明王全禮等滋事緣由復派員分赴鄖陽鄖西搜剿逸匪並盤獲房縣保康竄匪漢江以北之賊剿除淨盡地方甯謐並籌善後事宜以獎勵鄉勇令推義總俾有責成禁止擅殺誣害及撫恤難民旌表節烈防範漢江北岸諸條款奏入諭曰宜縣查明逆首王全禮等滋事緣由實力搜捕全行授首復派員弁於二鄖一帶搜剿擒殺漢江以北悉就肅清並將善後事宜詳悉籌辦實屬可嘉著加恩賞戴雙眼花翎並加太子太保銜六月以湖北當陽縣城被陷復派總兵觀祥領兵馳赴會剿上復嘉之先後疊奉恩賞玉扳指火鐮大小荷包二次七月飭屬查拏陝西白河縣傳習邪教之陳孝拒捕經差役格殺奏入諭令訪緝潛匿餘匪務絕根株八月奏籌款調劑兵餉以邠州商州長武三營地居衝要田少山多購買一切糧價較他屬稍昂所給餉銀往往不敷請於產糧稍多之商州營每名月加折銀三錢產糧較少之邠長二營每名月加折銀四錢上命軍機大臣會同該部議奏尋議以三營銀兩之增減總以糧價昂賤爲准本年糧價較昂應如所請其價平減之年仍照原定兵餉支給不

得援以爲例時因甘省皋蘭等州縣被旱命速回蘭州辦理賑撫借糶事宜十月四川達州亭子鋪及東鄉太平等處俱有賊匪滋擾宜縣統領官兵馳至興安由太平沿途剿捕至達州與四川總督英善會剿尋因川匪竄入陝省興安屬之安康平利紫陽等縣派肅州鎮總兵索費英阿由西鄉入川進剿宜縣親率兵繼之十一月安康教匪數千擾近興安府城宜縣馳抵興安會同秦承恩提督柯藩進剿是時府城以南牛蹶鋪古廟嶺兩處之賊王可秀成自智等以安嶺爲巢穴在府城北者馮得仕等屯聚將軍山而安嶺尤偪近郡城宜縣派游擊海洪阿等攻古廟嶺親率官兵督戰克之進偪安嶺大寨復克之斃賊數千生擒王可秀成自智及餘匪四百餘名尋攻將軍山賊巢斷其汲道用礮擊之斃賊首馮得祿趙可徵生擒馮得仕賊均就縛共一千八百二十名奏入疊奉優旨嘉獎尋派將弁剿漢江北岸大小米溪之賊翁祿玉林開泰等盡殲之偕柯藩索費英阿剿漢江南岸洞汝二河之賊汝河賊匪併入洞河五作雲合力抵拒官兵分路攻之宜縣由洞河口進並飭將弁抄賊後夾擊之斃賊五百餘名會各路兵進偪五作雲大寨放入火箭焚其草房柯板屋延及水城乘城慌亂我軍擁上殲斃賊首何知和

廖明萬李九萬並夥匪三千餘名被焚及自戕者千餘名紫陽境內肅清上以所辦實屬可嘉交部議敘二年正月派員分攻太平賊匪孫老五何如會等於通天觀高家寨南津關三處俱克之太平境內肅清時達州賊匪徐添德東鄉賊首王三槐冷天祿等攻陷東鄉屯聚張家觀又分夥聚清溪場金峩寺二處與張家觀爲犄角而巴州賊首羅其清嘯聚方山坪通江賊首冉文儔竄至方山坪迤東之王家寨相爲首尾冀乘間竄入張家觀合夥二月官兵攻王家寨徐添德抽壯健賊匪往援宜縣料張家觀守寨賊不多派員分路取之親率將弁襲曾家山焚其寨柵張家觀守寨賊目趨救官兵奪取張家觀賊寨宜縣由曾家山乘勢收復東鄉餘匪歸入金峩寺清溪場兩處官兵分路進攻金峩寺賊匪分屯大團包冉家壩口二卡清溪場賊匪聚東岸設立木柵槍礮使官兵不能過渡又於金峩寺清溪場中間之姚家壩設立大卡連絡聲勢三月宜縣督催官兵一路趨冉家壩口防大團包賊下寨撲營一路由大團包山後奪據賊寨賊首徐添德等率衆回撲我兵連日鏖戰復分三路乘高壓下殲斃無算賊匪冷倖等又於漏月巖設伏突出官兵夾擊之復斃二百餘名又派員從上流乘棧令善泅者潛赴東岸斬斷賊

船纜索斫開木寨奪據賊卡並攻得姚家壩賊卡尋據碁盤石進據雞爪嶺四月分攻清溪場金峩寺賊寨俱克之徐添德等竄重石子分屯香鑪坪方山坪賊又與合夥撲大羅坪及鷹背背頭卡均經宜縣派兵擊退而王家寨賊從後涌至官兵乘其巢穴已虛分路擊之燬其巢賊大潰逃回方山坪重石子香鑪坪賊亦分路來援經官兵擊敗之並乘雨奪獲茨茹梁富成寨賊卡賊匪欲撲羅江口窺伺達州宜縣派將弁邀擊之於楊柳坪賊首王三槐至雙廟場詭稱投降另於山溝藏賊千餘接應宜縣等探訪得實先行設伏派兵分擊斃賊百餘生擒符曰仁等十二名諭曰賊首王三槐假冒出降希圖撲卡劫犯狡詐已極幸宜縣等窺破賊情先行備兵設伏乘機剿殺不致墮其奸計實屬可嘉五月攻克分水嶺火石嶺二處賊卡香鑪坪重石子賊匪夜半傾巢出分撲各卡官兵擊退之奪卡緊逼賊巢宜縣駐紮大成寨策應派兵截賊於花潭子抄擊王三槐股匪於毛坪王三槐中槍落馬易他騎逸時因楚省賊匪由漢江北岸竄近漢陰廳治署陝甘總督陸有仁督兵遲誤逮問上命宜縣就近兼辦四川總督事務並命一切軍務著宜縣總統尋督官兵攻克重石子香鑪坪賊寨徐添德等竄屯陳家壩六月進剿賊退

屯精忠寺山包復進倡之賊又傾巢出官兵衝入賊分竄宜縣催趨兵勇追剿至磨子壩徐添德王三槐等向西逸復分兵追至徐家山進據小峩城山賊乘霧雨潛竄上以兵圍不固令賊竄逸飭之楚匪李全王廷詔姚之富三股入川與徐添德等合夥分屯土黃壩之五保頂經官兵進擊又分兩股一竄開縣之溫陽井一屯南天洞火燄壩白巖洞一帶官兵分路攻剿宜縣駐南壩場策應閏六月賊向雲安場逃逸宜縣奏賊竄東南官兵所至距原設糧臺稍遠請於新甯東鄉兩路添設臺站從之南天洞竄匪折回分水嶺桃花坪踞大梁山巔宜縣飭弁兵分五路剿之並陳家山八角坪石巖壩另起賊匪殲除淨盡又剿開萬一帶賊匪及水路壩白巖山之賊賊竄屯燕子山時川楚竄匪踞七星壩馬鞍山圖占夔州而巫山奉節大甯俱有新起教匪上命夔州一帶賊匪專交宜縣督同各路官兵剿辦七月派兵堵截燕子山賊匪親率員弁駐新店子杜賊窺伺開縣之路奏見在軍營存兵無多請調省標及甘肅督提兩標肅州河州等鎮兵並撤拉爾回兵來營協剿如所請行賊竄大甯一帶宜縣派兵追剿偪白巖山親率鎮將馳至開縣東鄉交界之寶山關駐紮策應賊竄太平縣宜縣抽撥弁兵探蹤會剿諭曰邇來川

楚各路賊匪奔竄官兵分投剿捕日久未能蕲事推求其故總由統兵大員漫無調度將官兵零星分撥處處堵截以致兵力分而見單正中賊計劃賊之法惟在整頓兵力擇要攻剿併力一處方可制勝著傳諭統兵大員務須探明首逆見在何路卽統領新兵向此一路併力圍拏俟肅清一路再移師一路以次遞剿無難逐漸蕩平宜縣等毋得仍踵前習致干咎戾而負委任八月賊分三路偪太平縣城經官兵擊退竄石關子絲蘿壩石窩場蘭草溝油坪一帶屯紮宜縣派兵分布堵截是時各路賊匪分青藍黃白等號羅其清等稱巴州白號冉文儔等稱通江藍號屯踞方山坪賊巢宜縣派員分攻多福山蓋頂山氈帽山俱克之進攻方山坪復克之賊竄通巴一路上以首逆仍未就獲嚴飭之賊屯邱家堡沙溪坳東鄉白號王三槐達州青號徐添德等在尖山坪邀約合夥宜縣派將分擊之賊匪俱竄岳家院合夥上以宜縣不設法繞出賊前祇任尾追復嚴飭之九月派兵攻岳家院賊潰追擊之於韓家院木通壩賊趨東鄉縣治復派兵擊走之奏見在各路剿捕教匪藉各州縣團練不敷但鄉勇等自衛村莊齊心協力若遠出數百里外其中勇往出力者固不乏人而畏縮不前者亦復不少此等鄉勇賞過則驕威過

則散雖鹽糧等項與兵丁所費相同究非紀律之師可比刻下附近省分官兵四川陝西已調兵一二萬不等湖北等省無餘兵可調其於四川陝甘共添練備戰兵二萬名河北河南各添五千名分營操演上允所請諭以四川賊首徐添德王三槐羅其清冉文儔責成宜縣時羅冉逆屯南背徐王逆竄青杠渡宜縣移駐白沙場派兵分擊清杠渡之賊躡水過河巴州被圍南背山之賊於觀音寺茶店雪花坪等處四出欲從儀隴南部分往保甯達州宜縣派兵分路防守進剿巴州賊匪賊分股由息陽河擾至黑石灘其地逼近蓬州營山爲文報糧臺後路宜縣派兵迎剿保護運道親駐渠縣之靜邊寺策應十月奏川東川北一帶處處與楚陝兩省犬牙相錯是以邪匪滋事以來不獨本省匪徒乘機響應卽楚陝賊匪闖入句結者亦復不少此時川省攻剿機宜處處需人調度卽各路轉運軍火糧餉亦較他省繁劇臣蒙恩兼辦川督事務深恐貽誤地方仰懇天恩另簡大員料理地方事務俾得親臨前敵專心辦理軍務上以湖廣總督勒保馳驛赴川總統軍務賊首王三槐等擾向迴龍場窺伺營山縣城宜縣派將弁痛剿之斃賊三千餘名賊退至劉家溝復分撲蓬州亦經官兵馳擊又斃一百餘名諭曰此次宜縣督兵

痛剿攻撲營山蓬州賊匪雖未擒獲首惡猶能以少擊衆殲斃多賊尙屬可嘉賊撲儀隴縣治官兵馳至衝擊之賊潰向李家場一帶焚掠宜縣督兵馳擊斃賊多名並預派將弁擊之於官渡口防護蠡蟲溪糧臺復親帶兵勇繞至文家梁駐紮防賊折竄達州並飭兵分路夾擊諭曰宜縣一路兵力無多伊又年老多病且已派勒保前往接辦而宜縣仍能認真剿賊並不存觀望之見此次調度將弁以少擊衆縣治糧臺俱能固守所辦實屬可嘉王三槐等經官兵截擊竄渠縣之望溪宜縣派兵由蠡蟲進剿羅其清冉文儔二逆股匪竄巴州之碾盤壩靈剛寺一帶上以宜縣連日截剿使首逆羅其清冉文儔不能與王三槐等竄聚一處嘉之十一月派兵擊王三槐股匪於石埡口草壩場大梁城賊退趨鄰水官兵馳剿二十餘里賊竄板橋天華山一帶屯紮上以宜縣督率辦理妥協復嘉之尋派將弁由板橋進剿奪據天華山賊由九龍場分竄鄰水縣屬之樊家槽復有匪徒藉團練鄉勇爲名陰圖接應宜縣派員獲爲首之高洪儒等八名復剿分股賊匪於長壽縣屬之葛蘭橋賊又分股趨長壽縣焚掠並有折竄墊江梁山之勢宜縣飭將弁追剿堵截羅其清冉文儔股匪分竄一入儀隴縣境一至營山來定寺搶入場廟

糧宜縣派兵擊退復攻之於靜邊寺山梁賊敗走十二月截擊王三槐徐添德分股賊匪於大竹縣境及墊江縣雞子觀賊匪時有撲達州之黃土場卡隘趨州城宜縣由文家梁督率游擊薛大烈分路馳擊斃賊五六百名生擒張正邦等一百二十四名宜縣自入川以來疊奉恩賞王金盒玉喜字牌扳指帶版帶環大小荷包等件十有六次三年正月勒保調四川總督接任總統事宜縣仍回陝甘總督任上命速赴西安或在興安一帶擇扼要之處駐紮與秦承恩督率籌辦二月因襄陽白號高均德黃號齊王氏等先後偷渡漢江廣州將軍明亮褫職命宜縣速赴明亮軍營將所帶官兵悉行統領督率德楞泰等實力查辦宜縣行至黃沙驛聞有川省賊匪竄入長寨馳往擊之殲戮殆盡時齊王氏姚之富經明亮御前侍衛德楞泰殲斃而川省竄匪阮正通襄陽藍號張漢潮等先後竄入陝境川省賊匪劉成棟與張漢潮合命以阮正通張漢潮股匪責成宜縣專辦三月張漢潮竄至王黑壩趨梅湖躡淺過江宜縣飭將弁截回又兜剿阮正通股匪於石泉賊竄城固四月襄陽白號高均德股匪與張添倫李全合夥折回漢陰阮正通股匪由城固折竄回川宜縣等奉嚴旨申飭尋偕明亮擊高均德股匪於五郎之兩河口

殲斃四百餘名五月陝省賊匪闖入甘境復奉旨嚴飭高均德股匪經官兵剿殺折爲兩股後股北竄鳳縣境宜縣派員追擊賊分股竄出略陽上以未擒首逆嚴飭之時通江賊匪竄近西鄉而川匪徐添德莫永壽等竄至房縣與湖北竄匪合趨陝境宜縣派員防護西鄉親率將弁馳赴平利洵陽適中之二郎鋪駐紮探蹤迎堵張添倫由略陽過烏龍河水漲淹斃六月劉成棟張漢潮股匪由竹溪竄入陝省平利縣上命各省帶兵大員分定責成陝省令宜縣與額勒登保興肇爲一路專剿竄平利之劉成棟等一股尋率將弁赴白沙河抄截擊之於孟石嶺斃賊六百餘名生擒周正材等八十三名賊向四川太平縣境竄逸上以宜縣不能將賊首擒獲又任竄入川境嚴飭之諭平利一帶責成宜縣在彼防堵以遏賊匪折竄之路八月張漢潮股匪由回軍壩向東逸宜縣馳至石泉派兵堵剿川省徐添德冉文儔高均德等由儀隴竄廣元而南江大河口亦有賊匪屯紮切近陝省南鄭甯羌沔縣等屬上命宜縣等於甯沔南鄭緊要關隘嚴密堵禦張漢潮股匪折入南江欲由陝回楚竄至梅湖南岸宜縣密派將弁從上流潛渡突擊之賊竄王黑壩宜縣馳回紫陽復派兵設伏擊之於納溪壩山後賊向老林西竄折回南江

時冉文儔數股賊匪折回營山儀隴高均德尙屯廣元宜縣以張逆不能渡江北必思與高逆合夥由甯羌沔縣入陝隨飭將弁於甯沔一帶防堵嗣聞高均德復至南江之坪河令鎮將在西鄉之私渡河罐子山邊截剿親赴石泉洋縣一帶策應九月高均德竄四川閬中縣境張漢潮竄太平縣境諭曰川省竄匪去陝已遠宜縣等惟當督率將弁實力嚴防不得以賊折回稍有疎懈十月分飭將弁堵剿川省箕山竄匪張時青於甯羌境通江竄匪阮正通於城固境並擊襄陽黃號樊人傑太平黃號龍紹周兩股竄匪於西鄉賊退出境龔樊二逆因官兵剿川匪李樹唐明高萬等於頂山復乘閒竄入與各股匪分數路圍繞官兵宜縣等親往策應時賊東竄十一月偕總兵慶溥馳剿川省各竄匪於紫陽邊隘擊大固賊匪李樹樊人傑元正澹等於二州埡賊退向川省竄逸尋又折近安康平利境宜縣飭員弁各據險隘禦之後竄至紫陽連界之大耳壩游奕官兵分投抵禦宜縣仍駐石泉往來策應李樹等攻撲安康之南天門隘口宜縣督兵馳至派員分路衝下賊驚潰又有賊匪撲黃金溝卡隘派兵馳擊之賊西奔尋以張漢潮股匪竄至雒南盧氏一帶其地卽爲去歲賊匪由豫入陝之路復飭鎮將由山陽商州迎剿十

二月李樹燮人傑龍紹周唐明高萬各股賊匪屯紮紫溪河欲趨西鄉宜縣奏西鄉邊界延長道路紛歧我兵若分段防守則兵力不敷惟有於適中扼要之地分駐重兵相機迎剿四年正月諭曰宜縣摺內既云兵力不敷何以又有重兵分駐措詞自相矛盾可乎伊等捏詞虛報並不親身督辦僅派鎮將等前往堵剿率照所稟隔數日奏報一次塞責伊等擁兵自衛安坐度歲甚至飲酒宴樂置軍事於不問此等積弊朕所深知豈能始終掩蓋且兵力不敷之故皆由伊等坐冒空糧虛糜廩給卽鄉勇亦恐有名無實不過爲濫銷軍需地步著傳旨嚴行申飭尋又諭曰宜縣係陝甘總督封疆之任是其專責從前賊匪至境任其越界奔竄往來自緣不能實力堵禦每奏稱漢江水淺竄賊得以偷渡皆係藉詞捏飾以掩其縱賊之咎嗣後著責成宜縣於陝省邊境一帶嚴密防堵毋許竄賊一名闌入尋奏川匪李樹等分夥竄入平利縣境派鎮將截擊賊竄川境臣由紫陽相機剿辦長嶺各股賊匪再張漢潮股匪折入五郎境內臣因堵剿平利賊匪不能兼顧見經副都統明亮荊州將軍興肇帶兵趕上正可併力截剿諭曰宜縣奏堵剿賊匪情形皆不切要以各路將領多人並未能擒獲李樹燮人傑并分出爲首之夥賊亦

未能弋獲並有以張漢潮委卸於明亮興肇之意宜縣又未身在行閒僅據稟報之辭一奏塞責仍蹈素日積習朕向聞自宜縣帶兵剿賊以來賊至則不敢向前賊去始移營前往因將軍機處鈔存伊節次奏摺詳加覈對皆於無賊處所駐劄畏蕙無能巧於退避實與朕所聞相符卽如本日奏到之摺旣稱張漢潮竄入五郎境內伊以堵剿平利賊匪不能兼顧爲詞其實平利一股賊匪又不見其親往剿辦僅委鎮將等帶兵堵剿俟賊竄回川境後宜縣始由紫陽趕赴長嶺此卽避賊之明證宜縣著傳旨嚴行申飭並著卽解任來京候旨尋奏帶領總兵慶溥參將韓家業由紫陽進剿西鄉賊匪屯紮王黑壩隨派慶溥等進剿臣與韓家業駐安子溝策應後路糧餉又有另股賊匪竄入紫陽關壩子城卽帶韓家業於漢玉城仙姑灘一帶分撥兵勇加意防守賊竄尙家壩復趨瓦房店臣卽趕回紫陽調兵堵禦諭曰朕素知宜縣自剿辦賊匪以來從未親身督率此次堵剿各股之賊仍係派人前往惟以策應後路糧餉及趕回紫陽調兵爲詞明係避賊而行仍蹈畏蕙不前惡習應俟宜縣到京時逐一詢問再降諭旨上命川省糧餉專交副都統銜福甯管理三月福甯奏川省軍興以來各路供支未能遵照定例覈

實辦理其官兵夫驟價值鄉勇鹽糧等項宜縣統軍因追剿竄匪逐日移營一時
權宜覈發所費尤爲不貲諭曰此項軍需經費用銀七十餘萬兩皆由各路領兵
大員任意濫用所致朕聞之至熟今福甯摺內稱宜縣一時權宜覈發所費不貲
卽此二語已包括無數浮支濫用矣四月和碩成親王永理奏見宜縣戴雙眼花
翎可否仍令戴用得旨令戴單眼花翎尋命在散秩大臣上行走諭曰宜縣自辦
理川省軍務以來並不親率將弁認真剿賊惟事退縮畏蕙致誤軍機重務是以
降旨令其解任來京昨到京時伊並未專摺請罪及召見面詢軍營情形止稱兵
少賊多於剿捕機宜地名遠近槩不能詳悉陳奏因詢以在大成寨蓋屋居住之
事伊居然直認毫無知罪畏懼之意隨令軍機大臣將朕所批伊摺給予閱看乃
多方辨飾惟以慚愧爲詞僅請革去太子太保銜仍不自伏愆尤實屬全無天良
出於情理之外宜縣身任陝甘總督帶兵打仗是其專責雖經具奏老病情形亦
不過虛詞搪塞爲諉卸地步試問伊屢次奏報打仗殺賊爲虛耶否耶其昧良負
恩實難辭咎究念伊老病免其治罪宜縣曾任烏魯木齊都統於新疆情形尙爲
熟悉賞給三等侍衛銜自備資斧前往烏里雅蘇臺幫同縣佐辦事尋因湖北安

襄鄖道胡齊倫侵餉事發呈出動用軍需底帳內有各路領兵大員得受餽送及濫提銀兩之事上以宜縣前在川省辦理軍需經手日久豈有不濫行提用作爲餽送藉資結納之理且川省領兵大員在楚既經得受餽送則於川省亦必藉端需索宜縣等如何侵用及致送何人之處不可不切實嚴究命四川總督魁倫駐劄達州審辦十月魁倫奏詳覈軍需檔冊惟長夫長騾及雇募鄉勇兩項所費最大初因宜縣等統兵由陝入川各兵皆帶有長騾每日給發騾價無長騾者給長夫川省接辦之初因軍需緊要一面照數給發一面移查陝省辦過成案旋據覆稱係權宜辦理並無成案可稽川省司道議定覈減章程宜縣以不敷用批駁復議加增並未奏明又鄉勇一項先經宜縣奏明分別給予錢文嗣因買食維艱復經奏明支給口糧十二月諭曰長騾鄉勇種種冒濫皆係宜縣任內之事總俟呈出底帳無難逐款跟究五年正月諭曰各路賊匪肆擾鴟張至今未能撲滅皆由宜縣因循玩誤所致若追論其老師糜餉之罪即將伊家產查抄並將該省軍興動用之款罰令賠出亦屬罪所應得今因事屬已往姑不卽行究辦且宜縣上年來京本係獲罪之人經朕加恩賞給三等侍衛派往烏里雅蘇臺參贊事務實屬

格外寬典宜縣具有人心其辜恩負職之罪甯不自知著縣佐卽將此旨密諭宜縣令其捫心自問當如何捐資助餉庶可自贖見在辦理軍務善後一切正需經費宜縣應激發天良將認繳銀兩若干之處自行陳明二月定邊左副將軍縣佐奏宜縣請將住房及地畝變價措繳外尙有前在陝甘總督任內未支廉俸一萬三四千兩遣人補領全數交出上以宜縣一味藉詞搪塞蒼猾已極可謂毫無人心復傳諭縣佐切責之尋命革職發往伊犁效力贖罪三月縣佐奏宜縣自認前在軍營因循玩誤懇赴軍營自備資斧帶兵效力諭曰宜縣因循玩誤此四字實爲罪案前將伊犁職發往伊犁亦因貽誤軍務按律懲治而宜縣在任尙未查出貪婪實跡並未因其認繳銀兩支吾搪塞故加之罪乃宜縣此時尙欲懇赴軍營自備資斧帶兵效力實屬無恥宜縣前此身爲總統畏蕙昏庸毫無展布坐誤軍機今更加老病復赴軍營有何用處豈因剿捕賊匪功屆垂成尙思廁身其間覲顏仰邀甄敘卽著前赴伊犁不得再有延緩尋請罰銀二萬兩以助軍餉上予限一年完繳六年二月宜縣子盛京刑部侍郎瑚圖靈阿奏未完罰項恐逾期請將住房估計價值呈繳入官諭曰宜縣獲咎之由實以其遷延玩寇不加重辟從寬

遠戍初非繳完罰項即可加恩釋回今瑚圖靈阿呈出住房雖係代伊父藉繳官項但伊見爲刑部侍郎在京當苦差房屋一併入官必致棲身無所況宜縣之罪與伊何涉所有宜縣應繳銀兩著加恩再寬限一年其住房亦不必呈繳七年四月奉旨宜縣年逾七旬精力就衰著加恩准其回旗九月呈請所欠官款尙有未完銀八百餘兩自伊犁釋回見患骹疾不能討賞差使另措繳銀二千兩稍效涓埃諭曰宜縣名下未完欠項自應按數完繳至伊旣患骹疾不能當差惟應上緊調治俟全愈後再請差使何必復行措繳銀二千兩輕視朕躬太甚豈以呈繳銀兩遂可復職乎著傳旨嚴行申飭十二月川陝楚剿捕逆匪大功戡定諭曰宜縣前在軍營督剿洞汝河等賊匪尙屬認真後因總統軍務安坐大成寨任賊匪往來奔竄革職發往伊犁念其年老釋放回京伊究曾出兵著加恩以六部員外郎用九年諭曰朕披閱剿平三省邪匪方略嘉慶二年九月間宜縣曾奏及各州縣團練鄉勇非紀律之師可比賞過則驕威過則散等語實爲切中軍營之弊宜縣久任封疆見識尙爲老到茲念其年老曾經出兵著加恩以四品京堂補用十年九月授大理寺卿十一年五月以骹疾復發奏請開缺得旨准其開缺在家調養

俟病痊後再行賞給差使十七年十一月卒子瑚素通阿原名瑚圖靈阿官至刑部左侍郎札勒杭阿一品廕生見任戶部員外郎富珠隆阿甘肅階州直隸州知州烏什杭阿禮部筆帖式

畢沅

畢沅江蘇鎮洋人乾隆二十二年以舉人爲內閣中書軍機處行走二十五年一甲一名進士授修撰三十年升侍讀三十一年升左庶子授甘肅鞏秦階道嘗從總督明山出關查屯田奏請調安肅道三十五年擢陝西按察使三十六年升陝西布政使三十八年授陝西巡撫三十九年與陝甘總督勒爾謹奏言甘省地瘠民貧全賴官倉接濟前收捐監銀以補常平缺額嗣因日久弊生奉諭停捐而倉儲缺額尙多不能如數籌補竊謂捐監之弊皆大吏稽察不嚴所致甘省農民藉糶糧爲生邇來歲慶屢豐價值平減若乘此有秋准復捐監舊例聽閭閻自爲輸納以裕倉儲以濟民生於事誠便奏上得旨允行並命沅詳定章程嚴密稽察四十年賞戴花翎四十三年以高樸在葉爾羌私採玉石運送回京沅審訊樸家人供辭不實降旨責沅草率四十四年十二月丁母憂去職四十五年十月諭曰

陝西巡撫員缺緊要畢沅前在西安最久熟悉該處情形且守制將屆一年見在
一時不得其人著前往署理亦非開在任守制之例也四十六年三月甘肅撤拉
爾番回蘇阿洪等爭立新教互相仇殺並害知府副將等官搶占河州沅聞報卽
選西安綠營精兵會西安將軍伍彌泰提督馬彪等剿捕賊徧蘭州又調各路官
兵守禦進剿安設臺站以速郵傳糧餉馬匹軍火器械籌備皆裕逆番就擒收復
河州上諭畢沅在陝西境內聞甘省有事卽能悉心調度事事妥協實屬可嘉著
賞給一品頂帶並交部優敘七月奏拏獲川省囑匪艾隆等旋以甘省捐監州縣
通同捏災冒賑沅未據實查參諭令沅自行議罪沅請罰繳銀五萬兩備甘省官
兵犒賞之用御史錢澧奏參沅前署督篆時於該省折捐冒賑諸弊瞻徇前任其
罪較捏災各員無減請敕部比照議處四十七年正月上諭畢沅在甘省兩署督
篆於該省歷年積弊亦無不知之理乃竟巧爲支飾降三品頂帶仍留巡撫停止
俸廉並不許呈進貢物四十八年正月復還原品頂帶仍准給養廉是月服闋實
授巡撫四十九年甘省鹽茶廳屬回民聚衆滋事沅奏調各路官兵搜剿又奏籌
辦軍需及沿站供支各事宜俱得旨獎勵五十年二月調河南巡撫二月奏河北

一帶未得雨澤各屬倉儲因連年積歉蠲緩散賑所存無多請截留漕糧二十萬石以備賑借之需上如其請又奏請將民欠錢糧槩予緩徵及展賑兩月溫諭嘉之五月奏柘城縣奸民聚衆抗官帶兵親往拏獲要犯審明正法又奏諭民毋得私自囤積以平糧價又濬賈魯惠濟等河奉硃批諸凡皆妥十月奏查明淮水發源在桐柏山賜御製淮源記五十一年正月恩旨賞穿黃馬褂五月奏豫省連歲不登山西富戶聞風赴豫放債準折地畝貧民失業見飭屬曉諭報明地方官酌覈原價取贖奉諭有盡心民事居心公正深識大體之獎六月擢湖廣總督因伊陽縣戕官首犯秦國棟等日久未獲不准前赴新任旋因陝省盤獲秦國棟沉以緝捕不力仍回巡撫本任五十三年荊州被水復擢湖廣總督奉諭卽速往荊州辦理撫卹事宜旋奏興修監利江陵公安廣濟黃梅等縣隄工五十四年奏續添荆江雞嘴壩工及打築萬城隄工上嘉之嗣以河南考城縣移建城垣非地糜費沉曾奉飭未據實陳奏有旨交部嚴議五十九年以湖北竹谿縣民人王占魁等傳習邪教川省委員查拏匪犯夥黨糾搶毆斃差役沉未奏及奉旨降補山東巡撫摘去花翎罰繳湖廣總督養廉五年再罰山東巡撫養廉三年是年奏臨清等

十州縣豐被旱澇飭屬及時採買存貯以備平糶六十年仍授湖廣總督時湖南苗石三保滋事命往荊州常德等處籌辦糧餉軍火等件沅抵常德設局籌運又以瀘溪爲辰州門戶浦市爲沿江大市且轉運必由之路守兵單弱奏調湖北省兵分助防守又於湖北省州縣與永順接壤各隘口俱添兵防守且爲聲援又奏辰州三廳及瀘溪等處村市焚燒被難之民旣妥爲安置其中不乏壯丁見飭屬招募團練又各寨熟苗近來亦知大義且步履驍健用以先驅必能得力見已出示曉諭招徠又以各苗寨中有寄居客戶不皆安分之人趁此點出散賑就便清查客民訊明鄉里遞回原籍於撫輯之中卽寓剔除之意諸奏皆有旨嘉獎旋以轉運妥協賞戴花翎又以各苗寨紛紛投誠官兵攻賊節經痛剿糧餉軍火均得應期足用交部優敘嘉慶元年正月湖北省邪匪聶人傑等滋事沅自辰州馳赴枝江等處帶兵會剿當陽又有匪徒戕官沅奏往荊州就近調度又奏賊情鬼蜮輾轉煽惑鹽梟土棍多附和入夥愚民被脅相從蔓延可慮請發京營勁旅三千名酌量分駐上諭畢沅因州縣紛紛稟報未免張皇失措不能得有把握又以襄陽賊匪潛出滋事由沅調度失宜所致傳旨申飭六月又以攻剿當陽曠日持久

傳諭嚴行申飭旋降旨交永保總督統辦七月沅奏督率兵勇將當陽賊匪全數剿滅上諭畢沅已將當陽肅清所有湖廣總督篆仍交畢沅接管繼以惠齡奏生擒首逆張正謨等沅並賞給輕車都尉世職作爲二等承襲九月奏抵襄陽偵探逃匪生擒頭目田德魁等又奏刊發簡明告示令生擒各賊內曉事者齎回賊營徧行曉諭日來悔罪投誠者絡繹不絕奉諭自應如此辦理畢沅仍當加意防範不可稍涉大意十月奏言黔楚苗匪首逆吳半生石三保吳八月等俱以次就擒僅石柳鄧未獲已屬勢窮力蹙請將各省營兵撤回本省營伍所有苗疆地方扼要處所酌撥二二萬名分布控制上諭軍機大臣曰官兵撤退朕所素願但見在平隴尙未攻克苗匪詭譎異常且教匪聲息相通見石柳鄧等未能拏獲卽行撤兵伊等亦無忌憚尤非良策豈能遽議及此沅旋以冒昧自陳十二月明亮等奏斬梟石柳鄧等蔽功獻馘上以沅於苗疆情形諳悉命速馳往湖南會同鄂輝姜晟悉心籌酌加意鎮撫沅奏言襄陽等處教匪尙稽殄滅先儘楚北之兵撤令歸伍以資彈壓又奏樊城爲漢南一大都會本年猝被賊擾因無城垣可恃遂多蹂躪臣駐守以來察看形勢必須建築輒城方可捍衛今乘難民空閒需食正殷就

地招徠以工代賑洵爲一舉兩得得旨俞允二年二月奏辰州逼近苗疆爲三廳門戶請將提督常駐辰州稽查彈壓提標四營兵於常德辰州分駐俟苗地安靜提督每歲於辰州常德往來駐劄又請添設總兵於花園汛又於附近平隴之強虎哨撥駐守備一員以資犄角三月又奏鳳凰永綏乾州等處酌添兵丁分駐又請各處修城築堡酌給新設苗弁餉銀諸奏入奉旨皆依議行時上以邪匪尙未剿淨諭沅查明焚掠處所難民復業者妥爲撫綏六月以疾入奏諭曰畢沅奏五月內頭暈失跌左手足麻木不仁見仍力疾照常辦事覽奏殊爲廬念著加恩賞給御藥房修合之活絡丸七月卒於官諭曰湖廣總督畢沅宣力封圻二十餘年辦理軍需積勞嬰疾茲聞溘逝殊深軫惜著晉贈太子太保世職令其孫承襲八月諭畢沅前在湖廣辦理教匪失察過多不必予諡四年九月諭從前畢沅身任湖廣總督不能實力整頓貽誤地方以致教匪潛謀勾結乘閒滋事畢沅於教匪起事之初辦理不善其罪甚重昨又據倭什布查奏胡齊崙經手動用軍需底帳畢沅提用銀兩及餽送領兵各大員銀數最多畢沅既經貽誤地方復將軍需帑項任意濫支結交餽送飢法營私莫此爲甚儻畢沅尙在必當重治其罪今雖已

身故豈可復令其子孫仍任官職所有承襲輕車都尉世職之長孫畢蘭慶及承襲畢沅廕生之次子畢嵩珠俱著革去不准承廕十月追產入官

秦承恩

秦承恩江蘇江甯人乾隆二十六年進士改庶吉士二十八年授編修三十三年大考二等遷左贊善三十四年擢侍講三十五年充順天鄉試正考官三十六年京察一等授江西廣饒九南道四十五年調福建延建邵道四十六年二月升按察使十一月調陝西按察使四十八年三月擢四川布政使五月調湖南布政使五十一年二月調陝西布政使五十四年正月調直隸布政使三月諭仍留陝西布政使任六月因前在湖南布政使任內失察耒陽縣生員賀世盛編造逆書部議降二級調用奉旨從寬留任七月擢陝西巡撫九月奏興安府屬之安康縣地方遼闊請分隸漢陰通判管轄裁漢中府沔縣貢河驛驛丞改爲漢陰巡檢下部議行五十六年三月奏陝甘局鑄錢文向保存貯局中近因收買小錢改鑄爲數更多若照舊貯局恐日久滋弊應請改歸藩庫收貯其搭放兵餉卽由司當堂給發得旨嘉獎七月奏查明陝省鹽法並籌補永東倉鹽池額課報聞五十七年二

月京察屆期諭曰秦承恩宣力封疆克稱厥職著交部議敘五月奏請定太白山祀典得旨允行八月因咸陽縣知縣張廷杰推升廣西慶遠府同知並未飭赴新任奏請留陝補用爲屬員規避邊缺部議降二級調用奉旨改爲革職留任九月奏陝省秋禾約收分數及糧價並不詳細查明十月覈奏收成分數單內未將災分輕重分別賑濟之處聲明均奉旨嚴行申飭五十八年七月奏將陝西延安漢中榆林鄜州綏德五府州屬之膚施等三十一廳州縣鹽庫正銀一併歸地丁攤徵命軍機大臣及戶部會議准行八月入覲賞戴花翎五十九年四月因前任湖南布政使任內失察武陵縣貢生歐陽緯編造誕謬詩文部議革任上免之八月拏獲邪教蕭貴等七十餘名並不由驛馳奏僅差人齎遞遲至二十餘日始行奏到上以秦承恩不知緩急輕重交部嚴加議處尋議革任上免之六十年二月奏拏獲河南竄入陝境盜犯十九名派員解省審辦得旨嘉獎並賞給大小荷包是月京察屆期上以秦承恩督緝盜犯認真妥辦交部議敘三月奏請封閉陝西略陽縣興隆灣銅礦從之嘉慶元年三月湖北竹山竹谿縣境內各有匪徒滋擾承恩以該處距陝省興安府最近札令將弁馳赴竹山竹谿縣剿洗親往接壤要隘

督同文武員弁堵截並飭將擒獲竹谿逆匪解至興安分別正法其誤習邪教者責令自新釋之並屬紳士團集鄉勇互相糾察奏入諭曰秦承恩在興漢一帶分派員弁防守地方並鼓勵鄉勇截殺湖北竄匪地方甯謐所辦可嘉之至著交部議敘以示獎勵十月奏四川達州亭子鋪地方匪徒聚眾滋事達州與太平縣交界太平與陝西漢中興安二府屬毗連恐川省追捕緊急竄入陝境臣見飭該管府道會同興漢鎮督率弁兵嚴密防守一面親赴漢中彈壓堵禦如陝省邊境照常安帖臣卽帶領興安府城守防兵徑往達州咨會侍郎英善兩面夾攻以期一鼓殲除上嘉之並賞給大小荷包尋因達州匪徒欲赴陝省旬人入夥經先曾入教改悔投誠之程廷珍等報知指引官兵圍擊之殲斃一百名擒獲首犯甯學成奏入諭曰所辦甚好程廷珍前曾入教經秦承恩出示化導絜家投出嗣又經伊報信並指引官兵殲擒多賊可見愚民具有天良地方官若實力勸導自無難化莠爲良是月達州所屬之東鄉太平等處亦有匪聚衆承恩帶兵赴州駐守使達州之賊不得與太平匪徒聯結十一月因提督柯藩馳抵安康太平交界之黃柏棚地方搜捕川省逃匪承恩馳赴興安彈壓策應奏興安府屬地方遼闊跬步皆

山而郡城爲川楚入陝門戶尤關緊要見在近城之牛蹠鋪古廟嶺等處亦有匪徒屯聚窺伺臣督率兵勇上緊搜捕一面札商總督宜縣將所調赴川兵丁帶至興安會同柯藩將境內之賊分路堵除卽由安康紫陽取道至太平會剿諭曰興漢與太平毗連防有川省逸匪竄入秦承恩仍著暫留該處督率堵拏並資彈壓不必遠赴達州爲是尋奏興安府屬各廳縣多與四川連界在府城南者爲牛蹠鋪古廟嶺兩處之賊以安嶺爲巢穴在府城北者爲將軍山皆逼近郡城賊匪屯聚窺伺將軍山與郡城相隔漢江可以據塹而守惟安嶺之賊憑高直下平日可到不可不先爲撲滅隨派將弁分路齊進焚燬木城殲斃數千並逃竄之賊剿除淨盡復分兵四路進攻將軍山斷賊汲道用礮轟開石牆乘勢直進殺賊數百生擒首犯馬得仕餘匪就縛者千餘梟奉優旨嘉獎並賞給瑪瑙盒大小荷包十二月汝河賊匪併入洞河五作雲賊巢力拒承恩督率兵勇由花黎岡進擊連撲三次適賊礮裂自行轟斃多人我兵乘勢撲進賊匪盡數殲斃會各路官兵進逼五作雲大寨截殺賊三千餘被焚及自戕者千餘殲斃首逆胡知和穆明萬李九萬生擒廖景華等三百餘名紫陽境內賊匪淨盡奏入賞給金盒玉扳指大小荷包

並交部議敘二年正月剿安康縣之光頭山賊匪先派將弁於對面之朝坪左右合撲殲斃五百餘名奪獲賊卡復於光頭山左右擊賊寨後之界嶺用礮轟擊四面攻撲殺賊二千餘斃賊總頭目王劉氏梟示並獲首犯劉文照彭儀萬石金順劉大富萬洪禮等正法男婦二百餘人均分別辦理安康境內賊匪淨盡奏入上以光頭山賊匪全行剿滅陝境肅清所辦實屬可嘉賞給金盒荷包雙喜如意仍交部從優議敘二月奏陝省興安境內被難民人業經派員查看先令搭棚棲身散給饘粥隨照災賑之例給予米糧及棉衣今陝境肅清應令復歸本業而該民人等籽種口糧牛具房屋蕩然無存情堪憫惻請再分別賑濟給予三月口糧被焚房屋給銀令自行蓋造仍各借給籽種牛具俾資耕作得旨允行三月楚省竄匪由河南盧氏闖入陝西商南縣境承恩馳赴商州一帶堵剿四月商州山陽交界之西牛槽等處有匪徒聚集多人乘機竊發承恩帶兵往剿尋擊之於三條溝剿殺五百餘名生擒百七十名又偕西安將軍恆瑞追截餘匪偪入深溝夾擊之立斃六百餘名生擒賊目韓有成並夥匪八十五名西牛槽竄匪全數殲除旋因雒南石板溝地方有楚匪勾結本處教匪起事承恩偕總兵富爾賽馳往剿捕奏

入諭曰雒南石板溝地方有匪徒滋事秦承恩已同富爾賽帶兵前往剿捕諒不難卽時撲滅著秦承恩於剿竣後酌量情形若賊匪尙在陝西邊界一帶竄聚秦承恩自應帶兵幫同恆瑞等合力兜擊如賊匪已出陝境軍營帶兵之員甚多商雒興安一帶亦關緊要秦承恩卽當在陝省邊界駐劄防堵不必再向前進以致不能兼顧五月上以秦承恩於堵剿賊匪事宜奏報遲緩申飭之六月總統惠齡等奏黃龍鋪西竄之賊在紫陽縣之白馬石搶船渡江經官兵拏獲代賊雇船之錢正萬等解交秦承恩收審諭曰錢正萬旣爲賊匪雇船必有與賊通同情事該地方官漫無查察任令錢正萬爲賊雇船偷渡亦當一併嚴參著秦承恩卽徹底究明嚴行定罪覆奏尋奏漢江北岸船隻前已全數收歸南岸而紫陽白馬石等處居漢江上游水祇深三四尺各股賊匪俱係騎馬浮渡間有搶過船隻裝載老幼婦女其強壯之賊多係兩人挽手並涉上以所奏實屬回護嚴飭之又奏籌辦川省糧運令西鄉附近州縣設法協濟上是之閏六月奏訊明錢正萬爲賊雇船及張三清爲賊渡送婦女老幼皆出於被偪被搶臣於楚匪闖入楚境不能迎截以致竄過漢江尙何敢諉過屬員爲自行解免地步請將臣交部嚴加議處上以

錢正萬等係無知小民見大夥賊匪猝至被其偪脅雇船其情尙屬可原至地方官有守土之責今旣防守疎虞其罪豈容解免秦承恩徇庇屬員未經參辦轉以不敢諉過爲詞自請處分了事實屬錯謬着先革去翎頂姑暫留巡撫任以觀後效八月楚匪竄入白河縣石槽溝與房縣竹山續來之賊三千餘歸併屯聚經官兵由東追堵隨向西竄赴朱家河承恩督率鄉勇在安康接壤各要隘防堵奏入上以見在陝省兵力無多雖有鄉勇一二萬人總須大員帶領官兵在前衝擊方能得力命恆瑞酌帶官兵馳赴白河洵陽一帶秦承恩帶領本地兵勇星赴該處與恆瑞併力迎擊一面扼其北竄漢江之路一面防護白河洵陽等縣治九月奏防堵東西兩路竄匪情形上以辦理俱合機宜嘉之時東路賊匪西竄赤崖分兩股一由香鑪溝竄近安康界一由花園寺竄近平利界承恩帶領兵勇赴安康邊界設伏於賀家壩山梁衝擊賊營殲斃七百餘名又令調到肅州官兵馳赴平利兜圍截殺奏入得旨嘉獎是月西路賊匪竄至安康輒坪與東路分股之賊合竄至平利太平河連線河一帶惠齡由西路追剿柯藩由東路截殺承恩督率兵勇策應旋因均州賊匪竄入洵陽之銅錢關神河口移駐金堂寺地方禦之賊翻山

西竄至爛泥灣分兩股一向平利南竄一向西緊偃郡城承恩偕惠齡合兵追截餘賊向平利界奔逸與南竄之賊合向白沙河一帶遁去奏入諭曰秦承恩在興安一帶督率兵勇堵剿尙屬出力著加恩賞還翎頂十月首逆王廷詔高均德一股由安康輒坪佐林溝直撲興安府城承恩派員弁分路堵截並密札惠齡相機迎擊得旨嘉獎並賞給嵌鑲寶石帶頭大小荷包十一月奏近省一帶兵備空虛商令總兵王文雄馳赴鎮安駐劄總兵愛星阿暫駐興安北面儻賊有北趨之勢臣卽與愛星阿馳赴鎮安會同文雄迎擊上以賊匪俱向西南奔竄安能復折向北岸竄至東北鎮安地方所奏殊屬牽混申飭之三年正月諭曰秦承恩見丁母憂例應離任守制但該撫見在興安一帶巡防軍務關係緊要且該撫在陝年久一切地方情形及軍需等件皆爲熟悉未便遽易生手仍著署理陝西巡撫在任守制尋奏高均德股匪竄至鎮安雲蓋寺一帶欲由山陽東竄商州直趨豫境臣與王文雄由藍田馳赴商州鈔出賊前斷其竄路諭曰自山陽以至商雒並無攔截之兵秦承恩等務當兼程趕赴商州迎堵二月高均德齊王氏兩股賊匪竄至漢陰之觀音河會合後股李全等又分竄城固南鄭偃近北棧及五郎一路擾及

郿縣熬屋地方承恩偕王文雄帶兵馳剿擊之於焦家鎮殲賊五百餘名生擒三十餘名上以承恩調度合宜賞給金鑲松石盒白玉喜牌大小荷包三月李全一股竄近長安地界承恩偕荊州將軍興肇提督柯藩王文雄分路進擊殲八百餘名餘匪分竄東入庫峪口內西至翔峪灃峪一帶又分數股承恩偕王文雄督率將弁堵住翔峪向內逼攻賊衆翻山回竄趕殺千餘名又經兵勇攻撲灃峪截殺五百餘名生擒二百三十名正法並被裹難民一千數百放歸復業復派精練鄉勇千餘隨興肇柯藩協剿庫峪之賊奏人諭曰被賊裹脅良民分別安撫使之陸續投出亦足以解散賊匪所辦尙是尋李全分股賊匪因官兵在東南兜剿伺隙翻山北竄欲勾合阮正通一股偷過嶺北又川省賊匪張漢潮及龍仁山之姪二股先後竄至西鄉之漁渡壩紫陽之毛壩關等處承恩偕王文雄在大峪一帶堵剿奏入上命秦承恩督飭陝省各員嚴密布置妥爲堵禦四月李全與阮正通合夥折回鎮安西竄漢陰石泉地方而高均德股匪竄入秦嶺老林折向東南奔逸承恩奏前此高均德股匪分竄渭南華州諸峪口欲出東北大路直趨豫境經臣督令王文雄等帶兵迎剿入山搜捕盡行殲除李全阮正通等正在漢陰石泉滋

擾經宜縣興肇柯藩在彼圍剿若偪歸一處各路官兵會合定可一鼓殲除惟查鎮安西北可由五郎洋縣直趨鳳翔寶雞盩厔鄠縣儻賊匪被圍緊急不能南竄勢必翻山北出臣與王文雄見卽帶領官兵由東而西暫駐子午峪相機迎擊諭曰高均德一股賊匪業向鎮安西南一帶奔逸乃秦承恩復追述從前情形尙稱賊匪欲出東北大路而於見在剿捕情形轉未聲敘明晰著傳旨嚴行申飭至該匪等折竄鎮安後被剿緊急難保不翻山北逸秦承恩王文雄見在帶兵駐劄子午峪務須相機迎擊尋奏阮正通等竄至城固之花家坪楊家莊等處恐潛出鳳翔寶雞一帶偷生割麥臣與王文雄卽由子午峪馳往郿縣探蹤截剿上以所奏仍不過防堵情形其高均德李全阮正通是否歸併一處亦未聲敘明晰嚴飭之時高均德李全張添倫合夥阮正通由石泉洋縣西竄上以秦承恩在子午峪迎擊爲日已久迄未將首逆拏獲庸懦無能又嚴飭之五月高均德等屢經官兵在陝截殺遂由鐵鎖關竄入川境諭曰漢中西鄉一帶著責成秦承恩嚴密防堵毋又任賊匪折回陝境六月奏臣與王文雄剿淨棧西竄匪前赴漢中適川匪一股竄至南鄭之牟家壩臣等卽督率兵勇星夜渡江馳剿並密派將弁分路截擊殲

斃八百餘名生擒二十二名賊匪折回四川南江縣境見在陝境甯謚諭曰秦承恩奏截回川匪一摺據稱陝省見已無賊但漢中一帶毗連川省秦承恩等總當實力嚴堵尋由鳳縣剿阮正學股匪於城固之二郎壩殲斃多名匪衆竄入南江縣境諭曰甯沔一帶著責成秦承恩等實力防堵毋使川匪復又折竄陝境八月川省徐添德冉文儔高均德樊人傑各股賊匪由儀隴逃向廣元一帶又南江大河口亦有賊匪屯紮切近陝省南鄭甯羌沔縣等處諭曰陝省邊界前經降旨責成秦承恩等嚴密防守今竄逃至廣元南江一帶與南鄭甯羌沔縣接壤著秦承恩卽於南鄭緊要關隘深溝高壘嚴密堵禦設伏邀擊漢中一帶亦應列戍嚴防或設疑兵使之不能闌入七月賊匪李樹唐明等一萬數千衆由西鄉井泉子竄入頂甲山羅家溝一帶經總兵慶溥帶兵堵禦而首逆樊人傑龍紹周等由三花溝乘閒竄入與各賊匪分爲數股將官兵圍繞承恩偕王文雄馳至策應賊山荒田嘴翻山東逸又另股賊匪張漢潮由通江老林竄至城固天明寺躡淺過江經守江鄉勇截住餘衆向北山一帶竄逸承恩挑帶兵勇馳回漢中由西江探蹤迎截並咨恆瑞分兵會剿奏入上以併力殲擒毋得疏懈勅之十一月另股賊匪竄

入洋縣鐵冶河承恩由留壩江口平定關抄至盤屋二郎壩攔截之川省冉文偉一股又竄至通江小方山將近陝境承恩由五郎仍回漢中顧棧道門戶尋張漢潮由洵陽竄至楚北鄖西邊界經官兵折回鎮安又竄入豫境四年正月諭曰秦承恩在漢中一帶邊界堵禦並不能嚴密防範任賊往來奔竄卽如張漢潮一股賊匪係由漢中入陝復由陝至豫竟無兵勇阻截該撫有封疆之責咎實難辭著傳諭秦承恩務當督率兵勇實力防堵嗣後儻有賊匪闖入陝境惟秦承恩是問是月又諭秦承恩多病精神不能振作想伊才具本短又伊母病故心緒昏瞽陝西軍務緊要秦承恩不必署理巡撫著卽回籍守制二月張漢潮在鳳陽縣屬之唐藏地方屯紮官兵四面圍剿其東面爲承恩所派之遊擊蘇維龍防堵失利賊匪竄逸諭曰張漢潮屯聚唐藏地方時明亮興肇帶兵抄截南路吉蘭泰官信在西北二面圍逼其東路秦承恩派遊擊蘇維龍帶兵防堵是四面皆有官兵斷其去路正可於此地將漢潮擒獲乃蘇維龍一路失利賊首卽由東面突出失此機會殊爲可恨秦承恩自剿辦賊匪以來從未身親督率總係派人前往而所派者又多怯懦無能之員此次蘇維龍帶兵失利縱賊逃竄卽係秦承恩派委非人所

致朕聞上年賊匪逼近西安時焚掠村莊百姓受害者不下十餘萬秦承恩以防守省會爲名並不出城殺賊且平日官聲亦屬平常若僅令回籍守制無以示懲恆瑞著署陝甘總督卽著恆瑞將秦承恩革職拏解來京交軍機大臣會同刑部審訊四月諭曰秦承恩昨經解到令軍機大臣嚴訊其緊閉西安城門不准難民進城一節據供伊與王文雄總在軍營並未在西安城內居住直至三月初一日賊匪竄入南山興肇柯藩王文雄帶兵往南剿賊秦承恩始於是日辰刻進城本爲安撫百姓非因避賊次日仍卽出城赴王文雄軍營前此關閉城門係陸有仁台斐音在彼秦承恩到時始行開城聽民出入至西安城壕向來無水近郊百姓多已避進城內實無難民觸城投河之事秦承恩進城出城皆有日月可稽賊匪由盤屋向東合竄時距城較近係陸有仁台斐音在城內防守將城門關閉亦有確切證見秦承恩果否於初一日進城初二日卽赴王文雄軍營無難一詢而得著恆瑞永保馬慧裕就近翰問王文雄柯藩台斐音令其詳覈秦承恩供詞或虛或實逐一登答毋得稍有瞻徇尋經先後覆奏五月諭曰秦承恩自教匪滋事以來漫無調度玩誤機宜以致賊匪日久未能撲滅業經革職拏問交刑部審訊今

已訊明並據查詢覆奏雖無關閉城門安坐衙署致難民觸城投河之事但秦承恩身爲巡撫不能盡心辦賊玩誤稽延實有應得之罪著軍機會同刑部按律定擬具奏尋議奏承恩於留壩一帶正資堵剿之時僅委遊擊蘇維龍帶兵前往伊轉在漢中觀望實屬玩誤稽延照臨敵逗遛觀望失誤軍機律擬斬監候諭曰秦承恩照玩誤軍機律定擬斬監候因屬按律辦理但念秦承恩本係書生未嫻軍旅前此因有人奏參秦承恩關閉城門安坐衙署不納難民以致數萬百姓觸城投河而死嗣陸有仁到京曾面加詢問據稱實無其事因降旨詢問恆瑞永保王文雄柯藩台斐音今據伊等先後奏到衆口一詞與秦承恩所供日月俱屬符合是則秦承恩之咎止於不能辦賊著加恩釋放令其回籍守制閉門思過服闋後另行簡用五年諭曰秦承恩前已革職因伊母喪加恩令其回籍今已服闋豈可令其安居故里著發往伊犁效力贖罪七年二月期滿釋回到京上念其平日辦理地方事件尙爲熟悉亦並無操守不潔之處命以六部主事用遇缺卽補七月命充會典館纂修官八月奉旨以六品頂帶補授通永道十一月命以三品頂帶補授江西巡撫八年三月奏請將江西省帶徵漕糧分別起運酌留籌補倉穀節

省經費諭曰秦承恩係朕棄瑕錄用之人地方公事尤應實心經理乃於運京漕米並不籌辦妥協欲借以彌補倉廩殊爲取巧著傳旨申飭九月因前在陝西巡撫任內濫應軍需部議降五級調用奉旨改爲革職留任十一月奏廣昌邪匪賴達忠句結甯都州李步高石城縣廖幹周等聚衆滋事業經先時撲滅見將生擒各犯分別審辦諭曰此案爲首之賴達忠李步高廖幹周等雖均經殲斃其夥黨生擒者諒必不少卽可追究該匪等滋事根由固不可遇事搜求亦不可稍有疎縱是月又諭曰秦承恩自本月初七日奏到廣昌等處邪匪滋事經官兵撲滅一案迄今半月有餘未據續有奏報之摺殊不可解著傳旨申飭十二月以審明邪匪分別辦理地方甯謐入奏諭曰該撫於一月之內督率員弁兵勇將地方謀逆重案上緊拏獲不致釀成大事所辦尙爲妥速本應加恩賞還二品頂帶並交部議敘以獎其勞惟是該省遇有此等奸民在彼蠢動一經奏聞朕無不刻深懸念該撫前月初七日奏報大槩情形後而月以來驛遞杳然雖辦理完竣而奏報遲延其案內要犯經該撫率同臬司審訊明確又未將各首匪供詞繕錄隨摺進呈僅稱條錄各供咨部亦屬草率覈其功過僅足相抵是以此次未予恩施該撫惟

當奮勉辦公另圖報稱以期仰邀渥賚九年二月諭曰本年京察屆期江西巡撫秦承恩當該省匪徒廖幹周等滋擾時卽帶兵趕往督捕全數埽除特因其奏報遲延是以未卽加恩因念糾衆鉅案該撫能剋期辦竣其功足錄著賞給二品頂帶四月因袁州等幫重運糧船失風遲至一月之久具摺陳奏奉旨交部議處尋議革任上寬免之十年授左都御史仍暫署江西巡撫十一年五月授工部尙書六月調刑部尙書九月署直隸總督十二年江西巡撫金光悌奏巡撫衙門有未結詞訟六百九十五起奉旨秦承恩在該省巡撫任內最久著交部議處部議革任奉旨改爲革職留任十三年因刑部審擬宗室敏學逞兇一案有心開脫部議革職奉旨著加恩降爲編修在文穎館效力十四年三月擢司經局洗馬四月諭曰秦承恩服官年久資格較深上年在刑部尙書任內審辦宗室敏學一案未免有所瞻顧尙非過之大者昨已加恩擢用洗馬聞其患病在寓尙難卽痊著加恩賞給三品卿銜俟病痊候補尋卒子耀曾兵部候補員外郎念曾工部候補主事

景安

景安鈕祜祿氏滿洲鑲紅旗人乾隆二十七年由官學生考取內閣中書三十五

年補官三十八年升侍讀三十九年調顏料庫員外郎四十二年調戶部員外郎四十五年京察一等四十七年遷郎中四十八年二月京察一等八月授山西河東道五十一年遷甘肅按察使五十二年調河南按察使五十三年遷布政使五十六年四月調山西布政使六月調甘肅布政使十一月廓爾喀侵擾後藏命將軍福康安剿之諭景安辦理西甯至藏臺站十二月賞戴花翎五十七年經福康安奏留西藏委赴察木多催趨軍需尋調往濟隴督運糧餉五十八年正月賊平以親老乞回旗終養上允之擢工部右侍郎兼正藍旗滿洲副都統六月轉左侍郎七月調倉場侍郎五十九年六月調戶部右侍郎仍暫留倉場任八月回京兼正黃旗滿洲副都統公中佐領十月兼管光祿寺及右翼官學事務六十年授河南巡撫嘉慶元年五月湖北教匪滋事賊鋒偪河南命景安駐兵南陽防堵九月鍾祥逆匪姚之富等竄踞襄陽之雙溝西安將軍宗室恆瑞等帶兵追剿糧運不繼景安籌撥給軍上嘉其不分畛域賞加太子少保銜十二月賊匪窺鄧州時景安駐州南之魏家集兵僅四百賊衆六七千四面圍攻景安厲兵堅守以槍礮斃賊數十相持一晝夜得恆瑞等援兵圍始解諭曰景安帶兵僅四百名被六七千

賊衆層層圍裹幸而景安持以鎮定不使賊匪知官兵虛實用能堅守遏賊甚屬可嘉著賞御用元狐冠一頂金盒一箇大小荷包以示優獎二年二月奏訪聞浙川內鄉有教首王佐臣等與楚匪勾結謀應姚之富督兵親往搜捕殺賊千餘擒佐臣及賊目楊志才等復誅餘匪一百五十餘人諭曰浙川內鄉教匪夥黨景安能留心查察於逆匪未發之先豫行擒剿立就駢誅使湖北賊匪不能糾合滋擾厥功甚偉著賞戴雙眼花翎加封伯爵並賞寶石帶頭大小荷包以獎勲勞三月楚匪由信陽分竄確山羅山縣境景安派總兵王文雄往援羅山自詣確山迎剿敗賊於遂平驛又追之於舞陽時別股賊匪竄葉縣焚保安驛折回裕州參將德勝等被圍於四里店景安馳往應援文雄自羅山亦以師至兩路奮擊解其圍賊越山狂竄景安追至南召之李青店偵知桐柏泌陽兩縣有賊侵擾與文雄馳回防禦敗賊於裕州古石灘追奔三十餘里上以其調度有方獎賚之尋擢湖廣總督四月自豫帶兵二千餘名行抵荆門州遇賊衆二萬餘鋒甚銳因先據白雲山立營設伏山溝賊恃衆來犯我兵四面轟擊守備張霞舉等奮力壓剿始潰敗復有股匪由山溝抄襲景安與藩司高杞分路迎截伏兵突出賊潰四散追擊二十

餘里上以其設法布置能以少擊衆嘉之五月賊首張漢潮等於當陽積山寺負
嵎抗拒景安率馬隊擊之遁復邀嘉獎八月湖北被擾難民及上年被旱州縣
奏請分別給賑得旨允行四年正月上以張漢潮日久未獲嚴飭統兵大員於是
署陝甘總督恆瑞署陝西巡撫秦承恩奏賊匪張漢潮由南山竄至盤屋又西竄
鳳縣分兵三路相機迎擊景安亦奏張漢潮股匪遁赴五郎洋縣一帶已派總兵
王凱駐守鄖西以防折竄臣暫駐鄖陽適中之地以爲策應並據宜縣札會張漢
潮在石泉地方經官兵衝殺截爲兩股前股赴留壩鳳縣一帶明亮興肇至漢中
截擊後股由漢陰安康折回鎮安境內止有總兵關騰帶兵剿捕又成尾追之勢
臣卽馳赴鄖西邊境迎截諭曰恆瑞秦承恩奏南北兩路賊匪情形仍屬敷衍空
言景安所奏馳赴鄖西邊界迎剿竄匪全不切實張漢潮股匪前經竄入陝境五
郎洋縣一帶湖北鄖西邊界最關緊要乃景安遠駐鄖陽僅派令總兵王凱駐守
鄖西殊屬畏怯退避見在張漢潮已竄留壩一帶而後股賊匪復由安康折入鎮
安與鄖西境壤緊接景安祇知關騰兵又成尾追之勢殊不思伊從前節次帶兵
堵剿時惟事避賊而行賊至則移營他往賊去始遠躡賊蹤則并關騰尾追之不

若矣卽如此時伊果早至鄖西賊至正可迎截何待聞信後始行前往乎況前往與否尙未可知著嚴行申飭三月諭曰景安前在河南巡撫任內駐劄南陽一帶堵禦湖北教匪毫無布置一任闖入豫境又不敢迎頭截剿惟知遠避賊鋒尾隨探信粉飾奏報以圖塞責縱令賊匪由南陽一帶直出武關竄赴陝境其畏葸退縮於帶兵諸臣中爲尤甚以致有迎送之號朕所深知近聞其辦理撫恤一事並不查明戶口按名散給每縣止發銀一千兩祇儘此數不准多開所辦尤爲乖謬地方大吏安集招徠自應查明各處戶口實數分別辦理若一槩定以成數則流離較多之處必至口食無資而未被賊擾之區亦得濫支官項無怪乎小民失所官吏冒銷也景安係和珅族孫平日趨奉阿附每於奏報之便附寄信件稟承指使以爲有所倚恃既不能實力辦賊又不能加意撫民此時湖北地方甚關緊要未便再任貽誤著來京候旨是月上以景安平日常守尙屬謹飭命以伯爵前赴川省更換明興接辦軍需先是景安以參將廣福玩視機務肆行咆哮奏請枷責示衆俟軍務告竣發往伊犁充當苦差命經略大臣勒保查訊尋訊明景安在湖廣總督任令廣福總理營務嗣駐竹谿每得軍報不審虛實輒發兵甫行又撤回

廣福以調度乖方兵多私議屢諫不聽反詈之廣福亦抗詞相抵景安遂行誣劾諭曰景安因廣福直言稟阻卽行詈罵已失待屬員之體又復奏參枷號并請事竣充發實屬任性妄爲然此猶過之小者景安大罪在前任河南巡撫時於賊匪由鍾祥竄至豫省縱令逃逸以致蔓延數省至今未能殄滅是其恇懼畏賊捏報邀功種種玩誤厥罪甚重著革去伯爵發往伊犁效力贖罪十二月上召見領隊大臣惠齡據奏從前教匪在荆襄滋事屢經官兵剿辦僅餘三千餘人彼時景安任河南巡撫在南陽一帶駐守不肖實力防範協同剿捕致賊匪闖入豫境到處焚掠景安相距數十里並不發一兵救援以致賊匪直從武關奔竄陝省人數又復衆多鷓張日甚景安惟於無賊處躲避又賊去已遠始行尾隨遙送合省官民無不恨其縱賊且笑其懦怯諭曰若使景安能實力防堵協同領兵大員會合夾擊保障全豫早可剿辦淨盡何至延及此時尙未竣事是數年來賊匪蔓延數省糜費國帑八千餘萬焚燬民田廬舍不知凡幾赤子之橫遭鋒鏑者又不知凡幾實皆景安之畏蕙無能養癰貽患所致卽辦理浙川一案亦係完顏岱等早經辦妥景安攘爲己功據以入奏得邀伯爵之封是景安旣恇怯縱寇又復飾奏冒功

其罪實無可貸若僅予革職發往伊犁轉得在彼安坐置身事外何以爲封疆大
臣縱賊殃民者戒著傳諭保甯卽將景安鎖拏迅卽押解來京交刑部另行審擬
五年四月諭曰教匪滋事起於湖北至二年竄入豫境其時景安係河南巡撫帶
領兵勇甚多若能在豫省各要隘督率防禦則賊匪前有攔截亦不至肆行衝突
乃豫省惟慶成王文雄張文奇曾與賊接仗亦未能將賊截回而景安則一味畏
葸懦怯僅在南陽無賊地方駐守該處居民裹攜糧食迎犒官兵景安拒而不納
因此大失人心甚至該省文員將糧餉軍火豫備齊全聽候景安調遣而景安不
發一兵武員伏地跪求打仗景安亦安坐不顧通省文武員弁俱各心懷不平是
以民間遂稱景安爲迎送伯人人痛恨而賊匪轉利其在彼得以肆行奔竄賊至
之處豫省並無官兵阻攔遂由羅山南召等處竄至盧氏從武關闖入陝境秦承
恩又失於防堵任賊竄往興安越過漢江擾及川境適川匪王三槐徐添德等亦
從此勾結蔓延迄今四載有餘未能戡事勞師糜餉荼毒生靈實景安首先縱賊
所致前經降旨將景安拏交刑部治罪茲景安亦自知罪狀昭著無可置辯其所
供從前湖北教匪北竄時同王文雄帶兵迎剿一節彼時景安並未能趕上賊匪

及賊已入陝王文雄帶兵進剿而盧氏境內尚有餘匪屯聚景安不會同慶成等剿辦乃轉向內鄉躲避迨賊匪全出豫境二十日後方到盧氏總在賊後逗遛從未與賊接仗一次其恇怯避賊實百喙難辭至所供辦理浙川教匪係據完顏岱面稟該處有教匪潛匿伊親自帶兵前往查拏一節浙川教匪本係伏而未動自應密加防備斷無任意妄拏激之生變之理見今賊隊中裹脅之人方節次降旨令各軍營設法招撫豈有將祇係習教未經滋事者槩行殺戮乎況此案人犯已經完顏岱訊明辦理完結景安始行到彼輒敢張大其事誑稱帶兵一千餘名生擒首逆飾辭入奏致濫膺伯爵崇封其欺誑冒功之罪景安已自認不諱以上種種款蹟若不公同鞠訊明正其罪何以爲封疆大臣貽誤國事者戒著交大學士九卿嚴訊定擬八月奏擬斬決上加恩改緩七年諭曰景安前任河南巡撫不能堵禦賊匪致令延及川陝其罪甚重業經問擬重辟念其平日居官廉潔從寬監禁茲軍務告蒞著加恩釋放發往熱河充當披甲八年八月以六部筆帖式補用九月命往豫省河工交那彥寶等差遣委用十二月承挑引河工竣賞加主事銜九年三月衡工合龍以六部員外郎用五年授直隸承德府知府九月超遷山西

按察使十二月調直隸按察使十年擢陝西布政使旋調福建布政使十一年三月升江西巡撫五月調湖南巡撫十六年七月授內閣學士兼禮部侍郎銜十一月遷理藩院右侍郎兼鑲白旗漢軍副都統十七年五月調戶部左侍郎七月調刑部右侍郎十一月擢理藩院尙書兼正紅旗漢軍都統十八年九月充繙譯鄉試正考官十一月調都察院左都御史十九年閏二月充國史館副總裁官三月擢禮部尙書四月充繙譯會試正考官九月調戶部尙書十二月賜紫禁城騎馬二十年命偕倉場侍郎朱理前往甘肅查訊虧缺倉糧行抵涇州卽查知額徵短缺四千餘石又平涼固原隆德靜遠會甯各州縣皆有虧缺據實奏參二十一年正月訊明該省續虧百萬有奇命自總督以下各按銀數著追治罪尋酌擬追補章程五條奏入下軍機大臣議行十一月授內大臣二十三年充繙譯鄉試正考官二十四年仍賞加太子少保銜二十五年十月授領侍衛內大臣守護昌陵道光二年休致三年卒諭曰景安服官中外宣力有年因年老休致回京茲聞溘逝殊堪軫惜著加恩賞給尙書銜所有應得卹典該部察例具奏尋賜祭葬子潤德兵部侍郎自有傳恩德官郎中緣事革職

吳熊光

吳熊光江蘇昭文人乾隆三十七年由舉人考取中正榜以內閣中書用四十一年補官尋充軍機章京四十四年擢侍讀四十六年升刑部郎中四十九年遷山西道監察御史五十一年轉掌四川道監察御史五十四年擢工科給事中尋丁父憂五十七年服闋補戶科給事中尋轉戶科掌印給事中嘉慶元年擢鴻臚寺少卿二年四月遷通政司參議閏六月特賞三品卿銜隨同軍機大臣學習行走十二月授直隸布政使四年正月高宗純皇帝龍馭上賓熊光專摺瀝陳哀悃敦勸仁宗睿皇帝節哀上以其情詞真切合君臣之義諭嘉之三月擢河南巡撫時川陝楚教匪滋擾豫省西南兩面逼近寇氛熊光抵任卽馳赴盧氏督辦飭河北鎮總兵張文奇駐盧氏之欒莊南陽鎮總兵田永桐駐浙川之荆子關自駐適中之地以爲犄角四月陝西股匪張漢潮竄入商州境復分股西竄藍田熊光奏言張漢潮股匪係參贊明亮帶兵專剿今分爲兩股牽制官兵又探另有賊匪由洋縣五郎廳東竄是又在官兵之後尤恐明亮顧此失彼豫省官兵不能再行抽撥請將山東派赴川省兵丁一千三百餘名於道過陝州時截赴明亮軍營以資協

剿已密札張文奇先於邊境聲言見帶山東勁旅前赴堵剿以壯聲援諭曰昨因陝省兵力稍單已降旨將山東新調兵丁留陝應用並先廣爲宣布以懾賊膽吳熊光所見皆與昨旨相合可嘉之至又以湖北股匪張添倫竄至楊家牌樓距鄖陽江岸二百餘里豫省東南邊境在襄江北岸應密爲布置以期有備無患查直隸正定標營尙有挑備戰兵一千餘名可以調用已飛咨總督胡季堂密飭預備聽調疏入諭曰河南邊界緊要自當添兵防堵朕本有調用直隸官兵之意今吳熊光已咨胡季堂密飭豫備與朕意不謀而合深堪嘉許嗣以張添倫等股匪擾至湖北竹山竹谿熊光奏請將前調直隸官兵迅疾派往聽調如兵丁到豫可以無需或就近令赴楚省協剿上以熊光張皇侵越有意見長訓飭之五月奏言各股賊匪俱在漢江之南江北惟張漢潮一股須會集兵力先行撲滅是以前奏請將山東官兵截交明亮嗣以張漢祥擾及隴州將東省兵丁改赴鳳翔一帶茲聞張漢祥已竄回秦州應仍飭東省官兵徑赴明亮軍營廓清江北賊匪再移赴南岸併力剿辦諭曰吳熊光係河南守土之臣將本境防守事宜妥協經理使賊匪不能闖入卽爲盡職至豫省而外陝甘等處軍情朕與經略尙不能遙度吳熊光

乃奉行臆斷紛紛檄調儼然以軍機大臣自命欲分經略之權不知分量不曉事體著傳旨嚴行申飭尋奏報賊匪張漢潮由商州竄越分趨雒南商南境雒南與豫省盧氏接壤商南與浙川接壤飛飭張文奇田永桐分兵堵截均截退未闌入豫境又奏賊匪由陝境竄近里漫坪復由黃柏溝罐兒溝一帶翻山奔竄恐其直向東趨急分兵兜擊賊首張漢潮身受槍傷西竄回陝復飭將邊境餘匪搜捕淨盡疊奉諭旨嘉勉時東河總督吳墩議加河工稽料運費於地糧內攤徵熊光不加詳察與聯銜具奏下部嚴加議處尋議降調上加恩改爲留任七月特旨賞戴花翎尋奏言前飭南汝道陳鍾琛赴襄江一帶督同府縣提淨南岸船筏並調集鄧州鄉勇在沿江要隘防守復恐沿江道里長陳鍾琛一人照料難周隨令糧道完顏岱帶滿營兵前往協防仍飛咨山西將楚省前調官兵催令迅速前進又酌派壽春鎮兵五百名往樊城駐劄諭獎其籌畫皆合機宜摺內有楚省爲豫省南面保障爲楚卽以爲豫之語上尤嘉賞焉又以邊隘遼遠江防緊要請召募練兵五千名以資保障並以開封練勇一千一百餘名征防得力請作爲撫標新兵從之時有旨命副都統額勒亨額領盛京官兵赴楚剿賊八月復諭令盛京官兵

改道赴陝熊光奏言官兵頭起已行抵南陽若仍由樊城未免紆折應卽由鎮安前赴商州但軍需一切陝省一時不及備辦已於南陽貯備項下就近支發俾得迅速進行上以熊光能以國事爲重不稍拘泥諭獎其實心任事五年正月奏陳豫省西南兩路辦賊情形得旨嘉勉先是直隸總督胡季堂奏請將河南內黃縣改歸直隸管轄已下部議行三月熊光以河南全漕皆在內黃楚旺地方受兌若改歸直隸隔省呼應不靈恐誤兌運奏請仍歸河南從之四月楚北賊匪竄入均州擾及鄖縣將偷渡襄江豫省防江兵勇擊走之事聞上念河南兵力尙單特命直隸山東山西督撫各派官兵赴豫交熊光調撥又諭熊光添募鄉勇熊光奏言各省團練鄉勇惟鄖西之勇最爲壯健緣前此賊匪齊王氏等係鄖西鄉勇擊斃該縣民人恐賊復仇是以同心協力奮勇禦賊至豫省盧浙一帶從前原駐鄉勇萬餘名而賊股奔竄仍得游行自如因盧浙地方民鮮土著團練維艱所募鄉勇悉係鄖州之人旣去其鄉安望其勇凡應募者無非游手好閒之輩賊至先已潛逃轉使兵心爲之搖惑是以上年秋間奏明裁撤鄉勇添駐防兵半年以來賊匪未敢肆竄此設兵勝於駐勇之明驗也目下盧浙邊境地廣兵單所有直隸等省

官兵即可陸續到豫擬分撥鎮臣等帶領擇要駐守分投策應疏入報聞又以營兵張文忠等暴橫滋事鞠實即將首犯正法附從者論罪如律並自請議處上以熊光所辦能知輕重其失察處分特予寬免六月奏以豫省有餘馬匹分解湖北陝西軍營各三百匹又撥銀十萬兩解楚北二十萬兩解陝西俾資接濟諭獎其不分畛域得封疆大臣之體七月寶豐邾縣匪徒李傑楊士全等聽從賊首劉之協勾結倡亂經布政使馬慧裕在翟家樓率兵剿散潰匪竄至彭山熊光在盧氏防堵馳赴追捕先飭附近各屬分布壯勇於隘口設伏嚴守親督將弁四面兜截盡殲其衆劉之協遁至葉縣就獲伏誅事聞上嘉熊光調度合宜將士用命下部優敘時湖北賊匪折回鄖縣並竄至穀城均州熊光奏請敕令吉林黑龍江官兵赴楚進剿諭曰本日據姜晟奏到已諭令長齡將所帶吉林黑龍江官兵徑赴湖北剿賊吳熊光所奏適與朕旨脗合可嘉之至六年二月京察上以熊光防堵認真上年剿捕寶邾教匪辦理安速下部議敘三月以鎮平縣誤將秋審絞犯處斬熊光僅將應議職名歸入年終彙題本內開參並未專摺奏劾諭飭之四月擢湖廣總督會經額勒登保奏劾湖北巡撫倭什布遲誤軍糧等款命熊光傳旨逮

問倭什布卽逐細詳查熊光奏言湖北與豫省接壤該省從前文武廢弛臣在豫已有所聞其不給兵餉一節臣以督臣書麟旣經奏聞故未具奏今若不徹底根究何以儆官邪而靖地方惟是襄局雖總司收發而發給各營又另有糧員經手軍務未竣一時難以傳齊審訊容俟詳細密訪至倭什布不能約束家人亦有所聞並須密訪確切一體嚴參諭曰吳熊光身任封疆旣知楚省文武廢弛及倭什布不能約束家人不給兵餉等款卽不專摺奏參亦當於奏事之便附片密陳乃年來並無一字提及事已敗露始稱早有所聞殊非誠心爲國之道至所稱經手糧員一時難以傳訊所見甚是吳熊光唯當詳細密訪陸續奏參六月偕提督長齡巡撫全保奏言川匪湯思蛟劉朝選等逆擾近上龔青峰溝官兵於青峰溝范家壩等處連次殲擒甚夥又奏賊匪經官兵追至興山長房河一帶遁入老林官兵奮勇迎剿賊不能支分股北走欲乘虛闖入東湖地界官兵分道兜剿俘斬無算並槍傷黃號賊首張萬林殲斃白號賊首王正賢生擒僞總兵鄧起龍等多名賊大潰上以熊光雖未親身打仗但一切調度供支糧運經理妥協溫詔褒嘉並賞賚焉尋又以官兵在竹谿房縣一帶殲賊多名又在房縣興山一帶分路剿賊

生擒首逆崔宗和之姪連兒及僞總兵王冠軍殲其黨千人先後奏聞均有旨嘉獎十一月奏請移德安營守備駐隨州隨州營千總駐德安從之七年正月奏言楚北新設提督改移鄖陽鎮協應添兵三千五百名請卽以無業鄉勇補充可收駕輕就熟之效又得官爲鈴束不致流而爲匪所需千把外委等官卽以鄉勇首領內酌量拔補又言二竹房縣當添兵力以資駕馭擬在腹地各營酌量抽撥於房縣之上龔設守備一九道梁冷盤堦各設千總一竹山之官渡設守備一洪平吉陽關各設千總一竹谿之豐溪設守備一向家壩設千總一各駐兵有差均如所請行又奏報官兵搜剿邊境潛匿賊匪生擒首逆張泳壽之子得貴並將青號餘匪全行撲滅王愾賢曾芝秀等股匪折竄巴東經官兵截剿殲賊多名三月又以官兵追剿賊匪射中賊首曾芝秀殲斃賊首唐明萬先後奏聞均得旨嘉獎六月以樊人傑股匪埽除淨盡上嘉熊光督辦糧餉認真俾士馬飽騰所向克捷命下部議敘八月奏言寨勇習於戰鬪輕視官兵種種流弊不得不豫爲顧慮見派員分投督辦令將寨堡戶口器械逐一登記陽資其力以助此日之軍威實默挈其綱以弭將來之民患上躡其言十二月賊首崔宗和在武當山就俘復諭嘉之

尋以大功戡定川陝楚逆匪全數埽除賞加太子少保銜仍下部優敘八年正月
奏籌辦安插鄉勇應於大兵未撤以前酌量籌遣並知照各原籍地方官妥爲管
束毋致結隊擾民間二月奏言湖北等省教匪滋事所有叛產絕產前經奏准詳
查明晰或以安插鄉勇或以分給難民茲查湖北叛產絕產散在蒲圻等二十六
州縣按縣查覈多寡不齊肥磽異致如以本境之產分給本境鄉勇難民則囿於
方隅辦理不能畫一然以此屬之有餘撥補他屬之不足該民勇等移家就業未
獲受田之益先增遷徙之繁惟有勘明變價照賑卹之例列等給賞以資生計報
聞三月奏楚省兵餉月需銀十六七萬兩今將不得力之疲兵有業可歸之鄉勇
節加裁撤見在月需八萬兩有奇上以熊光能隨時撙節覈實支銷諭嘉之七月
請將提標後營守備移駐湖河鎮右營守備移駐樊城從之是月剿捕餘匪全竣
三省肅清諭曰吳熊光督率地方文武及堡寨人民幫同搜捕勤奮出力著交部
議敘尋奏都司麻光裕原帶施南鄉勇五百名隨征數年技藝嫻熟請卽飭光裕
帶赴巴東江北駐劄另立一營各給守糧一分設馬糧十二分作爲額外外委令
其管帶操演下部議行十二月奏劾湖南巡撫高杞違例調補湘潭縣知縣周凝

遠有意開脫未陽縣知縣熊維培及採買倉穀亦有情弊上命刑部侍郎賡音馳往察審並召高杞來京尋賡音覆奏查無舞弊營私之處止於辦理遲延將高杞議降一級高杞由湖南來京上詢以熊光近日辦事如何高杞奏稱熊光性情躁急接見屬員每加訶斥批稟書札往往措詞過當上復詢熊光操守高杞奏稱熊光操守實屬廉潔願以身家相保旋經戶部侍郎初彭齡奏參熊光得受沔陽州知州秦泰銀一萬兩每年收受匣費銀六萬兩又將資財送交伊戚李世望代爲營運三款上究問彭齡此語得自何人以高杞對復召見高杞詰問奏稱秦泰餽送一節係湖北通判魏耀所言得旨交湖北巡撫全保鹽政佶山據實查覆九年七月全保等奏熊光實無貪鄙劣蹟匣費久經裁革魏耀向高杞所言堅不承認將魏耀解京與高杞面質耀供秦泰餽送等語係高杞先問隨口迎合實無影響其匣費及李世望代爲營運三款高杞與彭齡彼此推諉各執一詞高杞彭齡耀皆獲譴特命軍機大臣傳諭熊光不可不返躬自省有則改之無則加勉並敕以文稟批答自有體制須平心辦事不可仍前躁妄十年六月調直隸總督九月上巡幸瀋陽熊光迎鑾賜黃馬褂時兩廣總督那彥成與廣東巡撫升任湖廣總督

百齡互相參訐又兩淮鹽政佶山奏湖北鄖陽等處官引滯銷潞私充斥上命熊光偕侍郎托津馳往湖北查辦十月調兩廣總督十一年正月以路臣國商船駛至廣東熊光未能詳查明確遽准開船回國下部議處尋有湖北試用知縣盧家元訐告熊光任湖廣總督時升調不公及此次審辦百齡家人有意從嚴巡撫瑚圖禮以聞上以盧家元越分瀆陳革職治罪如律九月直隸司書侵帑事覺將司書王麗南等論罪有差上以歷任藩司漠不經心嚴旨飭責惟熊光在藩司任無虛收總督時亦無失察特旨優獎十二年四月奏言粵東內洋海道遼闊舊設礮臺多不得力請撤去礮臺兵丁多備船隻又米艇在外洋不能得力只可留於內洋守禦請另造戰船資外洋巡緝得旨允行九月有船商金協順等裝載暹羅國貨物來粵貿易熊光因奏請禁內地民人代駕暹羅國船隻進口以杜弊端上是之特降敕諭知暹羅國王申明例禁又以舟師在仰船洲洋面追捕匪船獲賊目多名得旨嘉獎又請增設開平縣文武學額從之十月御史鄭士超奏粵東吏治廢弛上以熊光於海疆重地不加整頓飭之十三年正月奏陳粵東實在情形謂從來有海防而無海戰上是其言八月有英吉利夷日帶領兵船駛入內洋泊香

山縣屬雞頭洋面英兵三百名持兵擅入澳門分守礮臺九月熊光始行奏聞並言已飭令停止開艙派員曉諭俟英兵退出澳門方准起貨若再挨延卽封禁水路絕其糧食上以熊光究竟如何嚴切曉諭及見在作何準備全未奏及所辦太輒諭曰邊疆重地外夷竟敢心存覬覦飾詞嘗試不可稍示以弱此時如該國兵船業經退出則已如尙未退出卽著遴派曉事文武大員前往澳門嚴加詰責以天朝禁令綦嚴不容稍有越犯逐層曉諭義正詞嚴該英人自當畏懼凜遵仍當密速調派得力將弁統領水陸官兵整頓豫備一有不遵竟當統兵剿辦不可畏葸姑息此事於邊務夷情大有關係該督不此之慮而唯鯁鯁於數十萬稅銀往復籌計其於防備機宜全未辦及懦弱不知大體著傳旨嚴行申飭旋命軍機大臣將奏到英吉利國原稟繙譯進呈稟內措詞多不恭順上以熊光接閱英稟早當驅逐駁飭乃祇以虛文入告且具奏後英船曾否退去亦未據續行馳報詔責其糊塗懈怠敕將見在情形及如何密飭籌備速行奏聞十月奏英船尙在澳門挨延觀望詔飭熊光因循廢弛只知養尊處優全不以海疆爲重大負委任先降爲二品頂帶拔去花翎仍下部嚴議尋褫職命新任兩廣總督百齡查明實在情

形具奏十四年四月百齡奏言上年英兵抵澳時地方文武節次稟報吳熊光批令照常防範香山縣等請兵堵逐亦批以鎮靜不可張皇並未親往查辦英兵見無準備將兵船駛進虎門停泊黃埔又駕坐三板船至省城外停住求見總督懇代奏在澳寓居熊光總未見面該英兵欲向十三行裝取火食總兵黃飛鵬開礮轟斃英兵一名帶傷三名英兵卽行退回熊光檄兵防守並未攻擊及至恭宣諭旨英兵畏懼情願撤兵復求開艙熊光諭令全行退去始准貿易英兵陸續退至外洋諭曰此次英兵遇官兵開礮並不敢稍有抗拒及奉有嚴飭諭旨亦卽開帆遠去是尙知震懾天威無他伎倆設吳熊光於英兵登岸之初卽親往彈壓曉以大義一面派兵防守英人自必知所畏懼卽時退出庶足宣示國威吳熊光於此等事遲至月餘始行具奏既未親往查辦又不面詢斥逐雖開艙在兵退之後而許其開艙究在未退之先奏報既屬遲延辦理又形畏葸且屢次英人具稟及吳熊光批示並轟斃英兵等事俱未入奏亦屬含糊吳熊光由軍機章京蒙皇考高宗純皇帝不次超擢用至軍機大臣復經朕簡任三省總督非新進不曉事者可比乃種種錯謬實負委任吳熊光前已革職著拏交軍機大臣會同刑部審訊定

擬具奏尋遣戍伊犁十五年洋匪肅清上念熊光平日尙能辦事前在軍營亦屬出力此時巨盜殄除特命釋回以六部主事用十六年補兵部主事十八年請假回籍道光八年舉行戊子科鄉試熊光係乾隆戊子科舉人至鄉榜重逢疆吏以聞諭曰原任兵部主事吳熊光曾任督撫大員雖於兩廣總督任內獲咎事尙因公此時養疴在籍年近八旬適當蕊榜重逢洵屬藝林嘉瑞吳熊光著加恩賞給四品卿銜准其重赴鹿鳴筵宴以昭盛典十三年卒

宗室恆瑞

宗室恆瑞正白旗人由閒散宗室於乾隆二十七年授三等待衛二十八年升二等侍衛四十年升頭等侍衛四十一年以副都統銜赴藏辦事四十六年署鑲白旗漢軍副都統四十八年授熱河副都統五十一年擢福州將軍會奸民林爽文莊大田等糾衆攻陷鳳山縣臺灣告警福建督臣常青奏請添兵五十三年二月上命恆瑞挑選駐防滿兵一千名往剿隨以常青爲將軍授恆瑞爲參贊四月師抵廈門五月至臺灣同常青至鳳山南路剿賊出城不十里遇賊萬餘進擊兩次頗有斬獲因賊勢衆多請增調勁旅命以廣東杭州駐防滿兵三千名閩省兵二

千名粵省兵四千名及兩廣總督孫士毅挑備兵二千名益之旋奉諭曰常青年逾七十精神不能周到恆瑞又係年輕未曾更事之人殊不可恃因命陝甘總督福康安馳驛至熱河預備差遣六月恆瑞奏稱賊匪連次來犯官兵迎擊輒奔逸臣等料其詭計欲誘官兵深入卽繞出後路而鹽水港等處之賊自北趨郡必更肆無忌憚又據總兵柴大紀及派往鹽水港遊擊楊廷麟告急請援已派總兵魏大斌等前往並令確探笨港有無失事查鳳山之東港在鹿耳門左已爲賊占諸羅之笨港在鹿耳門右又爲賊擾則見在鹿耳門一口尤爲緊要至鹽水港在諸羅之南府城之北距府城僅五六十里今賊衆攻鹽水港固意在諸羅實卽覬覦府城臣等時時兼顧勢難輕進諭曰賊人狡詐故作窺伺府城實欲斷我糧道攻偪諸羅若諸羅有失則臺灣府城勢更孤懸該將軍等竟宜先往北路會同柴大紀並力擒渠或分兵鹽水港打通糧道此爲上策七月魏大斌兵至鹿仔港遇賊被圍把總麥逢春武成烈劉聯升等陣亡上以常青恆瑞調度失宜又參將瑚圖靈阿等自山豬毛翻山進攻南潭並不親往應援坐失事機飭之旋奏賊犯郡城擊卻之督兵進剿至南潭殲賊數百人因天晚路窄收兵諭曰常青恆瑞等屢次

俱稱遇雨路窄收兵而於莊大田是否尙在南潭並未提及實屬糊塗著嚴行申飭八月奏言軍中偶染暑溼病者十有三二賊匪聞知屢次來犯經臣等擊退見在各里莊歸業者千餘人或以官軍南向隱有所恃若遽舍南趨北恐賊乘閒竊發而附近各莊不無惶惑又奏魏大斌等沿途遇賊打仗適參將潘韜李隆領兵迎接力戰始抵諸羅見在仍被圍困臣等當派副將貴林蔡攀龍等由水路往援諭曰常青恆瑞以一人統兵前往北路一人駐守並非令一兵不留在府城營盤也有何可慮並不那移尺寸之地柴大紀被圍日久魏大斌又在圍城之中此時尙不親往救援豈徒以株守爲事耶先是上以常青恆瑞俱未經軍旅恆瑞身係宗室或存富貴習氣未能和協令督臣李侍堯據實覆奏並詢以伊二人能否辦理此事侍堯奏稱恆瑞深知以國事爲重與常青亦並無意見惟不能親援諸羅未免爲賊所綴可否於武臣中如海蘭察者令其前來會辦即可及早歲功時已命福康安爲將軍代常青並授海蘭察爲參贊大臣馳往臺灣恆瑞仍令參贊軍務是月貴林等兵至英莊遇賊陣亡蔡攀龍力戰抵諸羅傷亡大半恆瑞率兵往援被賊攔截收軍改由海路前進抵鹽水港逗遛不前十月奉旨解任來京嗣以

撫諭附近民人造冊投誠上閱其奏尙屬奮勉命與常青仍帶兵協剿恆瑞又奏賊占據情形上以恆瑞恆怯著福康安確切查參是月恆瑞率侍衛烏什哈達梁朝桂等敗賊於新店收復鹿仔港十一月福康安等率師抵鹿仔港恆瑞同海蘭察屢敗賊於興化店斗六門大里枝等處擒斬賊日劉懷清林茂林素等林爽文遁去十二月進取集集鋪至生番隘口諭曰官軍屢戰得勝已成破竹之勢恆瑞因人成事並非自能奮勇前進又福康安派鎮將等攻剿獨不派柴大紀蔡攀龍二人而於恆瑞擁兵不救之罪不但不加參劾且屢次聲敘戰功豫爲地步以示公正傳旨嚴飭著恆瑞來京福康安旋奏恆瑞前在鹽水港不能直達諸羅咎無可辭但打仗俱親身前往每日招撫村莊巡查營卡並未在營坐守及臣等自諸羅進兵恆瑞屢次向前殺賊海蘭察等皆所親見臣固不敢徇私袒庇亦不敢因係親誼故爲避嫌應請留於軍營效力贖罪諭內閣曰恆瑞觀望遷移及張大賊勢妄言惑聽本應軍前正法朕以彼時官軍剿賊尙未得手慮駭聽聞降旨令其回京乃福康安曲爲庇護又屢於摺內聲敘恆瑞帶兵打仗試思伊爲滿洲大臣衆皆打仗獨伊不打仗逃往何處乎又前因保寧補放伊犁將軍川省無熟悉番

情之人故將鄂輝調回成都而以常青仍爲福州將軍福康安具奏時尙未知保寧調伊犁之信何以欲將鄂輝仍留成都不過因恆瑞本係福州將軍希冀仍留原任之意豈能逃朕洞鑒乎著傳旨申飭恆瑞仍遵前旨革職來京交部治罪是福康安愛之實所以害之也五十二年恆瑞同海蘭察等緝獲林爽文於老衢崎二月同總兵穆克登阿等追擒莊大田及其母莊黃氏等四十餘名奏入得旨從優議敘三月諭曰福康安前抵鹿仔港未及三月卽擒獲首逆南北二路全境蕩平恆瑞從前妄請多兵幾至惑衆誤事不可不治罪此奏出自他人必當按律正法姑援議親之條從輕革職發往伊犁效力贖罪十月諭曰恆瑞在臺灣獲罪究爲公事起見尙可寬宥著加恩賞給副都統職銜作爲伊犁參贊大臣幫同保寧辦事五十四年授正黃旗漢軍都統定邊左副將軍五十五年正月調鑲黃旗漢軍都統八月調正白旗漢軍都統六十年八月補授綏遠城將軍九月調補西安將軍嘉慶元年正月湖北教匪滋事奉旨令恆瑞帶兵三千名會同湖廣總督畢沅湖北巡撫惠齡往剿二月恆瑞奏烏魯木齊都統永保入京陛見道出西安請暫留駐以資彈壓得旨永保曾經軍旅著同恆瑞帶兵剿賊三月恆瑞與興漢鎮

總兵文圖等破賊於竹山復其城獲賊首武明山翁叔原等上嘉其功交部議敘永保至軍營合兵由房縣進剿鬼谷子黑虎溝賊匪奔三里坪留文圖率兵圍守恆瑞同永保由吧峪五虎埡進至七里灣適總兵彭之年領兵至賊驚走渡二郎溝竄入保康東北之白雲寺大山官兵由黃連埡進攻四月抵黑龍溝又至東山長嶺賊奔喇吧洞上以三里坪賊經文圖剿淨而恆瑞等日久無功飭之恆瑞仍遵旨赴襄陽同河南巡撫景安等剿賊留文圖剿喇吧洞五月文圖剿喇吧洞賊盡以兵赴巴東恆瑞所留西安官兵亦撤至襄陽遂同頭等待衛明亮領兵由樊城進攻呂堰與景安等會合進剿屢敗賊於岳家溝劉家集斃賊二千餘人奏入上以賊首姚之富劉之協並未拏獲一人不值加恩恆瑞等務宜倍加奮勉勿使逸入棗陽隨州等處是時賊屯聚蔣家壩曲家灣一帶官兵進至王家岡離棗陽三十餘里與賊寨偪近恆瑞同明亮等設伏縱擊大敗之六月進攻蔣家壩曲家灣殲斃無算棗陽圍解旋移營董家岡賊僞呼投降潛抄官兵後路恆瑞等急以後兵爲前隊翻身迎擊適總兵德齡兵至擊退之賊匪竄回棗陽正東丫兒山與張家壩賊連營十餘里官兵併力窮追一晝夜破賊營十餘處斬三千餘人生擒

百餘人得旨獎敘賞金盒大小荷包七月自隨州梓山進剿至龍門山屢克之棗陽隨州宜城境內賊平蒙恩優獎八月自青獅嶺赴鍾祥與永保夾擊鄧家岡賊追至黑沙河大破之餘匪復奔雙溝連夜追擊焚其輒堡九月賊匪分爲兩路一由棗陽東竄唐縣一由白河西竄呂堰恆瑞同明亮等領兵西躡賊退踞葉家店進兵圍之斃賊數百生擒首逆姚之富之母郝氏孫姚幅金等移兵渡白河唐河剿辦棗陽東竄之賊十月以賊匪直奔倉臺未能剿截與永保同奉嚴飭賊匪旋奔唐縣漳鎮一帶恆瑞移營倉臺永保景安偪賊至唐河卽往策應賊向東南竄走十一月官兵四路並進破賊屯十餘處恆瑞身受槍矛傷特賞金盒大小荷包十二月進擊姚之富至彭家岡殲擒三百餘名二年正月惠齡等自槐樹岡破賊恆瑞聞礮聲引兵邀擊殺賊二千餘名追至七里岡時永保以玩賊革職解京并以恆瑞參贊失宜降旨令惠齡景安查奏尋覆奏恆瑞不辭勞瘁頗屬勇往因與永保隔營不能每事商議見在帶兵需人請同慶成舒亮留營自效諭曰恆瑞慶成舒亮因貽誤在前各知悔懼奮勉出力若能迅速蒞功不但可贖前愆並當酌量施恩隨賞給鑲玉如意一柄是後同惠齡等屢敗賊於趙家岡勝廠等處追至

劉家集與慶成協擒賊首劉起榮解京伏法有旨獎勵二月惠齡舒亮由長岡嶺襲賊於小阜街恆瑞慶成以馬隊繞賊前斃賊五百餘人躡至曾家店敗之於鄭家河又破之於新城生擒賊目李潮等及騎馬小兒一名詢知爲姚之富之孫戮之三月追賊至泰山寺賊聞風遁及之於洛陽店殺賊百餘人進偃温峽口其夜二更令軍士銜枚疾走四更抵賊所奮擊殺四百餘人生擒賊目劉順等五十九名次日進擊龍鳳溝用連環大礮轟擊賊驚亂忽一賊手執大旗招貼賊衆復聚恆瑞從隔岸發矢中其左眼隨策馬先渡官兵爭赴擒之搜得數珠銅佛自供稱韋成係姚之富僞都總師並擒姚爽等二十七名皆伏法奏至賞戴花翎賊匪旋翻山竄入豫境又分爲三股分竄商南山陽一帶四月恆瑞馳赴山陽剿辦第三股賊匪進至周家河賊退走山梁官兵仰攻追偃山嶺數重擒斬七百餘人忽聞賊首王廷詔李全等犯山陽縣城乃回兵磨溝口遇賊於十里鋪擊退之周家河賊亦爲荊州將軍興肇截殺西逸恆瑞由商州進剿適陝西巡撫秦承恩追剿西牛槽賊東竄迎擊於雙路河口擒斬六百餘人五月追賊至黃龍鋪適惠齡等亦至追擊至豬坪共斬首三十餘是月姚之富王廷詔李全三股賊匪仍合爲一處

由紫陽縣白馬石搶渡漢江恆瑞等坐遲緩縱賊奉嚴旨革去花翎六月恆瑞等緣漢江尾賊至西鄉遇雨六晝夜賊遂分路竄入川省恆瑞等由城口進次平官渡賊奔開縣與徐添德王三槐合夥擾及雲陽萬縣閏六月大兵至大涼山下賊千餘人踞山顛恆瑞同明亮等分兵五路登山克之又殲陳家山賊方正潮等賞玉喜字牌大小荷包賊匪復偪雲陽大兵至殲六七百人餘賊奔夔州香坪桂壩一帶追及於雙河口千總安慶張奇首先殺入賊隊恆瑞等乘之斃賊五百餘生擒唐之英等八十餘名七月進剿大甯賊匪於田家壩西牛槽壩楓木嶺等地方連敗之擒斬共二千餘名獲器械無算賊竄太平縣之白楊廟八月追至金竹坪賊乘夜奔亭子廟將掠官壩塘恆瑞等設伏以待賊至殲九百餘人生擒十一人時當陽逸賊竄入白河縣都統豐伸布等陣亡奉諭赴興安應援九月抵興安同慶成迎擊賊衆於張家灘旋由牛蹠嶺繞出賊前進至狗脊關馬鞍鋪蔣家坪奪獲賊營九處馬騾器物無算十月赴西鄉行次沙潭坎與土都司韓光澤破賊於神仙溝追至七里溝韓家壩復大破之賊北趨漢中又破之於白廟崖高峰溝凡三日殺賊二千餘人生擒王廷基等五百八十一名賞玉喜字牌大小荷包十一

月追賊於毛埡子進抵襄城遇賊黃沙鋪擊殲之是時賊首姚之富李全齊王氏等合股西奔連營二十餘里將渡漢江北竄恆瑞同慶成設伏新街子乘賊半渡擊之擒龔玉等六十餘名進至桑樹灣遇賊高均德恆瑞令帶領撒拉爾官兵之都司馬鍾麒假鄉勇旗號以誘賊而身率兵自山梁下壓慶成等分投策應賊衆披靡殲一千九百餘人生擒八百九十餘人蒙恩賞同慶成遵旨中甯羌州赴援保甯十二月抵回龍場賊首王廷詔等犯郡城擊斃其衆七八百人旋同總兵觀成等赴援營山賊分股迎拒短兵接戰都司鍾琪王名望等戰歿總兵富爾賽自城殺出賊潰圍始解三年正月賊目羅其清糾合土賊黃道李鄉約自營山將寇順慶恆瑞同慶成進攻簡家壩黃連埡芙蓉寺等處皆有斬獲因賊勢滋蔓欲俟四川總督勒保陝甘總督宜縣撥兵會剿諭曰恆瑞慶成節次剿賊名雖八百人其實婦女幼孩居半且勒保宜縣等正在會擊王三槐徐添德豈能分兵前來此時賊匪既在老林若能設法擒渠尙屬伊等之功儻防堵不嚴復有勾結惟伊二人是問二月賊奔蓬州恆瑞同觀祥邀擊之賊分隊撲儀隴縣城恆瑞督兵追殺至蕭家梁賊向東南大山竄逸旋以逗遛奉旨申飭四月賊從孫家梁衝突十餘

次經官兵截回進攻鯉魚嘴羅其清掘溝斷道恆瑞同觀祥繞出山溝奪賊卡三座殺五百餘人賊匪潛句冉文儔滋擾儀隴運道總兵朱射斗等由馬鞍場副將關聯升等由清風寺分路進剿恆瑞分兵斷磨盤井次日賊潰殲戮無算五月惠齡朱射斗等進攻李華寺冉文儔敗走恆瑞以兵繼之殲何家寨賊二百餘人旋聞陝匪龍紹周等由巴州竄至欲與羅冉二賊合官軍由雙路場迎擊又破之於楊家寨六月都統德楞泰追賊高均德至石人河飛咨恆瑞等迎擊共殲千餘人恆瑞仍同惠齡赴老林場剿龍冉二賊連撲賊卡二座進偃山梁槍礮齊發擒趙連等七十餘人牛馬五十餘頭進次黃泥坪與德楞泰會進偃至大神山高冉等賊連挈二萬餘人繇瓦五十里札木山腰爲死守計惠齡等進攻打石坡恆瑞等進攻喻家壩德楞泰由中路由大神山皆有斬獲賊連夜撲德楞泰恆瑞營盤擊卻之乘雪雨昏黑進擊殺賊千餘人七月賊紮筏將渡渠河德楞泰引兵進擊恆瑞同惠齡分兵攻香安坪土門壩賊忽從三板橋金家場鼓譟而來援兵擊敗之旋分三路進攻恆瑞一路殺賊三百餘人其東西二面爲惠齡德楞泰所破合兵攻馬鞍山射死戴翎賊目冉文富進攻龍鳳坪賊奔觀音崖分踞箕山南北潛抄

我軍後路大兵回擊伏兵自後掩殺賊二千餘人生擒何世官等一百餘人隨聞賊首徐添德樊人傑爲將軍富成所追竄至紫觀場與高均德合恆瑞同惠齡德楞泰督兵截剿連戰壁山廟土門鋪觀音寺轉戰至風洞鋪凡四晝夜殺賊四千餘人擒獲千餘人賊窮蹙竄郭家溝仍依羅其清屯聚徐添德逸去八月從插旗山追擊徐添德偪入古戰坪擒斬千餘人遂克鳳凰寺巢賊奔箕山九月攻克白崖寨駱寺橋又克黃泥坪陳家坪小篷寺等處進偪柏樹山仰山埡距箕山十餘里惠齡德楞泰直前攻破卡柵恆瑞從右山殺入合兵縱擊盡破箕山後二十餘里賊卡凡四晝夜殺賊數千人賊目羅其清李全王廷詔奔大鵬山十月恆瑞同惠齡德楞泰進圍大鵬山十一月克之恆瑞前赴陝西與宜縣秦承恩會剿賊目張漢潮十二月惠齡德楞泰生擒羅其清於巴州餘匪李全樊人傑竄西鄉恆瑞以不卽迎擊屢奉旨嚴飭四年正月命恆瑞署理陝甘總督印務尋以兵赴大巴山獲賊龍日哩又赴甯羌迎擊藍白號賊張應祥包正洪蕭掌櫃等二月賊由七盤關竄至黃壩驛官兵進抵大安驛賊轉竄廣元遁入略陽恆瑞進攻柳樹埡而寧羌又報賊目鮮大川將至恆瑞回兵駐大安驛賊竄南江將近南鄭邊卡乃馳

回青石關禦之三月奏請派員駐劄漢中督辦軍儲從之四月藍白兩號賊竄秦州恆瑞由太渠出菜子嶺派員分路堵剿賊竄兩當縱擊殺三百餘人適張漢潮阮學勝大隊賊匪自留壩廳至杜家坪急引兵迎擊賊竄唐藏一帶明亮等自鳳縣隰追上以明亮恆瑞在二逆之間腹背受敵恐兵力不敷諭令於寧夏或阿拉善回兵內酌量添調五月卸督篆卽領兵剿白號賊馳抵白馬關其地與川西龍安接壤隨分派將弁從花長溝杏紅溝並進冒雨掩擊殲三百餘人湖北義民首易萬里等設伏閭門口復殺賊百餘人投出難民二百餘人上嘉其能保障川西邊界敕部議敘白號賊尋北竄西和禮縣而藍號賊又從米倉山南竄將入川境恆瑞札令甘肅布政使廣厚總兵吉蘭泰北面截剿白號而兼程由賈家店黑馬關抄擊藍號上以恆瑞能不就易避難諭獎之六月進擊藍號賊於老柏樹殲九百餘人賞戴花翎藍號賊旋竄入川北南江縣恆瑞自鳳縣赴明亮所會剿張漢潮七月藍號賊折回陝境恆瑞赴南路截剿殺數百人賊匪五六百人復竄川北恆瑞仍回兵赴石泉順流抵迎風壩至城固洋縣賊從馬埡道越老林竄去九月追賊清水溝擒十餘人賊乘霧冒雨過三渡水逸去十月引兵斷龍王溝明亮興

肇兵亦至陣斬張漢潮擒賊日李潮時明亮興肇已有旨奪職訊問又以恆瑞前次捨藍號垂盡之賊竟回陝省顯係趨避且有得受餽送之事諭工部尙書邢彥成切實查參尋奏張逆竄三渡水係由大山陡崖下竄非三人堵截之路恆瑞棄藍賊回陝乃因陝甘總督松筠知會有咨文可據惟永保慶成前在楚省得受餽送恆瑞亦有染指到陝後有無此等情弊已移咨松筠查辦奏入上以不追藍號賊係接松筠知會尙非恆瑞之咎松筠調度失宜奉旨申飭十一月自五郎追擊張逆餘黨李得士等進抵大建溝遂入老林徑趨秦嶺與邢彥成合兵會剿冉學勝高遇春劉掌櫃等賊奔澇峪移兵兩岔河遏之十二月躡賊盤屋鄆縣多斬獲五年正月追至山陽東溝擒斬千餘人尋聞川匪二萬餘由略陽寇兩當徽縣恆瑞自襄城入棧迎剿賊衆北竄渡渭河至隴州清水秦安縣境恆瑞同邢彥成等躡追至汪家山分路奮擊大敗賊衆擒斬三千餘人又救出難民千餘上嘉之二月同總兵凝德等分路由秦安剿賊凝德遇賊陣亡參將以下死者五人恆瑞自伏羌赴援邢彥成適至合兵擊敗賊衆又敗之於龍泉溝深都堡時總兵多爾袞扎普等剿賊洵陽之岔河戰沒上以甘肅竄匪有六路官兵剿殺不少恆瑞一人

祇以那彥成係恆瑞之壻不宜暫離實係公中之私特諭恆瑞馳赴鎮安五郎等處剿賊三月引兵由秦州回抵唐藏楊開甲高均德等方擾南星等處又有賊數千犯草涼驛恆瑞留總兵觀祥防守領兵由藍田赴山商一帶剿賊諭曰恆瑞係西安將軍既知鳳縣鎮安有賊自應擇要進擊乃置之不顧惟知趕赴山商伊從前尙有款蹟在朕處存記未曾宣露原係責令自贖之意儻因循觀望必當重治其罪見在恆瑞自己早抵商州著將該處事宜專交國霖辦理卽帶兵自東而西立功自贖不得再有玩延四月奏臣於途次探聞冉學勝等二三萬人分竄洵陽又有劉天成龐國勝等勾結多日臣不敢拘泥前奏已改道由大山岔野坪趕赴鎮安率同柯藩等從矛坪青銅關前進不使闌入楚豫上以恆瑞並未與賊打仗敷衍入奏飭之恆瑞等兵抵兩河關賊復西竄追至大中溪抵紅崖石嘴敗之共斬三百餘人經略大臣額勒登保同那彥成赴五郎鎮安一帶分路並進恆瑞率總兵劉之仁等抄擊至竹凹山斃賊四百餘人生擒周遇順等一百三十餘人訊之賊目伍金柱等糾黨二三萬人將竄商雒恆瑞卽由山陽高壩店抄截適額勒登保同提督楊遇春等擊敗賊衆楊開甲張添倫辛聰等從米糧川竄逸恆瑞馳

抵漫川關令副將李天林等進擊遇賊伏被圍恆瑞率遊擊李朝龍等親往援之賊退走追至黃鶯鋪斬賊日羅貴等五百餘人賊分爲四五股逃竄我兵掩殺二十餘里至麓子關前後擒斬六百餘人賊西奔大小壩廟川上嘉恆瑞親身督戰賞給雲騎尉世職六月同總兵德忠以兵三千人駐守太渠唐藏一帶八月賊伍金柱高二馬五等出略陽竄出沔陽徑奔西鄉提督王文雄戰沒適恆瑞同副都統綸布春等往擊九月自紅椿壩追至大川石賊奔灘口爲楊遇春所敗斬伍金柱餘匪奔雙河溝口與徐添德合突撲我軍營盤擊卻之追至金河口賊已躡淺渡河斃其衆百餘人賊連夜從漁渡壩翻山遁入川境十一月諭曰恆瑞見在何處剿賊總未據實提及從前恆瑞奏報亦多粉飾或恆瑞染患疾病不能帶兵著額勒登保查奏十二月覆奏恆瑞久歷戎行節年辦賊尙屬認真見在西鄉鍾家溝堵截亦甚嚴密惟年近六旬本年四五月間患病時發時止精力難以支持應請令回至西安藉資彈壓得旨報可六年卒於任子烏勒興阿盛京城守尉次綱阿塔三等待衛兼五品廕生

呢瑪善

呢瑪善初由閑散隨征湖北邪匪授七品職銜嘉慶二年授藍翎侍衛三年殲斃黃號首逆齊王氏姚之富以功擢三等侍衛四年丁父憂襲騎都尉加一雲騎尉世職五年十月隨領隊大臣長齡剿高二馬五等股賊匪在陣受傷命以應升之缺升用十二月擢二等侍衛復隨長齡進剿青號首逆徐添德屢敗賊衆六年七月偕副將吉林泰剿添德逆黨張允壽於熊藏山呢瑪善先登山梁礮擊張逆斃之擢頭等侍衛八月陝西逸匪王山逼竹谿率遊擊王占鼈等夜撲賊營焚其巢殲戮無算十月搜捕楚境餘匪擒賊日廖大海陳士富及夥匪劉光義三十八人下部議敘七年六月擢湖北竹山協副將十月藍號首逆戴世傑竄施家溝參贊德楞泰圍之呢瑪善偕總兵馬瑜由山梁下擊斬戴逆擒僞元帥趙鑑賞戴花翎八年以搜剿陰峪河餘匪行走遲緩褫花翎九年川陝零匪圖竄入楚呢瑪善在竹谿縣界奮力防堵楚地肅清賞還花翎十年閏六月擢河南河北鎮總兵十一月調湖北鄖陽鎮總兵十七年傷疾作回旗調理十八年二月病痊命在頭等侍衛上行走三月授浙江衢州鎮總兵九月調河南南陽鎮總兵二十五年擢成都將軍道光元年雲南永北廳土司所屬野夷唐貴等糾衆滋事命呢瑪善赴滇進

剿旋經雲貴總督慶保剿平呢瑪善搜獲餘匪諭曰呢瑪善遵旨赴滇比到軍營雖已埽穴擒渠尙有零匪竄匿山谷該將軍不事貪功分派員弁入山搜捕深合機宜著加恩交部議敘並賞玉韞黃辮大小荷包二年以果洛克番賊叛調兵剿捕擒土目曲俊等五十五人殲斃甚衆賊平得旨嘉獎下部議敘四年卒諭曰成都將軍呢瑪善由侍衛出兵川陝楚三省洊升南陽鎮總兵朕御極後特畀以將軍重任前派辦雲南永北軍務迅速妥協甚爲出力平日整飭營伍控制番夷均能認真任事方謂得一有用良臣長資倚任遽爾長逝實深痛惜著加恩贈太子少保銜賞銀一千兩照將軍例賜卹到京之日准其入城治喪所有任內一切處分悉予開復應得卹典該部察例具奏尋賜祭葬予諡勤襄

賽沖阿

賽沖阿赫舍里氏滿洲正黃旗人乾隆四十年閏十月由藍翎長挑十五善射十一月襲雲騎尉世職四十六年授健銳營委署前鋒參領四十七年升副前鋒參領五十一年升前鋒參領五十二年七月臺灣逆匪林爽文滋事派隨將軍福康安往剿十二月攻克大埔尾大埔林各莊連夜進攻斗六門賞斐靈巴圖魯名號

臺灣平列後三十功臣中繪像紫光閣命儒臣製贊五十六年授委署翼長五十七年升翼長五十九年擢吉林副都統嘉慶二年五月調三姓副都統七月以川楚教匪滋事命領吉林官兵赴軍營協剿十月抵將軍明亮護軍統領德楞額泰軍營時張漢潮張世龍張世虎李潮張世爵阮學明等股匪竄至平利縣之曾家壩賽沖阿從德楞額泰抄擊殲獲多名又敗之於大寧縣之黑虎廟箭斃張世虎賊分股狂奔連敗之於繳子坪周家壩白沔峽等處均得旨嘉獎賞玉韞大小荷包十二月追剿齊王氏姚之富李全王廷詔張漢潮等股至寧羌州之羅村壩賽沖阿以吉林馬兵衝入賊隊往來擊射殲斃甚夥三年正月破襄陽白號首逆高均德於洋縣之金水鋪旋復躡賊至安子溝賊乘夜折回偷撲營卡賽沖阿與總兵達音泰帶兵從卡內躍出併力下壓殺賊千餘二月高逆與齊王氏姚之富合擾安康界官兵進至判官嶺賊於溝內以四五百人誘敵復於林內豫伏數千人併力抗拒賽沖阿率先衝壓敗之擒賊目馮大甲朱錫並射斃紅衣賊目二名三月齊王氏姚之富東竄山陽之石河鋪明亮德楞額泰由大路進剿賽沖阿馳至壩店截擊遂與明亮德楞額泰等三面夾攻至鄖西之三分河擒賊目王如美朱正聲等齊

王氏姚之富均投崖斃餘匪擒斬淨盡捷聞賞金鑲松石盒等物四月迎剿高均德股匪於華州之高塘五月敗之於洋縣之茅坪又敗之於關西溝六月賊遁入川境時阮正通龍紹周龔建徐萬富唐大信等股屯踞南江之長池壩高逆與合賽冲阿隨德楞泰沿途追剿各賊俱奔至渠縣之大神山又與通江藍號首逆冉文儔合七月攻克大神山賊巢賊衆竄至營山縣箕山據各險隘與巴州白號首逆羅其清互爲聲援九月隨德楞泰分路進攻奪賊卡七賊寨六各股匪均潰直攻箕山賊巢克之羅其清退踞大鵬山十月攻克大鵬山賊復退踞青觀山十二月再克青觀山賊衆剿殺無遺擒羅其清及其子永福弟其秀其書冉文儔於攻破箕山時遁通江之麻壩寨移師剿之賊以除夕玩不設備賽冲阿隨德楞泰連夜進攻擒文儔及苟文玉等四年四月敗徐添德股匪於旗桿山六月敗張添倫股匪於修溪壩七月偵知線號龔文玉股匪屯踞夔州交界之八石坪與德楞泰分路進攻立破賊寨追至楚省竹谿之大禾田擒文玉及其家屬十月擊高家營股匪於大市川陣斃僞元帥曹明魁擒首逆高均德及其叔高成傑僞元帥王臨高僞先鋒閻慎卿閻慎雄秦學順等又於大安邦截剿張士虎股匪擒傳教首逆

劉學仁並殲土虎十一月殲白號賊首張金魁於空水河擒僞總兵符曰明僞先鋒王佐魁及耿向榮等於野人村十二月追剿苟文明鮮大川股匪於貓兒梁馬家營等處五年正月白號高家營青號戴家營各股由陝西竄入甘境隨德楞泰馳赴秦州會剿時藍號首逆冉添元合黃號徐萬富青號汪瀛線號陳得俸白號張子聰雷世旺度向瑤等乘閒由定遠搶渡嘉陵江分擾南部鹽亭西充各縣境復隨德楞泰回川剿之二月抵江油之新店賊分四路馬步各數千迎敵我軍亦分路並進乘勝衝入賊巢賽冲阿及副都統溫春深入被圍相持二時德楞泰往援內外夾攻圍始解生擒陳得俸箭斃冉添恆冉添元負創逸已而添元及僞總兵鮮其順俱就擒疊奉恩旨敍功三月大破賊於李家坪石門寨等處俘斬僞總兵李斌僞先鋒董廷華等四月賊竄渡潼河犯蓬溪縣圍成谷太和仁和仁義等民寨偕溫春往援連戰殲斃僞元帥雷世旺擒僞總兵吳學周等四寨圍解又分兵疊敗賊於中江縣境潼河兩岸肅清六月破冉添泗王士虎於江南之長池壩擒賊目鮮中青旗手周才掄探馬頭趙大成甘品玉等七月破鮮大川苟文明於岳池之新場殲僞總兵吳耀國僞先鋒鮮文炳擒賊目苟文禮劉照崇旗手張文

元苟文經王綬等八月擢固原提督諭曰此時川省各股賊匪勢已窮蹙軍威大振著德楞泰卽令賽沖阿速赴西鄉會同綸布春專辦高二馬五戴家營各股賊匪尋德楞泰奏稱臣一路官兵惟吉林索倫馬隊最爲得力吉林兵向交賽沖阿管帶已越三年該提督深得兵心人皆用命且東三省人之性情最爲忠直一經悅服終始不移昨聞賽沖阿授爲提督吉林兵無不同聲歡舞及聞其須赴西鄉卽紛紛至臣處環跪祈留實難驟離但賽沖阿係固原提督不便久留川省一俟川省肅清卽當權其緩急臣德楞泰或與賽沖阿同去或先令其赴陝上從之九月白號賊趙麻花與老林賊王珊合夥向陝境奔竄隨德楞泰由江口截剿至雲陽殲趙麻花於寒池壩殲王珊於濫泥溝餘匪淨盡十一月偵白號楊開第藍號李炳黃號齊國謨等賊向巴州南亞場一帶東竄馳赴觀音河截之擒李炳之子李朝坤僞總兵王得江陳文及楊開第之師余國明僞副元帥馮中謨尋隨德楞泰赴陝剿辦漢江南岸之賊德楞泰奏固原提督賽沖阿向隨臣一路帶兵剿賊刻下已入陝境查固原提督印信見經慶成署理此時慶成若將印信交出必致呼應不靈賽沖阿平日極爲衆心悅服打仗甚屬奮勉一易生手恐致兩無裨益

請仍令隨同前往剿辦俾得易於集事上如所請六年正月追剿高二於山陽之乾溝擒傳教賊目龔如一殲僞元帥閻慎珍賊奔竄追至鎮安之野豬坪高二就戮擒先鋒王儒等豐奉旨交部議敘三月敗唐明萬李顯必於和岡溪追抵黃花廟賊夜撲副將李應貴遊擊馬元營賽沖阿帶兵往援賊敗潰四月白號徐添德合藍號陳朝觀白號曾芝秀黃號樊人傑等股西竄屯踞白河縣黃石板德楞泰與賽沖阿分路進剿擒僞元帥龐士應及僞總兵古文魁蒲子榮陳添貴等首逆陳朝觀逸去尋亦就縛五月偕溫春兵至甯陝之兩河口獲徐添德樊人傑家屬添德竄紫陽之仁河新灘賽沖阿等自後蹙之添德溺斃餘黨俘馘無算上以賽沖阿奮力追剿窮賊所向實屬可嘉賞玉鞞大小荷包並下部優敘六月授西安將軍七月偕德楞泰截剿黃號賊首龍紹周於湖北之竹谿等處屢殲賊匪龍逆挈其黨折竄蜀之開萬又走楚之興房賽沖阿等帶馬隊窮追先俘其妻子復殲其兄弟紹華紹海並其大小頭目龍逆勢蹙遂由楚入陝與蕭四餘匪合竄十月賽沖阿偕溫春等追至平利之岳家坪乘雨雪迷漫縱兵衝蹋陣斃龍逆全股賊匪殲盡蕭四餘匪一併掃除捷入上嘉賽沖阿功績賞騎都尉世職並海龍馬褂

以示獎勵十一月截擊劉朝選股匪於東鄉之土黃壩獲其家屬十二月敗之於奉節大甯交界之桃木灣乾溝葛山一帶七年正月又敗之於潘字槽獲度向瑤之子度文正姪選正朝選與其黨十餘人逸去諭曰賽沖阿雖未能將首逆生擒而全股賊匪業已剿洗無遺所辦尙好加恩交部議敘二月敗白號宋國品於梁山縣之柏林槽又敗青白號零匪於東鄉之袁家壩擒賊首席尙文時總督勒保分派將弁於大竹鄰水一帶追剿陳自得股匪賽沖阿兵抄出賊前夾擊大破之得旨嘉獎賞玉韞荷包尋調甯夏將軍三月偕德楞泰赴楚剿辦黃號樊人傑藍號蒲添寶等股匪四月敗樊逆於雞公山梁及譚家廟等處又攻克蒲逆於大壩口六月樊逆敗竄平口河腦賽沖阿由黃茅壩自上壓下樊逆投河死殲其弟人禮子樊龍樊虎八月蒲逆竄入老山內瓦屋溝潛匿與德楞泰分兵搜捕蒲逆墜崖斃盡殲餘匪九月經略額勒登保以安平一帶營卡緊要調賽沖阿來陝駐紮太平河防剿川楚邊境十二月大功告成諭曰賽沖阿自隨征以來在諸將中勇略尤著節次殲擒首夥各逆爲數較多著賞加輕車都尉世職九年正月調西安將軍時零匪苟朝九等竄匿南山德楞泰督兵搜捕賽沖阿請馳往幫辦諭曰苟

朝九之外惟閻俊烈所剿之賊人數稍多該副將部下兵丁恐形單弱德楞泰聲威素壯自無須賽沖阿前往著卽赴閻俊烈一路幫同剿捕旋因苟朝九與閻俊烈所剿之賊合賽沖阿亦卽馳赴德楞泰軍營命嗣後有會奏事件賽沖阿列名在德楞泰之後四月以雨阻滯賊匪竄入老山官兵不能前進諭曰官兵不能洵渡何以賊匪又能冒雨狂奔似此日復一日老師糜餉何所底止著傳旨申飭五月奏報進剿情形諭曰連日分兵探剿不過殺賊一名生擒被擄人民十名賊匪除二百三四十人外又新擄一二百人似此裹脅日增何時始能辦竣此而不加黜罰何以肅軍紀而勵戎行賽沖阿係西安將軍早經派令在德楞泰軍營幫辦剿賊且係聯銜奏事之員非專聽調遣鎮將可比其獲咎亦重賽沖阿前賞輕車都尉世職著降爲騎都尉並拔去花翎以示薄懲八月奏殲斃苟逆等餘匪潰散賞還花翎並輕車都尉世職九月奏報餘氛掃蕩三省全功告成下部議敘十年十月調廣州將軍十一年正月洋盜蔡牽竄入臺灣句結嘉義鳳山兩路羽黨南北滋擾命賽沖阿爲欽差大臣馳往督辦提督李長庚以下均受節制二月行抵廈門奏報蔡逆經官兵剿敗逃出鹿耳門李長庚見帶領兵船追捕諭曰賽沖阿

不諳水師調撥衝涉皆非所長不可希圖立功親自出洋督剿惟當於陸路一帶將南北勾結餘匪悉數殲擒絕其黨與至蔡逆逃往南路鳳山一帶或又思勾結岸匪乘閒滋擾著賽沖阿隨時留意嚴密防範三月行抵臺灣奏鳳山縣城經愛新阿收復嘉義縣鹽水港一帶之賊經許文謨痛加剿洗此時蔡逆北竄餘匪奔逃南北兩路並無成股之賊所有前調之兩粵及福州駐防兵已移咨各督撫將軍飛行停止又奏將蔡安國所帶水師兵四五百人令其隨李長庚聽候調遣並將帶到官兵派撥鳳山大穆降分防及知會許文謨如果須添兵力再行隨時撥往上嘉其明白曉事所辦俱是尋調福州將軍諭曰前因廣東地方緊要曾降旨將各該省陸路鎮協各營均受廣州將軍賽沖阿節制聞省見有剿捕事宜所有陸路鎮協各營應如何交該將軍統轄之處著兵部議奏尋議上得旨除督撫提三標各有專轄外其陸路各營協均歸將軍統轄所有臺灣一鎮遠隔重洋自本年爲始令將軍總督巡撫及水師陸路兩提督輪往查閱營伍事竣奏聞七月蔡逆竄入鹿耳門洋面遊奕賽沖阿分飭鎮將布置堵剿四面合圍攻擊獲其船十沈其船十一擒賊目林略傅琛夥匪二百餘名擊斃淹斃賊匪共一千六七百名

獲旗幟器械無算並擊翻蔡逆坐船奏入上以賽沖阿雖未出洋督剿一切調度得宜運籌制勝實堪嘉獎下部優敘賞翎管扳指荷包十二年二月奏請移建鳳山縣城於舊縣興隆里從之四月奏臺灣水陸肅清留防兵丁三千餘名分作三起內渡頭起卽配船內渡二三起仍俟四五月間洋面實在安靜再統帶內渡諭曰蔡逆竄入粵洋李長庚追蹤剿捕尙未就擒而朱瀆一犯勢頗鴟張竄到粵屬廣澳洋面游奕去閩粵交界之南澳不遠恐其乘機竄閩窺伺臺灣著賽沖阿酌量情形如頭起征兵實已配船內渡自不必復行截回其二三起征兵卽應留於臺郡分布防守該將軍尤不可遽行內渡須探明蔡牽就擒朱瀆遠竄臺灣可以放心再行酌量內渡務宜妥協經理勿負委任九月奏報官兵剿敗朱瀆於雞籠洋面得旨嘉獎十三年正月總督阿林保奏蔡朱二逆均已窮蹙臺灣地方早經清謐可無須將軍大員在彼督辦命賽沖阿回將軍本任三月奏近年官兵出洋捕盜每因船身低小難於仰攻應酌量變通請將應行造補梭船十七號裁汰改造二丈三四尺梁頭大船八隻其應小修之善字號船屢經駕駛損動過多請照大修例辦理命如所請六月福建提督張見陞剿捕朱瀆遷延貽誤上褫見陞職

命賽沖阿會同巡撫張師誠審訊論擬如律九月奏稱福州滿洲營水師旗營修械需費並操演賞項不敷酌議籌款生息幼丁隨營操演酌量按月給銀諭曰福州駐防八旗及水師營額設軍械旣因貯存日久未能整齊如式准其於藩庫存貯旗營馬價內動撥銀二萬兩發交鹽商生息所有應行修理改造器械需用銀兩卽於此項內動支餘銀仍著歸還馬價原款其操賞一項亦應於息銀籌撥還額至官兵出口買馬及尋常差使例借公項不敷盤費自應於生息項下酌量動用惟所稱幼丁隨衆操演每名每月酌給銀三錢之處殊屬取巧市惠幼丁隨衆操演預備將來編隸營伍卽技藝嫻熟亦不過量加獎賞若技藝生疎並不必加之懲責原以該幼丁係屬閒散與入伍食糧者不同今若每名每月槩予銀三錢是又爲幼丁增添錢糧恐滋冒濫此一節著不准行十四年三月調西安將軍十二月調吉林將軍十五年以局員薩音保等淨收十四年分濩餘銀兩未能查明奏參又私裁卡倫亦未能及早查出偕副都統玉衡自請交部嚴議部議降三級調用上加恩改爲降四級留任十六年年班入覲奏途次見逃荒民人詢係奉天所屬岫巖復州等處歉收等戶因札致吉林副都統松霖將災民暫且安撫請於

雜項下動支銀兩先行煮賑兩月適松霖奏報近有奉天流徙饑民潛越入境見飭各員妥爲驅逐諭曰本年奉省復州等處歉收饑民流徙前賽沖阿曾奏明札致松霖於該處煮賑妥爲安撫今松霖以流民例禁出邊飭將饑民槩行驅逐各災黎已離故土今復遭驅逐嚴冬匝寒凍餒無依豈竟聽其輾轉溝壑莫爲軫恤所奏錯謬矣著松霖將各饑民照賽沖阿所奏暫爲安頓督同地方官查明戶口分設粥廠妥爲照料十七年正月賞紫禁城騎馬三月三姓副都統果勒明阿奏請三姓濩場加增濩餘銀兩所賞船隻官爲修理上命賽沖阿議奏尋奏三姓濩斤向皆送至吉林由將軍彙總辦理並無另有濩餘費用卽如官船係業經賞給該官兵之物每年黏補自不應動用官項命照所議辦理四月諭曰八旗生齒日繁京城各佐領下戶口日增因思東三省原係國家根本之地而吉林土膏沃衍地廣人稀聞近來柳邊外採濩山場日漸移遠其間空曠之地不下千有餘里著賽沖阿松霖查明吉林地方自柳邊外至採濩山場其間道里共有若干可將濩場界址移若干里悉數開墾自此之外所有閒曠之地計可分贍旗人若干戶一併詳細妥議具奏十一月覆奏勘得拉林東北有閒荒一處可墾五千餘晌又有

東北夾信子溝一處可墾二萬餘晌該兩處距阿勒楚喀城四五十里不等恐新駐旗人該副都統難以約束且近年吉林各處收成不豐請俟三五年後從容辦理又奏三道卡薩里閒荒地畝請撥補吉林官莊壯丁除撥給外其餘閒荒不許旗民侵占每年秋收後令該管官親往查勘以杜私墾諭曰今既勘明拉林附近有可墾地二萬五千餘晌而三道卡薩里地方仍有閒荒可墾是該省未經墾種曠土甚多與其每年派人查管何如一併籌畫至拉林荒地離城雖有四五十里移駐旗人耕作與按期演習騎射者不同亦不必專在近郊若謂該處近年收成不豐此時原不能即將旗人移駐其一切墾荒計畝章程則須預爲籌畫不必延至三五年後推諉時日著該將軍卽檢查乾隆年間移駐舊案先期試墾應辦各事宜先行籌議十八年四月調成都將軍九月教匪李文成據滑縣滋事十一月官軍敗賊於司寨李文成伏誅大兵旋復滑縣盡殲賊衆十九年正月諭曰此次調赴軍營之吉林官兵將司寨地方賊匪殲除及至滑縣攻城殺賊實屬奮勇可嘉皆由該將軍副都統平日訓練有方所致賽沖阿雖經調赴成都但離吉林未久著一並交部議敘是月陝西南山木廂匪徒經官兵剿敗竄至洋縣滋擾賽沖

阿以洋縣與川省通江接界檄調官兵二千名赴陝省會剿並續派兵五百名交總兵桂涵分撥要隘防堵奏入諭曰賽沖阿既入陝境無論何股賊匪探知相距不遠卽迅速前往捕滅切勿得一勝仗任聽餘匪竄匿又滋裹脅尋奏稱行抵木竹壩賊匪由老漁壩竄至督兵進剿擒青號僞元帥楊榮僞先鋒孫應才李定興及大小頭目十五名殲獲賊匪五百名又於太陽灘剿殺賊匪四十餘名二月在漢江北岸擒紅號首逆羅懷又奏報剿除青藍紅綠四號股匪陣斃首逆苗小一上以其保障東南加封二等男賞戴雙眼花翎三月奏報南山老林內外漢江南北兩岸全行肅清四月涼山生番出巢焚掠命馳赴督辦五月奏稱官兵殲斃爲首兇夷畢格等夷匪旋平得旨嘉獎二十一年正月成都兵丁孫占鼈等因挾私忿糾衆逞兇乘夜赴府縣衙署縱火賽沖阿聞知持以鎮定分派兵役看守倉庫監獄軍裝火藥次日城門照常啟閉市廛安堵先後將首夥十六犯全數拏獲賽沖阿自請嚴議上加恩寬免三月廓爾喀與披楞交兵稟請救援駐藏大臣奏聞命賽沖阿爲欽差大臣帶兵赴藏諭曰命汝帶兵至藏總爲嚴防邊界斷勿協助廓爾喀若披楞擾及藏地邊界必應痛剿驅逐切勿貪功窮追若廓爾喀王子情

急本身來投亦可收留妥爲安插嚴堵披楞勿令闖入若兩處講和罷兵汝卽回成都也並諭至藏時以奉旨詢問達賴喇嘛呼畢勒罕爲名切勿宣露帶兵衛邊之意四月奏稱廓爾喀披楞交兵瀆稟先行持檄詰責隨帶兵前越邊境脅以兵威諭曰所奏實屬妄誕紕繆之至此次賽沖阿帶兵赴藏原爲嚴防邊界並令該將軍到藏以奉旨詢問達賴喇嘛呼畢勒罕爲名不可稍露風聲乃賽沖阿竟不欽遵辦理輒首先出名將讓路阻貢之詞分馳二檄詰責廓爾喀披楞其詰責廓爾喀之詞已屬糊塗至詰責披楞其謬妄更出情理之外如披楞接到檄諭該國王以讓路阻貢之言係廓爾喀捏稟懇請天朝發兵其將何以應之若恃其險遠竟承認伊向廓爾喀曾有是言又豈能因此一言卽大興師旅窮兵黷武乎至廓爾喀屢次投稟請兵請賞今接到檄文卽回稟以前次屢稟駐藏大臣未蒙轉奏今聞大皇帝特差將軍帶兵前來感恩歡喜其讓路阻貢之言實係披楞所說懇請天朝發兵萬里遠征國家何爲出此若如賽沖阿所言我兵兩路進擣陽布檄飭披楞攻其南面則廓爾喀臣順多年不恤其難轉率同外夷夾攻其地堂堂天朝大體安在賽沖阿此舉首鼠兩端進退無據看來伊因朕派令赴藏妄起貪功

之念欲構成邊釁以邀爵賞而置國家大局於不顧是誠何心太不度德量力矣況如此重大軍情不待奏聞先行馳檄專擅之咎亦無可辭賽沖阿著傳旨嚴行申飭先拔去雙眼花翎降爲二品頂帶九月奏稱廓爾喀王專遣噶箕恭進表貢披楞部長頭人遵檄稟覆見在兩國講和邊界清謐遵旨撤兵回川上加恩賞還雙眼花翎頭品頂帶二十二年六月授正白旗漢軍都統命在御前大臣上學習行走七月授鑲黃旗領侍衛內大臣二十三年八月頭等侍衛扎蘭保呈控琿春協領扎呼岱私出小票向人海民人索贓於密扎安起地方招引民人蓋房墾地又於頭道溝等處令民人設園種澆並折磨兵丁等款命賽沖阿馳往審訊尋訊明扎蘭保因勒索不遂砌款控告其所控扎呼岱招引良人蓋房墾地設園種澆等款屬虛惟因公科斂役使兵丁訊實各按律問擬有差九月授盛京將軍十一月奏請盛京添設總管及增給佐領圖記諭曰盛京宮殿一應事宜向係將軍兼管內務府大臣總司其事自國初以來相沿已久賽沖阿率請照熱河之例添設總管一員熱河係屬園亭與盛京宮殿規制不同該將軍此奏明係意存推諉所請俱不准行十二月奏請添設圍場官兵下部議駁諭曰盛京圍場與木蘭歲歲

臨幸者不同賽沖阿前奏未免過事鋪張其所請專設協領及關防處官員兵丁等款著照部議不准添設二十四年九月授理藩院尙書兼鑲黃旗領侍衛內大臣正紅旗滿洲都統御前大臣十月命管理雍和宮事務二十五年七月賞用紫韁八月賞加太子少保銜道光元年管理咸安宮蒙古學唐古忒學托忒學二月授西安將軍仍兼御前大臣領侍衛內大臣三年三月奏稱西安所管營伍額存軍器因年久動用多有遺失損壞請做照吉林槍式製造長矛鳥槍五百桿及撒袋弓箭等項俾軍器一律堅利齊整上是之八月萬壽聖節列十五老臣中繪圖於萬壽山之玉瀾堂御製詩有屢膺廟略成偉績宣威重鎮知鷹揚之句四年六月詔來京供職閏七月授鑲藍旗蒙古都統八月授內大臣十二月授閱兵大臣五年五月授總譜達七月授鑲黃旗領侍衛內大臣十二月以年老上加恩賞乘轎六年正月管理健銳營事務尋諭曰賽沖阿年逾七旬毋庸在御前大臣領侍衛內大臣上行走著專管旗營事務並賞給內大臣二月署鑲紅旗滿洲都統九月署正黃旗蒙古都統七年調正紅旗滿洲都統八年三月調正黃旗蒙古都統六月因病奏請開缺得旨仍留內大臣總譜達是月卒命大阿哥前往賜奠贈太

子太師予諡襄勤子額圖璋原任三等侍衛孫特克慎襲一等男爵緣事革薩克慎前任戶部員外郎曾孫清福襲二等男爵官四等侍衛

清史列傳 卷三十一

大臣傳次編六

馬瑜

馬瑜甘肅張掖人寄籍四川華陽縣乾隆四十七年以武生效力督標洊升慶甯營千總五十七年隨將軍福康安出師廓爾喀累功授瀘甯營守備加都司銜六十年閏二月松桃廳苗匪闖入秀山縣境隨總督利瑛帶兵堵剿攻克各路賊寨賞戴花翎五月擢冕山營都司十月擢督標左營遊擊是月進抵高多寨生擒首逆吳半生下部議敘嘉慶元年命赴達州軍營二年三月攻克大園包賞大小荷包復擊賊於棋盤石奪其卡六月進攻安子坪等處槍斃首逆並擒其家屬予達春巴圖魯名號七月迎探賊蹤至甯羌州安撫州城三年三月殲首逆齊王氏姚之富於沙狐嶺餘賊竄匿時瑜首先偵探官兵得以分路截剿上嘉其奮勇擢參將四月剿白號賊高均德於維南六月追擊於鐵釘埡斃賊二百餘名均德與其黨冉文儔等竄踞大神山七月官兵分路進剿瑜攻其東面克之文儔等由龍鳳

坪遁走箕山坡下九月克箕山賊匪羅其清退據大鵬山寨十月合兵圍剿瑜等冒雨攻寨燬其南門槍斃其父從國其清遁十二月生擒於巴州濠子灘洞中事聞詔以升缺儘先補用文儔自箕山竄入通江之麻壩寨負隅抗拒四年元旦瑜隨副都統德楞泰等分兵三路燬寨而入生擒冉文儔及其子添受並賊黨千餘人奪獲牛馬器械無算加副將銜三月補四川督標副將七月追賊入楚十月擒高均德於大市川五年正月川北川西賊勢猖獗仍隨德楞泰統兵入川二月攻江油之烏龍寨生擒綠號首逆詔給功牌三月進攻重華堰賊伏於火石埡者萬餘瑜等分號環擊擒首逆冉添元等下部議敘復剿賊於劍州之石門寨賊搶渡潼河瑜偕副都統賽冲阿等擊走之四月追賊至開封廟乘賊搶渡嘉陵江斬殺三千七百餘人殲藍白號賊於麻柳場閏四月剿藍號賊於七孔溪瑜伏兵山下俟賊過溝時擊之五月攻長池壩賊巢得旨嘉獎六月擢貴州安義鎮總兵七月調重慶鎮總兵八月賊至長壩方渡河瑜領馬步兵掩至白號首逆度向瑤赴水死九月殲賊於母子壩六年正月逆賊徐添德並黃號股匪自洵陽北竄瑜追至乾溝擒斬甚衆餘匪奔鎮安瑜等領精兵八百閒道出野豬坪雪夜奮擊二月剿

黃號賊龍紹周於五里埡復蹙之於官渡河淹溺無算四月黃白藍三號賊匪自陝入楚與徐添德合瑜隨德楞泰追擊於陝之黃石坂斬獲二千餘名五月剿賊於昆河鋪賊勢瓦解徐添德奔河灘溺死七月追賊入川敗黃號賊於菜子埡峯竹廠賊走巴東復敗之於雲霧溪九月由老木孔入山搜剿賊西趨陝瑜偕總兵蒲尙佐等冒雪進攻殄龍逆於平利之岳家坪黃號賊匪殆盡十一月殲賊於白果壩賊竄至通江之劉家壩瑜等分路繞上山梁大兵繼進俘獲無算七年二月隨德楞泰至巫山十二峯埡除綠號散賊四月剿賊於雞公梁擒斬千餘人五月擊賊於水溝後山埡口擒斬八百餘人六月追擊於觀音碭首逆樊人傑就擒下部優敘十月賊竄施家溝爲先山極險處瑜步行入山督兵兜剿首逆趙鑑等就擒殲青黃兩號賊三百餘於中子洋坪復偵知巴巫接界賊匪屯聚月夜擣其巢穴擒斬之均下部議敘恩賞扳指荷囊時賊勢窮蹙瑜由巫山向北搜剿十一月斃賊於銅盆溪十二月追擊於栗子坪等處斬馘百餘擒青號賊於鳳凰山八年正月於黃柏溝及太陽河剿除零匪二月獲白號首逆王三槐之弟三魁於馬家壩餘股零星埽蕩而楚匪復偪入川瑜偕副都統色爾滾合兵迎擊閏二月從閒

道進攻鐙蓋窩雨霧瀾漫瑜由山頂衝下斬馘五十餘人隨於豐玉坪天池子草堂河黑樓門等處沿途搜緝川陝楚餘匪殲除殆盡乃於三省邊界分段巡防瑜派守川省之徐家壩十月突有陝界伏匪由南山竄出裹脅漸多因自川東探剿入陝十二月由八義寨獐麕崖而進擒斬數十名復躡之於尹家臺子賊恃險抗拒瑜設伏敗之九年正月擢江南提督留辦善後事宜二月賊竄湖北之興隆坡瑜勒兵兜剿殲斃苟文華等上嘉之賞翎管板指荷囊復追賊於日曬溪漁峒子四月調雲南提督仍留辦善後事宜六月賊屯柴扒老林瑜偕提督豐仲由添紫城在賊北進攻賊潛遁經略額勒登保偕德楞泰等奏言添紫城在賊屯之南最爲緊要專派豐仲馬瑜在彼扼截竟任乘間偷越實難辭咎命革巴圖魯名號摘去花翎時餘匪專向老林奔竄瑜帶兵二千追窮賊所向七月進攻鳳凰寨有名賊目數殲擒下部議敘八月斃首逆苟文潤等於魚峒子奏入賞還花翎及巴圖魯名號九月瑜率將備先後搜獲賊匪陝境肅清仍於川境沿邊分緝尋苟朝九被獲於漢中府全功告歲下部議敘十月檄撤陝西從征鄉勇十年八月赴雲南提督任十五年調江南提督十八年四月調直隸提督七月隨駕熱河命射布靶

中三矢賞穿黃馬褂九月河南教匪滋事陷滑城命瑜馳往剿辦十月至滑之留固村殲賊二百餘人於南湖北湖與總督溫承惠合兵會剿斃賊五百餘名奪獲槍礮器械甚多復由道口之運河西岸進兵賊匪淹斃無算上傳示方略命瑜偕副都統富蘭由濬縣繞道速赴開州以北逐一搜捕向南進剿瑜等探知滑縣之潘章李家莊袁家莊等處距開州甚近俱有賊屯聚十一月進燬賊巢殲斃二千八百餘人十二月攻復滑城瑜留駐開州搜捕竄匪九百餘人事竣下部議敘尋因失察都司曹綸從賊入教部議革職詔改爲革職留任十九年二月調江南提督四月以防守東明時失察所屬將弁買帶婦女降補徐州鎮總兵二十二年調山東兗州鎮總兵二十三年上以其怠忽捕務嚴飭之二十四年四月仍授江南提督六月卒諭曰馬瑜前在軍營著有勞績著加恩照提督例賜卹諡壯勤

薛大烈

薛大烈甘肅皋蘭人由行伍洊擢千總乾隆五十二年隨征臺灣逆匪有功賞戴藍翎五十七年隨將軍福康安征廓爾喀克熱索橋等處賊礮賞換花翎尋擢陝西固原提標後營守備仍留軍營五十八年敘功賞給應升頂帶五十九年授甘

肅黎園營都司嘉慶元年川陝楚教匪滋事隨提督柯藩進攻陝西之將軍山克黑虎塘賊卡馘賊二百餘復偕遊擊李逢春斷賊汲道十二月攻克洞河五作雲賊寨得旨以應升之缺升用二年四月隨陝甘總督宜綏攻雞爪嶺殺賊被創三年正月擢洪廣營遊擊時賊匪欲竄四川大烈隨宜綏由文家梁追剿三十餘里殺賊六百生擒一百二十餘二月隨四川總督勒保克賊於白沙河山梁七月偕參將王清弼等進剿開縣之蘭芽場生擒賊首洪道人八月白號賊首王三槐踞雲陽縣之安樂坪勒保先令大烈率兵勇馳伏俟大兵至聞槍聲爲援以火箭射賊巢賊潰生擒王三槐得賞健勇巴圖魯名號九月授陝西陽平關營參將隨勒保擊賊首冷添祿於石壁峯等處突有賊二百餘躍卡出鬪大烈由亂石窖下攻盡殲焉十二月隨甘肅提督達三泰攻手把巖賊卡據魚鱗口山梁四年正月由橫梁進攻濠邊遇伏大烈力戰賊退走四月補四川提標中軍副將五年四月擢川北鎮總兵先是勒保以玩延軍務褫職尙書魁倫署總督事大烈隨魁倫剿藍號賊匪於中江之象龍寨追至官家山斃賊四百餘藍號股匪與白號賊合南竄過河大烈偕副都統阿哈保總兵施縉馳擊之魁倫以潼河失守逮問勒保復任

總督大烈隨勒保由保甯追剿突有賊於開封廟截我軍後路大烈率兵折回擊退之偵知白號藍號諸匪欲分據各路渡嘉陵江大烈偕阿哈保等亦分路進擊賊不得渡得旨交部議敘閏四月白號股匪屯龍安之鐵籠堡大烈率兵勇徒步過獨木橋搶占山梁生擒賊目董大榜等白號股匪復與藍號賊合踞竹子山大烈由老林進攻總兵百祥遇伏於平家崖大烈令遊擊鄭啟貴兩路截殺斃獲甚多餘竄鳳陽山復偕百祥追剿至徐平埡摩天嶺等處七月白號賊首苟文明等圍三匯之高寺寨大烈隨勒保連夜馳擊圍始解我兵追至清河壩偵知苟文明欲由定遠之石板沱過江參贊德楞泰躡其後大烈隨勒保抄出賊前賊分兩路竄有餘匪四百遁飛龍場大烈率兵勇馳捕盡殲之九月大烈偕侍衛花聘等擊於下八廟乘夜雨進剿賊潰我兵復扼之於倒流水會副都統溫春賽沖阿夾擊斬級六七百生擒賊目王曰榜並殲斃偽副元帥湯思舉偽總兵王三魁等十一月湖北綠號股匪竄雞鳴寺大烈隨勒保抄出賊前師次漢陽河槍斃執旗賊目並馬步十餘賊餘匪遁大兵追殺四十餘里俘斬多名得旨交部議敘十二月襄陽白號賊首楊開第等竄巴州南埡場大烈於渠縣安仁溪遇探馬七八十騎盡

斬之卽偕阿哈保總兵永甯首占山梁射斃數賊賊遁自安仁溪追至巴州兩臺山疾馳百餘里途中殲賊及落巖死者一千四五百衆生擒七百七十三獲大礮槍矛器械無算楊開第逸於營山之柏林場尋爲亂矛殲斃上大烈打仗奮勇交部議敘餘匪竄通江之烏林埡大烈復率兵馳擊之六年正月藍白兩號股匪竄大甯金竹坪大烈率弁兵乘雪進剿棄馬步行進克賊於白馬廟山梁賊遁大蓋頂大烈隨勒保分兩路進擒獲多名時藍號賊首樊人傑徐萬富合藍白兩號股匪窺伺江岸屯儀隴之碑灣寺大烈偕阿哈保乘夜追擊八九十里賊潰殲徐萬富奉諭曰阿哈保薛大烈探知賊匪在碑灣寺屯聚卽乘夜追擊殲除賊首實屬奮勇出力交部從優議敘並賞給四喜玉扳指鑲玉帶版大小荷包二月賊圍九杵石準二寨九杵寨已爲賊破大烈率兵馳援立斃賊百餘賊始退脫被難男婦一千三百衆石準寨之賊旋逸去我兵乘勝追擊於廣福院沙箕灣等處馘賊五百餘生擒黃號僞總兵李尊賢等復由榨井壩羊子嶺進攻上嘉之三月率師由水路直趨夔巫遏賊竄楚之路賊竄入陝境上以剿賊延玩責之藍號餘黨曹世倫僞稱元帥竄南江之九嶺子大烈由麻柳灣進攻副將田朝貫直衝入陣以

分其勢大烈分投掩殺斬級四百殲曹世倫生擒僞總兵賀友文等獲旗幟刀矛四百八十九件六月青藍兩號餘匪竄東鄉犯仁和永興二寨我兵次樊噲店分三路進勒保令大烈由右路兜剿蹙賊於華尖壩河河邊藍號賊首苟文明及其黨四五百俱淹斃殲賊首鮮俸先生擒青號賊首何子魁等得旨交部議敘七月青藍黃號股匪竄巴州石婆山大烈先令遊擊楊春榮於龍鳳壩等處設伏偕阿哈保連夜進兵奮勇截擊斃賊千餘生擒賊首徐添德之弟徐添壽王登廷之弟王登高僞元帥王文科僞總兵劉學詔賊探李純緒等九名餘賊六百十八名上嘉其奮勇賞給四喜玉扳指大小荷包並恩賞大烈之子千總時高山寨高家營賊匪竄核桃壩大烈由土地坡進剿緊躡賊蹤而魏棒棒股匪踞童家山梁抗拒我兵分兩翼襲擊賊遁入老林八月高魏二逆合竄於大茅坪阿哈保由左路進至半山遇賊抗拒大烈由右路合擊勒保令諸將弁至大茅坡山頂下壓大烈趁勢進擊賊潰高逆竄空山壩遇襄陽藍號僞元帥冉學勝合聚於通江之盧家灣大烈偕阿哈保分路進剿乘賊不備殲斃甚多生擒冉學勝奏入諭曰阿哈保薛大烈自帶兵以來屢次殺賊立功節經升賞茲復親率官兵生縛渠逆俱爲奮勉

出力著加恩各賞給雲騎尉世職並加賞玉扳指大吉四喜牌大小荷包時魏逆竄南江老林我兵步行入山追擊二三十里九月克賊於溪口茶園溝等處十月督兵擊白號股匪於達州之盧峒寺河邊賊躡淺渡河大烈由魏家溝追剿斬級四百擒賊百餘脫被脅難民千人餘匪竄開縣之柴水壩復進攻羊耳業山梁生擒僞總兵黎朝順大旗手張名揚等賊遁入陝省西鄉之漁渡壩勒保令大烈專領將弁緊追大烈激勵將士不帶鍋帳各裹乾糧連追躡二百三四十里至通江之羅村有賊四五百恃險抗拒大烈率諸將擊斃二百餘餘賊潰亂大烈仍督兵緊躡沿途多有斬獲截賊回川不使入陝諭曰薛大烈鼓勵兵勇晝夜追剿不辭勞瘁其功甚屬可嘉著交部議敘十一月賊匪欲竄開縣老山大烈由雞鳴寺進剿令協領達斯呼勒岱截賊旁竄陝楚之路大烈率參將羅聲皋等追躡賊尾斃斃多名師次八臺山有另股零匪圍趙家坪寨峒大烈密諭兵勇勿舉煙火率兵馳擊之十二月黃號餘黨葛士寬等竄邀仙崖擲石抗拒大烈令趨捷兵勇二百設伏我兵徐退賊卽乘空下山從林內突出殲戮無遺復督兵進八卦山殲僞總兵李顯林等七年正月白號賊首苟文明竄開縣之馬家營老箐大烈令達斯呼

勒岱設伏於雙河口副將李應貴張績分左右進攻大烈由中路策應冒雪馳擊殺賊五百生擒二百獲賊旗刀矛馬驟無數苟逆竄入陝境西鄉二月大烈率步勇三千由秦嶺板房子追剿我兵分投堵截賊竄鄠縣之桃園子老林大烈偕張績直前衝殺賊踞圓嶺山抗拒後路有賊四五百由山溝突出大烈率兵勇折回援應賊踞半山我兵縱火攻山賊潰生擒僞總兵姚青雲大旗手喬應祿等上嘉之三月經略額勒登保令大烈回川剿賊四月因病未赴軍十一月勒保奏大烈病請解任諭曰薛大烈頻年在軍營帶兵甚屬奮勉出力今因積勞成疾著加恩准其回籍調理九年正月到京在乾清門行走四月諭曰薛大烈因無總兵缺出尙未簡放昨因隨從進城墜馬跌傷甚重已派蒙古醫官前往診治念在京當差並無俸銀日用著加恩照乾清門頭等待衛所得俸銀之數賞給所有春季俸銀並著補給尋補直隸天津鎮總兵十二月擢直隸提督十年奉旨賞穿黃馬褂十一年十月甯陝鎮新兵陳達順等滋事大烈隨領侍衛內大臣德楞泰馳剿十一月調陝西固原提督十二年二月陝西省瓦石坪叛匪周士貴等滋事大烈偕總兵楊遇春分兵進剿全數殲獲德楞泰奏入賞給大烈白玉喜字扳指黃辮大小

荷包又諭以大烈係首先督兵進剿予軍功加二級十三年二月調江南提督十月調直隸提督十四年奏獲民人私運銅斤進口親往八溝確查並獲平泉州私採銅斤各犯諭曰薛大烈昨經派赴八溝查辦因嘉慶六年平泉州回道溝曾出有銅鑛奏請開採未准恐係該處防禁不嚴所致當密委李學周等馳往訪查見將偷挖銅沙之徐振等盤獲且親往將鑛銅查出薛大烈能於多年舊案記憶明確辦理不致費手尙屬能事著交部議敘十五年二月以子續姻事入奏諭曰薛大烈爲子續姻輒敢以瑣屑私事入奏並向所屬守備求婚奏將該員迴避殊屬膽大妄爲著降補天津鎮總兵仍帶革職留任四月大烈訪獲福建民人蘇花臉流寓天津開賭窩娼並起出刀矛各件上以其緝捕認真開復革職留任處分八月擢廣東陸路提督十八年河南滑縣教匪滋事大烈奏請帶兵前赴軍營協剿諭曰滑縣教匪指日克復軍務即可告蒞薛大烈因請赴軍營擅發驛遞太覺高興多事所奏不准行交部議處尋議降三級留任十九年二月直隸總督那彥成奏查明古北口歷年提督動用馬乾買馬銀兩大烈用過銀二千七百餘兩得旨交部嚴加議處尋降補陝西漢中鎮總兵閏二月調河南河北鎮總兵二十年二

月唯工合龍上以大烈彈壓出力賞加提督銜仍交部議敘五月卒諭曰薛大烈屢次出師歷任提督著有勞績上年於河北鎮任內防護睢工出力復賞加提督銜茲聞溘逝深爲軫惜薛大烈著加恩照提督例賜卹其任內降革處分悉予開復所有應得卹典該部察例具奏賜祭葬諡襄恪子福候補千總

桂涵

桂涵四川東鄉人嘉慶元年川省教匪滋事青號賊首徐添德白號賊首王三槐等犯東鄉涵以鄉勇應募隨四川總督英善軍營效力十一月剿賊於罐子山以連有斬獲給外委頂帶十二月涵率義勇剿賊於張家觀普子嶺馬鞍山等處累戰皆捷英善上其功賞六品頂帶賊銜涵甚二年正月復犯罐子山焚劫涵所居村堡涵擊敗之賊轉掠冉家壩天星橋涵設伏邀其歸路俟賊過突起擊之追斬三百餘名給行營千總時徐添德大股駐金峨寺爲官軍所圍經月無所掠食糧且盡欲由尖山隘口西竄二月涵率義勇截剿遇賊於明月壩斬三百餘級賊走據香鑪坪三月四川總督宜綏檄涵屯守洋列子隘口洋列子距香鑪坪近涵日率數十人登高阜覘賊伺賊出營樵汲輒發火槍遙擊賊近卽率衆截殺前後斬

馘多名五月賊渡落尾河河水方漲涵以兵蹙之斬溺無算復戰於冉家壩譚家觀殲賊千人徐添德之黨幾盡涵親族同里聞涵累捷赴大營投充鄉勇者甚衆內大臣德楞泰將軍明亮卽令涵統之名涵字號義勇六月隨官軍擊斬賊首孫士鳳於淨土寺殲斃數千名又敗餘賊於天星橋敍功賞戴藍翎拔補黎雅營右哨千總十一月白號賊羅其清藍號賊冉文儔等合衆犯營山經官軍擊退賊走譚家嶺三溪口涵偕忠州知州劉清及武生冉子明等分三路躡剿擒斬五百餘名羅其清走來定寺十二月涵等追敗之三年三月隨川北鎮總兵朱射斗剿賊於巴州之插旗山擒斬一百餘名四月羅其清退據鯉魚嘴涵隨官軍追擊賊營於山巔深箐中沿坡設滾木礮石守禦甚備官軍仰攻士卒多傷涵率義勇分由石洞溝猴兒嶺間道攀援而上直撲賊卡賊驚擾官軍乘之斬三百餘名涵被重傷猶裹創力戰相持至日暮始斂兵退六月王三槐率衆犯東鄉太平遇官軍折而東追及於楊子嶺賊方渡河官軍先自下游躡渡繞出賊前而涵率義勇從後夾擊斬四百餘名十一月剿白號賊冷添祿於雲陽之安樂坪賊糧盡詐降涵偵知之預伏兵於方家壩魚鱗口賊夜至伏發斬賊二百餘東鄉賊匪謝萬青復糾

合零匪數百人據開縣之貓兒寨爲官軍擊走涵隨參將褚大榮胡尙賢星夜追躡及於三寶山賊竄匿深林涵等分三路搜捕斬萬青黨衆俱盡捷聞擢建昌鎮越巂營中軍守備十二月剿賊於手把巖涵偕守備薛升夜斫賊營手刃守卡賊匪攀柵而入斬八十餘名生擒賊目劉寅兒等四年二月剿賊於長壽之雲臺鋪達州之雷音鋪太平之鐵礦壩開縣之蘆花嶺等處俱有斬獲三月敗黃號賊龍紹周於太平之修溪壩徐添德由川竄陝經略大臣勒保檄副都統德楞泰統大隊追躡飭涵率義勇由間道出賊前夾擊敗賊於通天觀四月復擊徐添德於明通井王家壩新開場連敗之五月追賊至陝西平利之四季河擒賊目張仕達降僞總兵顧應全又剿賊於巫山之八十坪降僞總兵張宗泰六月隨朱射斗剿藍號賊包正洪於蘆花嶺斬之四川總督勒保以聞賞換花翎七月剿擒賊首龔其位顧三聘於八十坪斬四百餘名八月進剿賊首龔建於貓兒寨九月黃號賊樊人傑等自雲陽竄開縣涵隨四川提督七十五追及於火峯寨賊衆據險拒守官軍分道攻克賊首龔建突陣欲走涵擒以獻捷入命以都司升用徐添德率衆圍夔州府急涵會朱射斗等援之戰於蓮花寺擒斬八百餘名獲賊目李思貴欲解

大營正法思貴乞招賊以自贖涵縱之思貴旋回賊渠李其倉劉全德並其黨四百餘人詣經略額勒登保軍門降十月隨額勒登保追藍號賊張漢潮行次楊柳池遇白號賊鮮大川藍號賊王士虎涵所統兵少賊圍數重鏖戰良久突圍出大兵踵至會合擊賊斬數百名旋復敗賊於巴州之鷹背場擒斬二千有奇十一月剿青號賊王登廷於通江之東君壩偵賊營無備天未曙卽率兵薄之賊大亂登廷就擒並獲僞總兵王文奇旋補維州協左營都司五年正月敗賊於蓬溪之高院壩三月又敗賊於劍州江口擒斬數百名赴水死者甚衆獲羸馬無算尋剿白號賊高二馬五於江油之桂溪場敗之賊竄平武四月冉文儔犯象龍寨官兵擊破之賊乘夜撲營復爲官軍所敗涵率兵追至懶板凳擒賊日符得恆是時賊被官軍搜捕急遁入老林我兵復蹙之賊窘甚閏四月將由徑嶺竄逸脅守卡團勇俾讓路以出四川提督勒保令涵易服僞爲團勇讓路狀賊前隊至麾衆出不意擊之擒斬七十餘名餘皆墮澗死六月剿賊於新甯之鬪山關擒斬數百名七月敗白號賊楊開甲齊國典於鄰水之七孔溪又敗鮮大川於大竹之姚家巖敘功升靖遠營遊擊八月隨七十五剿黃號賊王國賢於開縣之温塘井擒斬二千餘

名十一月東鄉開縣零匪竄至扇子山涵帶兵躡賊追及於梁山太竹連界之賽白兔山梁盡殲之擒僞先鋒符大成六年正月搜逸賊於柏林槽誅戮殆盡又敗賊王士虎苟文明於閬中之碑灣寺二月追至開縣之土龍堰又敗之三月白號賊湯思蛟遣其黨唐大魁馬思貴僞總兵龐姓僞先鋒冉姓等分路滋擾涵擊唐大魁於猴兒巖擒之盡戮其衆四月剿馬思貴於蕭家山榨井壩等處馬思貴中矛死擒秦士玉等七十一名五月涵隨貴州古州鎮總兵永凝副將田朝貴等剿湯思蛟賊屯馬家營山梁而於靈官廟設卡分守官軍擊破之乘勝薄馬家營賊抵死據險抗拒永凝督衆仰攻相持久涵率步隊自山右陡崖揉攀而上官軍自山前冒矢石競登合擣賊巢賊不能支遂大潰擒斬多名獲刀矛旗幟無算奏入命下部議敘六月藍號餘黨鮮倖先苟文通青號餘黨何子魁與太平固軍壩殘匪同犯東鄉之仁和永興二寨官軍分三道擊之勒保率大隊由中路副都統阿哈保由左涵隨川北總兵薛大烈由右賊敗走窮追至葉尖壩陣斬鮮倖先擒何子魁苟文通赴水死旋隨阿哈保剿賊於通江之石婁山擒徐添德之弟添壽子大寬姪大朝王登廷之弟登高及僞元帥王文科僞總兵劉學詔等俘斬千二百

餘名上以涵累著戰功命以應升之缺升用八月官軍擒藍號僞元帥冉學勝於通江涵以協剿有功復命下部議敘九月賊東掠官壩官軍敗之涵偕參將羅聲皋等追剿斬一百餘名復隨勒保剿賊於墊江之太平鋪登溪鋪等處擒斬一千八百餘名十月湯思蛟竄達州涵隨阿哈保等追剿於魏家溝擒僞先鋒王登級等十一月剿擒賊首蕭坤於太平之潘家坪斬三百餘名十二月隨薛大烈剿黃號賊於太平之小中河賊遇官軍驚竄涵豫伏兵於各隘佯退師以誘賊賊乘虛逸出悉擊殲之獲首逆葛思寬七年二月升四川提標中軍參將三月湯思蛟之黨張學武率餘匪竄開縣之王家坪涵隨甘肅肅州鎮總兵張績擊斬之移師爛泥壩偵有徐添德餘黨在銀廠坪急往剿擒僞先鋒廖登仁陳文禮四月徐添德等走鐵鍊橋涵偕張績設伏邀擊俘斬無算餘匪王珊等竄鳳凰山復爲涵擊破七月湖北竄匪由巫山大甯入川涵隨張績截剿於石坪殲擒其半訊知賊將踵至駐師待之八月楚匪果犯馬蟻口復敗之九月剿賊新甯之兩峯壩賊衆竄匿深林四面兜擊賊無遺類移兵襲扇子山盡殲逸賊於金家營又剿賊於開縣之芭蕉溝太平之曹家溝擒斬五百餘名獲僞總兵孫廷相十月龍紹周餘黨由舊

縣壩犯東鄉涵率兵截剿夜擊賊營斬一百餘名時王國賢暨線字號餘匪先後入川合擾雙場民寨涵隨官軍分路進擊賊敗走馳抵大竹殲餘匪於烏龍寺十一月剿青號僞總兵熊卜祿於長壽之宋家溝擒斬七十餘名卜祿死移師討白號賊庾秀僞千總楊林等於忠州之高岡堰悉擒之十二月偕鄰水縣知縣鍾人傑合剿宋逆餘黨於張家場俘男婦一百餘名八年正月敗白號賊於大竹之三墩坡賊目苟文富竄墊江之冷家壩爲我兵追獲又搜餘匪於梁山之石板坡大竹之大安槽及江北廳之古路坪木耳場月來場等處頻有斬獲三月殲藍青號餘匪於萬縣之四十八槽孫家槽等處獲青號賊目王青四月白號餘黨宋國品率衆自老山竄擾大竹涵令知縣袁士先預設伏於大埡口防賊敗竄而自以大軍迎戰於柏楊溝大破賊衆生擒國品五月剿賊於巴州之清平寺僞總兵王老少率餘衆降六月遷雲南龍陵協副將剿畫角嶺鶯嘴巖諸賊擒僞先鋒陳宗冕八月調維州協副將時川東諸賊肅清大兵以次凱撤川東諸鎮將分守各隘涵駐太平搜剿匪未幾蒲包山黑礮山關口坪峨城山黑峒溝柯家坪諸處零匪悉平九年正月以次殲開縣桃花洞白筍坪諸賊四月陝西固原提督楊遇春敗

賊於平利之楊道士溝七月賊擾安康之鳳凰寨涵復隨遇春等分三路進擊斬偽元帥李如玉周天良偽總管王士奇擒偽元帥羅思蘭符廷伏偽總管王宗福紀友亨蕭昌奉等於陣並殲賊黨一百五十餘名十年十月調署夔州協副將接捕川陝楚沿邊餘匪殲除淨盡十一年綏定叛匪王得先等滋事涵帶本營弁兵急募鄉勇三千人星夜馳往剿捕遇賊於檀木場大破之首逆王得先等俱就擒事聞賞健勇巴圖魯名號加總兵銜仍交部議敘十三年署重慶鎮總兵十四年授川北鎮總兵十八年陝西岐山三才峽木廂匪徒萬五等因饑煽亂上命四川提督多隆武率涵等駐川北截剿以防陝匪南竄十九年正月賊黨吳抓抓等率千餘人趨武關欲自黑河入蜀涵率松潘兵由沔縣迎遏賊退走二月事平道光二年三月擢四川提督七月果洛克賊番劫西藏堪布貢物涵奉命剿辦兵抵唐凹達凹等寨殲戮甚衆擒首逆曲俊父子懲治如律阿壩各番畏威乞命上以涵辦理甚合機宜命交部議敘賞玉翎管玉扳指大小荷包以示嘉獎十二年四月甯遠府烏坡廠夷人阿都扁巴等勾通沙罵土司安玉嘸聚衆作亂涵檄守備張富蔡長青帶兵剿捕擒阿都等誅之追至萬回姑夷巢扁巴安玉嘸俱自殺十一

月越巂廳屬捫扒支夷滋事四出焚掠涵偕成都將軍那彥寶調兵三千人往編查保甲招撫生熟夷一萬五千餘戶夷衆感悅縛獻首逆送還所掠漢民上免其疏防處分尋以軍政復予議敘十三年正月曲曲烏窩石等支野夷與熟夷勾結漢奸楊文斌馬新明等聚衆數千人焚劫越巂廳之大樹堡等處清溪各屬熟夷競起應賊涵督兵剿捕連破賊於水桶溝香樹頂楊文斌等俱伏誅移師富林汛賊夜撲大營涵麾衆嚴禦遘疾二月卒於軍諭曰四川提督桂涵由鄉勇拔補千總洊升提督久歷戎行身經百戰在提督任內整飭營伍訓練有方上年辦理越巂廳捫扒夷匪諸臻妥協近以清溪夷匪滋事該提督懋著勤勞歿於王事著加恩贈太子太保銜卽照提督賜卹任內處分悉予開復應得卹典察例具奏伊子桂文奎等俟服闋後送部引見候朕施恩尋賜祭葬予諡壯勇十五年諭曰前因原任四川提督桂涵久歷戎行屢著勞績特令伊子桂文奎等俟服闋後來京交部帶領引見昨經吏部將桂文奎等帶領引見朕追念成勞賞延後嗣雲南候補知州桂文奎著加恩以知州歸部儘先選用文生員桂文籍著賞給副榜營千總桂文籙著以千總用用示朕眷注蓋臣有加無已至意子文奎以廕授員外郎改

捐知州見任雲南昆陽州知州文籍恩賜副榜就職州判文錄候選營千總孫森煌陝西候補未入流有根候選教諭

李長庚

李長庚福建同安人乾隆三十六年武進士授藍翎侍衛四十一年補浙江衢州營都司四十六年升提標左營遊擊四十九年遷太平營參將五十年升樂清協副將五十二年署福建海壇鎮總兵五十三年六月以所轄洋面盜案多未捕獲革職留緝隨於外洋各處疊獲洋盜林權等及首夥各犯並船隻槍礮刀械等物五十四年十一月奉上諭李長庚准其留於福建遇有遊擊缺出該督酌量奏補五十九年二月補海壇鎮標右營遊擊署銅山營參將疊年在洋捕獲盜犯林瓢等嘉慶元年二月遷銅山營參將會合浙省兵船圍捕粵匪獲吳興信等三十七名二年四月升署澎湖水師副將又獲盜犯鄭翁周疊等三年二月擢浙江定海鎮總兵六月長庚帶領兵船於黑水洋面攻擊蘇柳等斬賊二十名八月攻盜於普陀外洋獲其船殲斃無數四年七月於潭頭外洋生擒盜首侯納等旋以土盜鳳尾幫勾結夷艇百餘人踞浙界島嶼長庚率舟師出擊追至温州三盤嶼沈其

一艇時守備許松年等三船皆爲賊困長庚返篷衝入夾攻三船皆得出賊遁有旨嘉獎旋諜知艇匪竄過泉州而閩盜蔡牽船三十餘隻泊海壇境內之沙郎南盤一帶遂由南日洋而駛往沈其船一殲賊三生擒三十餘人復追艇匪至閩粵交界之甲子洋嗣聞蔡牽潛伏於白犬洋長庚率兵往擊生擒許老等三十餘人奉旨賞戴花翎五年閏四月過温州鳳凰洋救護商船獲盜林青等並鐵礮二巡撫阮元奏以長庚統率水師得旨三鎮會剿自應有一人統其號令李長庚素有威望應令温州黃巖兩鎮聽其關會協同策應六月艇匪自温州北來長庚率師會同黃巖鎮淀泊海門與松門盜隔港相持適颶風起盜船覆溺甚多賊有泅水匿島登岸者官兵水陸並擒之旬日間獻俘千數獲安南僞爵侯倫貴利事聞得旨褒嘉又殲賊於調班洋獲李出等二十二二人於深水外洋沈其船一擒丁郭等十九人於潭頭外洋六年獲林俊新等十五人於六橫洋獲楊烏等十九人於徐公洋至福建竿塘外洋獲林俊興等十人燒其船一至旗頭獲蔡牽幫盜首陳帖等二十二二人奪其船一至東雀山獲李廣及女犯等二十一人至盡山獲盜首陳火燒等二十二二人至三盤獲高英等七人十月擢福建水師提督奉旨李長庚於

緝盜事務尙屬奮勉是以加恩簡用此時蔡牽等逃竄閩洋李長庚卽往新任儻盜船折回浙洋當不分畛域以副委任尋以籍隸福建例應迴避調任浙江七年至象山潭頭獲張如茂等十四人至閩南日東滬洋獲徐逆等三十五人八年蔡牽竄漁山長庚率舟師掩至晝夜窮追蔡牽僅以身免復與黃巖鎮總兵張成合兵擊盜尤升等生擒五十六人獲其船二又獲石塘釣艇盜二十餘人進擊蔡牽於三沙沈其船一斃數十人賊北竄復追及南麂外洋奪其船一燒其船一生擒八十七人九年六月閩浙總督玉德等會奏請以長庚總統閩浙兩省水師得旨俞允先是三月蔡牽泊於閩洋之浮鷹長庚率兵擊之擒其男女四十餘人殲斃十三名燒其船一奪其船二並獲紅衣礮刀械百餘八月遇馬蹟盜船六十餘長庚督兵衝入賊分兩股東西竄長庚分兵擊之沈其船二殲斃無數蔡牽所坐船篷索爲官兵所斷及過盡山風雨驟起收兵入衢港俘五十二駢首五級得旨嘉獎十年四月兼署福建水師提督奉旨李長庚調福建水師提督鎮將皆其統轄著將擒捕蔡牽一事責成專辦一切機宜悉聽調度閏六月蔡牽聞長庚至遂由臺灣北竄入浙長庚追擊之青龍港獲其船一沈其船二擒彭求等二十八人得

旨李長庚自統舟師以來具報剿賊均無虛飾俟聞浙洋面一律清平必加懋賞
又奉上諭李長庚總統水師温州海壇二鎮總兵爲左右翼聽李長庚調遣俾事
權歸一八月長庚追蔡牽於台州大陳斗米洋攻擊三晝夜燒其船一沈其船一
生擒七十三人尋以浙江提督孫廷璧不諳水師奉旨浙江提督仍著李長庚調
補十二月蔡牽大小盜船百餘肆擾臺灣長庚率師會剿殲斃無數親駕杉板往
勘鹿耳門外港口同護温州鎮總兵李景曾分幫把守長庚截守新港於水深處
鑿沈同安船以防竄逸時東風甚急同安船爲巨浪所衝蔡逆乘潮竄去詔摘去
翎頂立功十一年四月蔡牽與朱潰俱竄福甯外洋長庚會兵往剿賊東竄張坑
洋復追擊之沈其船一奪其船三生擒盜首陳潰李阿七等七十餘人斃百七十
餘人獲刀礮僞印旗幟救出商船及被劫難民蔡逆北竄又折回南復追至台州
之調班洋生擒李按等五十一人殲百五十餘人獲銅鐵礮十七門時新任閩浙
總督阿林保密參李長庚因循怠玩並鈔李長庚致署總督溫承惠書請旨革職
治罪上諭阿林保密參李長庚因循怠玩二摺覽奏均悉但如摺內所云李長庚
藉燂洗船隻爲名收船進港恐其私回衙署亦未可定等語尙係該督揣度之詞

又稱李長庚於七月初間在盡山等處洋面追剿賊船扼住上風旋又探聽無蹤其跟剿竟屬空虛等語但昨據李長庚奏稱七月二十一日在大陳等處洋面擊沈盜船一隻殲獲盜犯一百五十餘名起獲槍刀鐵礮等件並拏獲另船盜首李按等語阿林保發摺時尙未得其咨報如果屬實是李長庚兵船七月初間在盡山外洋一時未能瞭見賊蹤旋又追獲得勝尙非始終株守可比又李長庚所稱兵船缺乏口糧之處是否實情抑係藉口引避均須詳查明確方可治以應得之罪該督遠在閩省僅據李長庚致溫承惠信內之言恐尙未確實當剿賊吃緊之時水師統領責任綦重一時亦無可代之人況臨敵易將亦不可草率此時且毋庸革職逮問同日又諭清安泰見在溫台一帶所有李長庚追賊情形知之必悉著卽詳細密查據實回奏八月李長庚率各鎮舟師擊賊漁山身受多傷事聞得旨此次李長庚督兵圍捕蔡逆殲擒盜匪多名身受多傷實爲奮勉著加恩賞還頂帶旋據浙江巡撫清安泰覆奏李長庚帶領兵船經過海口並未回署至於海船若不勤加燂洗則船底苔草螿蟲膠黏纏結輒致駕駛不前其生擒盜犯李按委係蔡逆另船頭目餘係李按同船夥犯並無捏報又兵船口糧實有暫時缺乏

應採購之處亦無藉詞耽延情弊復遵旨將李長庚在洋剿捕情形密詢黃飛鵬何定江二人據稱黃飛鵬爲守備時卽同李長庚在洋捕盜無不勇往向前自蔡逆滋擾臺灣倍加感奮誓不與賊俱生實無鬆玩情事何定江居官閩省時卽知李長庚身先士卒奮勇直前茲與連幫出洋總以剋除首逆爲急務實無怠玩奏到奉上諭阿林保前此密奏李長庚因循怠玩種種貽誤請將伊革職治罪朕披覽該督所奏卽覺不愜阿林保到任不過旬日地方公事一切未辦海洋情形素未熟悉而於李長庚從未謀面輒行連次奏參殊屬冒昧是以降旨令清安泰秉公詳查本日據清安泰覆奏則稱李長庚帶領兵船經過海口並未回署又稱海船若不勤加燂洗輒致駕駛不前又所獲李按實係蔡牽夥黨並無捏報斬獲情弊又轉詢黃飛鵬何定江二人亦均稱李長庚實在奮勇等語是阿林保奏參全屬子虛今兵船正當剿捕吃緊之際若阿林保尙不知以國事爲重猶復輕聽人言甚至因此次奏參李長庚不能遂意遇事掣肘使其不能成功則阿林保之罪甚大阿林保著傳旨嚴行申飭九月長庚於竿塘外洋擊斃蔡牽之姪蔡添來沈其船二計擒獲及落海者約數百人駢首五級得旨此次李長庚督兵攻剿不遺

餘力奮勇可嘉俟拏獲蔡牽再賞世職酬勳十月長庚會師擊蔡牽於二盤沈其船一生擒盜首李添來等七十人斃其股首周添秀等七十餘人十二年正月追剿蔡牽入粵洋沈其船一獲十一人二月追至大星嶼奪其船一又擊蔡逆坐船時風浪大作兵船不能聯絡收軍還抵肇慶戩船澳四月會同廣東提督錢夢虎擊粵匪鄭一幫船於佛堂外洋生擒盜首羅二十及男婦四十八人七月由閩還浙奏請辦理軍政奉旨李長庚統領水師剿捕蔡逆正在吃緊之時卽因軍政屆期亦當權其緩急或請令清安泰代爲考驗候旨遵行乃並未具奏請旨輒順道往甯波竟置海洋盜首於不問實出意料之外著傳旨嚴行申飭八月仍具奏出洋十一月與金門福甯兩鎮合追蔡逆於浮鷹洋面獲其船二擒九十五人駢首十五級賊竄東南外洋十二月二十四日長庚會同水師提督張見陞聯鯨入粵二十五日至黑水外洋蔡逆僅存三舟長庚率師專取逆船槍礮並發逆船兩旁並巾頂插花皆被轟破賊蒼黃落水者不可勝數長庚又別用火攻船乘風挂其後艚時烈風大作波浪洶涌火礮亂發互擊長庚猝被賊礮子中傷咽喉額角遂於是日未刻卒事聞上震悼下部議卹諭曰浙江提督李長庚宣力海洋忠勤勇

幹不辭勞瘁懋著威聲數年以來因閩浙一帶洋盜滋事經朕特命爲總統大員督率各鎮弁舟師在洋剿捕李長庚身先士卒銳意擒渠統兵在閩浙臺灣及粵省洋面往來跟剿艱苦備嘗破浪衝風實已數歷寒暑每次赶上賊船無不痛加剿殺前後殲斃無數擒拏盜船多隻蔡逆亡魂喪膽畏懼已極聞李長庚兵船所至四處奔逃正在盼望大捷之際乃昨據阿林保奏到李長庚於上年十二月二十四日由南澳洋面駛入粵洋追捕蔡逆望見賊船祇賸三隻窮蹙已甚官兵專注蔡逆窮其所向追至黑水洋面已將蔡逆本船擊壞李長庚又用火攻船一隻乘風駛近挂住賊船後艙正可上前擒獲忽暴風陡作兵船上下顛播李長庚奮勇攻捕被賊礮中傷咽喉額角竟於二十五日未時身故覽奏爲之心搖手戰震悼之至朕於李長庚素未識面疊經降旨褒嘉並許以奏報擒獲巨魁之時優予世職李長庚感激朕恩倍矢忠盡不意其功屆垂成之際臨陣捐軀朕披覽奏章不禁爲之墮淚李長庚辦賊有年所向克捷必能擒獲巨魁朕原欲俟捷音奏到時將伊封授伯爵此時李長庚雖已身故而賊匪經伊連年痛剿之後殘敗已極勢不能再延殘喘指日舟師緊捕自當縛致巨魁況李長庚以提督大員總統各

路舟師今歿於王事必當優加懋賞用示酬庸李長庚著加恩追封伯爵賞銀一千兩經理喪事並著於伊原籍同安縣地方官爲建立祠宇春秋祭祀其靈柩護送到日著派巡撫張師誠親往同安代朕賜奠並查明伊子見有幾人其應襲伯爵俟伊子服闋之日交該督撫照例送部引見承襲其李長庚任內各處分著悉予開復所有應得卹典仍著該部察例具奏以示朕篤念勞臣恩施無已至意十三年二月奉上諭李長庚爲國捐軀凡水師大小將弁兵丁皆當爲李長庚復仇方不愧同心敵愾之義見在蔡逆不過賸船數隻閩粵兩省大幫兵船總先專注蔡逆上緊擒拏上以張國威下以洩衆忿亦可慰忠魂於地下也是月又奉上諭水師提鎮將弁等如能將蔡逆擒獲卽遵旨將該逆解京如拏獲賊犯必究出放礮中傷李長庚之人解赴同安於李長庚靈前禱祭以慰忠魂儻不能究出放礮之賊亦當將賊衆內罪應凌遲者解往一二二人禱割致祭俾伊家附近居民皆得同伸憤恨嗣部臣以伯爵等次請欽定得旨李長庚著封三等伯承襲十六次襲次完時給予恩騎尉世襲罔替其卹賞銀著再賞給四百兩予專祠賜諡忠毅子廷鈺承襲封爵

許松年

許松年浙江瑞安人由武舉效力温州水師鎮標於乾隆五十九年補黃巖鎮標左營千總六十年升鎮海水師營守備嘉慶四年隨定海鎮總兵李長庚擊土盜鳳尾幫匪於温州三盤巖沈其艇一尋松年船爲賊困長庚往援之與松年內外夾攻船得出賊遁五年超擢定海鎮標左營遊擊六年正月隨李長庚擒楊烏等十九人於徐公洋四月隨黃巖鎮總兵岳璽擊洋盜蔡牽於衢港擒王山等十七人奪船一經浙江巡撫阮元奏入上嘉其出力下部議敘七年隨提督李長庚擒張如茂等十四人於潭頭洋復獲金人飛等八十七人於南甌洋奪船二沈船一焚船一九年二月升水師提標參將三月蔡牽泊於浮鷹洋松年隨李長庚擊敗之擒男女四十餘人斃十餘人奪船二焚船一獲紅衣礮刀械百餘十年正月蔡牽竄臺灣閩浙總督玉德疏劾金門鎮總兵奇貴延玩貽誤褫職逮問以松年在水師中最爲勇幹奏請護理金門鎮總兵率兵渡臺協剿上允之二月擊蔡牽於小琉球洋面斃賊數十人沈船一三月廣東艇匪烏石二竄入福建與洋盜朱潰合黨滋擾松年自琉球回至廈門卽日出大擔門駛至銅山追及於宮仔前洋面

斃賊無算四月在鎮海洋與李長庚合兵進擊瞭見匪艇向熨殼澳南竄追敗之於閩粵交界之甲子洋獲船二沈船二救出商船及被劫難民六月蔡牽與朱潰合竄浙洋李長庚檄松年會剿敗之於青龍港獲彭求等二十八人奪船一沈船二賊遁八月追及於斗米洋連擊二晝夜擒翁進壽等七十三人奪船二焚船二獲礮械百餘是月蔡牽與朱潰分竄南洋十二月蔡牽復竄臺灣密結臺地奸民攻郡城自北汕口至洲仔尾一帶排列多船與岸上賊往來接應並於鹿耳門鑿沈船隻堵塞口門以拒外援李長庚統舟師寄碇口外松年偕澎湖協副將王得祿率兵數百乘小船入安平十一年正月進攻洲仔尾賊以槍礮抵拒松年首先陷陣乘勢火攻焚船二十有二奪船九賊焚溺死者八百餘人擒林望等一百六十八人得旨嘉獎二月松年復潛師夜薄洲仔尾登岸焚賊寮及其船蔡牽自鹿耳門來劫安平松年返篷擊敗之沈船二旋與賊戰於海岸殲斃甚夥焚賊寮七八里還至海又焚其船四十餘蔡牽窮蹙欲遁以大船駛近鹿耳門李長庚統舟師南北截擊松年亦率兵夾攻獲賊百餘人奪船四焚船五尋海潮驟漲蔡牽乘潮遁舟師復追敗之獲賊二百餘人焚船九沈船六松年左手受槍傷以蔡牽未

經就擒借李長庚奏請革職治罪諭曰此次官兵攻剿賊匪大加殲戮該逆亡命奔逃其潰敗情形實屬顯然但不能將蔡逆立時殲獲李長庚許松年等疎虞之罪實無可辭惟查閱李長庚許松年二人兵船駐防之處李長庚係在北汕許松年係在南汕蔡逆係在北汕口內漸次竄出是許松年之咎較李長庚稍輕且許松年此次奮勇殺賊被賊槍子穿過左手功過尙足相抵況見在受傷可憫著免其革職仍留頂帶以觀後效尋追蔡牽於東港外洋斃百餘人沈船一蔡牽又以大船遁六月蔡牽竄鹿耳門朱潰竄銅山李長庚渡臺剿捕蔡牽閩浙總督阿林保檄松年於海壇竿塘一帶扼要截擊遂於張坑返埕等洋擒林祖建等七十四人獲船一沈船三阿林保奏朱潰匪船見竄古雷洋檄許松年移赴崇武一帶堵截不使與蔡牽合黨上是之七月擒曾左等二十四人於崇武洋八月蔡牽經李長庚剿敗竄水澳松年率兵截擊擒蔡三來等七十六人獲大船一九月阿林保奏臣細詢李長庚水師各鎮勇懦情形據稱各總兵祇可駕馭均難膺總統之任惟署總兵之參將許松年沈勇有謀可獨當一面報聞十月在三盤洋與浙省舟師會剿蔡牽擒李來等十七人獲船一沈船一上嘉之十二年正月蔡牽竄粵洋

松年與李長庚合剿二月追及於大星嶼松年率兵先進直攻蔡牽所乘船風浪陡起賊拋擲火器松年頭而手足均受傷收軍還泊肇慶賊船澳諭曰許松年在洋捕盜二年緝獲多犯並拏獲盜目大船昨在奧洋隨同李長庚攻圍蔡逆首先衝攏賊船身受多傷甚爲奮勇著加恩實授金門鎮總兵五月追蔡牽於急水洋遇粵匪鄭一幫船擊敗之沈其船獲首犯十一月擊蔡牽於浮鷹洋松年躍入賊船擒王澤等五十人獲大船一得旨下部議敘十二月李長庚在黑水洋追捕蔡牽中礮卒十三年正月諭松年偕提督王得祿等速擒蔡牽二月松年與福建提督張見陞在龜齡洋合擊粵匪擒王瑞等五十五人獲船二焚船一六月朱潰竄閩洋松年於料羅一帶截剿九月金門洋有賊船自臺灣私載硝磺內渡松年緝獲之得旨嘉獎十月以朱潰久在東涌外洋潛匿命松年放洋東渡會同臺郡舟師探蹤協剿十二月朱潰復竄南洋松年率兵入粵會同閩粵南澳鎮總兵胡于鏞追至長山尾見賊船四十餘內大船一知爲朱潰所乘松年督官兵併力攻圍槍礮並發溺斃無數朱潰受礮傷遁餘船紛逃舟師復追擒二十六人獲船一焚船三十四年正月朱潰因傷斃阿林保奏入諭曰朱潰在洋行劫稔惡已久雖不

若蔡牽之豎旗稱王亦係著名首逆今被官兵用礮打傷越十餘日斃命卽與臨陣殲斃無異總兵許松年率同守備黃志輝趕攔該匪大船專注攻擊槍礮齊施用能傷斃渠魁奮勇可嘉許松年著賞戴花翎給雲騎尉世職八月粵匪張保仔竄閩洋金門廈門一帶松年遣漁船數十誘之而以舟師出其不意突出痛剿復追至外洋乘風衝壓擒何來等六十六人獲船七沈船六上嘉其勇往下部議敘十五年正月以傷發解任回籍調理十六年丁母憂十八年服闋十九年正月授甘肅西甯鎮總兵尋調陝西延綏鎮總兵復調福建漳州鎮總兵二十二年直隸天津新設水師調松年爲天津水師總兵道光元年裁天津水師調廣東碣石鎮總兵尋升廣東陸路提督調福建水師提督三年四月渡臺閱兵適噶瑪蘭匠匪林允春等滋事松年督師入山搜獲首犯正法餘匪分別懲辦上嘉之六年四月臺灣北路有閩粵兩籍民人分類械鬪之案匪徒乘機煽惑焚掠村莊延及嘉義淡水等處時松年渡臺閱兵命其就近會同臺灣鎮總兵蔡萬齡知府陳俊千查辦七月以起釁及蔓延情形奏入上以松年未將煽惑糾鬪要犯究明擒獲所奏釁起實情及蔓延村莊亦未明晰命武隆阿爲欽差大臣馳驛前往會同閩浙總

督孫爾準妥速籌辦自許松年以下聽其調遣尋福建巡撫韓克均奏松年在臺查拏解散將次完竣孫爾準見已渡臺督辦不日即可蒞事諭武隆阿無庸前往八月孫爾準疏劾提督許松年辦理錯謬諭曰此案臺灣匪徒李通等挾黃文潤搜贓之嫌糾眾尋鬪黃文潤集眾抵禦格殺二人匪徒遂造分類械鬪之謠乘機焚搶經該縣王衍慶拏辦數賊匪徒遂竄彰化境內該提鎮等誤執民自械鬪官兵祇有彈壓不便加誅之說致該匪等益無忌憚具結復鬪見因官兵雲集均已解散提督許松年未能痛加懲辦乃邀集總董勸令講和失體損威辦理已屬錯謬又監提尙未定讞之兇犯吳谿等作線並在行閒乘坐肩輿何以率先將士許松年著卽革職留臺交孫爾準差遣效力贖罪十二月因病呈請回籍調理經孫爾準奏入命俟病痊後送部引見七年卒子錫麟襲雲騎尉世職嶽生候選州同廷恩議敘把總

邱良功

邱良功福建同安人乾隆六十年由行伍屢隨總兵李南馨出洋巡緝獲盜多名拔補外委嘉慶二年在祥芝洋先登盜船獲匪三十餘名遷把總五年擢千總遷

水師提督中軍守備八年九月擢左營遊擊十一月總督玉德以良功奮勇出力保奏堪勝參將之任十二月遷烽火營參將九年八月逆匪蔡牽在洋拒捕戕傷總兵胡振聲良功以失於防護革頂帶尋復還十年正月署閩安協副將偕署金門鎮總兵許松年過臺會剿蔡逆官兵出洋蔡逆已先竄追至小琉球洋良功見臺協外委許元良等二船被賊圍往救援松年舉旗招之未卽攏幫因劾良功不聽調遣致蔡逆竄逸詔革職交總督玉德審訊尋訊明良功以救援故不及攏幫復原官十月署臺灣副將蔡牽復竄臺灣滋擾良功隨浙江提督李長庚剿捕十一年正月諭曰李長庚帶領大兵抵臺在鹿耳門駐守應卽四面兜圍截其去路但恐該逆乘間逃逸則平安港口最爲緊要見在邱良功帶領換班兵船在彼防守恐兵力尙形單弱李長庚當添派兵丁義勇飭交邱良功令其悉心力堵禦如能將蔡逆攔截卽係邱良功之功當加以重賞若稍有疏虞卽惟邱良功是問決不寬貸三月攻破洲仔尾賊巢斬獲甚衆惟蔡逆乘間逸去命革良功頂帶仍責令帶罪立功五月蔡牽復竄入鹿耳門洋而良功偕副將張見陞王得祿等合力會剿良功首先衝入賊陣督率弁兵奮不顧身擒殺無算奪獲船械礮位賞加副

將銜賞戴花翎十二年七月賊目朱潰竄至臺灣北路淡水一帶游奕良功帶兵追至雞籠洋奮力攻擊連獲勝仗奏入諭曰朱潰幫船三十餘隻先後竄至雞籠洋經署副將邱良功會合總兵王得祿督率舟師攻擊拋擲火斗火罐賊船立時火起生擒匪犯林紅等十五名燒斃落海者約有六七百名餘匪敗竄奔逃窮蹙已極實屬奮勇可嘉邱良功著加恩交部議敘尋部議照一等軍功例給與功一等紀錄二次十三年正月授臺灣協副將六月遷浙江定海鎮總兵十四年正月擢浙江提督九月會同福建提督王得祿剿捕蔡逆南至魚山外洋督催閩浙兩省舟師專注蔡牽本船并力攻擊覆其船蔡牽及逆黨俱沈海奏入諭曰洋盜蔡牽原係閩省平民在洋面肆逆十有餘年往來閩浙粵三省擾害商旅抗拒官兵甚至謀占臺灣率衆攻城僞稱王號實屬罪大惡極王得祿邱良功協力奮追殲除首惡邱良功著加恩晉封男爵並賞翎管玉韞荷囊尋部議良功爲三等男爵照例承襲二十二年入覲回任卒於道諭曰邱良功前在福建剿辦洋盜著有勞績曾經賞給男爵世職簡任提督克共厥職茲在途病故殊堪軫惜著加恩照提督例給予卹典尋賜祭葬諡剛勇子聯恩襲

張見陞

張見陞廣東東莞人由行伍洊擢千總乾隆五十七年升海澄協左營水師守備六十年擢龍門協右營都司嘉慶元年署碣石鎮標中營遊擊三年升福建銅山營參將五年四月升浙江瑞安協副將十一月調福建臺灣水師副將七年三月擢福甯鎮總兵八年七月洋匪蔡牽竄入浙江洋面總督玉德派見陞與副將蔡安國在箬塘浮鷹等處洋面分布巡防十年六月上命提督李長庚專剿蔡牽見陞等帶舟師策應十一年四月會副將邱良功船巡至淡水滬尾洋面瞭見洋匪朱潰幫船四十餘隻奮力圍捕擊斃賊匪多名七月蔡牽匪船竄入鹿耳門洋面遊奕見陞與副將王得祿邱良功四而攻擊奪獲賊船十隻擊沈十一隻生擒賊目林略傅琛二名匪夥二百餘名割取首級一百餘擊斃淹斃者一千六七百名搜獲旗幟鳥槍器械無數上嘉其衝入賊陣奮不顧身加提督銜賞帶花翎並四喜玉扳指大小荷包總督阿林保奏兵船配定統帶之熟悉洋面之員上以見陞在水師將領中出色閩省新雇商船五十隻著專交其管帶八月擢福建水師提督十二年二月與總兵杜魁光在閩粵交界洋面截擊蔡逆蔡逆窮蹙竄粵復率

舟師防堵朱潰幫賊匪三月於三澎白鴨洋面兩次追擊朱潰大加攻剿轟燒盜船傷斃盜匪多名生擒十數名上嘉其奮勇五月蔡牽由粵竄回閩洋命昇陞與李長庚兩面夾攻八月追捕蔡牽至南日洋面連環攻擊擊獲盜船一隻擒匪犯林順等三名九月粵洋艇匪二十餘船竄入閩省象嶼洋見陞率兵追捕擊斃賊首奪大船一隻小船三隻生擒賊犯六十三名起獲旗械礮位數十件上以見陞奮勉出力賞玉扳指大小荷包並交部議敘十三年正月率舟師進剿蔡牽際見龜齡洋面有匪船大小六十餘隻與總兵許松年督兵攻擊擊沈匪船二隻焚燬一隻擊獲兩隻生擒賊目王瑞鄭阿由等五十五名奪獲礮械一百三十餘件餘匪四散奔竄二月在粵洋督師擊蔡牽坐船轟斃賊匪甚衆四月偕總兵黃飛鵬等兵船駛抵大星洋面瞭見土匪船三十餘隻在外洋游奕卽督師於芒嶼牛腳川等處擊捕奪獲盜船九隻燒燬一隻生擒一百三十二名五月於柑桔外洋遇粵東匪船十餘隻乘風竄至率衆攻擊生擒盜犯十七名起獲礮械四十三件旋以兵船低小收泊銅山修理朱潰匪船由粵竄入閩洋不能卽時擒獲經阿林保劾其距匪船甚近藉口修葺船隻觀望遷延請旨嚴加訓飭諭曰張見陞身任水

師提督海洋捕務是其專責且經奏明剿辦朱潰幫匪竟敢觀望遷延任令朱潰搶掠游奕實出情理之外前此李長庚捕賊受傷時張見陞同在粵洋並未聞有就近救援情事經朕逾格施恩不遽加之責備並因其在洋接仗給與甄敘方冀仰邀鼓勵倍形奮勉今距匪甚近觀望遷延若不加以懲創何以肅軍紀而靖海疆張見陞著革職拏問經將軍賽冲阿巡撫張師誠會審擬斬監候十六年五月諭曰已革水師提督張見陞前因剿捕洋匪不力革職拏問擬斬候查閱原案因屢被風阻不能前進以致盜匪遠颺覈其情罪與有心逗遛觀望失誤軍機者尙屬有間是以屢次秋審俱邀寬宥姑念監禁有年予以自新之路張見陞著加恩賞給千總發往福建水師營效力以觀後效十七年補提標左營千總旋升水師協左營守備十八年十二月卒

胡振聲

胡振聲福建同安人提督胡貴之子由行伍拔補千總乾隆五十三年擢福建海壇鎮左營守備五十七年調水師提標中營守備五十八年補閩安左營都司五十九年補海壇鎮左營遊擊嘉慶三年遷浙江玉環營參將四年補廣東龍門協

副將五年三月總督玉德奏振聲在浙緝捕盜匪於洋面情形素所諳悉以之補授溫州鎮總兵可期勝任得旨允行旋經巡撫阮元等奏會勘洋匪事宜諭令定海鎮總兵李長庚總其號令振聲與黃巖鎮總兵岳璽聽其關會協同策應九月探聞水溪鳳尾兩幫盜船在洋游奕卽督率兵船駛至盜放礮迎敵振聲督同將弁奮勇攻擊自卯至午盜匪受傷落水不計其數追至北甌外洋盜匪大船被兵船礮轟沈沒匪徒落水四散拏獲盜匪三十二名割首級五十二顆上以振聲所轄之北甌外洋有盜船游奕並未確探速捕實屬疏玩著交部嚴議尋奉旨降三級從寬留任六年七月蔡牽等追劫商船自閩竄浙總兵岳璽李長庚沿途追擊振聲會剿之獲洋匪陳贊等一百四十名斬首四十八沈溺盜船及獲器械無算奏入上嘉之下部議敘九年六月振聲以兵船二十六隻與海壇鎮總兵孫大剛會捕洋匪蔡牽駛至浮鷹洋面瞭見匪船游奕督率將弁奮勇追擊賊匪迎拒振聲與孫大剛夾攻自未至酉賊匪受傷落水甚多而振聲以坐船逼近山麓一時不能轉運被賊擲火焚燒振聲被害經總督玉德奏入諭曰胡振聲在洋被盜戕害殊可矜憫著加恩照提督陣亡例賜卹伊如有子嗣著於服闋後送部引見尋

議給騎都尉又一雲騎尉世職繼子廷恩襲

岳起

岳起滿洲鑲白旗人姓鄂濟氏由文生中乾隆三十六年舉人四十二年由方略館議敘補授昭西陵筆帖式五十年升戶部堂主事五十三年升本部員外郎五十四年升翰林院侍講學士五十六年升詹事府少詹事旋擢奉天府府尹五十七年升內閣學士兼禮部侍郎五十八年授江西布政使因查水災致疾告假歸旗調理諭曰岳起自簡任藩司以來辦理地方事件尙爲妥協今因查勘被淹圩隄落水致病殊屬可惜岳起著卽回旗調理嘉慶四年病痊授山東布政使旋擢江蘇巡撫九月奏清查漕務積弊曰京中所關俸餉米石久有回漕米之名積習相因惟弊是營竟置米數之盈絀米色之純雜於不問是以旗丁領運無處不以米爲挾制卽無處不以賄爲通融糜費至今有加無已推原其故沿途之抑勒由於旗丁之有幫費而旗丁之需索幫費實由於州縣之浮收竊思欲除一弊先絕其源而禁止浮收實爲絕弊源之首應請諭旨敕下有漕諸省各按本省情形詳細籌畫列款指明嚴行禁止俾各省旗丁及漕運倉場諸胥役無從更生觀望冀

俸之心奉硃批所指浮收折價及旗丁挾制需索各事實爲切當其另單所開幫船費用出運陋規及南賑北賑名目足見實心查覈將歷來積弊和盤托出從此按款清釐逐條嚴禁可期漕務肅清是月奉廷寄胡觀瀾結交鹽政長隨高柏林修寺派累一案情節據實具奏尋奏查廣福寺年久坍塌非保惠民生之要工自應聽寺僧自行募修今高柏林係鹽政長隨希圖誇耀鄉里慫恿鹽政徵瑞捐銀五千兩胡觀瀾以知府大員明知工程浩大非五千兩所能辦理有意逢迎輒令該縣選舉董事飭發印簿派捐鄉鎮復因催繳不前差追滋擾以致民怨沸騰今胡觀瀾已經革職永不敘用高柏林亦已遞回原籍管束尙不能安服衆心相應請旨將前捐錢二萬七百十串卽於胡觀瀾高柏林二人名下各半追賠惟查各商民所捐之錢爲數零星若令按戶給還轉恐書役地保頂冒侵蝕查蘇州一帶官塘石路橋道攸關閩浙等省文報且爲糧船經由繹道多有殘缺亟應修理請將胡觀瀾等罰賠之錢留爲修理塘務工程之用得旨允行五年署兩江總督五月查辦南河積弊人員莊剛劉普等侵漁舞弊奏入莊剛劉普逮罪七月奏揚州關徵收盈餘溢額稅銀儘數報解以歸覈實十月奏江蘇藩司耗羨酌覈刪減同

閒款各實存銀數造冊報部惟有率同詳慎覆覈加意撙節不致稍有浮濫俱敕部施行十一月借總督費淳奏陳江浙輕齎米石原定折價每石五錢爲數太少本不足以服旗丁之心但因旗丁運費不敷竟全行改爲本色百姓以銀交米頓覺浮多亦有難行之勢與其以虛名致旗丁轉生覬覦莫若徵收實數俾民丁永絕葛藤應請嗣後江浙輕齎折價以十成折算分爲四六將六成改徵本色以撫旗丁四成竟與豁免以惠百姓奏入上敕大學士九卿會議駁曰據該省市價每石總在二兩上下約略覈算完納前納六斗之米較原定折價幾多至一倍有餘是使小民虛受四成之名轉增六成加本之累實與加賦無異況折徵銀兩尙虞加耗滋弊今若改徵米石更可藉口浮收國家愛民薄斂之政業經百有餘年未便輕議更張事遂寢六年二月奏審明職衿韓怡呈控紳士鄒光國妄呈知縣黎誕登實政黎誕登於衆紳之前將所辦之事自行誇張欲人見好迨王文治攢集實政索看後並不將溢美之處深自引咎亦不將保留之議自行阻止洵屬沽名釣譽且貼給夫價毫無覺察李魏氏在逃三年未獲於贖房細事擅責生員又將久經例禁之房不拆實屬溺職應照例革職奉旨依議四月奏借項挑築河堰以

資保衛毛城鋪迤下洪減等河又天然開下河道前因邵工漫水下注以致河身淤成平陸兩岸堰工衝塌必須挑浚深通補築堰工以資黃河分洩暢達無阻上游之河南永城縣洪河下游蕭碭等縣境內河堰尤應趕緊挑築其所借銀兩分作五年按畝攤徵庶民力得以舒徐田疇得以利賴得旨允行五月奏審河工舞弊人員莫澧身列職官乃公然於任所開設店鋪及將貨物運至工所居奇網利漁弊及賤役民夫種種卑鄙巧詐實屬不堪奏入莫澧擬罪八年來京陛見以疾留京署禮部右侍郎七月承辦孝淑皇后永遠安奉事儀之王大臣禮部堂官於會奏摺內粗心疎忽措詞不經諭曰岳起見在患病著不必署理禮部侍郎仍以革職留任註冊是月卒諭曰岳起自簡任封圻以來雖歷年未久而操守清潔在督撫中最爲出衆前日來京時見病後體氣未充特令留京調攝以冀速痊茲聞溘逝殊堪軫惜岳起著加恩加贈太子少保銜照侍郎例賞給卹典其各任內降革處分悉予開復至伊見無子嗣同族又無堪繼之人所有伊家墳墓祭田無人經管著該旗照例查辦八月本旗奏臣等遵將諭旨宣示岳起之妻孀婦隨將伊家見有房四間契紙一張地七十六畝內除給族衆作爲墳地四畝並本家立墳

地十五畝下賸地五十六畝五分契紙七張呈旗查辦查定例凡有官無子嗣呈出應入官地至一頃以下准以三十畝爲祭田其餘畝全行入官今岳起係有妻室復蒙聖恩優渥之人伊妻孀婦呈出地畝不敷一頃若按例辦理轉覺有負聖主鴻施臣等遵奉上諭將岳起之妻呈出房契一張地契七張卽存貯該旗於每年應得租錢京錢四十千文仍交伊妻孀婦作爲祭埽修墳之用俟岳起妻沒後將呈出五十六畝五分地交該旗佐領於所得租錢派人承管一半作爲祭埽之用一半作爲修理墳塋之用得旨依議

清安泰

清安泰費莫氏滿洲鑲黃旗人乾隆四十六年進士授刑部主事五十一年擢員外郎五十二年授甘肅涼州府知府五十六年以署蘭州府事鞫審得實上嘉其留心政事送部引見五十八年擢湖南衡永郴桂道六十年苗匪滋事總督畢沅令清安泰於保靖花園一帶撫綏降苗尋以督餉奮勉賞戴花翎嘉慶元年先後解送首逆吳半生石三保赴京擢湖南按察使五年擢廣西布政使六年以上林縣買補穀數造冊舛錯部議降一級調用恩予留任七年署廣西巡撫八年調浙

江布政使九年浙省糧價昂貴清安泰隨巡撫阮元捐銀以濟民食上嘉其急公十年擢江西巡撫尋調浙江巡撫十月奏言浙西杭嘉湖三府上年歉收有緩徵漕米十一萬七千餘石本年春夏雨多麥蠶並歉請再緩至來年徵收以紓民力得旨如所請行十一年三月奏言閩浙兩省新造艇船係畫一造辦今閩省報銷經部議覈減著賠者已恩免追繳浙省請一例邀免上允之八月洋匪蔡牽北竄浙洋清安泰馳赴溫台一帶嚴禁小船出口透漏米石火藥並飭弁兵分路追剿洋匪不能近岸樵汲仍竄去上以清安泰認真防堵嘉之時總督阿林保劾提督李長庚私回衙署捏報獲盜請褫職治罪諭曰清安泰見在溫台一帶所有李長庚追賊情形知之必悉著卽秉公詳查具奏尋覆奏長庚督捕奮勇並無玩盜捏報狀上嘉其所論公正事見李長庚傳九月奏言沿海村莊編查保甲凡散處海畧之居民鋪戶一律編牌造冊其寄寓遊民卽責成房主鋪戶考察如有行蹤詭祕立即稟究並稽查出入米數以杜販運濟匪禁止製賣花礮以杜火藥透漏至海口採捕小船恐有奸徒溷跡均飭沿海員弁隨時查禁上是之十二年五月平陽縣監生莊以莅抗糧奪犯毆官命清安泰督同江蘇按察使百齡審辦鞠實報

聞時譌傳蔡逆於祥芝洋礮傷斃命七月清安泰奏言臣以該逆因傷斃命之處祇係漁戶傳述焉知非該逆故散浮言以爲緩剿稽誅之計見在諄囑李長庚探聽匪船下落趕緊剿擒卽該逆眞已傷斃亦須根求證據方可信以爲實其遺夥亦須乘時殲除萬勿輕聽浮言稍涉觀望致失事機上謹其言九月偕阿林保奏温州府屬外洋東白等六山向隸樂清縣山外洋面向歸温州鎮中營管轄請就近改隸玉環廳其洋面改歸玉環營管轄於緝捕有裨下部議行十月劾温州府知府楊兆鶴妄報緝捕邀功狀得旨褫兆鶴職時蔡逆仍竄浙洋其子二來登岸入普陀寺燒香事聞諭曰蔡逆爲積年巨盜亟應躡蹤追捕盡絕根株今伊子二來膽敢入寺燒香毫無忌憚可見該督撫等所稱嚴防口岸及蔡逆窮蹙之語全不足信而浙省地方官尤爲鬆懈清安泰尙敢覩顏入告乎尋命交部議處十二月調河南巡撫十三年正月清安泰以浙省漕幫回空阻淺耗費甚多奏請將應行扣還恩借本息行月米價並嘉慶九年十二月造船公借銀兩暫緩分扣奉旨俞允旋莅河南任四月劾糧道孫長庚擅動庫項放債漁利狀下部鞠實論罪十四年四月卒

恩長

恩長覺爾察氏滿洲鑲藍旗人父鍾音官閩浙總督授禮部尙書自有傳乾隆三十年遵川運例捐員外郎選盛京戶部四十二年調回京補兵部員外郎充軍機章京四十六年三月授河南南陽府知府十月遷直隸霸昌道十一月調口北道五十一年升湖南按察使五十八年以失察屬縣捕役誣良斃命降三等待衛爲和闐幫辦大臣嘉慶四年調辦事大臣五年奏和闐回戶因原種官地年久迷失歲納空糧者共有七百五十餘戶茲於塔克一帶地方丈出官荒地二萬六百餘畝可資開墾請照額糧多寡均勻撥補從之尋受代回京六年授安徽按察使七年擢廣西布政使十一年遷巡撫十三年二月學政祁墳任滿回京奏劾臬司王家賓年老降旨查詢恩長始行奏明上以其徇隱飭之八月因岑溪縣知縣黃通等濫批釀命屬差賄和恩長誤擬絞候經刑部駁正自請議處諭曰該撫原擬錯誤固有應得之咎惟因黃通等身係職官其犯罪與常人有間又律無明文是以比照定擬其科罪失入尙爲警惕官方起見所有應行議處之處著加恩改爲察議尋議降二級調用上改爲降三級留任十四年調河南巡撫十五年奏豫省衛

輝一帶著名河流有三一衛河一洹河一漳河自乾隆五十九年漳水南徙挾洹入衛每至夏秋盛漲勢無收束致直隸河南所屬地方屢被淹浸見在漳河形勢北高南下故道既難修復而兩岸俱係浮沙又非築隄所能堵禦查內黃縣之南豆公北豆公村爲漳衛經過口門且係蘆鹽豫漕轉運要路擬於該處春秋兩次大加疏濬歲需挑費銀八千餘兩令豫省有漕州縣及長蘆鹽商攤捐從之十六年以南陽府匪徒王膀子等糾衆搶劫持械拒捕恩長查辦遲延並失察已革道員林樹芳劣蹟及縣丞冒冠德許賄求升等款降三等侍衛爲烏里雅蘇臺參贊大臣十七年遷二等侍衛調喀什噶爾參贊大臣十九年二月以失察阿奇木伯克玉努斯營私罔利苦累回民並私行遣使與浩罕伯克愛瑪爾通好部議革職諭曰恩長於玉努斯種種劣蹟未能查參本有應得之咎念其到任在後已加恩改爲革職留任當深知感愧於所管各事務加意經理卽不諳回語亦當慎選通事察言觀色留心聽斷設有錯誤必將伊從重治罪伊係已經獲咎之人當倍加謹慎也十月召回京二十年因前在廣西巡撫任內於貴縣匪徒顏亞貴等糾衆不法審擬錯誤部議降一級調用命以員外郎降補復以失察喀什噶爾阿渾仔

牙墩謀逆革職二十一年卒子保善工部郎中

顏檢

顏檢廣東連平州人父希深官兵部左侍郎自有傳檢乾隆四十二年拔貢朝考一等以六部七品小京官用籤分禮部拔貢用京官自是始四十三年丁母憂四十五年丁父憂四十八年服闋五十四年升主事五十五年遷員外郎五十六年扈蹕灤陽校射中四矢賞戴花翎五十七年升郎中五十八年授江西吉安府知府五十九年擢雲南鹽法道嘉慶二年正月調迤南道四月剿辦威遠裸匪帶領兵練擒獲裸首扎杜上嘉其功賞加按察使銜十二月升江西按察使四年升河南布政使尋調直隸布政使五年護直隸總督疏言通水道所屬楊村通判駐劄處所距天津近而距通州遠請改歸天津道管轄下部議行東明縣民李車強姦七歲幼童趙六不從起意致死疊斫十五傷於保辜限內治愈檢以李車淫惡逞兇未便拘引常例請絞立決得旨所議甚是又永年縣民梁自新勒斃繼妻白氏及媳張氏一案訊由氏攜前夫女張氏再醮梁自新自新子有幅以愚駭爲白氏所嫌時加凌虐自新念係獨子媒聘張氏爲有幅妻冀白氏因愛女并憐其子詎

白氏憎詈如故復縱張氏與族孫梁順先通姦爲自新父子窺破遽商同謀毒有幅經自新搜出毒食忿欲鳴官白氏母女轉驅逐有幅自新憤極先後將張氏白氏勒斃準律毆妻至死應絞監候惟白氏怙惡不悛與夫恩義已絕與尋常斃妻有間請從輕改擬杖流上躓其議加恩減爲杖一百徒三年六年三月疏請復旗租原額以紓民力諭曰直隸省回贖旗地租銀因地方官經理不善以致拖欠至十三萬餘兩節經前任督臣胡季堂奏請調劑迄無善策而汪承沛復有將官地變價之請事涉紛更尤爲非體著加恩全行減免其餘額徵租銀年清年款毋許仍前延玩六年四月擢河南巡撫先是檢弟顏樾由舉人大挑一等王大臣避嫌扣除諭曰廣東舉人顏樾業經王大臣挑取一等後因係顏檢之弟復經扣除朕本欲俟會試揭曉後另行加恩今榜發未經中式顏檢平日居官公慎伊弟顏樾著加恩仍作爲一等九月奏增豫省武職荆子關添設副將一員都司一員千總把總各一員外委額外外委各一二員廬氏縣汛添設守備把總各一員朱陽關添設千總一員新野汛添設遊擊一員千總額外外委各一員彰德營添設參將一員千總把總外委額外外委各一員內黃汛添設外委一員內黃縣之楚旺地方

係河南通省兌漕重地添設千總一員從之十一月獲西華縣隆勝溝地方土棍張愍子等首夥各犯上嘉其妥速鎮靜七年二月違例奏補羅山息縣知縣部議降一級留任上以檢平日辦事尙好改罰俸四月署直隸總督諭曰顏檢曾任直隸藩司護理督篆辦理地方事務尙屬認真伊資格較淺著以兵部侍郎銜署理直隸總督九月擢直隸總督諭曰本年直隸總督缺出因顏檢資格稍淺特令以兵部侍郎銜署理抵任以來將及半年辦理公事尙無貽誤顏檢著加恩實授直隸總督並加兵部尙書銜尋賞穿黃馬褂八年三月奏改直隸涿州管河吏目爲北岸三工巡檢霸州管河吏目爲北岸六工巡檢滄州減河吏目爲滄州風化店減河巡檢專管河務從之五月面奉訓諭具摺奏謝諭曰君臣相得亦非常之緣不可思議卿當思頌不忘規朕若有叢脞之處必密行進諫切勿不言不言則爲負恩矣卿若有失算之處朕必加譴責斷不姑息姑息轉爲私德矣勉之誌之六月請將元城大名南樂清豐四縣捕務責成大名府同知管理改爲兼河捕盜同知長垣開州東明三州縣捕務仍歸大名府通判管理兼管通屬鹽務得旨允行七月以永定河三汛安瀾賞加太子少保銜諭曰顏檢自入夏以來駐工防汛督

同道廳各員隨時搶護各工俱臻穩固宜防盡力殊屬可嘉是月直隸各州縣蝗害稼檢奏三河昌黎樂亭三縣並無蝗蝻其餘如遵化豐潤玉田灤州盧龍遷安臨榆等州縣間有飛蝗過境俱在空際飛揚並未傷及禾稼諭曰飛蝗過境之處道里縣長豈有久飛不停之理既經停歇斷不能忍飢待斃又焉有不傷禾稼之理總由地方官規避處分非以有報無卽以不傷禾稼之語諱匿具詳視爲故套顏檢自不肖飾辭陳奏而地方官誑報積習實不可信朕聞三河一帶蝗蝻不但飛集田疇卽大路旁亦紛紛停落而豐潤竟有填積車轍者此皆過往官員日擊之語顏檢不可聽屬員稟報遂以爲實仍當詳細訪查期於秋收無歉儻該督不認真查辦經朕查出恐不能當此重咎也八月奏請將大城等各州縣旗租全行豁免經部覆豁免十分之五復以戶部繕寫錯誤仍咨請更正部臣以聞命傳旨申飭尋諭曰前因戶部具奏直隸督臣顏檢請將大城等七州縣旗租例應蠲免五分者於奉到部覆後仍咨請查覈更正全行豁免曾傳旨申飭仍照部議行旋經顏檢於差次而奏此項旗租業已頒發膳黃與民糧一體全行豁免此係加惠黎元之事所有大城河間新河甯晉隆平新安安州七州縣及宛平文安二縣應

徵七年各項旗租著加恩全行豁免至該督於奏請時如欲將旗租與民糧一律請豁則當聲明從無全免之例懇求破格施恩方爲正辦何得含糊聲敘以致辦理歧誤著交部議處是月以查辦水利工程請酌加鹽價爲興修之用上命大學士九卿會議尋議駁諭曰九卿議駁顏檢等籌辦水利工程請加鹽價一摺此事本屬難行鹽斤加價不獨係病民之舉且官鹽價昂則私販愈多滯銷愈甚於鹽務亦屬無益若以興修水利爲詞則該督等所奏每歲僅將加價銀六十餘萬兩歸入河工於目前修濬事宜亦屬緩不濟急顏檢向來辦事認真此奏未必全係該督主見自係賽尙阿輕聽商人之言從旁慫恿而顏檢卽會同入告殊屬非是著傳旨申飭九月奏請緩徵文安大城雄縣安州新安河閒青縣靜海隆平新河等州縣新舊錢糧允之九年二月京察屆期上以顏檢辦理地方一切事宜阻勉妥協下部議敘四月謝恩並自陳惶悚微忱諡曰常持此心不令稍放自能永受多祐朕以自勉之心望卿慎勿稍忽復諭曰物阜民安節度方能愉快近日望澤頗殷未能霑漑朔日內苑例陳龍舟水戲亟命罷之以承天澤赦過愆農曷勝企望六月以廣渠門外及通州等處間有飛蝗上命檢查明具奏尋奏蝗不成災諭

曰昨據奏見已捕盡並稱飛蝗不傷禾稼惟食青草殊不成話范建豐赴廣渠門外見田禾被蝗食者已有十分之四尙得云不傷禾稼乎顏檢不應出此當於摺內批示該督平日辦事尙爲認真惟於摺內每敷陳吉語未免近於虛浮朕勤求治理惟日孳孳總以實不以文卽景星慶雲前史所稱朕皆不以爲瑞必果係時和歲稔家給人足方爲有象太平豈可稍有粉飾如顏檢之好語吉祥則屬員等意存迎合偶有地方災歉必不冝據實直陳閭閻疾苦壅於上聞吏治民瘼大有關係仍著顏檢迅派妥員分投查勘務期撲捕淨盡如有傷殘禾稼收成稍減之處卽據實查奏候朕加恩毋得仍前諱飾致干咎戾本日御製見蝗歎一首並錄交顏檢閱看尋奏陳實在情形並自請嚴議諭曰前因京城廣渠門外及通州等處間有飛蝗一面派范建豐前赴查勘一面諭令顏檢將直隸地方有無蝗蝻滋長之處悉心查明具奏旋據該督奏稱均已撲除淨盡嗣於前月二十九日朕齋戒進宮披覽章奏適一飛蝗集於御案當令撲捕經太監等捕獲十數箇因思宮禁既有飛入者則郊原四野不知更有幾何旋即派員四路查勘茲據奏馳赴宛平縣屬之水屯八角二村查勘該處七八十畝之廣穀粟被傷約有三四畝復據

大興宛平通州武清新城遵化任邱容城涑水固安保定滿城等州縣稟報所屬村莊均有蝻子萌生見在上緊捕除可見如許州縣均有蝗蝻若非特派卿員馳勘顏檢仍未必據實直陳前此所奏實不免於粉飾顏檢奏請嚴加議處之處本屬咎所應得姑念該督平日辦事尙屬認真著加恩改爲交部議處嗣後惟當痛改前非實心任事遇有地方災歉事務尤當一面查辦一面據實陳奏俾閭閻疾苦不致壅於上聞方爲不負委任如再有諱匿遲延經朕查出必將該督嚴行懲處不能曲爲寬貸矣七月東鹿縣民王洪中獄上諭曰此案王洪中被張文觀糾衆尋毆寫呈具控復被張文觀等揪落髮辮剝脫衣履王洪中赴省在臬司處控告批府該府卽應親提訊辦輒委之分發試用初學審案之知縣黃玠審訊偏信張文觀等一面之詞稱王洪中素不安分疑爲誑告轉將干證等各加掌責遂至順口捏供迨經稟府覆審吳兆熊仍不虛衷研鞫復將王洪中掌責以致王洪中受屈自縊王洪中平素卽係刁健而就案論案實因官司負屈莫伸輕生自縊皆由該府縣偏聽枉斷所致總督顏檢據詳率結已屬非是況此次在差次召見經朕詢問伊等但奏稱係屬尋常鬪毆案件於部訊各情節竟茫然不知可見該督

等於此等民人負冤上控之事並不親加伸理委之首府審辦任令顛倒是非出入人罪似此玩視重案國家又安用督撫藩臬爲耶顏檢著交部嚴加議處尋議革職上改爲革職留任九月永年縣民郭四獄上上以此淫兇重犯不容一日稽誅該督仍照尋常案件奏請敕部覈議實屬拘泥命傳旨申飭十二月奏陳各屬文武年終考語得旨知人則哲惟帝其難今之慎終如始者鮮見利忘義者多朕實愧知人之明願卿留意勿被人欺勉之十年四月刑部以逆犯劉士興獄上諭曰直隸民風素稱良善乃劉士興一犯平日在藁城地方與周廷敬等結拜兄弟並向魏迎春學習槍棒其好勇鬪狠本非一日竟敢於禁門外持械逞兇實爲罪大惡極地方官稽查姦宄責任綦嚴如尋常賭博細故尙皆申明禁約何至此等匪徒傳習槍棒毫無見聞總督顏檢著交部議處部議降調上以劉士興平日尙無逆跡彰著此次持械突至禁門原非意料所及命改爲降一級留任是月奏敬承諭旨嗣後加意整飭屬吏諭曰方今中外吏治貪墨者少疲玩者多總尙因循每多觀望大臣不肖實心惟恐朕斥其專擅小官從而效尤僅知自保身家此實國家之隱憂不可不加整頓卿係心腹之臣故將此旨諭知卿其勉之又奏言敬

承聖訓推廣管見屬員平日出力處如果超衆而所罹不是輕而可原仍當教導成全以協爲國儲才之義諭曰屬員中不肖者乃殃民之官斷不留於治世如近日廣西之孫廷標湖南之董如岡去其已甚正所以保全餘者能多幾員改過之人保全百姓之元氣多矣以此類推知其略矣非教卿存心刻薄嚴厲御下也五月奏劾易州知州陳漢虧空纍纍並自請嚴議諭曰陳漢在任八年虧空倉庫正雜錢糧銀九萬八百餘兩又捐雜各款銀二萬一千五百餘兩地方官於帑項任意侵那該管上司扶同徇隱若不嚴行懲辦何以清帑項而飭官方顏檢係由本省藩司升任總督於屬員倉庫虧短並不早爲參辦著交部嚴加議處尋議擬任諭曰各省倉庫錢糧均係國帑儻有虧缺卽當按律治罪節經降旨通諭各省督撫令其督率清釐毋許屬員續有虧那不啻至再至三而類檢歷任直隸藩司總督總未據實入告每於差次逐日召對面加垂詢亦未將實在虧短情形備悉密陳祇圖含糊了事實則並未上緊查辦顏檢好爲虛語意存粉飾屢經訓飭仍不悛改一味徇庇屬員因循推諉以致各該州縣無所畏懼藐法營私前欠未補抑且任意續虧今易州一處虧空正雜款項至十一萬餘兩之多皆由各上司沾名

見好遷延不辦所致本日吏部議奏將顏檢降四級調用因本有革職留任之案無級可降應行革任此專指易州一案而言合之通省續虧之數該督獲咎甚重本應革職治罪姑念顏檢平日尙能辦事操守亦尙謹飭破格施恩著賞給主事銜在吉地工程處效力仍帶革職留任八年無過方准開復六月以永定河隄工蟄陷諭曰直隸總督職司宣防此次隄根汕蟄自因辦理草率所致顏檢前在直隸總督任內何以並不留心稽查責無可辭傳諭顏檢刻卽馳赴永定河北岸隄工隨同那彥寶辦理堵築事宜勉贖前愆如查有應行賠修工段卽著落顏檢等賠修是月以直隸省上年情實人犯刑部由緩決改情實者十四條得旨督撫臬司於秋讞事件自應詳慎參覈分別定擬緩實期於無枉無縱乃顏檢傳修於兇毆斃命各案輒從寬貸且將原擬情實之犯無故改擬緩決似此心存姑息欲邀寬厚之名而不顧死者含冤地下該督等於此等情真罪當之犯尙思曲爲末減又何能整飭吏治無怪乎屬員罔知儆畏於倉庫任意侵那日久不行彌補並有續虧該督等一切置之不問尙復成何事體直隸省諸事因循廢弛卽此次辦理秋審失出至十二案之多而前實後緩者又有兩案顏檢傳修卽見任總督臬司

其咎已應罷黜況前於辦理清查案內業經獲罪顏檢前經賞給主事銜令在永定河工次效力今辦理秋讞似此謬妄實屬辜恩顏檢著革去主事職銜仍在工次效力以爲各省大吏闡茸廢弛者戒十一年七月諭曰顏檢前在直隸總督任內於各屬虧缺庫項因循不辦任令監追各員在省閒住復於秋讞情實案犯改擬緩決有意輕縱該員在工效力已閱年餘其才具尙不至終於廢棄其罪亦非必不可恕見在南河要工林立顏檢著賞給五品頂帶發往江南差遣委用接奉此旨卽著迅速前往如果奮勉出力鐵保等卽據實奏明將顏檢以同知補用先是直隸省官吏勾通侵吞帑項歷有年所事覺諭曰該省官吏幕友長隨人等敢於一氣勾通將國家正帑任意侵吞明目張膽毫無忌憚歷任總督藩司懵然不知竟同木偶所司何事爲從來未有之案朕不得不從嚴加重辦理顏檢本係在直隸總督任內獲咎之人經朕節次施恩棄瑕錄用賞給同知發往南河效力今伊在總督藩司任內復有此重大之案實難再爲曲貸顏檢著革去頂帶著鐵保派員押送來京聽候部議尋議革職上以革職不足蔽辜發往烏魯木齊效力贖罪十三年三月命釋回令其自備資斧前往南河工次差遣委用十四年六月命

以主事充西倉監督十月調大通橋監督十五年二月調戶部主事三月授湖南岳常澧道五月授雲南按察使十六年六月授貴州巡撫具摺謝恩得旨潔清立身汝之長處剛方御下汝未能及所以被人欺侮今世小人多於君子一味厚道斷乎不可勉力振作爲要十七年正月奏謝頒賞福字得旨貴州民情不似從前淳樸有習西洋教者有販賣人口者汝不嚴究又似先時懦弱情形矣若再犯國法朕斷不輕恕慎之勉之二月給事中何學林奏劾貴州傳習天主教各鄉聚集數十人及數百人不等省城之北門外尤甚又思州府等處有拐匪各據巢穴誘拐婦女地方官俱不嚴行查辦諭曰思州平越等處距省尙遠或係府縣官隱匿不報至省城北門外傳習天主教者實繁有徒該撫駐劄省垣豈竟毫無聞見乃漫不經心所司何事顏檢係獲咎之人經朕棄瑕錄用仍畀以封疆重任倍當激發天良力圖報效今該省有此奸匪伊未能早行查辦已有失察之咎著該撫卽督率所屬將省城關外各處傳習天主教教徒及思州等處拐匪分飭嚴密查拏以靖地方而除積患若因循姑息釀成大案其咎更重於失察書吏侵蝕錢糧矣思之慎之御史王開雲奏陳黔省近年略販人口之風甚熾諭曰顏檢身任封圻

戢暴安良是其專責今該省有此奸匪略賣興販干禁病民伊已失察於前若再因循姑息不認真查辦其咎更重朕追論前愆一併懲治恐該撫不能當此重譴也五月命來京候旨先是灤州民董懷信等傳習邪教事覺吏部議上歷任總督等官處分上以顏檢在總督任內最久並曾任藩司其咎較重降二級以京員用八月復以直隸涿州知州徐用書交代含混經侍郎景安等查明奏參諭曰前任總督顏檢被屬員朦混據詳率奏屬實憤憤豈能復勝京堂之任著於到京後以六部郎中降補十八年補工部郎中十九年六月授山東鹽運使七月命以三品頂帶爲浙江巡撫十二月以杭嘉湖三府旱疏請豁除蠲緩允之是月奏請開濬西湖其略以爲杭州之西湖聚南北諸山七十二泉之水瀦而爲湖仁和錢塘等州縣及嘉湖二郡田畝均藉此湖灌溉且許村西路黃灣等場商人掣運鹽斤賴以浮送實爲浙省緊要水利從之二十年正月諭顏檢曰汝操守好才幹優所欠者愛惜小陰功心慈面軟不能振作是以屬員祇知懷德而不知畏威吏治敝壞皆由此起猛以濟寬汝其勉之五月西湖山內厝棺被竊獄上命刑部覈議尋經議駁諭曰此案俞瑞祥等燒棺竊取財物自有撬棺移屍情事該撫所稱並未損

及一骨殊難憑信明係將賊犯罪名從輕問擬豫爲地方官開脫處分顏檢向來辦事疲輒經朕棄瑕錄用乃於地方竊盜案件仍縱惡養奸因循怠玩不能實力整頓又欲爲部曹乎著傳旨申飭七月武平縣民劉奎養等結會傳徒獄上諭曰此案劉奎養聽從在逃之謝懶勳糾入添弟會給與祕書一本顏檢既經起獲卽應向該犯等追究係何人編造作何行用乃僅將該犯等照復興添弟會名目加重問擬斬決並未研究該犯等有無謀爲不軌情事實屬草率顏檢因循疲玩總不能改姑著交部議處十二月西湖厝棺被竊之案復經御史蘇繹參劾命侍郎成格等往讞訊明俞瑞祥等均非燒竊厝棺正犯係由縣役差緝正賊未獲畏懼比責賄囑誣認諭曰此案若非特派大員前往查辦幾至以假亂真使正賊轉得漏網成何事體顏檢前任直隸總督卽闖茸不職以致地方廢弛邪教萌孽滋生後遂釀成大案迨由貴州巡撫降補郎中因一時簡用乏人又加恩擢授浙江巡撫顏檢蒙屢次棄瑕錄用之恩自當力圖奮勉乃仍復因循怠玩無能已極且年已就衰難望振作卽著照部議革職回籍家居閉門思過二十四年恭逢萬壽入都祝嘏奉旨以六部員外郎卽用二十五年七月補刑部員外郎十二月擢福建

巡撫道光元年疏陳編查白底漁船以靖盜源其略以爲奸弊必有由起防察須究其源閩省下游各郡民多操楫爲生舊例凡商漁置造船隻由地方官取結給牌出入各汛口一體挂驗又復烙號書篷將船戶姓名懸於目睫如有在洋作奸犯科情事人皆一望瞭然立法未嘗不周無如狡猾之徒行爲詭祕常有私置船隻或向人轉租私賣假冒原主名姓混越出口陽託採捕爲名實則隱圖劫掠大爲商旅之害查各澳船隻出洋貿易者惟有白底船卽大漁船一項每屆春冬駛往浙洋捕鱸釣鱒其初原無爲盜情形若漁汛愆期無利可獲往往乘間伺劫舊例烙號書篷易於塗滅仍屬有名無實惟有編立甲牌以十船爲一甲責令該澳甲族房長取其連環保結一船爲匪九船連坐嗣後飭領本籍牌照不准於鄰縣請照亦不准將船租賣別縣民人以杜假冒庶守分者不敢妄爲玩法者知所儆懼得旨所辦甚善務在實力實心地方文武員弁認真稽查奉行毋懈如有疏防玩縱情弊爾督撫等卽據實奏參勿稍徇隱以靖海疆勉之二年正月復擢直隸總督先是直隸藩司屠之申奏直隸差務殷繁議請於每地一畝攤徵差銀一分以均徭役上命俟顏檢到任後妥議具奏尋奏稱減差均役之說實不可行其略

曰自古有治人無治法立政貴持大體無事紛更守土重在得人自臻治理見惟有嚴飭該管道府各就地方情形並向來辦理舊制隨時斟酌妥爲布置一有差務卽嚴察該州縣等如有能體卹民艱公平允協之員據實保舉其有聽信書役任意浮派苛累者卽指名糾參不得稍從寬縱上以所論極是諭曰賦徭之制東南則賦重役輕西北則賦輕役重立法至爲深厚若如該藩司所奏是役重而賦並重其意何居嗣後直隸辦理差務著顏檢嚴飭該管道府仍遵舊章各就地方情形斟酌妥辦七月奏請賑濟霸州等二十一州縣被水災民得旨如所請行八月疏陳永定河水勢驟漲南六工東西壩共走失十三丈未克如期合龍懇請寬限諭曰近日天氣晴明並未陰雨卽使偶值北風汕刷勢猛永定河面不爲寬廣何至水勢陡長波浪洶涌不能如期合閉口門反走失十三丈之多總由料物本未購備齊全人夫又不能督飭搶辦種種辦理不善咎無可辭此次姑允所請予限二十日毋許再有遲誤顏檢督辦無方著交部議處尋議降一級留任九月大壩合龍得旨該督督率廳弁晝夜趨辦慎重進占於十三日啟除土埂開放河水建瓴而下大溜掣動暢流下注卽時挂纜合龍全河復歸故道覽奏欣慰十月

奏緝獲在逃十年習教之逸犯宿景連等按律懲治上嘉之三年二月請將大城縣續淹七十村莊加賞一月口糧得旨允行四月上以顏檢自簡任直隸總督以來辦理均無遺誤惟年近七旬究恐精力不逮有失整頓命來京另候簡用是月署工部左侍郎六月調署禮部左侍郎九月授戶部右侍郎兼管錢法堂事務十二月調倉場侍郎四年七月以失察舊太倉監督吉升保等得贓部議降二級調用上加恩改爲降三級留任十二月授漕運總督五年以河淤漕滯下部嚴議尋議降三級調用諭曰朕惟國家用人之道貴在賞罰嚴明而賞罰之平允在權衡功過朕自臨御以來於內外諸臣無不傾心委任從不以其人之功過豫存成見意爲寬嚴顏檢經朕特簡漕督漕務是其專責乃不能妥速辦理有負委任且年力就衰著加恩改爲降二級以三品銜休致尋疏稱察看幫船鹽運情形恐致遲誤請援照成案截留存貯籌辦復諭曰顏檢曾任督撫有年自特簡漕督以來並不通盤籌畫一味游移遷就實屬無能著降爲五品銜休致十年以戶部假照案發覺顏檢失察被議降六品銜十一年入都祝嘏賞還五品頂帶十三年卒子伯燾見官閩浙總督緣事褫職

裘行簡

裘行簡江西新建縣人父曰修官工部尙書諡文達自有傳乾隆四十年行簡蒙恩賜舉人內閣中書四十二年在軍機章京上行走四十五年擢內閣侍讀是年京察一等復考選御史先後引見皆記名四十九年隨大學士公阿桂赴甘肅剿辦石峯堡回匪旋隨赴河南查辦睢州河工堵築事宜五十年擢山西甯武府知府五十三年調平陽府歷署雁平道太原潞安等府五十五年八月呈請改補京職奉旨裘行簡向在軍機處行走由內閣侍讀補放知府今以親老呈請改補京職外省官員往往有父母年已衰老不肖據實呈請意圖戀棧裘行簡情願內用甚屬可嘉著加恩仍留知府頂帶以員外郎卽用旋補戶部員外郎仍在軍機處行走六十年擢刑部郎中嘉慶四年擢內閣侍讀學士奉命祭告南海五年擢太僕寺少卿六年正月偕大理寺少卿窩星額赴陝西軍營犒軍擢太僕寺卿四月授河南布政使旋調江甯布政使五月上以裘行簡前赴軍營犒賞兵勇並將王廷詔管解均屬出力賞戴花翎諭曰裘行簡奏謝恩馳赴河南藩司新任摺內有俟大功告成仍懇求來京供職之語今又調任江甯屆期候朕酌奪七月抵江甯

任八月丁母憂回籍八年五月諭曰裘行簡將屆服闋著署理福建藩司印務不必來京請訓卽赴新任十二月服闋實授福建布政使九年十二月調直隸布政使十年正月奏直隸藩庫各項錢糧大概情形酌擬辦理緣由又遵旨逐條復奏直隸虧缺款項細數應飭各道府造冊齊全送局後方可徹底查覈至州縣因何賠累之由說者動以皇差爲名藉口賠累殊不知乾隆三十年以前從未聞直隸有虧空之事然乾隆十六年二十二二十七三十等年四舉南巡盛典乾隆十五二十六年兩次巡幸五臺二十年之內六次辦理差務不爲不多何以並無虧空乾隆四十五四十九等年兩舉南巡盛典四十六五十一五十七等年三次巡幸五臺二十年之中辦差五次較少於前而虧空日增總緣三十年以後之地方大吏貪黷營私納交餽送非辦差之踵事增華實上司之借端橫索近年大吏不加查察一任州縣藉詞影射相習成風試令州縣捫心自問果有賠累其捐官肥囊之錢究從何出此臣之所不敢代爲寬解者也至分年彌補之說可以行之於他省而在直隸爲難可以行之於見任而在離任之員爲難蓋直隸爲各省通衢往來驛務最爲繁多缺分較好之州縣祇可哀多調劑津貼衝途又無別項陋規可

以提取此直隸較他省爲難也至見任之員查有虧空予以革職留任勒限彌補彼必保護身家愛惜官職卽賣田鬻產亦思依限全完若責以代離任之員按年彌補伊焉肯自解私囊代人完欠勢必取給倉庫遮掩目前是前欠未清後虧復至此見任代前任彌補之爲難也至直隸屢次清查虧缺漸增完繳漸少之故蓋亦有說查屬員之虧項無著例應該管之道府分賠道府之賠項無著例應本任之院司攤賠今直隸並未申明定例查照辦理則其自爲之私已可槩見乃惟沾沾於原虧之員是問又不按例嚴追無以示懲此所以原款無著後虧復增也臣愚以爲初二兩次清查應行在省監追之員及應令各省監追之員經此次盤查後再行勒限一年如果實在無力完繳查明任所原籍財產實屬盡絕卽由部臣查明各該員在任月日著落該管各上司分別賠繳以歸有著至嘉慶十年以後州縣交代遇有虧空臣惟有執法從事斷不准混入清查致從寬縱總之自九年以前查覈虧數以清虧空之源十年以後嚴究交代以截虧空之流如此辦理庶以前之虧空或不致懸宕無著以後之交代或不敢仍前藐玩疏入上獎其所奏明晰令大學士六部尙書議行五月兼署按察使九月護理總督十月諭曰裘行

簡資格較淺於直隸地方事務尙能整飭著加恩以兵部侍郎銜署直隸總督十一月奏直隸初二兩次原虧銀兩將應行監追人員飭追旋即查明原任知府顧賓臣等五員虧缺銀數奏請辦理十一年奏請移駐汛員以重河防補築永定河隄埝工程直隸舊有千里長隄及新舊格淀隄亟請疏築又會籌兵丁差費於該省公項內撥款生息均得旨允行五月因辦理宋二油餅故殺一案入於緩決部議降調諭曰裘行簡於應入情實之犯咨請入緩嗣復引案飾非部議降二級調用著改爲降三級留任六月奏查北運河一帶官剝民船滋弊情形請明定章程報聞七月永定河北岸坍塌一百餘丈防堵不力自請嚴議奉旨降二級留任八月布政使慶格查出司書假雕印信串通銀匠虛收解款行簡據實入奏欽派大學士費溥尙書長麟馳赴嚴訊查明款項具奏諭曰裘行簡在藩司任內曾虛收銀一萬一千餘兩其署總督任內亦失察藩司虛收銀一萬六千餘兩但爲數較少再伊署任總督後因藩庫款項未清奏明查辦方能釐出弊端免其嚴議著交部議處部議革任上改爲革職留任九月卒諭曰署直隸總督裘行簡係裘日修之子少時卽蒙皇考高宗純皇帝賞給舉人內閣中書在軍機處章京上行走有

年洊擢山西知府嗣因親老籲留京師供職嘗荷恩准以四品頂帶改補部秩仍直樞曹朕親政之初曾經有人密保迨擢授京堂簡放藩司果能辦事實心正己率屬前年由福建藩司來京覲對彼時因直省錢糧款項糾纏懸宕恐有弊端特將伊調任直隸自到官以後將通省倉庫徹底清查條分縷析於地方一切公事均能不辭勞瘁經理認真是以上年該省總督缺出卽命以侍郎銜署理此次辦理書吏等句通州縣舞弊虛收錢糧一案雖係慶格自行查出究因該署督立法清查始能句稽得實封圻重寄倚任方資茲披覽遺章並據天津道胡鈺奏稱該署督由天津赴永定河查看漫口工程行至三河頭地方偶感風寒醫藥無效遂致不起殊深惋惜著加恩照實任總督例給與一品卹典所有任內一切處分均予開復伊子裘元善著加恩賞給舉人俟服闋後一體會試賜祭葬諡恭勤子元善見任翰林院庶吉士

張誠基

張誠基山東金鄉人乾隆三十四年進士分戶部學習三十七年補浙江司主事洊升郎中四十三年授貴州貴西道四十六年調糧驛道四十七年擢貴州按察

使五十年調四川按察使五十一年丁母憂五十五年二月命署甘肅按察使十一月擢直隸布政使五十七年調江蘇布政使嘉慶元年六月授安徽巡撫八月查緝潁毫六安等處匪徒奏聞上是之調廣東巡撫先是粵東洋盜充斥肆行劫掠誠基嚴飭員弁購線緝拏二年二月獲盤踞夷地積年在洋肆劫之盜首大辨貴及匪黨十八名又獲盜犯周得仁等十七名按律懲辦梟示沿海地方奏入報聞三月獲在洋行劫盜匪並服役各犯審明分別辦理具奏諭曰此次所獲盜匪祇係隨同在洋行劫及服役各犯並非盜首何足爲奇張誠基務須督飭所屬上緊購緝將盜首林發枝等悉數拏獲以靖根株毋得稍存推諉是月仍調安徽巡撫四月調江西巡撫十一月以高安縣俞聖基任聽管倉丁役私造大斛希冀浮收奏請革審旋於三年三月訊明係糧道張姚成恐人造斛作弊令差役私誘木匠故作寬大斛面以便從此根究後木匠畏罪妄扳高安縣家丁姚成誤信揭參請將該道革職該縣開復並請交部議處諭曰張誠基於已經奏參之案並不迴護據實平反所辦尙是自請交部議處之處著加恩寬免仍交部議敘八月義甯州陳坊地方有習教教徒聚衆滋事誠基接據稟報卽督同總兵帶兵剿捕將爲

首劉聯奎槍斃餘黨擒獲居民安堵如故奏入上嘉之賞戴花翎交部從優議敘諭曰江西地方向未聞傳習邪教亦無糾衆搶掠之事此案劉聯奎聞湖北蒲圻縣有匪徒搶掠獲利遂起意在陳坊地方豎旗聚衆焚劫村莊實屬不法張誠基督率將弁馳抵該處剿捕直搗穴巢於羽衆初起之時將各犯全獲已降旨從優議敘賞戴花翎張誠基著賞黃綬大荷包一對小荷包四箇玉扳指一箇纍絲盒一個碧玉帶板一塊以示獎勵六年上聞江西正考官周興岱以侍直內廷於前赴該省時稱有奉旨查訪地方之事並擅出告示收受程儀密旨命誠基查覆七年正月誠基據實陳奏諭曰周興岱以供奉內廷在外誇張何以該省官員畏其聲勢餽送從厚張誠基平日辦事必非無瑕可指慮其舉發故爾曲意周旋仍蹈逢迎積習俱著交部議處十月原任江西建昌縣知縣劉光遣子赴步軍統領衙門控告誠基剿捕義甯州逆匪時冒功上命侍郎姜晟前往審辦姜晟奏稱訊問誠基供認此事實有粉飾因年來心疾未釋當日聞地方有反叛之事雖經辦竣恐干重罪是以將八月搜捕完竣之日作爲伊帶兵打仗之時其實並未親自臨陣並繕具誠基親供呈覽諭曰張誠基以巡撫大員於地方逆匪滋事之案平日

不能留心查察及破案之後尙不將辦理情形據實陳奏又復粉飾情節今據供稱希冀輕減罪責試思失察逆匪之罪較之捏飾具奏之罪孰輕孰重張誠基著革職交軍機大臣會同刑部審擬治罪八年正月審訊屬實擬斬監候上寬之改絞監候交刑部監禁十一年奉旨發伊犁效力贖罪十三年釋回命自備資斧前往南河聽候差委十四年奉旨以六部主事用十五年補刑部江西司主事二十一年卒

陸有仁

陸有仁浙江錢塘人乾隆三十四年進士分刑部學習三十七年補貴州司主事四十年授雲南司員外郎四十二年轉四川司郎中俸滿保舉知府四十五年充貴州鄉試正考官四十六年授廣西梧州府知府四十九年調太平府知府五十二年升福建延建邵道時以安南內訌夷眷來奔陸有仁詳詢夷官援接防護經總督孫士毅奏入並請留同防邊得旨嘉獎五十四年調福建督糧道五十五年升山東按察使五十七年五月授直隸布政使十月因山東任內未能確查所屬盜殺重案率行據詳降甘肅按察使嘉慶元年六月擢刑部侍郎留辦甘肅賑務

十一月命代辦陝甘總督事時因四川達州教匪西竄陝甘總督宜縣親往辦理甘省秦州鞏昌均與川省毗連上諭陸有仁嚴密堵截二年四月河南賊匪竄入來朱場偪近雒南請與西甯鎮總兵富不賽馳赴潼商相機堵禦又以賊匪侵入商雒境地請督兵進剿並飭調甘涼鎮營兵前往堵截諭曰陸有仁不過代辦總督事件至軍務緊要自有巡撫在彼今檄調甘涼等處兵丁並親身來陝殊屬張皇甘肅地方緊要陸有仁自應在彼彈壓何不曉事體緩急輕重若此著於途次轉回蘭州並將所調兵飛飭停止五月因宜縣檄調撒拉爾兵二千交總兵柯藩於興安防剿陸有仁諭令暫停循化經宜縣等奏入諭曰漢中兵單力少是以檄調此項回兵以資截剿乃教匪竄至漢陰而回兵尙在循化是陸有仁從前遇事張皇一經申飭於檄調應援之兵亦屢催罔應遲誤軍情較永保漫無調度者尤爲過之陸有仁著革職交刑部治罪八月訊係拘泥候旨與宜縣查奏相符上命戴罪往四川效力旋補陝西按察使十一月授陝西布政使三年賊匪高均德股匪竄浣手寺諭陸有仁留心防截敍功賞戴花翎四年正月擢廣東巡撫時夷洋盜匪同劫鹽船飭兵擊捕之九月以農耐與安南國兵船遭風入粵所奏失當旨

飭之十一月奏盜匪悔罪投首分別撫卹安插得旨所辦甚是至安南農耐盜匪或有風聞來投者卽當給資遣回五年二月內遷工部右侍郎六月調刑部右侍郎九月授陝西巡撫十一月奏沔縣洋縣餘匪疊經經略額勒登保參贊德楞泰剿戮不難剋期蕝事見赴漢中督辦糧餉惟期和衷共濟早靖逆氛時陝省民心散懈於團勇築堡不能實力奉行防堵未能盡力上切諭之旋以結寨得宜可以堅壁固守團勇得力可以禦賊衛民入奏上是之又奏安撫難民被脅有久暫之分則安頓亦須區別如寄民貿易猝遇賊脅旋卽逃出者其原有產業只給川資卽可甯家惟落業之戶不得已隨賊日久一經逃出惟恐兵勇所不容又恐謀生無術以致疑懼不前前奉諭旨飭令清查叛產以備安頓難民見查白河安康等處叛產可以備撥又有全家被害無人承業之產以及南山客民試種之田因賊拋荒俱可確查以備安插無歸之人各遂生全則賊黨自能解散矣得旨解散賊黨安插難民自應如此辦理果能給予恆產固其恆心何至甘心從賊總在實力奉行不可徒託空言也六年正月奏委員曉諭各寨並於總要隘口分撥兵勇守卡無使賊匪入境又請將五郎孝義專派大員加意團練堵剿以專責成可期卽

收成效二月奏賊匪被剿情急往往竄南山老林劫奪零星居戶以爲口糧請勸令居民搬移出山安頓使賊入林無糧自不能日久潛跡諭曰此事斷不宜輕動妄爲將來事定後惟當酌量情形安設營汛派兵分駐永臻綏靖三月以辦理糧餉迅速議軍功加級又與總督長麟籌辦甯陝鎮額設新兵六千以兵六勇四配搭請於凱旋時以各路鄉勇充補諭曰長麟陸有仁之意以所有應設新兵俟凱旋歸入善後事宜辦理未免不知緩急務當設法速爲經理俾屹然成一巨鎮以杜賊匪再入之路儻有遲延賊復竄入山內則惟長麟陸有仁是問四月奏曰下據險設防南山之賊剿滅淨盡各路防兵俱已抽撥入山又籌議撫輯饑民難民上是之六月諭曰陸有仁自簡任以來皆能預爲妥辦且於築堡一事與額勒登保酌量章程籌畫盡善俱有成效賞給荷包議軍功加級紀錄七月奏安插鄉勇爲善後第一要務請於大功告竣之日分別安置十一月以川省賊匪逼近黑河有仁飭總兵齊耶阿通判維昂截擊有功上嘉之賞烏雲豹馬褂時餘匪東竄牛尾河有仁飭副將韓自昌等擊剿淨盡議軍功加級七年四月會議甯陝鎮新設兵丁分別防剿事八月諭曰陸有仁三年以來經理糧餉俱能先事綢繆供給充

裕並督率地方官辦理搜捕零匪甚爲出力且節次捐廉製辦衣履解營分賞兵勇著交部議敘十月卒於漢中賜卹如例子繼祖蔭生

荆道乾

荆道乾山西臨晉人乾隆二十四年舉人大挑知縣三十一年籤發湖南四十二年補麻陽縣尋調善化縣四十七年遷甘肅甯夏同知五十四年擢安徽池州府知府六十年擢登萊青道嘉慶二年擢山東按察使四年擢江蘇布政使五月疏言驛站額需夫馬工料向係各州縣將地丁銀兩解赴藩司移貯臬庫州縣復差人支領輾轉糜費請照吏役工食例於地丁內扣支得旨如所請行七月諭曰宜興奏革除漕弊一摺所指浮收勒索及折色分肥等弊朕聞之已久實爲漕務之害但所指情弊尙有不止於此者著傳諭有漕各督撫一體查辦將以上積弊實力革除尋又諭曰宜興所奏有漕州縣旣革浮收領運弁丁自無從再有幫費見在移會漕臣將所有沿途無名雜費一概裁革及嚴禁水手格外勒加身工各情節並著岳起荆道乾會同漕臣實力查辦岳起荆道乾操守素好均能實心任事之人務須與漕臣妥爲經理俾相沿陋習以次清釐丁力旣得寬舒兌運不致有

誤而收漕積弊亦一律肅清有守有爲方爲不負委任八月擢安徽巡撫十一月
奏臣前奉諭旨清查漕弊業經嚴禁州縣浮收並擬將耗米五斗向以五升給丁
者酌加二升俾旗丁藉資幫補奏蒙俞允在案查旗丁用項見在雖尙浮於得項
但得項有據可查至沿途浮費係由採訪而知謹一例查察分別開單奏請禁革
諭曰各省旗丁押運抵通沿途費用甚多糧道又將旗丁應領各項不行如數發
給以致旗丁向州縣加增幫費而州縣遂得任意浮收積弊已非一日岳起荆道
乾奉到諭旨應禁陋規自應槩行裁革見在沿途濫費既除旗丁又得增添津貼
用度寬裕自不致仍前支絀不能復向州縣索費而州縣更不能藉口浮收從此
漕務肅清諸弊可期盡絕著將岳起荆道乾兩次奏到清摺交部通行有漕省分
將一應陋規永行禁革十一月又奏貼運屯田一項每丁派田若干及應得租籽
新僉旗丁不能了然臣見令糧道刊刻木榜令衆丁認田收租其每船應領款項
亦刊刻易知單令正身運丁請領以杜包領欺壓之弊查屯田根據向歸衛備經
管不足以昭周密請照造一分發交各衛以備僉丁查驗之用其原冊改歸糧道
收管報聞五年三月奏臣於督放宿靈泗三屬展賑途次接到硃諭宿州等處總

應留心恐伏秋大汛時又增災難我君臣盡此心力保民捍患甯濫無遺仰見皇上軫恤窮黎刻刻痾瘵在抱臣當卽兼程馳抵宿州次至靈泗駐廠親放畢查宿靈泗皆邵壩下游其中原被七分災地陸續涸出可以補種雜糧惟原被八九分災地見在水深三四尺不等無從耕種奏入諭曰宿靈泗三州縣原被八九分災區尙未耕種見在將屆大汛之時該處積水未消萬一水勢加長後始行賑卹未免緩不濟急著荆道乾查明戶口加恩展賑至口門合龍之日俾災民不致失所六年十月因病奏請開缺諭曰荆道乾官聲素好自簡任封疆辦理地方公事均屬妥協今年老患病著准其解任或回山西本籍地方或卽在安徽省就近調理俟病痊來京另候簡用七年三月諭曰荆道乾患病解任不能起程回籍至今尙在安徽省調養著王汝璧密查近日病體如何旋奏道乾於是月初三日病卒諭曰原任安徽巡撫荆道乾外任有年清操素著自擢巡撫辦理地方事務俱能整飭去冬因病患氣喘曾降旨准令解任並准在安徽省調理以冀就痊茲聞溘逝殊堪軫惜著加恩賜祭一壇所有任內降革處分均予開復伊有二子一孫俟服闋後著伯麟揀選一二人送部引見尋賜其孫燉舉人

謝啟昆

謝啟昆江西南康人乾隆二十五年進士改庶吉士三十一年散館授編修三十五年充河南鄉試正考官三十六年京察一等充會試同考官三十七年授江蘇鎮江府知府旋調揚州府知府四十三年東臺縣民徐述夔詩詞悖逆事發以啟昆查辦遲延論軍臺效力贖罪尋復原官經兩江總督薩載奏留江南四十四年丁父憂復奏留委用四十五年命署安徽甯國府知府俟服闋再行實授四十六年丁母憂回籍四十八年服闋以病仍留本籍五十五年病痊赴京引見命仍發江南以知府用旋特擢江南河庫道五十九年遷浙江按察使六十年授山西布政使是年冬諭曰浙江爲財賦之地聞謝啟昆在山西任內辦事尙屬認真且曾任浙江臬司署理藩篆著調補浙江布政使以資駕輕就熟嘉慶四年奏請陞見回任護巡撫篆旋擢廣西巡撫奏言廣西邊境土司四十六處星羅碁布爲通省藩籬各土司本無俸廉專恃祖傳田產辦公養贍自宋元至今支庶派分恆產漸少且累世承襲以來衣食租稅不知節儉又自乾隆五十二年辦理安南兵差出夫供役亦有賠累之處生計日絀輒向客民借貸奸民乘機盤剝將田產準折以

致養贍無資前撫臣成林奏請招徠土司境內客民開墾閒田撫臣台布又奏請官設典當以濟土司緩急均屬勢所難行曾奉諭旨嚴切訓飭仰見聖明洞燭遐荒無微不至臣見在遵奉恩訓曉諭各土司嗣後務宜倍加節儉并嚴飭客民如有重利剝削準折田土之事卽照例遞籍治罪將產給還土司其通情典當尙無重利者姑免深究計其有餘利者減價取贖利不敷本或無力贖回應酌定年限俟所收田租已有一本一利卽將田產撤歸原主總以五年爲期毋許再占復督率各道府革除一切陋規俾資休養生息自可復原客民旣無重利可圖斷不懷挾重貲赴瘴癘之鄉自取罪戾則盤踞占耕之弊不禁自絕至客民入苗地買賣借貸例應究治惟廣西土司與民地犬牙相錯土官土民皆馴謹愚陋與滇黔苗猺之獷悍者迥不相同順其性而撫之儘可相安無事且物產稀少藉客民販運有無相通因地制宜無庸禁止從之五年四月奏興安縣有陡河一道發源陽海山築隄分水東流爲湘江西流爲灘江係楚粵滇黔五省所經之道秦漢開鑿以來間歲不修卽多淺阻臣抵任時路經該處見有陽海隄一道埤數十丈水勢漫潰隄內民田淹漫數萬餘畝隄外河流因之淺涸臣倣浙江海塘竹篔簹石之法

鑲築石隄民田俱經涸出可以播種其河流亦一律深通向來銅船過陡河必行一月今浙江銅船一百五號三日內全行出陡此其明驗至廣西通志自雍正十一年纂成後已七十年臣公餘搜羅散佚續編成書進呈欽定報聞又奏曰臣恭奉 上諭百姓不可剝削倉庫不可虧損在督撫悉心講求無欺無隱臣查各省倉庫積弊有年其州縣之敢於明目張膽虛報虧空監交之員又敢於兩邊說合寫券書押者皆由貪黷債事之督撫釀成於前庸闇姑息者又縱容於後迨至水落石出則藉口設法彌補以圖掩飾豈知天地生財止有此數所設之法仍不過取之於民是以各省倉庫大局約有三變始則大吏之貪婪者利州縣之餽貽債事者資州縣之攤賠州縣匿其私橐而以公帑應之一經離任則虧空累累大吏既餌其資助不得不抑勒後任接收此虧空之緣起也繼則大吏之庸闇者任其欺朦姑息者又懼興大獄甚至以敢接虧空者爲能員以稟揭虧空者爲多事以致州縣視若己貲取攜如寄并有藉口虧空過多挾制上司升遷美缺者此虧空之濫觴也近年督撫之不職者相繼敗露諸大吏共相濯磨各州縣亦爭先彌補但彌補之法寬則人心生玩而胥吏夤緣爲奸急則衆志張皇而百姓先受其累此

立法之難況各省多寡貧富不同難易情形迥別一法立即一弊生惟在因地制宜似難率定章程反多窒礙臣愚陋之見請敕下各督撫先徹底查明實數除本員見在者如律論治外其積虧無著之項詳記檔冊使猾吏無可影射多分年限使後任量力補苴不必輾轉誅求亦不必成功旦夕仍責成督撫裁革陋規以清其源倡行節儉以絕其流講求愛民之術以培元氣獎擢清廉之員以勵官常似此日計不足月計有餘不數年間休養生息不特倉庫充盈而吏治民生亦蒸蒸日上矣廣西地瘠民貧倉庫向無虧缺自孫士毅辦理安南事務一切軍需供億所費不貲且米穀銀餉軍裝器械在關外毀棄者不可勝數均因不能開銷令各州縣分賠遂致通省各有虧短臣思此項本非州縣侵蝕且本人均已去任接收者方在實力補苴乃一經參劾追賠難保無勸捐派累之事惟躬率司道府州省衣節食革去一切陋規昔日應酬之費作爲州縣從容彌補之資少者限以一年多者二年至多以三年爲斷仍實心訪察進廉去貪俾無絲毫累及百姓計三年之內庫項必能補足惟是數十人補之而不足一人敗之而有餘是又全在督撫知人善任大法小廉不愛逢迎不存姑息庶不至復有續虧之患矣又言彌補虧

空總期倉庫豐盈初不爲一身免累之計庶不至事事皆無實際臣前歷官山西浙江藩司慎密設法將山西積虧八十餘萬全行補完浙江則彌補十分之五皆未經咨部亦未咨追原籍蓋因當日之員大半死亡遣戍其子孫貧乏者居多一經咨部查追紛紛滋擾徒飽胥吏之橐仍不過以家產盡絕咨覆完結求其如數追繳十無二三而見任之員反得置身事外實與帑項無益茲查廣西通省庫項未完者共三十九州縣覈其虧數與廉羨之多寡分限三年按月交庫作爲額貯實數於州縣交代時察其補數不足者卽以虧空參劾先後奏入均嘉納焉先是上諭嗣後遇應行買補倉穀年分務須飭令所屬於豐稔鄰縣按照時價公平採買不許在本地派買啟昆以廣西地方跬步皆山轉運之費不減於市穀之價各州縣於鄰邑採買旣無糧食市廛又不能向肩負力役之鄉民零星收買恐不肖者因辦理掣肘或互相朋比代爲勒派致有防弊之名而無杜弊之實請仍於本地買補上允其請八月奏言准部咨州縣未滿三年不准奏調所以杜奔競絕營求立法實爲盡善但粵西煙瘴缺甚多水土最惡官員不無視爲畏途與調繁之得美缺者迥殊是以向例煙瘴缺出止應揀選能耐煙瘴水土之員調補毋庸拘

定年限今若一律定以實缺三年則粵西州縣六十二缺煙瘴居其十於內地州縣中擇其歷俸三年並無違礙處分而又年壯才明能耐煙瘴者竟不可得若請旨揀發則初至之員不習水土居多若以年老之人遷就調用使之觸冒瘴癘而年壯力強者反因格於定例得遂其規避之計似未平允且恐年老者血氣既衰不能彈壓整頓於邊疆吏治更有妨礙如以煙瘴員缺俸滿卽升似有捷徑可圖則定例本有煙瘴人員俸滿後僅循分供職者將應升之處註銷濫行保送者該上司降二級調用處分甚嚴是旣調之後仍應覈其政治實績並非一經調邊卽可升擢請仍照舊例不必計俸惟擇才優庶有裨益下部議行六年以廣西弁兵調楚剿賊奮勇立功下部議敘加一級旋以上林縣知縣寶謙採買倉穀不善奏請革訊寶謙畏罪溺死未經防解命交部議處並令明白回奏尋諭曰謝啟昆覆奏自稱求治太急馭下太嚴等語謝啟昆在巡撫任內朕亦聞其辦事過急每有失當之處此案辦理疏忽傳旨申飭七年四月疏言廣西寶桂錢局向由本省銅廠解局供鑄嗣因本省產銅稀少赴滇採運俱係高銅乾隆二十一年改爲高低對半迨三十八年後改爲高四低六經前撫臣熊學鵬籌議將少買高銅一分改

買低銅一分計節省正價及腳費銀八百餘兩添買低銅通融配鑄維時本省有金雞等廠高銅尙可通融辦理嗣於五十七年各廠全行封閉專賴滇銅而已酉年買運回局成色過低咨明滇省委員會煉其釵銅一百二十三斤僅得淨銅七十六斤覈與二十七二十八等年改撥低銅案內奏明每正耗銅一百二十三斤煉淨八十四斤十三兩零之數又短銅八斤十三兩零咨滇撥補五十八年准滇省咨見在高銅豐旺或此後全買好銅以免成色不足往返之咨查太煩旋因五十九年後暫停鼓鑄嘉慶元年適有小錢鼓鑄致未辦理戊午年赴滇採運仍循舊例鑄出錢文色黯質脆民間難以行使屢經監局官督飭鑪匠錐煉而火工折耗賠累甚重應請自七年爲始一律採運高銅於鼓鑄大有裨益再查廣西嘉慶三年以前設鑪十二座買運高低銅二十五萬餘斤內高銅十萬餘斤自三年減鑪五座共需銅十萬一千八百餘斤若全買高銅與從前未減鑪座以前買運高銅數目所增無幾滇省撥運可無虞拮据如慮各省紛紛陳請江蘇湖北二省久經改爲全買高銅並非廣西創始惟歷年採買高低銅正價及腳費除鎔出黑鉛變價外需銀一萬三千六百四兩零今改買高銅需正價及腳費銀一萬四千六

百四十一兩零計不敷銀一千三十七兩零未便因餘息可支遂啟加價之漸查此項爲數無多臣與兩司鹽道養廉優厚應請每年於撫司道養廉內攤扣撥補毋庸作正開銷奏入下部議行七年六月卒於任遺疏聞諭曰謝啟昆在巡撫任中資格尙好其前任藩司時辦事認真於倉庫錢糧尤能清釐整頓迨擢任巡撫操守亦廉潔茲聞溘逝殊堪軫惜該省潯梧兩關盈餘銀兩向來留充公用自謝啟昆到任後陸續節省一萬兩存貯藩庫著加恩於此項內提銀三千兩賞給謝部察例具奏尋賜祭葬如例子學崇嘉慶七年進士見任翰林院編修學炯見任刑部員外郎孫振音從二品廕生

蔣兆奎

蔣兆奎陝西渭南人由副榜貢生捐教諭乾隆二十六年補甘肅張掖縣教諭三十年中式舉人三十一年成進士以教授銜管教諭事三十三年俸滿保舉授四川合江縣知縣調灌縣知縣以憂去四川總督富勒渾奏請留川省辦理軍務旋署華陽縣知縣賞知州銜四十一年捕獲拒傷官兵囑匪首犯送部引見交軍機

處記名四十二年四月服闋四十四年補山西澤州府同知四十六年遷安徽潁州府知府改授山西汾州府知府四十八年調太原府知府四十九年擢河東鹽運使五十四年二月遷山西按察使六月擢甘肅布政使五十六年調山西布政使時河東商力疲乏議將鹽課改歸地丁上以蔣兆奎曾任河東運使鹽務素所熟諳命協同山西巡撫馮光熊經理旋議將山西陝西河南三省應納之正課雜項共四十八萬餘兩在於三省行鹽完課納稅之一百七十二廳州縣地丁項下通計均攤約略每兩攤銀九分有餘馮光熊奏入下部議行五十七年閏四月奉上諭河東鹽務從前僉商承辦徒滋地方官勒索之弊是以議將鹽課改歸地丁以期利歸於下商民交便見在該省鹽池產鹽旺盛兩三月內發販鹽數較往年多至加倍是鹽課改歸地丁一事效驗甚速此議實蔣兆奎所倡今果能始終承辦已著成效甚屬可嘉蔣兆奎著加恩賞戴花翎十二月擢山西巡撫五十八年二月奏裁芮城縣陌底渡巡鹽巡檢五月奏山西省北邊牆一道中有殺虎甯魯得勝等口三十六處向於殺虎口設立監督凡貨物往來必由該口投稅放行乾隆二十九年經前撫臣和其衷奏請於左雲縣屬之甯魯口添設稅口稅務仍歸

殺虎口監督派人征收奉旨允行在案茲查近來各貨多在大同府城聚集由府城出甯魯口至豐鎮發賣計程三百六十里出殺虎口遠至五百二十里道里既遠則腳價增添貨物因而昂貴若由大同府出得勝口至豐鎮廳僅止百里道里平坦車輛可通請於得勝口添設稅口俾貨物就近投稅赴豐鎮實屬商民兩便從之八月以辦理秋審人犯內布蘭毆死濟成一案定擬錯誤命傳旨嚴飭仍交部議處五十九年迎駕淀津賞穿黃馬褂六十年奏山西寶晉局鼓鑄原設六鑪前因錢價平賤減去二鑪祇存四鑪茲查省城見在錢價每庫平紋銀一兩易錢一千市平紋銀一兩易錢九百八十文不等較之未曾減鑪之前仍屬相倣而各州縣錢價亦未見昂請將寶晉局減存四鑪全行停鑄其搭放兵餉請旨以銀兩滿支報可嘉慶元年奏參汾州府知府張力行審辦岳望冀負欠錢債與伊子張情田通同婪索冀甯道鄧希曾太原府知府高燦朔平府知府章鈺甯武府知府張端城委審此案未曾審出實情恐有迴護同官情弊得旨張力行著革職拏問鄧希曾高燦章鈺張端城均著解任交與蔣兆奎一併提集人證嚴行質審定擬具奏又續參張力行於庫貯兵餉飯食等項銀侵用一千二百餘兩業據供認諭

曰張力行以知府大員於審追錢債事件任意婪贓已屬大干法紀茲又查出張力行侵用兵餉各項銀至一千餘兩之多實出情理之外見經軍機大臣會同法司定擬斬決但該參員尙有婪索贓銀一案應行質對著傳諭蔣兆奎將前案卽速審訊明確歸案定擬一面具奏一面照議並將張力行卽於該處正法以昭炯戒二年八月以剿辦教匪調派本省官兵妥速交部議敘十一月以病懇休得旨蔣兆奎著准其解任卽就近回籍調理四年二月起爲漕運總督七月倉場總督達慶奏本年山東臨清一帶河水稍落糧船起撥耽延天津以南脫幫計三十二日奉上諭漕船脫幫例干嚴議今夏運河水淺糧船起撥不免耽延亦何至脫幫三十餘日之多該漕督總司漕務不能設法遄行著交部照向例議處尋部議鑄秩奉旨改爲降二級留任八月奏辦理漕運要在卹丁見在清釐漕務嚴諭有漕各省督撫整飭一切慎選米色革除陋規誠百度維新之會也第查陋規內旗丁於水次兌銀時向州縣需索免費有一二百金者今旣徵米精純嚴禁浮收州縣並無餘利豈肯復出免費旗丁旣得好米需索無詞自當受兌開行惟各衙門以及沿途陋規雖已禁革旗丁花費自可節省而生齒日繁諸物昂貴應得之項委

不敷用急須調劑前讀上諭言有漕州縣無不浮收江浙尤甚每石加至七八斗等語此歷來交納習以爲常今若於七八斗之內劃出一斗津貼旗丁其餘盡行革除所出有限所省已多不特千萬旗丁藉資濟運卽交糧億萬花戶已霑聖恩無窮奏入命大學士會同戶部議奏諭曰州縣徵收漕米不許顆粒加增例禁甚明近因各省多有浮收之弊節經降旨嚴查整飭今蔣兆奎以旗丁用度不敷輒請明定章程每石加增一斗以資津貼是使不肖官吏益得有所藉口且名爲加增一斗其所徵並不止於此數恐浮收積弊仍不能除而此新增一斗之糧與加賦何異其事斷不可行惟邇年旗丁疲乏亦當設法調劑量爲津貼著有漕各督撫確查妥議具奏務令丁力不致拮据而正供不致加增方爲妥善十一月奏各幫費用不敷見奉恩旨設法調劑令有漕各督撫確查妥議無如調劑者有名無實卽如兩江總督費澹所奏與運費並不敷用尙奉部駁而江蘇撫臣之四升七合安徽撫臣之二升焉能有濟揆度情形必有貽誤臣才識短淺無能補救惟求皇上另簡賢員速爲接手庶於卹丁濟運之道實有裨益諭曰蔣兆奎係朕特簡漕督如果實有礙難辦理之處亦應再爲設法籌畫何得竟請罷歸爲此忿激之

語看來蔣兆奎竟不免聽信漕屬員弁一面之言而又無良策以善其後遽以引退爲詞實屬冒昧粗率蔣兆奎著傳旨嚴行申飭並著將漕運情形詳悉陳明除加賦一節斷不可行外其應如何津貼之處再行明白回奏候旨遵行尋奏漕船冬兌冬開見在漸次兌漕轉瞬開行一切費用入不敷出然眉之急已不可解再四思維苦無良策擬每船借給銀一百兩於各省糧道庫內支領分作三年在該丁給領項下扣還歸款其山東河南船隻路途較近每船只給銀五十兩已可接濟再查有漕各省皆有輕齎一項本係應徵之米每斗折銀五分名爲輕齎今請仍徵本色按照旗丁每船所載米數賞給又江安輕齎改徵本色米石較少蘇松輕齎改徵本色米石較多白糧並無輕齎請通融勻撥漕白各幫如此則漕運不致拮据可以一勞永逸諭曰蔣兆奎奏酌籌津貼運費一摺已交部議奏矣前蔣兆奎將有漕州縣徵收漕米每石增收一斗之奏事屬加賦斷不可行今閱所奏又係損民益丁其意總欲於正供內設法添增巧避加賦之名而仍存加賦之實自係輕信衛弁慫恿爲其所愚故爾頻頻瀆請但加賦一節斷不可行朕志已定蔣兆奎如果自問才具不能將漕運妥爲經理卽當據實具奏不得輒忿激求去

如明季挂冠之狀朕前不可施此伎倆也將此諭令知之仍卽明白回奏又諭令鐵保馳驛前往會同費溥詳細飭查蔣兆奎究係聽信何人之言屢次瀆請抑係年老不能經理旋據兆奎覆奏臣才具實不能將漕運妥爲經理不勝漕督之任懇祈皇上另簡賢員將臣更換此時正當吃緊之際並求皇上令更換之員刻卽來淮接手免致誤公又奏臣前摺曾將旗丁運費不敷及臣求退情由具奏在案而其故尙未縷析陳明查旗丁運費本有應得之項應無不敷惟所定領項在數十年百餘年前迨後生齒日繁物價數倍從前所定之領項見在實費用不敷而近年旗丁尙可撐持者以州縣浮收向索免費並因州縣折收米石將行月等米亦向州縣折收兩項所得以之貼補一切經費各處浮費見在革除漕弊則浮費可省而免費究不能減於是始議劃米一斗再議輕齎改本均以加賦不准臣才識短淺別無經理良策恐貽誤重務懇皇上另簡賢員接辦原從小心敬畏而來並非氣質用事先後奏入諭曰向來有漕省分徵收漕糧州縣以濟運爲名多方浮收最爲民困是以降旨清釐漕政剔除積弊仍慮運丁免費不敷令有漕省分各督撫確查妥議酌給津貼並降恩旨令旗丁多帶土宜二十四石免其上稅原

期地方漕務兩有裨益而蔣兆奎總以運費不敷爲詞頻頻瀆奏又不妥籌辦法其意總在加賦借帑始終堅怙已見執拗不回看來蔣兆奎竟難勝漕督之任所有漕運總督員缺卽著鐵保補授蔣兆奎暫留該處俟費漕鐵保查辦完竣後再降諭旨五年正月費漕等奏查明蔣兆奎屢以旗丁免費不敷瀆奏係爲恐誤漕運起見尙無任聽衛弁慫恿情事奉旨蔣兆奎免其交部議處卽來京候旨是月補工部右侍郎旋授山東巡撫閏四月奏年老有病懇請簡員更換諭曰蔣兆奎前在山西巡撫任內因年已七旬兼患怔忡予告歸里上年來京朕看其精力未衰復用爲漕運總督伊赴任後將近一年聲名尙好惟於旗丁津貼不敷一節始則妄議加賦繼則請借給各幫銀兩嘵嘵置辨經朕節次申飭伊卽懇請解任已失敬事之道姑念其平日官聲清潔不肖卽加罷斥改授工部侍郎伊來京謝恩在朕前猶以旗丁究屬不敷於漕運恐有貽誤堅執前見其實鐵保接辦漕運後並不見其掣肘各省漕船俱各依限開行見已陸續抵通並無遲緩可見蔣兆奎於漕運情形全不悉心體究逞其偏見自以爲是其剛愎自用之咎實無可辭朕猶念其曾在封圻於地方事務較爲熟諳將伊補授山東巡撫伊到任後於該省

吏治官方並未見實有整頓之處前因御前侍衛明安往泰山進香回京奏稱東省地方官私餽贖儀八百兩並稱沿途經過營汛墩房坍塌未見有兵丁守驛會明降諭旨將蔣兆奎等申飭據伊覆奏上年明安前赴泰山進香亦曾收受銀八百兩至守汛兵丁因明安乘馬馳行不及身穿號衣站班伺候等語殊不成話向來奉旨出差人員沿途驛站俱有傳單預行知照豈有明安業已到境而汛兵尙未得信之理所奏實屬迴護強辨復降旨申飭茲蔣兆奎遽因此事忿激求去如此執拗任性豈人臣事君之禮乎況朕不過降旨申飭尙未將伊交部嚴議而伊卽抗章求退豈內外大臣有善必旌有過卽不應加之譴責乎若臣工等皆似此相率效尤甯不成明季挂冠惡習此風斷不可長蔣兆奎在朕前尙敢如此其接見屬員辦理公務必更有偏執己見不恤人言之處安能飭吏治而得民心本應革職治罪究念其廉名素著量予薄懲蔣兆奎著革退巡撫拔去花翎加恩降爲三品卿銜卽予休致由山東啟程回籍不必進京謝恩伊卽來京朕亦不復召見回籍後惟常閉門思過以終餘年用副朕格外矜全至意五月御史周枋奏參蔣兆奎因事申飭竟引疾去嗣蒙恩賞卿銜理宜匍匐宮門謝恩請罪乃竟悍然不

顧徑自歸里請交部治罪上以蔣兆奎係奉旨回籍毋庸過事搜求特原之七年二月卒子蓮二品廕生捐納主事

興奎

興奎瓜爾佳氏滿洲鑲白旗人乾隆三十一年由健銳營藍翎長補前鋒校三十年升前鋒參領四十一年正月授貴州黔西協副將三月調陝西慶陽協副將十月擢直隸宣化鎮總兵四十六年調甘肅西甯鎮總兵五十四年擢烏魯木齊提督嘉慶四年八月調烏魯木齊都統十二月以軍機大臣議准駐防保舉人員遇各省綠營缺出准其升用惟伊犁烏魯木齊等處與內地情形不同請敕交將軍都統議奏興奎偕伊犁將軍保甯奏言伊犁烏魯木齊地處極邊官兵必技藝精銳始足以資捍衛升用各省一員卽少得一人之力況與內地風土人情不能熟習且駐防人員遞有應升之缺不虞壅滯請仍其舊又以禮部議准駐防官兵聽其就近應歲科兩試復奏言伊犁烏魯木齊俱係用武之地總當以騎射爲本向雖設有官學習讀漢書不過爲鈔寫文移起見無庸令其考試從之七年正月丁母憂七月授西安將軍時大兵征剿川陝楚三省邪匪將屆竣事命搜捕陝西

餘匪九月經略大臣額勒登保以甯河一路爲川陝門戶奏令興奎駐守十月以川匪二百餘人窺陝西花石梁卡隘移咨總督惠齡防堵又偵知南山餘匪有西竄之勢移營鐵鎖關禦之八年二月南山賊匪由金池院南竄興奎派遊擊劉英魁等擊斃多名賊逸至鐵鎖關復派把總李永和等截擊之餘匪遁入卦子山興奎督兵搜捕四月以青海蒙古被野番劫掠敕惠齡回蘭州查辦南山餘匪專責興奎督剿六月由洋縣取道入山與總兵楊芳合兵搜剿殲擒淨盡仍回甯河巡防邊界八月三省底定撤兵歸伍仍留兵分守各要隘命興奎統陝西防兵九年調甯夏將軍十二年四月奏滿營兵丁生齒日繁請於庫貯馬價等項撥銀二萬餘兩發商生息擇其弓馬嫻熟者按月給賞從之五月甘肅大通縣野番肆擾上以興奎爲都統命赴西甯偕辦事大臣貢楚克扎布剿之尋番目尖木贊率衆來降願爲官兵前導貢楚克扎布疑其詐發兵捕之遁上以貢楚克扎布失信損威奪其職興奎未能阻止又不據實奏參交軍機大臣會同兵部議處尋議革職九月官兵進克沙卜浪番族番目完木古等降番地平諭曰興奎督辦軍務尙爲妥協本應加以獎敘惟於妄拏尖木贊一事經軍機大臣等議以革職茲念其帶兵

出力功過尙足相抵著加恩免其革職毋庸交部議敘十四年復授烏魯木齊都統十五年四月以和闐辦事大臣色克通阿在吐魯番患病率令回京上責其專擅下部議降調上加恩改爲革職留任十一月請借鎮迪道庫貯銀六千兩設典生息以濟孤寡旗人從之十八年以已革領隊大臣恆傑揭告興奎收受屬員餽送及虧缺倉庫等款革職命伊犁將軍松筠會同新任都統長齡鞠明受餽屬實餘坐誣上以興奎業經革職已足蔽辜飭令回旗道光四年卒子額勒德理

三音布 扎勒杭阿等

三音布英土爾氏伊犁錫伯營鑲黃旗人由領催於嘉慶五年補藍翎長十三年拔補驍騎校洊升佐領道光五年逆裔張格爾遣其黨奇比勒迪帶領回衆於巴雅爾一帶意圖種地資糧藉以聲氣相通經參贊大臣慶祥密派三音布與協領科凌阿等帶兵相機擒捕至占帕拉特住處誘其前來隨設伏於雅滿山口險要之區奮力兜剿殲斃賊衆多名并梟賊目奇比勒迪捷入得旨以應升之缺升用六年賊匪圍攻喀什噶爾漢城隨同慶祥等盡力抵禦兩月有餘賊匪竄遁地道進城官兵猶復巷戰拒殺多名衆寡不敵三音布與前鋒校扎勒杭阿驍騎校達

明阿藍翎侍衛德普興阿俱歿於陣事聞均賜卹如例賞雲騎尉世職三音布子博爾果素襲扎勒杭阿子慶春襲達明阿子德清阿襲德普興阿子訥摩布襲扎勒杭阿吳佳氏蒙古鑲黃旗人由前鋒於道光三年拔補本職達明阿孔格利氏伊犁錫伯營正藍旗人由領催於嘉慶十三年補藍翎長道光五年升本職德普興阿孔格利氏伊犁錫伯營正藍旗人由領催於道光五年授本職

清史列傳 卷三十二

大臣傳次編七

松筠

松筠瑪拉特氏蒙古正藍旗人乾隆三十七年由繙譯生員考補理藩院筆帖式四十一年充軍機章京四十二年升主事四十三年升員外郎四十四年充三座塔理事司員四十五年調戶部銀庫員外郎舊例蒙古司員不與銀庫之選松筠經軍機大臣保奏蒙古司員之掌銀庫自松筠始也四十八年京察一等超擢內閣學士兼禮部侍郎銜授鑲黃旗蒙古副都統賞戴花翎四十九年調正紅旗滿洲副都統賞穿黃馬褂命赴吉林查辦濼務五十年命往庫倫查辦鄂羅斯事務五十一年三月庫倫有官馬逸入鄂羅斯卡座鄂羅斯人獲而獻還松筠傳示各卡嗣後有鄂羅斯馬誤入官卡者亦如之事聞有旨嘉獎閏七月授戶部右侍郎仍留庫倫辦事五十五年有術勒干卡倫巡兵爲鄂羅斯打牲人所害松筠檄緝各犯先行治罪然後具奏上切責之革退侍郎副都統拔去花翎以四品頂帶留

庫倫效力贖罪五十六年授工部左侍郎正白旗滿洲副都統五十七年四月調戶部右侍郎復賞戴花翎七月充蒙古繙譯考試官十月轉左侍郎五十八年二月充崇文門副監督尋授御前侍衛內務府大臣軍機大臣七月充國史館副總裁時英吉利入貢請於天津寧波海口貿易並求給附近珠山小海巒附近廣東省城地方各一處居商存貨上既嚴諭指駁復慮其沿途生事特命松筠護行凡所要求嚴詞拒絕途中安謐有旨嘉其得體九月松筠奏遵旨令該英人在船順道觀覽俾知民物康阜景象恬熙惟有隨時隨事加意斟酌體會務令知感知畏勉期妥辦得中奉諭命汝去可謂得人勉之望汝回來面奏耳五十九年正月署吉林將軍六月命查辦湖北荊州稅務道出河南衛輝值淫雨衛河水驟長數丈淹浸民居松筠躬率牧令開倉賑恤疏入上以松筠奉差經過並不置身事外實心可嘉賞給大小荷包下部優敘七月升工部尙書授鑲白旗漢軍都統尋充駐藏辦事大臣嘉慶四年正月召還京調戶部尙書二月授陝甘總督加太子少保銜初松筠駐藏時達賴喇嘛濟隴呼圖克圖等報稱西南邊界有廓爾喀之兵松筠訪知廓爾喀係向定結邊外等部帶兵索欠並無他故恐唐古忒番民疑懼特

於喀達定結帕克哩等處親往拊循並借川省藩庫銀五千兩籌議撫恤窮番修
建鄂博寨卡各事宜至是請扣陝甘總督廉俸解歸四川時川陝楚三省教匪滋
事黃號逆匪張漢潮與藍白兩號之黨由楚入陝又竄甘肅五月松筠抵陝後疏
陳賊匪情形因言前奉恩旨招諭脅從雖已膾黃曉諭恐賊隊中尙未盡知見遣
安人潛入賊隊諭令被脅良民能捕獻首逆則當宥罪施恩卽臨陣投降亦令給
資回籍又復徧諭村鎮與其避賊而焚掠一空莫若團集而勢操全勝抵禦殺賊
者定加獎賞擒獲渠魁者奏予職官疏入諭曰松筠甫入陝境所辦已得要領留
心軍務忠悃可嘉時有千總向明山帶同鄉勇五十二人巡緝被秦州鄉勇蕭復
有等疑其爲賊盡遮殺之松筠奏言此案若問以擬抵恐各路鄉勇心懷畏怯遇
有眞賊不敢堵截但向明山無辜被戕情殊可矜請照陣亡例議卹蕭復有等照
過失律擬絞收贖從之陝西自嘉慶元年軍興以來共撥餉銀一千一百萬兩至
是續撥銀一百五十萬兩上命松筠駐紮漢中督辦糧餉松筠請移西安軍需局
於漢中清查舊款另立新規查明各路官兵數目酌定每日支用銀數由糧員按
旬開摺呈局每月彙奏咨部庶案牘易清飭查不難得實得旨所辦甚是松筠平

日廉潔自持故能正己率屬總理糧運必能勝任矣又奏高河梁金家山陣亡義首張奎樊雄秀請以把總外委議卹其陣亡鄉勇一併造冊咨部上是之並諭嗣後各路鄉勇打仗陣亡俱著照松筠所奏一體議卹先是有旨命訪查領兵各員優劣據實密陳九月松筠密疏副都統明亮久歷戎行素稱知兵所言似合機宜其實罔有成效西安將軍恆瑞前在湖北戰功爲最後剿藍白兩號賊匪亦著勞績惟年近六旬精力大減固原提督慶成身先士卒然中無主見領隊則可出謀發慮非其所長署陝西巡撫永保無謀無勇惟知利己過則歸人惟額勒登保英勇出羣其次則德楞泰亦稱奮勇上嘉其評論得當初明亮奏參永保駐紮大山岔擁兵不進商州之役永保慶成遷延不進以致張逆脫逃上命松筠查訪尋奏永保慶成遷延避賊屬實命褫永保慶成職飭交審訊嗣永保偕荊州將軍興肇奏言駐紮大山岔係聽明亮指揮並訐明亮數月來從未接仗屢次誑報軍功上並褫明亮興肇職交松筠歸案審辦時明亮已剿斃張漢潮松筠請將明亮暫緩究訊又請留撤拉爾回兵派慶成帶領協同剿賊諭曰此等回兵從前爲保護桑梓是以急公趨事若離家較遠強以從戎儻稍違約束別生事端轉致礙難辦理

見在各路之兵已極壯盛張漢潮已就殄滅零星餘匪豈必藉回兵剿辦耶況松筠派令慶成帶領以獲罪聽審之人派令領隊豈不爲其所輕至另片奏明亮已將張漢潮殲斃審辦自當暫緩尤不成話前旨以明亮如已將張逆擒獲尙可寬其一綫原指定案後朕覈其功罪量爲寬貸並非令松筠不加審訊也如明亮並未札令永保在大山岔久駐其龍駒寨牧關欒莊皆曾打仗殺賊則有功無過朕卽全復其官亦無不可若有心傾陷永保勝仗全屬子虛則其罪甚重卽念其有殲斃張逆微勞量從未減亦應恩出自上非臣子所可妄干松筠意在置之不問是與令慶成帶兵均爲擅權矣著嚴行申飭仍遵旨秉公查訊十一月審結明亮等擬罪如律時工部尙書那彥成奏參恆瑞前棄藍號垂盡之賊折回陝省係接松筠知會上以松筠種種錯謬革去太子少保銜御前侍衛拔去花翎十二月疏言漢中北通襄鳳保障秦中西達略陽控扼甘肅西南寧羌爲蜀棧咽喉東面洋縣爲駱谷要口從前川陝總督曾駐此地其後總兵駐興安漢中設協又有漢興道駐紮城中控馭極爲周密今總兵與漢興道均移設西鄉郡城重地僅一都司不足以資控馭宜移興漢鎮於漢中移漢中協於西鄉寧羌再增一協東西兩協

爲漢中鎮之翼商州增立一鎮興安改鎮爲協與潼關協爲東西兩協爲商州鎮之翼五郎本屬西安亦應移置一協仍屬西安將軍管轄再四川提督應移駐達州距西鄉漁渡留壩不遠四五百里其勢可以相接商州設鎮不獨固陝省之藩籬兼可壯鄖陽之聲勢川陝楚相爲犄角碁布星羅絲聯繩貫誠久安長治之策也疏下四川總督魁倫議奏五年正月授伊犁將軍尋命署理湖廣總督馳往湖北剿賊閏四月入覲請弛私鹽私鑄之禁諭曰松筠在陝甘總督任內曾奏私鹽私鑄弛禁所見迂謬本應嚴議特以平日尙能持正爲有用之材是以不加深責特令軍機大臣親書諭旨密爲訓飭而松筠屢稱患病於防堵事宜不能妥爲布置猶念其聲名尙好授爲伊犁將軍命赴湖北暫署督篆剿賊松筠懇請陞見稱有恩出自上之事必須面奏因准令來京乃所面奏者仍係私鹽私鑄請寬例禁經朕反覆譬曉松筠固執己見懷摺瀆奏試思私鹽私鑄律有明禁祖宗定制豈得輕易更張且見在私鹽有禁尙有私梟拒捕若設立稅口販私之徒悍不交稅又將如何辦理至國家泉幣之權操之自下隳紀綱而弛法度莫此爲甚松筠以爲所鑄係嘉慶通寶卽非私鑄是何言耶若交大學士九卿覈議必議以變亂成

法之罪朕念其所言究爲國家公事是以命軍機大臣明白傳知松筠自知糊塗冒昧懇仍赴軍營效力但伊前往軍營實屬無益著賞給副都統銜前赴伊犁作爲領隊大臣並賞戴花翎松筠當力改前非以期稍贖罪愆無負朕格外矜全至意七月復授伊犁將軍初乾隆二十九年有旨以伊犁田土肥潤飭將軍明瑞等查明地畝分給滿洲官兵以資養贍嗣明瑞查明可耕之地甚多請俟滿兵到齊辦理迨五十年及五十五年復歷奉諭旨飭令籌畫耕種歷任將軍均以灌溉乏水爲詞八年正月松筠疏言臣自上年接任後探明近水可耕之田由惠遠惠寧兩城酌派閒散試種通計所獲十分有餘本年秋麥又布種一千餘石急當廣行汲引因於惠遠城東伊犁河北岸新開大渠迤邐數十里又於城西北草湖中覓得泉源設法開渠修築隄岸疏引支流其地卽分給惠遠城八旗耕種至惠寧城八旗所耕本係裁撤綠營屯地原有渠泉足資灌溉惟種地必資牛力請於官廠內賞借惠遠城每旗牛八十隻惠寧城每旗牛四十隻庶令邊地駐防兵農並習得旨嘉允二月請設伊犁學額上以不曉事體斥之九年六月有伊犁民人郝鏡致死貴勒赫自行投首松筠審明後卽寘之法上責其辦理過當諭嗣後新疆遇

有謀故自首之案不必從重立決伊犁塔爾奇地方向設水磨派兵碾運麥麪以給兵食時官兵皆願領麥易麪松筠請撤此項兵丁分屯耕種從之十二月松筠以伊犁屯種有效惠遠城得地八萬畝惠寧城得地四萬畝請照伊犁錫伯營八旗屯種之例按名給地各令自耕自食永爲世業經軍機大臣議覆以此項田畝祇可令閒散餘丁代爲耕種官兵不當親身力作有妨操練上命松筠妥協經理務使兵農不致偏廢十一年奏准伊犁南北山場官地木植禁止兵民私採設立商頭官給驗票並定抽收數目卽藉以管束民人稽查逃犯十二年賞還太子少保銜並頒賜御製明慎用刑說十三年正月奏報惠寧城東時出水泉蕩漾房屋多圯請展築城垣移建教場並於城東挑一大渠引灌田畝六月奏塔爾巴哈臺東北一帶夏間應設卡倫查濟默爾色克卡倫地處山陰不生柴草請移設於博洛呼濟爾又請於板廠溝安設塔布圖小卡於稽查哈薩克出入最爲有益九月奏請塔爾巴哈臺地方撥兵加屯撥提督所屬中左右三營兵二百名前往農隙操演派守備千總外委各一員管轄又奏查禁達木達爾圖金廠請於通山路徑安設卡倫派兵防守令塔爾巴哈臺庫爾喀喇烏蘇兩處領隊大臣每年按季巡

查均從之十四年正月塔爾巴哈臺有遣戍蒲大芳等三十餘人聚謀不軌松筠偵知其事密遣領隊大臣色爾滾帶兵前往以巡查金廠爲名悉數擒戮上嘉其妥速松筠又以戍兵馬友元王文隴等一百六十九名皆與逆謀盡邀殺之上責其辦理苛刻下部嚴議諭曰松筠辦理此案並非濫及無辜惟前奏旣屬含糊而此一百餘人必應調至伊犁研鞫確實明正典刑原非過當忽於半途截殺成何政體在松筠恐事機不密釀成他患然措置未免失當姑念其平日操守尙好熟悉新疆情形著賞給頭等侍衛作爲喀什噶爾參贊大臣六月以二品頂帶復授陝甘總督尋賞一品頂帶九月奏准秦州營改歸固原提督統轄鞏昌營改歸河州鎮統轄十二月調兩江總督江南河道自上年馬港口墊陷黃水倒漾河口淤墊爲患十五年二月松筠偕江南河道總督吳璥查勘舊海口請修復舊河使全黃仍歸故道得旨允行時南河有醫生王勳詣松筠獻疏沙器具圖以堅木爲架每架用鐵百餘斤釘鑲鐵齒以巨繩繫於船尾而行能刷淤沙使河流通暢松筠倣其式製造四十架親自乘舟隨處疏濬果效事聞諭曰河口一帶連年黃水倒灌動輒淤墊松筠配製器具督率疏濬前水深一尺餘寸者見已三四尺有餘中

泓寬有七八尺實爲可嘉著做照製造愈多愈妙以期積淤疏滌河道深通俾軍船往來無誤松筠又以比年河口淤淺糧運遞遲請造剝船一千隻停泊禦黃壩外以備撥運並以江廣漕船笨重請照江西漕船一律改小以利遄行均如所請七月奏報重運全數渡黃日期下部議敘十一月以回空漕船渡黃迅速復下部議敘是役也上聞松筠親赴河口懸立賞格督催重空每幫數百兩及一二千兩不等諭曰松筠自係爲力趨漕運起見但此項賞銀出於何處計其爲數不少非養廉所能敷用松筠操守清廉朕所深信斷不疑其取自官民自係向人借貸但借貸銀兩必須完欠勢不得不藉資商力又與取之於民何異況賞之一事非可濫施得當則人皆感奮過濫則視爲泛常軍船淺阻本所時有惟在認真催趨隨時相機其得賞可以挽渡者不賞亦未必停閣若專以賞項爲事年復一年何所底止嗣後務當相機經理期臻經久可行不得專以懸賞爲事松筠之赴兩江也疏請引沁入衛以濟漕運復疏陳黃河受病之由緣吳璈等於黃泥嘴俞家灘二處逢灣取直以致停淤此時亟應挑復嗣河督陳鳳翔等議覆引沁助衛勢不可行吳璈等奏言河水曲則行遲直則流急挑復斷不可行上責松筠謬執已見輕

率陳奏傳旨申飭既松筠遵旨密疏吳璫徐端議論河務不實辦理工程有虛捏開報情弊另片自求調任總河以便查覈又保薦蔣攸銛孫玉庭堪勝此任諭曰所奏各款必應澈底詳查秉公參奏河工敝壞已極人人視爲畏途松筠不但不能藉詞推諉轉肯銳意自任全是一片公忠實心爲國甚爲可嘉但松筠於河務素非所長已降旨將蔣攸銛補授松筠惟當與之實心講求相助爲理十二月兼署江南河道總督十六年正月奏報馬港口堵閉合龍河復故道並請於南北新隄兩岸各設同知守備把總協辦把總各一員專駐巡防增設淮海道駐紮中河專管桃北中河山安海防及新設兩廳河務下部議行旋調兩廣總督先是粵洋患盜籌議鹽船海陸兼運至是松筠以洋面肅清請照舊全由海運又疏稱立法之嚴尤貴行法之速粵東懲辦土匪因部覆稽遲有痕斃獄中倖逃顯戮者未能觸目警心請嗣後有夥衆四十人以上或不及四十人而有奪犯毆官各情俱先行正法臬示均從之六月授協辦大學士兼內大臣仍留兩廣總督任八月疏請改雷瓊鎮陸路總兵爲水師總兵粵東西下路海口龍門海安崖州各協營均歸管轄九月奏請增設佛岡廳直隸同知及照磨司獄各一並移設千總一把總二外

委四裁惠州嘉應二府通判各一復嘉應府爲直隸州復南雄州爲府均下部議行是月授吏部尙書命來京供職賜紫禁城騎馬十七年正月充國史館正總裁五月管理武英殿御書處事務六月賞給御製南苑大閱詩墨刻上以京城八旗生齒日繁不敷養贍疊諭吉林將軍等於吉林等處籌度閒散地畝酌量移居至是命松筠前往盛京敬謹會勘永陵工程並籌辦移駐宗室房地各事宜八月松筠奏查明西廠自大凌河東岸至禿婆婆店西首有可耕之地三千頃可移駐旗人二千餘戶東廠周圍數百里地多積水其積水皆自北山柳條邊而來若自邊牆相地開河使入川歸海則可涸出沃壤又東柳河溝一帶亦多積水若自北山東由巨流河至鶴鷹河橫開大渠東水入川歸海亦可得沃壤數千頃又奏續勘彰武臺邊門外養什河迤西一帶牧廠閒地東西寬三四十里南北長六七十里足可移駐並請於大凌河西廠東界一帶酌墾田數十頃先行試種上以東廠柳河溝等處相地開渠經費不敷無庸辦理命盛京將軍於西廠地方卽行試墾九月奏盛京小東門外東北里許共建房屋七十所除見給宗室五十五戶尙餘住房十五所請將見在閒散宗室添派十五戶每戶給田三十六畝允所請行是月

命仍在軍機大臣上行走管理理藩院事務十月管理雍和宮咸安宮蒙古學唐古忒學事務兩江總督百齡奏參江南河道總督陳鳳翔數月不赴工次陳鳳翔陳訴鹽巡道朱爾賡額捏報葦蕩柴束數目不符百齡奏報節省帑銀不實上褫鳳翔職命松筠偕戶部左侍郎初彭齡馳往查辦十一月訊明百齡所奏虛誣朱爾賡額委辦蕩柴多雜蒲草名爲增採實則虛糜擬褫百齡職朱爾賡額遣戍並請罷葦蕩左右兩營歷年額外所增柴斤疏入上以松筠據實辦理毫無瞻徇公正可嘉賞貂皮馬褂十八年正月授御前大臣二月京察議敘六月命以協辦大學士兼任伊犁將軍九月授東閣大學士十一月以平定滑縣逆匪敘功賞加太子太保銜十九年五月疏言烏魯木齊從前調派綠營兵擇地墾種嗣因積糧漸多撤屯歸伍其屯地六萬餘畝招民領種每戶三十畝徵糧二石八斗八升九合覈之屯兵每名二十畝交糧十二石者多寡懸殊年復一年倉儲漸少於邊地兵食大有關繫請復兵屯舊制從之八月授武英殿大學士二十年以審辦塔什密里克逆回仔牙墩一案未候命下將首從均寘重辟嚴旨切責革去太子太保銜仍革職留任二十一年正月京察屆期諭曰松筠近年辦事漸覺任性改常凡所

陳奏亦多窒礙難行毋庸給予議敘五月召還京命在御前大臣上行走總理諮達處先是伊犁惠遠城旗屯公田與關里沁回田均藉東山關里沁泉水灌溉上年阿奇木霍什納扎特等稟請開渠引霍什河水澆灌關里沁回田以關里沁泉水專灌惠遠城旗屯公田松筠覈實准行至是以得水豐餘兩有裨益奏聞七月管理吏部理藩院事務授鑲藍旗滿洲都統復充崇文門正監督八月復賞穿黃馬褂九月管理健銳營事務賞還太子太保銜十月署兩江總督十一月上以全唐文頒賜廷臣松筠與焉二十二年二月回京四月充殿試讀卷官六月奏言三輔亢旱請將來年恭謁祖陵典禮暫緩舉行諭曰乾隆四十三年皇考高宗純皇帝恭謁盛京特降諭旨垂示後嗣當眷懷遼瀋舊疆再三周歷斬於祖宗遺緒身親目覩或有無識臣工以爲不宜當律以悖命之罪誅之無赦朕敬承聖訓擬於明秋再舉恭謁三陵大典時向臣工言及今夏亢旱未得甘霖昨據大學士松筠奏致旱之由因朕欲詣盛京列聖示象阻止實屬夢囈怪誕極矣成湯遇旱六事自責六事中有謁祖陵之一事乎況一年後之事先爲此言搖惑衆心大玷首輔之職矣設若明年直隸及盛京遇有歉收朕何難降旨展期上年因縣課阻止秋

獮曾降諭旨儻有造作浮言阻止者必按軍法今松筠竟敢阻止上陵鉅典較秋
獮爲尤甚此奏若在明降諭旨之後朕必將松筠寘之重典今尙在未降諭旨之
前是以交軍機大臣會同吏部議處本日奏上諭將松筠革職實屬罪所應得姑
從寬典薄示降謫著革去大學士並各項差使以二品頂帶補授察哈爾八旗都
統仍革職留任八年無過方准開復二十三年十月署綏遠城將軍時松筠之子
吏部侍郎熙昌歿於湖南差次上憫松筠年老喪子召回京調補正白旗漢軍都
統賞還頭品頂帶花翎復賜紫禁城騎馬十二月授禮部尙書兼管樂部太常寺
鴻臚寺事務二十四年正月兼署理藩院尙書三月上謁東陵西陵命松筠偕莊
親王繇課大學士章煦尙書英和留京辦事四月充繙譯會試正考官六月調兵
部尙書授御前大臣領侍衛內大臣總理行營事務九月授盛京將軍十二月奏
盛京柳河溝一帶地勢低窪請籌辦開濬允之二十五年二月奏原定安置宗室
增設官學生五名歸併盛京宗室官學查移居營房距宗室官學八里冬寒夏暑
幼童徒步維艱請將原設學生五名撤回本營再增設學生十五名滿漢教習弓
箭教習各一名卽在本營就近訓練操練得旨所辦甚好四月以兵部遺失行印

查係松筠時任兵部尙書且佩帶印鑰革去盛京將軍降山海關副都統復降本旗公中佐領六月又以前在盛京將軍任內審擬溫程毆斃宗室喜受罪名顛倒再降本旗驍騎校八月宣宗成皇帝御極擢都察院左副都御史十月授左都御史十一月授熱河都統翰林院侍講學士顧莛疏稱松筠宜置左右以爲諫臣之倡諭曰朕擢松筠於降調之餘先用爲左都御史又任以熱河都統量能授職自有權衡何分內外乃顧莛以爲擢用左都御史羣臣慶於朝萬民怵於野松筠何足以致此若簡放熱河都統乃使之爲國宣力顧莛以爲雖與重大之任若有疏遠之心尤爲信口亂言矣至稱或疑其意氣之戇致拂聖聰或疑其攻擊之嚴致遭衆忌無論朕虛懷納諫從不以直言爲忤且松筠近來亦實無犯顏極諫之事其於內外臣工更無私毀私譽若以此致疑豈舉朝大臣除松筠而外均爲讒詔容悅之人乎顧莛著嚴議十二月松筠進呈自纂新疆識略十二卷上賜序刊行道光元年五月授兵部尙書七月調吏部尙書充會典館副總裁授正黃旗漢軍都統八月復充崇文門正監督調鑲黃旗蒙古都統復賞戴花翎賜紫禁城騎馬在軍機大臣上行走充實錄館正總裁九月偕禮部左侍郎康紹鏞赴浙江查辦

事件二年正月授閱兵大臣管總理行營大臣事務署直隸總督二月奏請整頓直隸各屬書院上是之閏三月回京充繙譯會試正考官六月理藩院有議覆烏里雅蘇臺將軍奏烏梁海驅逐潛住之哈薩克及科布多商人私向杜爾伯特交易一摺松筠索彙刪改理藩院尙書禧恩劾奏諭曰六卿分職各有專司若將別衙門所辦之事妄加刪改實屬罕見罕聞卽和珅當日之專權橫恣亦未敢公然出此實屬膽大妄爲著大學士軍機大臣會同九卿議罪尋議革職遣戍得旨加恩以六部員外郎候補在上書房繙譯諳達上行走十一月授光祿寺卿十二月以二品頂帶授左都御史三年六月命偕戶部右侍郎穆彰阿赴熱河鞠獄八月賞還頭品頂帶九月授吉林將軍四年正月條奏濩務疲累情形請復舊規辦理並請在小綏芬等處屯田以供創夫糧食疏下軍機大臣會同戶部議奏尋議上得旨吉林濩務節經立定章程所議尙形苦累自應量爲調劑所有綏芬烏蘇里產濩山場住山過冬創夫著准其仍復舊規辦理並令各攬頭舉熟習創夫在蘇城蘇子海訥思屯泥滿口等處尋採按額交上等好濩挑賸餘濩方准售賣如有蒙混情弊卽著落賠換重責示懲其每年留山創夫不得過每票人數之半儻潛

居偷漏從重究治並著守卡弁兵查驗勿任黑人夾帶私渡以昭嚴密至松筠奏請在小綏芬雙城子達場河一帶屯田墾種以供創夫糧食耕種採澆本難兼顧辦給農具殊形繁費且道里遼遠稽察難周尤恐別滋事端轉啟奸民窩藏寄頓等弊著毋庸議朕因松筠熟悉吉林情形簡畀將軍重任乃遇事紛更種種錯謬不勝將軍之任吉林將軍著富俊補授二月奉諭松筠著補授左都御史此係朕眷念舊臣格外施恩賞給差使松筠務慎守職任毋得妄行紛更致干咎戾四月充考試繙譯正考官七月授正黃旗漢軍都統因日昏陳請開缺溫諭慰留派考試鄂羅斯學十一月復賜紫禁城騎馬十二月充八旗值年大臣五年正月稽查內七倉五月稽查右翼幼官學六月充蒙古繙譯考試官八月署兵部尙書九月署烏里雅蘇臺將軍十月伊犁將軍慶祥奏鄂羅斯在哈薩克遊牧地方蓋房種地請敕下理藩院檄詢上詢之松筠松筠奏哈薩克素稱強悍或曾侵占鄂羅斯地今從索還不能不予而以無據之詞懇將軍奏請實未可定若理藩院行文查問鄂羅斯直以索還侵占爲言轉難查辦從前哈薩克襲封汗爵鄂羅斯卽有哈薩克早經投順彼國之語溯查乾隆三十五年土爾扈特明背鄂羅斯前來投順

後鄂羅斯行文索討經高宗純皇帝諭旨斥駁今以無甚關要之事行文令其遵奉儻彼以土爾扈特爲言或以哈薩克投順彼國爲詞徒生枝節有傷體制況哈薩克非國家用兵平定者緣乾隆二十二年平定伊犁之後哈薩克貢馬入覲因封汗爵藉以羈縻其或向鄂羅斯投順亦應置之不問查哈薩克游牧地方與鄂羅斯毗連之處理藩院並無圖志惟有曉諭哈薩克以天朝定例外藩之地無圖志者例不辦理上嘉其熟悉邊情飭慶祥詳酌辦理六年二月署兵部尙書五月授禮部尙書兼管太常寺鴻臚寺事六月偕戶部左侍郎王鼎赴山西查辦事件松筠於山西途次聞喀什噶爾軍報疏陳熟悉新疆情形自請前往宣撫溫旨嘉勉未允行八月命校勘清文聖訓九月充武會試監射大臣十二月充經筵講官七年二月充總諳達七月充玉牒館副總裁八年二月署熱河都統六月充蒙古繙譯考試官七月諭曰松筠前於陝甘總督任內借用養廉尙未完銀八千兩又管理崇文門稅務未完分賠銀一萬三千兩松筠宣力中外操守廉潔所有應交銀兩著加恩全行寬免八月仍署熱河都統授閱兵大臣疏請挑挖承德府屬早河工程應歸都統專摺奏報毋庸由直隸藩司報銷以免稽遲又都統衙門請復

舊制揀派協領佐領各一員幫辦刑名事務十月奏承德府屬一州五縣前經直隸總督那彥成奏准以漢員對調查漢員與蒙古言語不通艱於聽斷應循舊制專用旗員俱得旨俞允九年正月署吏部尙書三月署兵部尙書偕工部右侍郎白鎔往直隸覆鞫新城縣營弁朋謀陷害白勤一案平反定讞原審官議譴有差四月復署直隸總督六月調兵部尙書命赴科布多鞫獄十年命偕吏部右侍郎保昌赴陝西查訊巡撫徐忻被控各款鞫實請將徐忻下部嚴議途次又聞回疆軍報密陳剿辦事宜諭曰進剿何難善後不易若常川檄發調派成何事體必得一長久綏安之道方爲至善卿若有所見不妨陳奏候朕採擇十一年二月奏言喀什噶爾換防官兵宜裁撤免累回衆葉爾羌玉山宜弛禁聽回衆採販沾潤喀什噶爾參贊大臣宜改設於阿克蘇適中之地喀什噶爾宜改設正副辦事大臣二員令阿奇木郡王伊薩克爲幫辦與正副大臣聯名奏事喀什噶爾一帶卡倫宜添設侍衛領滿兵輪駐無令綠營官兵駐守易致逃避回疆駐紮大臣均不得攜眷免傳回婦應役英吉沙爾無庸專駐大臣可設三品阿奇木伯克每事就近呈報喀什噶爾至安集延回衆貿易爲生所販氈絨染色無不用茶配製宜因其

所利而利之永弛茶禁又安集延貿易之商回遠在浩罕西南來至喀什噶爾迢遙辛苦宜免其納稅以示招徠疏下揚威將軍長麟查辦是月松筠八十生辰賜耆齡錫祜扁額御書福壽字各一並文綺服物有差七月署理藩院尙書管理三庫事務八月奏請開缺旋即銷假諭曰松筠並無患病情形乃數日之間忽稱衰病難支忽稱精力如前既請開缺旋即請賞差使進退自由輕率陳奏君臣相與之際總當以誠爲主朕於各大臣推心置腹既以誠相感各大臣身受重恩尤當以誠相應似此任性自便殊失朕優禮大臣之意松筠自問於心能安與否嗣後各大臣務當仰體朕心恭矢靖共恪守事上以誠之義用副恩眷九月充蒙古繙譯正考官授鑲白旗漢軍都統十月授內大臣十一月因前赴科布多囑直隸道員徐寅第代購備賞什物及奉旨回奏又未將囑買在先發價在後據實聲明命革去內大臣以三品頂帶休致十二年六月浩罕伯克邁瑪底里遣使進表松筠前曾奏及浩罕通商邊境即可綏靖上思其言賞還頭品頂帶署正黃旗漢軍副都統七月達爾漢茂明安土默特三旗爭地命往歸化城查辦八月松筠督同副都統惠顯副盟長公喇特那巴拉等逐處履勘查明自克籌堆記東北一帶直至

哈達瑪勒河山後係達爾漢所屬山前係土默特遊牧有乾隆二十年圖記茂明安爭土默特之沙拉哈達地方屬實自克鄂博東至哈達瑪勒河山前係土默特遊牧山後係達爾漢遊牧有乾隆二十八年圖記達爾漢爭土默特山前地方屬實松筠按照原字原圖堆記履勘曉諭茂明安扎薩克及達爾漢貝勒皆折服松筠又奏言自哈達瑪勒河東至託蘇圖山係四子部落郡王伊什登遊牧南接土默特遊牧北係達爾漢遊牧三旗地界應一律查勘又南係延壽寺喇嘛遊牧亦宜添設堆記鄂博各清界址永杜爭端從之十二月授理藩院左侍郎十三年四月調工部左侍郎五月授正藍旗蒙古都統六月授閱兵大臣八月派考試滿蒙中書九月署戶部右侍郎兼管錢法堂事務十月充左翼監督十四年命以都統銜休致十五年卒年八十有二遺疏入諭曰松筠歷練老成清勤正直先朝耆舊由侍郎尙書都統簡授大學士出任將軍總督敷歷中外宣力有年歷事三朝恪恭匪懈上年因老病命休方冀家居調攝獲享期頤茲聞溘逝深爲悼惜著加恩晉贈太子太保銜照尙書例賜卹所有任內一切處分悉予開復應得卹典該衙門察例具奏尋賜祭葬予諡文清入祀伊犁名宦祠二十三年庫丁侵虧帑銀事

發經查庫王大臣載銓等議奏歷任管庫查庫大臣分成攤賠已故者子孫減半代賠得旨松筠之子原任二等侍衛熙慶見已病故並無子嗣免其罰賠子熙昌吏部侍郎熙慶原任二等侍衛

托津

托津富察氏滿洲鑲黃旗人父博清額理藩院尙書自有傳乾隆四十三年托津由都察院筆帖式充軍機章京四十七年升工部主事四十九年遷員外郎五十六年調戶部銀庫員外郎五十八年授福建道監察御史嘉慶元年兼公中佐領四年四月升兵科給事中六月賞副都統銜署鑲黃旗蒙古副都統八月署四川總督魁倫以川省教匪不靖奏請撥解部庫銀兩以濟軍需上命托津解往達州軍營五年正月補正紅旗滿洲副都統尋命接辦四川軍需閏四月審擬廣西平樂協副將七格捏報重傷私離軍營並於所帶官兵毫無統束奏請奪職遣戍伊犁允之五月奏言川省距京遙遠解運需時請豫撥餉銀早爲籌備諭曰川省剿捕見常喫緊之際軍餉自所急需托津酌量情形原可隨時奏請乃於一月以前豫懇接濟豈不徒添朕憂甚屬冒昧糊塗於軍餉事務漫無籌畫著卽來京供職

伊才具平常既不能籌辦軍餉而帶兵打仗更非所長斷不准續奏留川卽過陝西時亦毋庸向經略懇請隨營效力此卽朕保全之恩不可不知也六月奏報回京諭曰托津係特派管理軍餉之員自應將所管營內見存銀幾萬兩約敷幾月之用卽目下所餘無幾尙需調撥幾萬兩備用亦應奏明軍營距達州甚近緊要情形亦應遇便奏聞托津並無一言奏及實屬糊塗之至似此無用之人卽使來京又令辦理何事托津著革去副都統加恩賞給頭等侍衛前往葉爾羌更換奇豐額回京尋抵葉爾羌辦事大臣任六年二月奏准葉爾羌搭放官兵鹽菜銀兩請以每兩折給普爾錢二百官兵口食羊隻每隻折價銀五錢向係合錢發給請改爲銀款三月以前任辦事大臣奇豐額擅給伯克頂帶托津接任後未經更正部議降二級調用上加恩改爲降三級留任七年九月賞給副都統銜作爲喀什噶爾參贊大臣十二月授鑲黃旗蒙古副都統八年九月奏喀什噶爾英吉沙爾兩城歲收錢文支放官兵鹽菜等項按照銀錢各半搭放尙有盈餘請自九年爲始按銀四成錢六成支放於經費既可節省而錢文亦無積壓允之尋調鑲黃旗漢軍副都統十月授倉場侍郎九年八月奏浙江台州後幫旗丁虧短米石私買

餘米抵漕並以徵變米石充數請交刑部嚴訊失察之浙江糧道達琳押運通判德克金布領運千總張超羣等下部議處又議覆御史五誠額奏請各倉監督在倉住宿章程疏言倉廩啓閉有時監督率役住內恐家丁蠹役得與外間匪徒勾引夥竊且嚴冬風高物燥火燭可虞應嚴飭監督等在附近官房輪班直宿仍周密巡查以昭慎重上是之十一月丁母憂十年閏六月調吏部左侍郎命在軍機大臣上學習行走八月賞戴花翎尋充左翼監督九月湖廣總督百齡奏劾武昌鹽法道海昌失察岸商擡價病民劣衿賄和釀命並寶武局鼓鑄偷減上命偕直隸總督吳熊光往按罷海昌職岸商程啟大鑪匠黃銘仁革生王揆英悉按律懲辦又廣東已革南海縣知縣王軾番禺縣知縣趙興武訐告前任巡撫百齡委令屬員代辦供應家人藉端需索並違例製造非刑命托津會同湖廣總督瑚圖禮往治其獄按訊得實請褫百齡職論如律王軾等問擬有差十一年正月調戶部左侍郎四月以河南巡撫馬慧裕劾河東河道總督李亨特勒派廳員銀兩各款命托津偕署刑部左侍郎廣興往按獄定李亨特奪職逮問成伊犁十月賜紫禁城騎馬十二月往讞天津已革貢生賀有年索詐賄和捏控慶雲縣知縣柯映伊

私侵關稅盈餘一案奏言天津海稅向無定額致歷任知縣以多報少通融侵那應按照本年那用之二萬二千兩爲率自乾隆四十三年起查明徵收各員按在任之久暫經徵之多寡勒限著追照例問擬並將歷任通同那移各上司查明提用銀數按六成分年賠繳仍下部議處革生賀有年坐受賄索詐稅吏章德程等坐盤踞囑和均置之法天津道胡鈺慶雲縣知縣柯映伊以聽民求和下部議處又疏陳酌定徵收稅額請飭直隸總督就近遴委道府大員監收以杜侵那均如所請行十二年二月京察屆期諭曰托津在軍機處行走勤慎著加恩交部議敘七月充崇文門監督時熱河副都統福長安劾前任副都統慶傑收受屬員公分等款疏上奪慶傑職命偕工部侍郎英和往鞠讞定慶傑依官吏求索所屬財物律戍烏魯木齊十二月署經筵講官十三年九月賜燕郊房屋一所先是南河雲梯關外陳家浦漫口由射陽湖旁趨海口兩江總督鐵保江南河道總督戴均元請改河道徑由射陽湖入海十月命偕刑部尙書吳璥馳赴南河會勘十一月覆奏查明馬港口張家莊漫水俱西漾數十里始折歸北潮河如果該處地勢建瓴何以轉向西流且北潮河已匯流數月水未消涸顯見去路不暢改道斷不可行

請仍修復故道接築雲梯關外大隄收束水勢使之東注較爲得力又奏勘河口高堰各工因運河西岸堵築漫缺頭二壩口門較寬以致不能擎托暢注請趕緊補築均得旨允行十二月以前偕廣興審辦案件於廣興需索騷擾得受苞苴情弊未經陳奏部議降二級調用上加恩改爲降三級留任旋充經筵講官十四年正月往讞江蘇金山寺僧人志學呈控民人王兆良爭墾沙地糾衆戕斃多命一案僧人志學等均治如律二月署刑部左侍郎六月前任倉場侍郎福慶許兆椿奏通州中西二倉所存白米虧短已革倉書高添鳳盤踞舞弊命偕福慶往勘倉書高添鳳甲斗趙長安花戶陳四等坐奸吏骫法治如律旋經刑部究出高添鳳私出黑檔重領米石一案奏入上以倉場侍郎及監督等官歷任相沿因循廢弛以致百弊叢生將辦理不善各員分別革懲托津在任較久下部嚴議尋議奪職諭曰國家經久之計首重倉儲該侍郎自當督率所屬慎重鈎稽方爲無忝厥職乃怠玩因循毫無整頓以致已革倉書在彼盤踞似此積蠹橫行官吏骫法不知該倉場侍郎所司何事此而不嚴加懲辦何以肅紀綱而整職守托津在任一年未能查出弊竇但黑檔舞弊非伊任內之事著從寬革職留任仍著落分賠八月

御史陸言劾浙江學政劉鳳誥代辦監臨印用聯號命偕刑部侍郎周兆基按治得實劉鳳誥革職逮問戊伊犁十二月失察工部書吏王書常私雕假印冒領庫銀降一級留任十五年正月署山西藩司河東道劉大觀參奏前任山西巡撫初彭齡任性乖張署潞安府知府試用直隸州知州朱錫庚婪索贓私命偕刑部左侍郎穆克登額往按鞫實初彭齡劉大觀均下部嚴議朱錫庚奪職論罪如律二月擢工部尙書授正黃旗漢軍都統四月以上年承辦萬壽慶典經理妥協賞加一級五月調戶部尙書旋因給事中胡大成劾奏勒保任四川總督時有匿名揭帖指訐總督藩司款蹟寢息未辦命托津偕光祿寺少卿盧蔭溥往察得實奏聞勒保坐應奏不奏罷大學士六月以粵洋巨匪烏石二等殄除淨盡海面肅清諭曰軍機大臣承旨書諭自剿辦洋匪以來頗屬勤慎宜加優獎托津著賞加軍功加一級十一月兩淮鹽政阿克當阿劾前任揚州通判繆元淳承辦揚河隄岸草率偷減命偕順天府尹初彭齡前往查辦十六年正月署兩江總督二月奏通判繆元淳並無偷減情弊惟於淮揚運河水漲未能先事籌防以致廟灣場河隄漫口搶護不及糜帑誤工請褫職遣戍四月調鑲白旗滿洲都統賞加太子少保銜

兼內大臣九月署吏部尙書十七年充會典館副總裁官十八年二月京察下部議敘六月扈蹕熱河九月直隸教匪林清謀逆遣其黨闖入禁城命托津回京查辦尋獲林逆於黃村西之宋家莊上以軍機大臣托津等晝夜宣勤辦理妥協賞加二級旋授協辦大學士時股匪李文成犯豫陷滑城欽差大臣那彥成遷延旬日尙未進兵上命托津往代嗣因那彥成帥師進剿連著戰績復命托津赴開州軍營督同提督馬瑜剿辦餘匪十一月駐兵開州得旨托津見在開州督同馬瑜搜剿直隸邊境賊匪該處不過零星竄匪不難辦理如托津一路兵力有餘無大股可剿之賊或於蘇爾慎閻俊烈等酌分一二人帶兵馳往滑縣會剿卽或兵力不敷分派則吉林黑龍江馬隊過開州時不許截留一名速令全抵那彥成大營聽候差撥托津前奏恐滑縣賊匪被剿竄向東北欲厚集兵力堵禦不知滑縣賊匪殲除則北面自無虞竄逸朕盼望捷音宵旰焦勞見當功屆垂成之際伊與那彥成當統計全局先其急者以期速蕩大功軍務至重功則同賞過則同罰想托津公正廉明自能仰體朕心協助那彥成成功托津一律受恩朕無歧視只盼捷音尋由湯二莊進發連克楊店子王家道口等村焚燬賊巢殲除賊目邢全忠執

賊目郭明山餘匪俘馘無算捷入下部議敘復諭曰托津奏官兵剿捕開州邊界賊匪淨盡所辦甚好一切機宜當詳細斟酌不可畏蕙遲疑亦不可輕率孟浪也嗣聞逆匪馮克善竄德州奏請帶兵偵拏諭曰托津所奏紕繆已極查拏要犯不過派員緝拏若各處皆須發兵前往有是理乎托津之意計行至德州時滑城已破德州無事可辦彼時派馬瑜等將兵帶回開州伊自行奏請回京卽就近由德州起程竟係思家念切以致舉動冒昧糊塗著嚴行申飭卽刻帶兵兼程轉回開州防堵會賊匪李文成等竄往輝縣焚掠高莊直趨林縣上以托津不顧北面率往德州嚴旨申飭諭曰首逆李文成劉幗明已至林縣欲趨磁州汝速領官兵星夜馳回自北而南奮力截剿生擒二逆立受隆恩若再遲延觀望退縮不前朕必按皇考慮治訥親之例辦理禍福任汝自取慎之懍之又諭曰汝逕往德州之舉糊塗之極不治汝罪已屬格外施恩此次再不奮勉不能輕恕矣十二月由大名退駐開州連獲零匪得旨開州一帶零匪托津督率官兵擒縛九百餘人辦理認真著照軍功例議敘時滑城克復偕直隸總督那彥成奏陳善後事宜七條一酌改直隸營制一添設河南山東官兵一於直隸開州長垣河南濬縣滑縣等處移

駐弁兵一調撥吉林黑龍江官兵一千名駐京操防一各直省編查保甲以詰姦
宄一散鄉勇以收器械一請以陝甘將備與直隸分別對調疏入如議行十九年
閏二月授正白旗領侍衛內大臣其三月以前在開州時失察家人攜帶幼孩下
部議處尋署兵部尙書五月充國史館總裁官七月倉場侍郎榮麟劾通水道張
五緯玩誤漕運張五緯復以榮麟迴護已見互相揭奏命托津往讞之獄定榮麟
張五緯下部議處有差八月授東閣大學士管理戶部事務九月晉太子太保銜
充會典館總裁官十一月倉場侍郎初彭齡劾兩江總督百齡江蘇巡撫張師誠
收受餽送並劾江蘇藩司陳桂生冊報溧水縣虧缺銀數先後多寡不符有心朦
混命偕戶部尙書景安往按二十年正月查明百齡張師誠俱無收受餽送之事
惟百齡於提取關稅銀兩發縣生息作爲兵丁差費未經奏明辦理張師誠於未
到任之先標弁迎至其家卽留供應差遣均有未合百齡張師誠均下部議處察
議有差陳桂生亦無含混隱匿情弊初彭齡坐奏事不實下部覈議八月充崇文
門正監督二十一年二月京察下部議敘四月署御前大臣閏六月以直隸總督
那彥成前在陝甘總督任內與藩司陳祁商那賑銀津貼腳價等費事覺命托津

往按褫那彥成職逮問解京命托津暫署直隸總督旋回京二十二年六月管理理藩院事務九月御史伊綿泰蕭鎮於封禁米石婪索錢文問擬如律以御史等係由戶部保送托津未能詳慎揀選下部議處二十三年二月充文淵閣領閣事五月以纂輯明鑑體例不合罷原纂各官特改派總裁官另行編輯托津與焉八月上恭謁祖陵禮成賞加二級二十四年京察下部議敘尋諭曰朕本年六旬正壽左右近臣宜再加恩澤托津襄贊內廷樞務多年辦事老成承旨書諭總理部旗事務從無錯誤著加恩賞戴雙眼花翎並賞用紫纁二十五年四月充殿試讀卷官六月扈蹕熱河七月仁宗睿皇帝升遐命總理喪儀九月充實錄館監修總裁諭曰七月二十五日慟遭皇考大行皇帝大故彼時軍機大臣敬擬遺詔朕在諒陰之中哀慟迫切未經看出錯誤之處朕亦不能辭咎但思軍機大臣多年承旨所擬自不至有誤昨內閣繕呈遺詔副本以備宮中時閱恭讀之下末有皇祖降生避暑山莊之語因請皇祖實錄跪讀始知皇祖於康熙辛卯八月十三日子時誕降於雍和宮復徧閱皇祖御製詩集凡言降生於雍和宮者三見集中因令軍機大臣明白回奏據稱恭查大行皇帝御製詩初集第十四卷萬壽節率王

公大臣行慶賀禮恭紀詩註恭載高宗純皇帝以辛卯歲誕生於山莊都福之庭
又十六卷萬萬壽節率王公大臣等行慶賀禮恭紀詩註相同至實錄未經恭閱
不能深悉等語朕敬繹皇考詩內語意係泛言山莊爲都福之庭並無誕降山莊
之句當日擬註臣工誤會詩意茲據軍機大臣等稱實錄未經恭閱尙屬有辭至
皇祖御製詩集久經頒行天下不得諉爲未讀實屬巧辯托津戴均元俱已年老
毋庸在軍機處行走並不必恭理喪儀一併交部嚴加議處遺詔布告天下爲萬
世徵信豈容稍有舛錯故不得不將原委明白宣示中外著將此旨通諭知之尋
部議奪職諭曰托津等敬繕皇考大行皇帝遺詔內有錯誤之處非尋常錯誤可
比吏部議以革職實屬咎所應得第念皇考梓宮在殯兩大學士同時罷斥朕心
實有不忍托津戴均元著降四級留任六年無過方准開復道光元年三月仁宗
睿皇帝奉安禮成托津恭題神主命晉太子太傅銜賞加隨帶三級七月調正黃
旗蒙古都統八月調正白旗滿洲都統二年三月署戶部尙書四月授內大臣五
月以議奏倉場盤查章程措置失宜部議降二級留任上加恩改爲降一級留任
尋授閱兵大臣八月充崇文門正監督十月署吏部尙書兼管戶部三庫事務尋

署理藩院尙書三年正月托津子恆齡之妻乘轎由神武門中門行走有乖體制上以托津平日不能管束革去紫纒並褫雙眼花翎仍戴單眼花翎以示懲儆八月上幸萬壽山玉瀾堂賜宴十五老臣恩命入宴繪像御製詩有昔贊綸扉承考澤立朝正色端巖廊之句褒托津也四年七月以官犯侯際清呈請贖罪賄囑官吏並職員董椿指官撞騙等情命托津按治侯際清董椿問如律刑部堂司各官降革遣戍有差五年正月京察下部議敘二月署戶部尙書八月署刑部尙書復充崇文門正監督六年四月充殿試讀卷官七月署左都御史七年五月管理刑部事務七月通州民人王文弼呈遞封章控告協辦大學士英和家人張天成增租擾累命托津等治其獄讞定坐英和失察褫協辦大學士仍下部嚴議王文弼等論罪如律八年正月回疆底定恩逮廷臣賞還紫纒七月以審擬侍衛恩緒毆斃家人一案瞻顧遲延含混聲敘命將刑部堂官議處托津降二級留任九年八月上詣盛京祇謁祖陵托津留京辦事十月賞還雙眼花翎旋諭曰托津年逾七旬著於該管旗分衙門帶領引見之日免其帶領以示體恤耆臣至意十年八月得旨御門辦事托津著加恩免其進班十月以前在戶部尙書任內失察捐納房

書吏蔡繩祖等私造假照降四級留任十一年因病陳請開缺諭曰大學士托津自嘉慶年間仰蒙皇考仁宗睿皇帝簡任綸扉贊襄樞禁朕御極以來命管理部院旗務宣力多年悉臻妥協今歲秋間屢以病乞休降旨令其安心調理茲復以氣體衰憊奏請開缺朕實不忍遽允所請但察其病勢未痊若令勉強趨公轉非所以示體恤托津著加恩以太子太傅大學士致仕支食全俸俾資頤養用示眷懷耆碩恩禮優加至意十二年托津孫庚長以二品廕生分部學習期滿引見上加恩准其留部卽補十五年十月卒年八十一諭曰致仕大學士托津宣力五十餘年資深望重歷仕二朝渥承恩眷辦事實心老成公正十一年冬間以老病乞休不忍遽令解退因伊年躋八旬恐其繫心職守特加恩恤准予致仕並賞全俸歲賞葦枝時加存問俾安心頤養獲享遐齡茲聞溘逝深爲悼惜著賞給陀羅經被派慶郡王綿愨卽日帶同侍衛十員前往奠醑朕於十一月初七日親臨賜奠並加恩晉贈太子太師入祀賢良祠賞給廣儲司庫銀一千五百兩經理喪事所有原任內一切處分悉予開復應得卹典著該衙門查例具奏十一月上親臨賜奠復諭曰朕親臨原任大學士托津宅賜奠眷念耆臣伊孫太僕寺員外郎慶端

俟服闋後加恩以郎中升用尋賜祭葬予謚文定孫慶端福建布政使庚長浙江鹽運使

鄒炳泰

鄒炳泰江蘇無錫人乾隆三十七年進士改庶吉士四十年散館授編修旋充四庫全書纂修官四十三年因纂書出力命優敘四十五年充文淵閣校理四十六年遷國子監司業五十二年擢祭酒五十三年充浙江鄉試正考官五十四年七月授詹事府少詹事八月提督山東學政十二月遷詹事五十五年擢內閣學士兼禮部侍郎仍留學政任五十六年八月丁父憂五十八年十一月服闋六十年二月補原官八月充順天鄉試副考官尋提督江西學政嘉慶二年正月丁母憂四年四月服闋五月補原官旋授禮部右侍郎九月調倉場侍郎五年三月劾坐糧廳顏培天嗜酒任性請撤回交部議處從之六年二月京察諭曰鄒炳泰剔除積弊整頓漕務著交部議敘五月裕豐倉不戒於火炳泰以未能先事防範自請議處上以炳泰駐筭距倉較遠一聞稟報卽馳赴該處查看尙無不合免之五月都統明安奏二月分西四旗應領俸米見在海運倉始行支放上以炳泰總司倉

務常因事入城可以隨時稽察何至該倉應放米石遲至數月之久毫無聞見命
交部嚴加議處尋議降二級調用恩准抵銷會侍郎達慶奏報軍船回空日期炳
泰未經聯銜復單銜具奏各幫虧短米石數目上命侍郎和寧祖之望馳赴通州
查辦嗣以查明未經會商奏入諭曰鄒炳泰於二進軍船挂欠既經奉旨將餘米
扣補三進軍糧事同一例焉有歧視之理而鄒炳泰因與達慶意見不合輒奏稱
豫防旗丁等年年積壓雖似因公起見實不免偏執使氣鄒炳泰著交部議處尋
降一級留任九年八月御史五誠額奏請各倉監督輪流率役在倉住宿敕下倉
場議奏經炳泰議以倉廩重地若令倉役時常出入或與在外匪徒勾串偷竊且
嚴冬燒炕火燭可虞請仍於附近倉門官房居住輪班稽查上是之十年二月擢
都察院左都御史五月遷兵部尙書六月兼署工部尙書九月管理戶部三庫事
務十二月充經筵講官十一年三月上御經筵炳泰誤站班次未請處分命交部
加等議處尋議罰俸六箇月九月兼順天府尹事十一月命紫禁城騎馬十二年
正月調吏部尙書十三年正月充會試正考官十四年正月加太子少保銜四月
充殿試讀卷官六月己革倉書高添鳳盜領米石案發上以炳泰在任最久於少

收多放情弊全無覺察命革去宮銜降爲二品頂帶仍帶革職留任尋以萬壽慶典賞還一品頂帶十五年十月炳泰七十生辰御書卿雲錫祉扁額賜之十六年正月炳泰以足疾請開缺諭令安心調養不必限以時日優命御醫診視三月署戶部尙書四月充殿試讀卷官復充朝考閱卷官五月協辦大學士仍兼吏部尙書六月賞復太子少保銜九月炳泰因吏部司員扣缺錯誤迴護堅執將辦理緣由陳奏上是之十八年充順天鄉試正考官會降調知縣傅士奎及已革司獄夏本榮呈請捐復炳泰前後准駁與署任侍郎初彭齡意見不同經初彭齡入奏上命大學士勒保等詳覈具奏旋經查明兩案覆奏均應議准諭曰鄒炳泰身任尙書遇有呈請捐復者應准應駁自當準情覆議乃於傅士奎一案則已駁復准旋又改駁於夏本榮一案則已准復駁茫無定見著交都察院議處尋議降二級留任又兵部主事姚塹在昌平州八仙莊被劫上以該處距京城數十里爲官員商賈往來孔道盜匪膽敢糾衆邀劫實由地方官闌茸所致鄒炳泰僅將專管上司參奏亦未自請處分竟視爲尋常盜案照例辦理殊覺懈弛諭無庸管理府尹事務九月以逆匪林清黨與多係直隸固安及黃村一帶人諭曰鄒炳泰在順天府

尹任內平日漫無查察以致養癰貽患著以中允贊善降補尋休致回籍二十五年正月卒

曹振鏞

曹振鏞安徽歙縣人父文埴官戶部尙書振鏞乾隆四十六年進士改翰林院庶吉士五十二年散館授編修五十六年二月大考翰詹列三等諭曰曹振鏞雖列三等然觀其才具尙堪造就且係曹文埴之子著加恩授侍講十月充日講起居注官五十七年六月充浙江鄉試副考官九月任河南學政嘉慶元年二月轉侍讀四月升右春坊右庶子十一月升侍講學士十二月轉侍讀學士三年二月大考翰詹振鏞列二等遷詹事府少詹事六月充湖北鄉試正考官八月任廣東學政九月升詹事十二月丁父憂五年特予曹文埴卹典賜諡文敏振鏞入謝上以文埴之母年九十有四賜人淺緞匹命振鏞齋回以資頤養六年服闋七年五月補通政使司通政使八年九月充實錄館副總裁官命專司勘辦彙本十二月遷內閣學士兼禮部侍郎銜尋充經筵講官文淵閣直閣事九年二月上幸翰林院分韻賦詩振鏞與焉賜絹箋筆墨有差時值京察上以振鏞恭纂實錄彙本尙爲

詳慎下部議敘尋以恭進實錄內擡寫之處譌繕一字部議降一級調用上從寬改爲降三級留任六月署吏部右侍郎七月遷工部右侍郎八月任江西學政十年二月偕巡撫秦承恩疏言萬載縣土棚兩籍考試請於原額十二名外加額四名不分土棚籍合考取進從之十一年六月調吏部右侍郎十月遷工部尙書十二年三月充實錄館正總裁官四月聖訓實錄告成予議敘振鏞辭免恩加太子少保銜九月命恭送高宗純皇帝實錄前往盛京尊藏禮成加二級十二月充文穎館正總裁官十三年三月署吏部尙書尋署戶部尙書四月充殿試讀卷官六月署刑部尙書八月充順天鄉試正考官十四年四月充殿試讀卷官五月管理戶部三庫事務七月調戶部尙書十二月以失察工部書吏舞弊冒領三庫銀兩部議降二級調用上加恩改爲降三級留任十五年五月充會典館副總裁官十月充順天武鄉試正考官十六年三月充會試正考官四月授翰林院掌院學士充經筵日講起居注官十八年八月復署吏部尙書九月調吏部尙書協辦大學士尋擢體仁閣大學士管理工部事務十二月賜紫禁城騎馬賞平定滑城功以振鏞職任綸扉晉太子太保銜充文淵閣領閣事十九年正月命稽察欽奉上諭

事件處閏二月命續纂河工方略一書振鏞總司其事是月纂輯全唐文完竣賞加二級五月充國史館正總裁官七月上謁東陵命留京辦事九月充會典館正總裁官十月振鏞六十生辰御書綸閣延暉額并服物賜之二十年三月上謁東陵命留京辦事先是工部司員福海保送一等尋任雁平道緣事革職將歷次濫保各堂官均交部議處尋議降二級調用上改爲留任七月上秋獮木蘭命留京辦事二十一年正月京察上以振鏞總理工部兼管三庫事務均屬妥協交部議敘二月上謁東陵命留京辦事七月上秋獮木蘭復命留京辦事二十二年三月充會試正考官七月上秋獮木蘭命留京辦事二十三年三月上謁西陵命留京辦事五月以纂輯明鑑體制背謬振鏞等不知豫行請旨部議降調上加恩改爲降三級留任七月上謁盛京恭謁祖陵命留京辦事是月工部續估東嶽廟工程浮開銀兩上以工部各堂官旣於書吏舞弊毫無覺察又失察司員得贓平昔互相推諉怠玩因循將振鏞等交部議處尋議降調上改爲降三級留任二十四年七月上秋獮木蘭命留京辦事九月復管理三庫事務十一月命振鏞偕尙書穆克登額查估正陽門應修工程振鏞疏稱大樓等處尙屬穩固時屆寒凍難以施

工明歲南北向亦屬不宜請暫緩興修上以所奏甚是從之二十五年三月上謁東陵命留京辦事是月兵部遺失行印命振鏞等鞫訊以日久未能審出實據降二品頂帶尋會審得實復其頂帶七月上秋獮木蘭命留京辦事九月命在軍機大臣上行走充實錄館監修總裁官道光元年三月仁宗睿皇帝奉安禮成振鏞恭題神主晉太子太傅銜加隨帶二級五月授爲武英殿大學士賜第於內城三轉橋二年正月京察上以振鏞辦理部務本屬妥協又自簡任軍機大臣以來敬共所事實力匡襄交部議敘二月承辦壇廟工程司員得受官匠銀兩復囑託看冊司員朦混銷算上以該堂官漫不經心將振鏞等交部嚴議尋議褫職上加恩改爲降四級留任八年無過方准開復四月充殿試讀卷官十二月振鏞等奏見察各處工程較多請嗣後分別輕重情形酌辦不得同時並舉以重工料而節糜費從之三年正月諭曰朕於本年元旦御殿受賀闈惠覃敷左右近臣允宜特加恩澤大學士曹振鏞失察承修工程司員降四級留任著加恩寬免二月上臨雍視學振鏞充直講三月充會試正考官八月上幸萬壽山玉瀾堂錫宴十五老臣時振鏞年齒居末恩命入宴畫像御製詩有絲綸佐朕彌恭謹抒忠獻替資匡襄

之句褒振鏞也四年四月仁宗睿皇帝實錄告成賞戴花翎子恩沛候選員外郎
遇缺卽補子恩浚特賜舉人一體會試七月充上書房總師傅十月振鏞七十生
辰御書調元篤祜額秉鈞日贊資良弼杖國時康引大年聯句并服物賜之五年
正月京察上以振鏞管理部務均屬妥善承書諭旨獻替匡襄尤爲出力交部議
敘六年四月充殿試讀卷官十二月入直南書房七年回疆克復四城諭曰見已
諭撤大兵籌辦善後計逆裔犯順一年有餘凡一切軍報承書諭旨軍機大臣等
夙夜殫心勤勞懋著允宜特沛恩施大學士曹振鏞著晉加太子太師八年正月
回疆奏報生擒首逆張格爾諭曰自道光六年喀什噶爾用兵以來軍機大臣曹
振鏞等佐朕運籌軍務夙夜勤勞承書諭旨鉅細無遺去歲因四城雖復首逆未
獲曾經稍示恩榮朕意未愜茲元兇生獲紅旗報捷軍機大臣尤當再沛恩施用
昭獎勵大學士曹振鏞著晉加太傅銜賞用紫韁仍著照軍功例交部議敘四月
賜圖像紫光閣御製軍機大臣像贊並序曰朕寅承大寶日理萬幾孜孜焉惴惴
焉嘗恐用人行政或致闕失每遇事必虛懷延納不敢自作聰明而軍機大臣曹
振鏞等皆能感戴皇考之遺澤暨朕之信用是以知無不言一心一德卽如前歲

西陲用兵諸臣夙夜在公襄贊機謀承書諭旨無不盡心竭力與朕同一憂勤而大學士曹振鏞自簡授軍機大臣以來公正慎勤班聯領袖尤能殫心據實鉅細無遺茲大功告歲特欲循照舊章繪入功臣像而朕之不自大其事不自尙其功亦可昭示來許柰曹振鏞等善則稱君真誠遜讓朕亦難於勉強在朕心終未愜也試思漢高祖之大度唐太宗之英明運籌決勝亦必須蕭曹房杜輔助而成也矧戎爲國之大事朕臨御以來興戎首舉嘉予內外文武諸臣各殫心力迅奏膚功不然則成功未能如此其速籌畫未能如此其善也朕思之再三允宜別繪一圖親爲製贊以遂諸臣不敢列入功臣之心而又能彰明帷幄之輔弼得人不亦善乎御製振鏞贊曰親政之初先進正人密勿之地心腹之臣學問淵博獻替精醇克勤克慎首掌絲綸九年元旦上親書御製振鏞像贊賜之三月充會試正考官八月隨駕詣盛京恭謁祖陵大禮慶成賞加二級十月諭曰大學士曹振鏞年逾七旬著於該衙門應行帶領引見之日免其帶領引見以示體恤耆臣至意十年十二月御書同德資良弼單心贊治樞聯對賜之十一年正月京察上以振鏞久任軍機大臣贊襄勤慎承旨詳明交部議敘五月振鏞子戶部郎中恩汴病歿

上傳諭慰之並以恩汴原得一品廢生予其次子恩淡承廢示體恤焉八月上五旬萬壽慶辰加恩廷臣振鏞得賞戴雙眼花翎十二年充殿試讀卷官十三年充會試正考官十四年正月賜紫禁城內乘轎時屆京察諭曰大學士曹振鏞久任軍機克勤克敬年登八袞精力如常著加恩交部議敘三月上謁西陵命留京辦事十月振鏞八十生辰諭曰大學士曹振鏞由乾隆年間供職詞垣嘉慶年間洊擢至大學士朕親政之初簡授軍機大臣久贊綸扉倍加勤慎見在年登八袞精神強固朕心實深嘉悅允宜特沛殊恩以昭懋眷伊孫曹紹櫛著加恩賞給舉人准其一體會試用示朕篤祐耆臣有加無已之至意頒賞御製詩曰八袞洪開甲午年嘉予元老弼仔肩三朝雨露霑深澤一德謀猷濟巨川梁棟有徵資啟沃絲綸必慎冠班聯長茲壽寓君臣慶政在親賢幸得賢又御書領袖耆英額紫閣圖勳嘉輔弼玉瀾錫慶介期頤聯對并服物賜之十二月因感冒請假諭令安心調理十五年正月卒諭曰大學士曹振鏞學問淵博獻替精醇公正慎勤老成持重自其父曹文植供職內廷渥承皇祖高宗純皇帝知遇擢至戶部尙書嗣曹振鏞仰荷皇祖特達之知由翰林洊升詹事皇考仁宗睿皇帝親政以來洊加升擢簡

任綸扉朕御極之初特授軍機大臣十四年餘一德一心深資啟沃絲綸首掌鉅細畢周夙夜在公始終如一實朕股肱心膂之臣服官五十餘年歷事三朝身躋崇要從未稍蹈愆尤動循矩法克副贊襄念其年躋八秩特命肩輿入直俾節勞勩上年因微疾請假派員存問俾安心在寓調養優加慰勞方冀速痊照常入直詎意數日之間遽成長往頓失腹心之臣不覺聲淚俱下悼惜難堪著加恩入祀賢良祠賞給陀羅經被並手串煙壺煖手各件派穆彰阿帶領侍衛十員卽日前往奠醑朕於本月二十九日親臨賜奠並著賞給廣儲司庫銀二千兩經理喪事其任內一切處分悉予開復應得卹典著該部察例具奏伊子曹恩澆著賞給四品卿俟服闋後遇有四品京堂缺出著該部開列請補用示朕軫懷耆舊恩賚有加至意尋賜祭葬諭曰朕親政之初見大學士曹振鏞人品端方學問優長特授爲軍機大臣用資啟沃十四年餘靖恭正直歷久不渝雖身躋崇要動循矩法從未稍蹈愆尤凡所陳奏均得大體老成持重懋著忠勤實朕股肱心膂之臣從前乾隆年間大學士劉統勳嘉慶年間大學士朱珪仰蒙皇祖高宗純皇帝皇考仁宗睿皇帝鑒其品節賜諡文正易名之典備極優隆曹振鏞實心任事體用兼優

外貌呐然而獻替不避嫌怨朕深倚賴而人不知揆諸謚法實足以當正字而無愧茲據該衙門奏請予謚著加恩賜謚文正用示朕眷懷良輔寵錫嘉名至意復諭曰大學士曹振鏞先朝耆舊久直內廷端謹老成靖恭正直十四年餘嘉謨嘉猷深資倚賴前因溘逝特崇懋典用獎前勳加恩賜謚文正並准其入祀賢良祠伊子曹恩澣服闋後以四品京堂補用朕追維良輔疊沛隆施茲復派令惠郡王前往賜奠伊孫曹紹桐著賞給舉人准其一體會試將來靈柩回籍時著沿途地方官照料妥爲護送用示朕篤念耆臣有加無已至意七月諭曰大學士曹振鏞靈柩於月內起程由水路回籍著加恩於二十七日派御前侍衛道慶前往賜奠到籍後加恩賜祭一壇著鄧廷楨派委道員一人前往奠醮子恩澣候補四品卿

百齡

百齡張氏漢軍正黃旗人乾隆三十七年進士改庶吉士四十年散館授編修四十年充文淵閣校理四十二年提督山西學政五十年改江南道御史五十五年丁父憂五十七年服闋補浙江道御史尋擢奉天府府丞五十八年丁母憂六十年服闋嘉慶三年補順天府府丞四年調奉天府府丞五年二月授湖南按察

使十月調浙江按察使六年擢貴州布政使七年二月貴州巡撫常明劾糧道孫文煥侵蝕賞卹征兵銀兩兼於糧臺委員名下虛填銀數朦混報銷並抽匿印領冊卷經百齡於到黔後卽行查出上嘉之嗣孫文煥控告百齡假公勒索並巡撫常明鎔賣軍需用贍鉛丸四十餘萬斤各款上命侍郎初彭齡富尼善赴黔嚴鞫尋據奏常明鎔賣鉛丸屬實餘坐誣諭曰此項鉛丸既經軍需用贍自應歸入軍需項下報銷乃因幕友金玉堂向來販賣白鉛竟鎔作鉛斤運往漢口發賣希圖漁利迨藩司百齡查知常明始應允照數買還散法營私行同市僧常明著革職至百齡於孫文煥所控各款雖審全虛但百齡既經查出常明欠繳庫項並縱令劣幕私賣鉛斤各款不卽據實參奏僅以催逼押繳完結意存瞻顧巡撫實屬有心袒庇令初彭齡等於定案時治以應得之罪尋部議降三級調用上寬之十二月調雲南布政使八年擢廣西巡撫九年四月奏廣東合浦靈山縣民勾結滋事竄入廣西博白縣境拏獲馮老四定幫林青上等六月奏越南夷人阮傑等前安置江寧時私買內地百姓爲僕攜帶還國路經廣西經臣查出後卽行截留照契價贖回送還原籍上是之七月劾武緣縣知縣孫廷標屈抑革生黃萬璆等毀屍

誣告冤擬絞候一案請將廷標革審上嘉其到任未久能平反重讞賞戴花翎並以廣西道府等官與孫廷標半屬舊識恐互相蒙蔽命廣東布政使廣厚赴廣西隨同百齡鞠訊尋審明孫廷標殘屍滅傷任意藐法各情特予太子少保銜十一月調廣東巡撫十年四月陸豐縣甲子司地方會首李崇至勾結土匪洋盜滋事飭文武員弁拏獲匪黨二十餘名並疊獲甲子司著名夥犯四百餘名奏請分別覈辦閏六月以南海縣知縣王軾番禺縣知縣趙興武玩視刑獄濫羈人犯並任聽蠹役官媒私押男婦致斃多命偕總督那彥成列案參奏命加一級以示獎勵六月擢湖廣總督九月兩廣總督那彥成以已革南海番禺二縣王軾等稟百齡在巡撫任內用聯枷致斃二命復派家人任二傳令兩首縣代辦供給並於升任時將署內一切玻璃紫檀物件用人夫二千餘名搬運下船又以百齡在巡撫任內曾與總督連銜具奏各摺百齡到湖北後將摺差截留僅錄硃批行文知會等款奏入命直隸總督吳熊光吏部侍郎托津馳往查辦十月吳熊光等奏百齡在廣東曾用聯枷及將摺差截留俱經供認惟在粵省起程時將署內各物搬運下船一節堅不承認請將百齡解任質訊諭曰批迴奏摺既係督撫會銜則總督列

銜在前自應先交總督拆閱卽因係巡撫衙門主稿先行拆閱亦應將奉到硃批原摺封交恭閱況百齡已升任他省並無應辦之責乃輒將粵省會奏摺件中途截留迨拆閱後又不將硃批原摺寄交邢彥成閱看祇係恭錄知照安保其不意爲增減殊屬錯謬實不料其竟敢如此妄爲至各衙門所用刑具自有定制今百齡於懲辦棍徒輒用聯枷拘繫實係非刑但百齡款蹟所重者總在逼勒二縣供給買辦臨行搬運物件一款見據百齡供認祇係在書院寓居十二日曾交二縣買辦食物業經發銀一百兩其預備轎傘等物亦有開銷公項銀六百兩若無別項需索何至二縣用銀一萬兩之多與所供銀數大相懸殊至任二供稱起程時曾將署中置備几案等項搬帶家眷船上若如所供則器具儘屬無多何以用夫搬運多至二千餘名殊難憑信不可不澈底根究百齡見已解任如審有婪贓款蹟卽將伊革職拏問並將任所資財查抄十二月吳熊光托津等奏據任二供百齡自廣東起身時眷船隨後行走將歷年積存之物並廣東署中原備器用私自搬取下船到楚後在漢陽李姓棧房安放百齡均不知情當已逐件查出並將百齡署內物件亦行查封內有木器挂燈等項亦係廣東之物據百齡供稱俱係任

二私自安放實不知情惟自認糊塗昏曠等語諭曰百齡平日爲人辦事朕所素知係屬精明之人非糊塗昏闇者可比伊於家人任二在漢陽寄頓之物卽難諉爲不知焉有近在署內毫無覺察之理況任二私帶物件自必私瞞伊主何以轉運進署內豈不慮百齡看出乎總督係關防衙門當物件搬運進署時百齡豈得諉爲不知所供明係支吾狡辯卸罪於任二至伊於任二寄頓物件內又自行指出紗格瓷器等一二尠舊價賤者認爲己物以見其餘各件與伊無涉此又係百齡巧卸之術豈能逃朕洞鑒看來不但伊署內查出之木器挂鏡等件係百齡自行攜帶卽在棧房寄頓之物亦係百齡所寄不過尙未運進衙署可令百齡據實登答毋許含混以致罪上加罪且披閱單內有買房六處買地五十餘頃爲價不少伊出京時曾聞其盤費不敷向人那借銀兩竟似清貧有素而見查出所置產業如此其平日所爲恐未足深信見在吳熊光已赴兩廣總督新任百齡著革職拏問交托津會同瑚圖禮提同伊家人任二及廣東人證詳細質訊按律定擬具奏十二月托津偕新任湖廣總督瑚圖禮審擬百齡截留批摺製造非刑及令屬員代辦供應致家人任二借端需索等款請將百齡發往伊犁效力贖罪諭曰朕

詳加酌覈百齡所犯共係三罪其截留批摺一事係前在廣東巡撫任內會同總督具奏之摺雖係巡撫衙門主稿但伊列銜在後且已赴湖廣總督新任卽不得與聞廣東之事何得於摺差過境時擅給驛馬令齎赴武昌省城及拆閱後並不將原奉硃批移交廣東僅止照錄移文實屬非是姑念此係尋常摺奏並無密諭查辦之件因此洩漏事尙可原其製用聯枷一事在百齡原因廣東省民風刁惡以懲辦奸徒但究屬非刑有違定例設地方官因此效尤紛紛做造並將尋常案犯一概施用率致枷斃豈非百齡作俑乎至伊令屬員代辦供應並失察家人借端需索一節百齡在廣東巡撫任內雖無婪索贓款但委交二縣代辦食物又不駿回鋪墊以致伊家人任二借端需索兩縣家人朦混開銷數逾巨萬而於任二私帶傢伙物件前赴湖北寄頓隱匿毫無覺察見在抄出任二物件供係粗重什物若百齡意在貪贓則粵中珍玩細輦可帶者多何必攜此累重之物乎是百齡委不知情所供尙屬可信且伊自擢用督撫以來所到之處俱能實心任事整頓地方國家辦理刑章八議中原有議能之條百齡尙可量加寬宥著免其發往伊犁加恩在實錄館效力行走十一年三月上以實錄將次告成無須另行添派見

在閩省臺灣剿辦蔡逆匪黨一切軍需糧餉須人經理命百齡隨領侍衛內大臣德楞泰馳驛前赴閩省幫同布政使景安妥爲辦理五月賞六品頂帶補福建汀漳龍道十二年擢湖南按察使賞加四品頂帶四月調江蘇按察使十三年二月以病請開缺回旗調理從之五月病痊補鴻臚寺卿尋授山東按察使九月擢布政使十二月升山東巡撫十四年正月命百齡以二品頂帶兵部侍郎銜補授兩廣總督四月劾前督臣吳熊光辦理英吉利兵船擅入澳門一事遲延錯謬請旨加罪並請俟本年英吉利國貨船到時先期偵探預籌防範事宜上是之五月密奏粵東廢弛情形以粵海著名盜首如張保仔等幫船甚多夥黨幾萬餘人其所以有恃無恐者總因接濟根源不能斷絕請令地方官認真堵緝並拏獲接濟盜匪及濫竽等一百餘名上嘉其所見深得要領六月奏歷年粵洋剿捕匪船米艇具有成效前督臣吳熊光以米艇不能遠出外洋請改造登花船二十號茲查登花船難以購料請將原估登花船二十隻工料銀改設大中小米船四十號以節浮費而便駕駛又吳熊光原奏於遂溪縣東海地方設立專營在督撫各標內抽兵防守嗣以東海不產輒木停止復請改募水師添船緝捕茲以新造米艇二十

隻在東洋巡防二十隻在西路洋面策應其配駕巡兵卽於通省水師內按數勻派既可毋庸建立營汛亦毋庸改募水師且陸路口岸防守緊要原議裁撤督標後營及提標兵丁之處本與營制不符斷不可輕議裁革得旨允行九月奏粵東鹽船多由外海運至省河近因海氛未靖鹽船涉歷外洋或被擄劫或畏怯盜匪買照放行間有不肖船戶私帶水米濟匪獲利而內地一切情形就中暗遞消息是鹽船出海實爲目前之大患請改爲陸運以杜諸弊從之十一月奏賊匪張保仔恃衆時入內港焚劫大黃埔甚急臣會同水師提督孫全謀合擊先後殲擒盜夥二千四百餘名並張保仔之兄生仔及大頭目三十四名賊勢窮蹙冒死衝突各兵船於港口遙堵不能連絡攔截致首盜乘間竄出外洋孫全謀坐失機宜功難掩過請治其罪上以水師恆怯無能命將孫全謀革職拏交刑部治罪尋諭曰朕聞廣東數月以來洋盜充斥因百齡到任之後更張過急查辦嚴緊故盜匪登岸肆行劫掠順德新會番禺香山東莞等縣到處皆有而番禺之三山東莞之濬園鄉俱經蹂躪人口傷至數千尤爲慘酷前據百齡奏派兵堵剿殲擒匪夥二千餘名賊勢是否稍斂並聞該督因籌辦太急心存焦憤見患失血之證殊爲垂慮

該省積玩已久並非始於今日水陸官兵幾不知有緝匪之事奸徒地棍無往非通盜之人百齡力挽頹風認真整頓飭催官兵出洋剿捕將各處口岸防守嚴密水米不能透漏該匪無所存身鋌而走險始行撲岸焚搶此正因百齡實力經理方有此等情事見聞賊匪銜恨百齡竟敢攢湊花紅三十萬兩謀致該督殊深痛恨亦可見該督在彼實爲賊中畏憚賊匪不法至此安得不大加剿辦但積玩之後不能驟然整頓而全勝之法必須部署萬全此時總當將內河未淨餘匪先行悉數辦淨各處口岸加意嚴防不任賊匪乘間竄入再將水師官兵次第整飭船隻礮械預備齊全方可隨時酌量機宜儘力剿辦不妨從容布置轉不可存欲速之見且該督年逾六旬平時實心辦公本不惜殫竭思慮此時焦急過甚深恐體氣不支尤當加意自愛仰副委任十二月奏洋匪張保仔屢思內竄俱經舟師擊退大幫洋匪郭婁帶等率夥衆五千餘人擒獻張逆匪夥三百餘名呈繳船隻九十餘礮四百餘座悔罪投誠諭曰廣東捕務廢弛日久自百齡到任之後認真整頓嚴斷接濟簡練舟師用能壁壘一新俾賊衆膽寒見在郭婁帶率衆投誠又張保仔自赤瀝角遁出外洋之後希圖掠食直趨官兵屯筭之固戍地方欲圖攻撲

並經百齡督飭舟師及地方官兩次迎剿大挫賊鋒此外內河積年兇盜向來爲害商民者亦經督飭地方官擒拏分別審辦本日摺內卽有一百二十餘名可見其辦理認真無少疎懈實爲出力可嘉百齡著加恩賞戴花翎並賞四喜扳指翎管鼻煙壺吉祥牌四件黃綵珊瑚豆大小荷包以示獎勵十五年正月奏潮州府屬洋面有烏石二等幫匪船在彼遊奕經總兵胡于鉉帶領舟師分路剿捕擒獲盜賊六十餘名並奪獲礮械等件上嘉之三月奏粵洋巨盜張保仔香山二等畏罪乞降率其黨二萬餘人繳船四百餘隻聽候收驗諭曰此等降匪皆係伊等自行來投非由兵威震懾所致卽該督等原摺亦稱其並未窮蹙是以此時不加恩獎若能乘此大股解散之時將烏石二東海霸股匪悉數殲除自當立沛殊恩用獎勤勞六月奏生擒積年巨寇烏石二等首夥各犯並盜首東海霸等悉數已降諭曰粵東盜匪在洋面肆劫已非一日百齡自簡任後實心經理振作有爲督飭舟師紀律嚴明將弁等無不踴躍用命粵洋著名大股盜匪除投首外均已悉數殲除全省洋面一律蕩平允宜特沛殊恩用昭懋賞百齡著加太子少保銜賞戴雙眼花翎給予二等輕車都尉世職並賞給扳指句環大小荷包八月奏粵東地

濱海洋水陸營務甚繁非提督一員所能經理請添設水師提督一員駐劄虎門地方左翼鎮總兵請移改副將守備縣丞各員酌添兵丁以重邊防而專職守下部議行十一月奏粵東鹽斤加價原爲捕盜之需今大小匪幫俱已辦竣應請停止並以前因籌杜接濟將粵東鹽務奏改陸運今全洋平靜請仍海陸兼運以便商力從之十六年正月因病奏請開缺回京調理諭曰百齡自棄取錄用以來感激朕恩矢圖報稱經朕節次簡用兩廣總督彼時洋匪未淨百齡力肩重任銳意經營一切隨宜布置悉能殫竭盡勞年來賊匪窮蹙投誠其怙惡者亦悉行剿滅外洋全就肅清百齡勲績懋著經朕渥沛恩施優給輕車都尉世職錫予宮銜賞戴花翎伊感奮之餘宣力不懈復將內河盜匪以及陸路土匪設法偵緝次第辦理多案地方日臻寧謐海疆大有起色克副委任見在粵省善後諸事尙多正資其一力整頓今據奏稱上年十二月望後忽然心氣作痛寢食不寧兩耳聽語不眞非旦夕所能平復所奏自係實情朕垂廬百齡積勞已久當此患病之時再若撻心公事難資調攝著加恩准其開缺並緩程來京俾得從容調理計百齡到京之時其病體自已就愈可資倚任所有刑部滿尙書員缺卽著百齡補授五月上

以百齡病體尙未全愈刑部事務較繁改授左都御史六月病痊授兩江總督時陳鳳翔奏五月二十四日夜大雨如注河水增長王營減壩土隄坐墊口門塌開八十餘丈七月鳳翔奏減壩口門大溜側注水深三尺有餘見在東西二壩裏頭盤就之後測量口門尙存七十五丈八尺若遽行收窄進占必致水勢擡高轉礙已成二段且恐正河水路不暢致有他虞此時惟先行趕集料物俟秋汛過後再行堵築一面先同督臣前赴海口查勘下游情形上以百齡平日辦事明決命會同陳鳳翔詳細履勘將應如何籌辦之處先行據實具奏以慰廬注尋百齡奏親赴海口查勘見無高仰形跡亦無攔門沙隄至其受病處在去年挑挖河身二段內積淤三千餘丈又親至馬港口以下見所積淤沙挑費更鉅且入海路窄從前數年總不能通暢兩相比較仍以修濬正河爲便並請將竈工尾以下河身加挑寬深兩岸接築新隄夯礮堅實再於七套地方增建減水壩及修復王營減壩復建磨盤埽等工上以所議均有條理命百齡盡心籌畫又奏邳北綿拐山及蕭南李家樓二處隄工漫溢命會同陳鳳翔嚴飭該道廳迅速堵築八月奏李家樓漫口見寬至一百零一丈口門水深二丈八九尺不等急難堵合擬於大隄之外繞

過圈築土堰接築東西壩基盤作裏頭以爲進占地步並築攔河壩以免停淤上
是之十月諭曰本日萬壽之辰召見軍機大臣適據口奏百齡於九月十五日得
生一子百齡年逾六旬望子甚切該督連年辦理地方公事實心實力有裨封疆
因得上蒙天佑老年得子繼續宗支朕聞之甚爲欣慰著加恩賞伊子名札拉芬
俾得健壯長成百齡奉到此旨必感激歡忭精神奮發專意辦公心力益臻周密
十二月奏長河放水暢行王營減壩台龍穩固下游諸工一律完竣諭曰王營減
壩自五月間坐墊以來下游直至海口一帶逐段淤淺經朕節降諭旨催令挑濬
堵築百齡等欽遵辦理厚積人夫工料先將下游河身一律挑通一面將口門趕
緊進占開放引河溜勢順暢茲於十一月二十七日挂纜合龍堆壓穩固其洪湖
仁字壩先於二十四日堵合清水全出河口見在溜歸一處沿沿東注直達海口
毫無阻滯而覈計工料所需較之歷屆大工復節省孔多辦理實爲妥速百齡自
補授兩江總督以來經理河工不辭勞瘁前此各工漫口皆非伊任內之事茲督
率員弁奮迅趨公調度有方勞績懋著百齡著加恩先行交部議敘頒賞御書福
字俾迓吉祥並賞給金線蟒袍一件大荷包一對小荷包四箇節屆新春並加賞

小荷包一箇內貯金銀八寶一分以示優獎見在李家樓工程緊要該督當倍加奮勉務將挑工趕緊督催一面相機進占期於明年正月內奏報合龍屆時再膺懋賞又奏江南原設淮安府外河同知一員守備一員經管兩岸隄埽工程道路縣遠難以兼顧請於外河北岸添設通判一員守備一員與原設之外河廳營分管南北兩岸以專責成得旨兪允十七年三月李家樓大工合龍上以百齡督率有方辦事妥速交部從優議敘並賞四喜玉扳指鼻煙壺大小荷包五月奏南糧全數渡黃諭曰南糧幫船渡黃近十餘年來皆係於五六月間報竣本年四月二十八日卽行全數渡黃百齡自簡任兩江總督以來辦理河漕諸務俱有起色前已屢次加恩甄錄此次毋庸交部議敘該督年老得子經朕賜名札拉芬著加恩賞給六品廕生俾得早膺頂帶俟年及歲時再行賞給差使以示推恩至意七月奏黃運兩河伏汛安瀾諭曰本年江境黃河南經挽歸故道伏汛疊次長水仰荷昊蒼默佑各工平順目下黃河尾閘通暢大有轉機惟洪湖爲清水總匯其節宣囊籥全在五壩啟閉得宜今五壩已壞其四惟餘智字一壩設遇湖水漲滿不足以及資宣洩不特下河一帶橫遭淹浸而清水不能收蓄則淮黃倒灌接踵卽黃

運兩河仍必日形淤墊此時大局應以修復五壩爲緊要機宜著該督趁此各工無事之時卽會同籌辦務使湖水啟閉由我可以放心收蓄永資以清刷黃之利八月奏陳鳳翔於禮壩要工自四月開放後並未親往查勘迨至六月水已衝動壩下土石樁木道廳節次稟報始行察看行至高堰仍不親身籌辦僅委遊擊陳岱堵築陳鳳翔復藉查陳家浦埽工遠赴海口至八月始行赴壩並河庫所發禮壩工銀至二十七萬七千餘兩之多仍未竣工清水大洩下河州縣被水成災諭曰陳鳳翔在河督任內上年王營減壩及李家樓各工漫口皆其貽誤所致嗣經簡用百齡督辦將漫口次第堵合朕念陳鳳翔亦隨同幫辦加恩賞給三品頂帶以觀後效乃陳鳳翔於禮壩要工仍不及早親往籌辦因循貽誤糜帑殃民著革職留於河工當差嗣百齡因禮壩急難堵合復劾陳鳳翔急開壩於前遲閉壩於後以致辦理棘手請將陳鳳翔嚴加議處並自請議處先是御史吳雲馬履泰劾奏任用朱爾賡額貪黷侵欺所舉劾多失當敕下松筠等就近密行查訪諭曰朕於百齡獲罪仍加恩留任者原以人才難得覈其前後功過權衡斟酌一秉至公毫無曲庇百齡之心今該御史又有此奏豈可不查明覈辦松筠初彭齡平日辦

事公正此事仍交伊二人確查如吳雲摺中稱朱爾賡額貪黷侵欺如此不肖百齡倚爲用人卽有不可問之處等語朱爾賡額爲百齡信用是平日有納賄交通情弊又摺內稱百齡於屬員意爲喜怒保舉參劾俱多失實不問可知等語並著松筠等詳查百齡在兩江所舉所劾各員何人毫無勞績百齡受其重賄濫行保薦何人懋著勤勞百齡任性憎惡屈抑參劾松筠等到江已經月餘於百齡官聲事蹟自必有所聞見著於接奉諭旨後先行據實覆奏仍一面密查確訪如查有前項真實款蹟卽由四百里嚴參候旨交伊等審辦嗣經松筠等覆奏遵旨查訪吳雲原摺所參毫無確據良由毀譽之詞出諸恩怨之口實不敢以無據之言妄行入奏諭曰松筠等二人平日辦事公正衆所共知今所言猶如此豈能據馬履泰吳雲二人空言搖惑卽將百齡斥辦耶總而言之百齡實屬有爲之臣朕非輕言所能搖惑之主百齡將來能永承恩澤與否朕不能保此時不能再加重譴以遂讒譖之奸十八年三月偕河道總督黎世序奏仁義禮三壩近年屢經開放衝跌壩基損壞刷成深塘難以修復請於蔣家壩以南附近山岡之處儘先仁義禮三壩並挑挖引河三道儘先改建仁義二壩將禮壩基址築作草壩以備本年宣

洩並繪圖貼說進呈上以地基所奏未能詳晰飭令再議尋復加履勘力稱穩便命卽照所請改建九月賞還頭品頂帶命協辦大學士時直隸長垣縣匪徒滋事竄赴東省曹州一帶百齡接准山東巡撫同興知會卽派弁兵於江蘇安徽兩省交界地方分路協防就近選帶標兵數百馳赴徐州察看情形相機籌辦奏入上是之十二月奏籌辦撤兵歸伍及邊防善後事宜諭曰滑縣克復並無餘匪竄出各省邊界防兵自應撤回歸伍該督以邊界甫經輯寧尙資彈壓請暫留兵一千二百名在彼駐防亦係慎重之意但亦不必遲至二月該督察看情形如地方寧靜於正月內全行裁撤以節勞費十九年二月請於江蘇各當舖按照成本多寡將息銀輸納二成以捐輸之次年爲始分作五年卽於各州縣每年所徵錢糧內就近照數給還並請於出資開當之本商有職銜者按等酌予加銜無職銜者查明量給頂帶奏入諭曰國家理財利用政有常經卽權宜取濟亦當酌事理之平今該督等欲按常商成本責以輸納又恐取民非制令五年如數給還無論一出入甚滋繁擾試思地方官勒借所部財物尙干功令況以經國之需而謀及庶人不已褻乎至仕宦家固亦有治生營運者然此輩大概市儈居多強其所不欲

而濫給名器亦太不計利弊輕重矣百齡由翰林出身歷任封疆至協辦大學士不應識見庸陋爲此不學無術之言除所奏飭駁外仍交部議處八月兵部尙書署江蘇巡撫初彭齡奏請查辦各屬虧空上以百齡初彭齡皆係實心任事之員命會同查辦分別情罪輕重酌擬章程開單具奏九月以巡撫張思誠已赴本任命初彭齡於交篆後暫留蘇省會同該督撫詳悉妥辦嗣初彭齡百齡張思誠先後將查辦虧空之事各擬立章程十條具摺入奏諭曰初彭齡百齡張思誠平日辦事俱尙公明是以此次江省虧空令伊三人會同查辦定立章程初彭齡等自應和衷彼此共同商酌卽稍有意見不同之處亦不妨據理折衷期於同歸一是乃初彭齡不待商定先於本年本月二十日自將章程具奏彼此齟齬大乖公忠體國之義除將伊等各擬章程派托津曹振鏞等妥議具奏外初彭齡百齡張思誠俱著傳旨申飭尋初彭齡參奏百齡於兼署巡撫時管關道員鍾琦曾幫貼摺差盤費銀一千二百兩並風聞百齡收受永豐壩泰壩委員餽送銀二萬餘兩命大學士托津戶部尙書景安馳往清江查辦先是十一月百齡奏兩淮運使廖寅之子廖思芳拏獲林清案內逆犯劉第五旋經解部鞫誣命托津景安訊擬江蘇

原審各員罪諭曰百齡於此等重案不詳慎嚴鞠率以廖思芳恐嚇教誘供詞冒昧入奏若非部臣平反幾成冤獄百齡不必交部議著革去宮銜協辦大學士暫留兩江總督之任二十年正月托津等奏查明巡撫衙門提取兩關銀兩係相沿陋規由來已久此次百齡署巡撫時曾因蘇屬出差兵丁口食不敷由藩司議詳在海關提銀一千二百兩揚關提銀八百兩發縣生息以資津貼至兩壩解送總督衙門銀兩係奏明批解公費此外百齡並無收受餽送情事諭曰初彭齡原參摺內據稱百齡需索提用銀數係由藩司常格告知經朕派軍機大臣傳到常格兩次詰訊常格堅稱並無此語初彭齡奏事不實咎無可辭著交部嚴加議處百齡提取兩關稅項銀兩發縣生息以資兵丁差費雖係以公濟公惟率據司詳並不奏明辦理究屬不合著交部議處四月湖廣總督馬慧裕奏江夏漢陽兩縣先後檢獲悖逆字跡三紙內有白陽立業聚會金陵等語諭曰前年逆案卽係白陽邪教今逆詞又以白陽之名惑衆而起事之處獨指江寧地方畢竟白陽邪教黨羽伏匿在彼著交百齡密訪嚴查留心緝獲五月御史石承藻參奏湖北襄陽府知府王樹勳原係京城廣慧寺僧法名明心後因犯禁遞解還俗隱匿罪名混捐

官職得旨革職交刑部審訊諭曰聞百齡前在京師曾與明心識面後來百齡在湖北緣事來京之時王樹勳正在楚省百齡曾令其起課占問休咎彼時百齡是
否知王樹勳卽係明心僧抑或但知其爲楚省官員並未識蹤跡著百齡卽據實
具奏尋百齡覆奏前在御史任內曾在廣慧寺與僧人明心談禪丁母憂又曾就
廣慧寺念經後在湖北令王樹勳占課時實知王樹勳候補同知並不知係僧人
明心請交部議處諭曰百齡在楚省接見王樹勳之時事隔十餘年王樹勳容必
更換伊旣未述及前事百齡一時不能辨識亦屬情之所有至拜懺占課均例所
不禁所有百齡自請議處著加恩寬免前百齡以私行拾獲逆詞並查辦情形呈
奏諭曰朕加披閱詞語悖逆已極末又將劉伯溫張百齡方維甸名字並列情殊
險惡此項逆詞其布散旣廣必非一二人所能爲看來並非僅爲挾讐傾陷而起
必有蓄意倡亂之人糾結黨羽潛匿江境謀爲不軌先以此帖布散以惑人心百
齡等必須速辦切不可視爲細事稍存大意以致日久釀成事端至百齡與方維
甸皆總督大員乃逆詞內竟敢如此誣陷此事朕萬無加疑之理但百齡被人誣
爲叛逆伊尙何地自容該督查辦此案不惟以國事爲重直當忿切私仇必期得

罪人而後快六月御史高翔麟奏江淮一帶私販鹽斤有巨梟窩藏淮徐廬鳳多有拽刀手等匪徒應設法訪拏諭曰江省私販充斥自必有窩藏之所拽刀手招集匪徒結盟訂會尤易逞兇滋事皆不可不嚴拏懲辦況見在江南一帶散布逆詞若不上緊訪拏恐有潛匿逆謀之人與此等鹽梟拽刀匪徒暗引勾結百齡前因逆詞內有誣陷之語奏稱接閱之下不禁切齒恨不立時碎剉其屍語意非不憤激而數日以來未見拏獲一人亦未將緝捕情形具奏百齡曾經人誣以貪婪尙覺顏變愧生豈被人誣爲叛逆有不忿切私仇欲得罪人而甘心若口是心非虎頭蛇尾因循怠玩意存消弭自問爲何物耶著百齡與張師誠督飭所屬密訪嚴偵務期迅速弋獲九月奏派文武官員先於和州地方緝獲散布逆帖人犯嚴士龍究出編造逆詞首犯方榮升卽於巢縣拏獲並於窩藏方榮升之朱上信家起獲九龍木戳及偽造時憲書悖逆經卷字跡四箱諭曰百齡督緝認真能將逆犯訪明蹤跡嚴密捕獲實屬可嘉著加恩賞復太子少保銜並給還雙眼花翎仍交部議敘尋奏拏獲首逆方榮升究明造意謀逆散帖惑衆各確情並獲夥犯一百五十餘名諭曰此案方榮升罪大惡極覆載不容雖在百齡所管境內該督能

督率所屬訪查破案將首從各犯同時並獲俾國法早伸人心胥靖實係百齡之功百齡見係二等輕車都尉世職著加爲三等男並賞給吉祥如意玉牌一面白玉翎管一箇四喜扳指大小荷包共十事其子扎拉芬前曾賞給六品廕生著加恩賞給五品以示優獎九月奏感受風溼未痊請派員代辦武闈上命其安心調攝照常辦公十月奏患病未痊請假一月調理諭曰百齡前患胃痛病證近復感受風寒著加恩賞假調理不必拘定月日兩江總督印務著松筠馳驛前往署理十一月卒諭曰兩江總督百齡簡任封疆歷有年所辦事認真不辭勞瘁伊年逾六旬精力素強正資倚畀乃積勞成疾昨因患病請假特派乾清門侍衛帶領御醫前往診視茲聞溘逝殊深軫惜百齡著賞還協辦大學士派乾清門侍衛博啟圖馳驛前往祭奠並帶同伊弟碩齡桂齡一并馳驛博啟圖事竣後先行回京桂齡碩齡在彼料理伊靈柩到京之日准其入城治喪屆時著軍機大臣奏聞朕派皇子至伊家賜奠任內一切處分概行開復所有應得卹典該部察例具奏伊子扎拉芬卽承襲男爵俟年及歲時再行當差二十二年正月諭曰上年曾經降旨俟百齡靈柩到京准其入城治喪並著軍機大臣屆時奏聞派皇子至伊家賜奠

昨據松筠奏徐州屬邳州貧民攔路呼號懇請撫卹事關民瘼前此百齡在徐時未能查辦周詳使其尙在必當治以應得之罪今已身故姑免追究伊靈柩到京毋庸奏派皇子賜奠准其入城治喪尋照例賜祭葬予諡文敏

章煦

章煦浙江錢塘人乾隆三十七年進士授內閣中書四十年丁父憂四十二年服闋四十五年充軍機章京四十六年補官四十七年丁母憂四十九年服闋五十年補原官五十一年四月遷宗人府主事五月充雲南鄉試副考官五十六年遷刑部員外郎五十七年七月充河南鄉試副考官十月遷郎中五十八年提督陝甘學政六十年任滿回京奏留刑部嘉慶元年三月補原官五月改山西道監察御史仍留軍機處五年截取知府經軍機大臣奏留命以四五品京堂升用六年四月擢太僕寺少卿舊制京堂不兼直軍機煦應開缺諭曰該員在軍機處行走有年於剿辦教匪一切事宜本係熟手此時大功指日告竣若令其卽離樞直轉不能仰邀恩敘章煦著加恩暫在軍機章京上行走俟大功告竣再回本衙門供職九月轉大理寺少卿十月以軍營疊獲首逆下部從優議敘七年三省教匪平

上以煦辦理軍務始終其事復下部從優議敘尋自請回本衙門供職允之旋以雲南巡撫初彭齡劾布政使陳孝升迺西道薩榮安辦理緝西軍務冒銷帑銀命偕兵部侍郎那彥寶往讞得實治罪如律九年二月升太僕寺卿六月遷順天府府尹稽察右翼覺羅官學十年授湖北布政使十一年擢巡撫十三年六月授刑部左侍郎八月雲南已革貢生任澍宇訐告地方官冒銷軍需那移城工各款命偕右侍郎穆克登額往按之坐誣治罪如律九月授貴州巡撫十月調雲南巡撫十二月署雲貴總督十四年六月調江蘇巡撫十一月署兩江總督十五年二月上以漕運阻滯或將本年漕米交渡海商船灑帶來北其是否可以試行之處命籌議以聞四月奏稱江蘇惟大號沙船尙可帶運然約計運費每一百石需銀三百兩且商船不能安設氣筒易致微變事屬難行上韙之五月奏嚴上海海口米禁四事一奸商勾通吏役於放米出洋責成蘇松太道實力稽查一軍民探有偷放之人赴官稟報者給賞一文武員弁能於海口內外泊船各山巖起獲出洋米石加以升擢一客米入境令將銷售米數五日一報仍責成員弁於出口要隘隨時稽查得旨允行十六年奏設海門廳學校允之十七年三月入覲以年力就衰

懇留京供職改授刑部右侍郎七月原任直隸涿州知州徐用書子思曾控後任知州周景捏增其父任內虧空思曾旋在清苑縣瘐死妻黃氏疑其中毒來京控訴命偕戶部左侍郎景安往按之思曾實係病故徐黃氏坐誣用書虧項因前後任互相推移致有輻轉請將失察各上司及歷任涿州知州交部分別議處九月回京十八年九月河南滑縣教匪李文成等滋事直隸長垣山東曹縣等處均有賊黨應之命直隸總督溫承惠統兵剿賊煦署直隸總督尋擢工部尙書充國史館副總裁官仍署總督事十月奏團練鄉勇請將口糧及製造號衣器械等費由官支給諭曰國家經費有常從無此例且人數聚散無時何所稽考此必係承辦軍需劣員倡爲此議豫爲冒銷地步章煦受其慫恿妄行陳奏著交部議處先傳旨嚴行申飭尋議降調上加恩改爲留任十一月大名縣監犯李經句通逆匪田克岐製造號旗散交匪黨霍富秋等糾約爲逆捕獲寘於法十二月調吏部尙書賜紫禁城騎馬仍署總督事以研訊逆犯廉知滑縣首逆馮克善竄伏直隸獻縣境內飭知縣張翔弋獲械送京師戮之諭曰章煦督緝要犯任事實心著加恩賞加太子少保銜仍交部照軍功例從優議敘十九年二月回京閏二月充文穎館

治河方略總裁三月充會試正考官六月山東金鄉縣竊匪聚衆拒捕巡撫同興率以邪教餘黨上聞命偕刑部右侍郎那彥寶往勘得寶首從均問擬如律以知縣袁潔誤報褫其職時臬司程國仁參奏濟南府知府凝圖徇庇劣員通同舞弊煦等查出章邱縣知縣崔起龍因催比漕糧杖斃九命凝圖徇庇屬實均治其罪上以山東吏治廢弛同興毫無整頓命煦詳察劣蹟以聞七月奏山東地方凋敝倉庫空虛皆同興玩誤所致藩司朱錫爵徇私廢公終日宴樂均褫職以煦署山東巡撫清查虧空九月新授巡撫陳預抵任命煦以欽差協同查辦並簡戶部刑部司官四員襄其事十一月查明嘉慶十四年以前虧缺實數奏前任巡撫吉綸曾於十四年清查一次但奏報不實其原奏虧缺銀一百七十九萬八千餘兩及另案參追銀六萬一千七百餘兩外見又查出虧缺銀一百五十五萬二千餘兩共銀三百四十一萬二千餘兩係十四年以前虧缺實數其十四年以後虧空見因冊報不符飭道府分赴所屬督催盤查疏人命嚴行懲辦十二月授協辦大學士二十年正月以新虧款項轉轄乞展限辦理諭曰查辦虧空全在章程周妥果能斟酌盡善實力奉行自有成效山東十四年以前既經查有實數此時按銀數

之多寡定追繳之遲速應如何分別辦理使帑項胥歸有著著章煦悉心覈定奏准後交陳預實力遵辦其十四年以後虧缺之數一時雖未能查明亦當議定章程將來陸續查清以次覈辦章煦斷無在彼久候之理伊總須將章程酌擬周密無舛無漏設所議不能妥善將來行之無效必仍派章煦覆查不能置身事外也二月查自十四年以後截至十九年九月止續虧銀三百三十四萬七千餘兩新舊共六百餘萬兩其十四年以後虧項某員某任究係若干請立限一年調集離任回籍各員詳加覈計先擬章程十四款上之一清查藩庫一嚴查交代一酌定徵解分數一嚴立追繳限期一追繳限期再分別升任及降調革職等員量予增減一酌定上司分賠限期一催徵民欠一覈減提解節省銀一確查無著虧項一攤捐各款查有無詳稟案據覈辦一流抵房屋器物勒限估變一州縣應領司庫各款儘正項扣抵不准先抵攤捐一倉項與捐項庫項一律籌補一州縣墊辦軍需應俟查明再入抵款下部議行三月回京六月湖北襄陽縣候選訓導吳煥章控縣民易成元與河南南陽縣民易登朝等勾結謀逆並控襄陽縣知縣周以焯押斃無辜多命命偕刑部右侍郎熙昌往鞫先抵南陽訊明易成元等並無逆謀

煥章依律反坐次抵襄陽查以焯實曾押斃十四命遣戍黑龍江十月廣東雷州府已革經歷李棠訐總督蔣攸銛專擅徇私復借熙昌往鞫以棠誣告論戍嗣有已革萬州知州李仁峻訐雷瓊道胡大成苛派屬員已革舉人劉華東等控已故洋商盧觀恆濫廁鄉賢已革貴縣知縣吳遇坤刻書詆毀上官均命詳讞得實褫大成職罷觀恆從祀戍遇坤黑龍江十二月命管理刑部二十一年正月京察屆期諭曰章煦前署直隸總督緝獲逆案要犯多名辦事認真著交部議敘四月回抵山東會江蘇已革知縣王保澄訐上官諱匿邪書仍命偕熙昌往讞坐誣依律遣戍五月安徽阜陽縣民王勇志控捻匪王景糾搶婦女拒殺事主仍命往鞫得實問擬如律六月署安徽巡撫閏六月回京調禮部尙書七月上秋獮木蘭命留京辦事十月命在軍機大臣上行走十一月調刑部尙書管理禮部二十二年二月因病賞假遣御醫診視三月奏請開缺允之九月病痊授兵部尙書協辦大學士兼管順天府府尹事務十二月充經筵講官二十三年三月授文淵閣大學士管理刑部五月以館臣纂輯明鑑體例未合諭令覆輯煦充總裁官七月上詣盛京恭謁祖陵復留京辦事二十四年正月上六旬萬壽加恩廷臣章煦晉太子太

保銜旋值京察諭曰章煦管理刑部事務尙屬盡心著交部議敘四月充殿試讀卷官十月充武殿試讀卷官十一月因病奏請開缺上尉留之賞假調理二十五年二月以宿疾未痊累疏乞休諭曰大學士章煦供職有年宣力中外經朕簡任綸扉上年十一月初間因病請假兼旬未愈卽奏請開缺降旨令其安心調養不限時日本年正月開印後復懇請解職朕以其所患祇係骸疾天氣漸暖血脈和暢仍可望痊又經賞假一月茲據章煦奏稱病在筋絡斷難脫體不敢再事因循曠廢職守情詞懇切若仍復慰留伊心恐有誤公轉難調攝莫若聽其解職俾得安心頤養宿疾或可漸瘳章煦歷任封圻曾在軍機大臣上行走其在署直隸總督任內並有拏獲馮克善軍功章煦著加恩准其開缺以太子太保大學士致仕賞給全俸伊或在京調理或回籍就醫均聽其便用示朕優待老臣至意三月煦乞歸上准其馳驛命沿途地方官在二十里內者護行道光四年卒諭曰予告大學士章煦由乾隆年間進士蒙皇考仁宗睿皇帝簡任封圻洊擢綸扉贊襄樞務嘉慶二十五年因病乞休予告回籍支食全俸茲聞溘逝殊堪軫惜著加恩照大學士例賜卹在任一切處分悉予開復所有應得卹典該部查例具奏尋賜祭葬

予諡文簡子挺廣東南澳同知坦江西候補知州孫鏞一品廕生

鐵保

鐵保棟鄂氏滿洲正黃旗人乾隆三十七年進士授主事籤分吏部四十年五月補官十二月襲恩騎尉世職四十二年遷員外郎四十三年三月遷郎中十一月兼內務府六庫郎中四十四年調戶部顏料庫郎中仍兼吏部行走四十五年十月擢詹事府少詹事仍兼吏部行走十二月因辦理知州彭日龍捐復錯誤降三級調用四十七年補戶部員外郎五十年二月遷吏部郎中三月擢翰林院侍講學士仍兼吏部行走五十二年充日講起居注官五十三年三月轉侍讀學士十二月升內閣學士兼禮部侍郎銜五十四年正月遷禮部右侍郎二月兼鑲紅旗蒙古副都統稽察會同四譯館並管理咸安宮官學事務三月充會試副考官十月調鑲黃旗蒙古副都統兼公中佐領十二月充經筵講官五十五年正月上元日視朝前引失儀部議降三級調用上改爲革職留任三月充會試知貢舉五十六年十一月丁母憂十二月轉左侍郎五十七年五月校射中布靶賞戴花翎六月充江南鄉試正考官五十八年三月充會試副考官尋調鑲黃旗漢軍副都統

五月調正白旗蒙古副都統五十九年二月服闋四月畿內旱上禱雨禮部於應
辦事宜陳奏遲延部議革職上加恩改爲留任以議上未赴宮門候旨嚴飭之並
褫花翎七月充山東鄉試正考官六十年三月充會試知貢舉四月充殿試讀卷
官嘉慶元年充會試知貢舉二年五月命督理萬年吉地工程八月充繙譯鄉試
正考官三年八月充順天鄉試副考官旋調吏部右侍郎十二月調正白旗滿洲
副都統四年正月轉左侍郎命教習庶吉士二月以司員於陳奏事件未經回明
面斥之復加參劾上責其過當命以內閣學士降補仍兼副都統尋遷盛京兵部
侍郎五月調盛京刑部侍郎兼管奉天府府尹事九月調吏部右侍郎兼正紅旗
漢軍副都統十一月調正藍旗滿洲副都統十二月授漕運總督五年正月請將
向例隨漕項下應給州縣銀米改撥旗丁並將旗丁應得行月米石改給折色應
領運費令糧道親身監放從之十一月詔於明年駕詣盛京恭謁祖陵鐵保疏陳
三款一裁革將軍府丞等餽送扈從官員土儀一御道祇就舊址鑲墊平坦毋庸
另闢新道一扈從官員不得指稱官差妄拏車馬上嘉之如所議行六年二月京
察以漕政肅清交部議敘七年調廣東巡撫八年正月調山東巡撫二月入覲賞

還花翎六月以違例保升人員且摺內措詞失當嚴飭之並交部議處尋議降調上改爲革職留任九月東河衡家樓漫口下游穿山東張秋運道命鐵保設法輓渡回空糧船豫籌明年運道十一月以前承辦萬年吉地工程鞏固下部議敘九年三月南糧首進幫船全過張秋加太子少保銜五月以運河水勢淤淺糧船行走遲滯部議革職上加恩改爲留任八月清查山東虧空密疏請將離任人員限滿未完者徑行提省押追毋庸報部並分咨各旗籍查抄家產估變解東歸款諭曰所奏大謬離任人員多有見官他省卽告病丁憂者亦係職官尙有旗員在京當差者焉有不行奏明遽爾提往押追之理至分咨各旗籍查封家產尤無此辦法查抄家產原因官犯有貪劣款蹟參革後查抄示懲若未經奏參奉旨遽行知照查抄是該旗籍竟聽各督撫指示遵辦有如是專擅之督撫乎鐵保此奏實屬糊塗本應交部議處姑念係審辦事件尙未舉行著傳旨嚴行申飭十年正月擢兩江總督九月南河秋汛安瀾下部議敘十月捕獲洋匪蔡廷秀等多名予軍功議敘先是安徽武舉張大有以妒姦毒斃其族姪倫前任總督陳大文坐罪於大有亡父體文十一年命鐵保覆按之鐵保委臬司遇昌蘇州府知府周鏗等提訊

鏢等聽受賄屬以張倫等猝中蛇毒定獄鐵保以平反有功請將承審各員議敘十二年四月經安徽巡撫初彭齡勘問得實寘大有於法諭曰鐵保於特旨交審之案並不親提嚴訊率據承審屬員照擬定案復失察周鏢等徇情蒙混之弊轉以平反得實代請議敘實屬錯謬鐵保著革退宮保銜拔去花翎仍交部嚴加議處尋議革職命降爲二品頂帶革職留任十月以秋汛安瀾復頭品頂帶及花翎十三年二月奏八旗官兵應領米石請酌給二成折色經戶部八旗滿洲都統倉場侍郎議駁諭曰京師五方輻輳商民雲集本處產糧既少又無別項販運糧石專賴官員兵丁等所餘之米通流糶糴藉資糊口是以自王公以及官兵等應領米糧定額俱酌量從寬並非計口授食卽如親王每歲領米萬石甚屬寬裕豈爲其一身計乎若如該督所奏不惟於八旗生計恐致拮据卽以每歲少放米五十餘萬石計算於商民口食之需亦多未便鐵保曾經管理旗務並不通盤籌畫實屬妄改舊章冒昧不合著傳旨申飭仍交部議處尋議革職上加恩改爲留任三月請改建王營減壩並培築高堰山旰隄後土坡及沿河兩岸大隄命協辦大學士尙書長麟戴衢亨往勘如所議行六月以漕船渡黃迅速下部議敘旋以七里

溝運河漫溢降二品頂帶花翎九月秋汛安瀾復頭品頂帶嗣因淮安三鋪地方運河繙隄坐墊部議降調上加恩改爲留任十二月請修復雲梯關外海口允之十四年正月以運河荷花塘決口合而復潰再降三級留任七月以上年淮安等府水災山陽縣知縣王伸漢浮冒賑銀懼查賑委員試用知縣李毓昌舉發醜殺之至是事覺諭曰鐵保前在司員及侍郎任內屢獲愆尤棄瑕錄用自補放兩江總督以後不能敬慎辦公一味偏聽人言固執已見辦河工則河工日見敝壞講吏治則吏治日見廢弛甚至有不肖劣員藐視法紀逞其貪戾殘忍全無忌憚致釀成如此奇案而彼猶夢夢不知可謂無用廢物不但不勝封疆重任亦何堪忝列朝紳鐵保著革職發往烏魯木齊效力贖罪十五年六月賞三等侍衛充葉爾羌辦事大臣七月授翰林院侍講學士仍留辦事大臣任旋調喀什噶爾參贊大臣十六年八月以阿奇木伯克玉努斯稟稱回民毛拉素皮等與叛裔玉素普私通書信釀金助之捕獲寘於法賞副都統銜九月授浙江巡撫旋改授吏部左侍郎十一月兼鑲藍旗漢軍副都統十七年擢禮部尙書鑲白旗漢軍都統尋管理武英殿御書處十八年八月充崇文門監督九月調吏部尙書十二月充經筵

講官十九年二月伊犁將軍松筠奏參鐵保前在喀什噶爾辦理回衆資助叛裔玉素普一案係玉努斯捏造情節刑倡誣認鐵保爲其蒙蔽枉殺邀功諭曰鐵保前在兩江總督任內於王仲漢謀毒李毓昌一案毫無覺察將伊褫革發遣旋又棄瑕錄用洊升吏部尙書乃前於玉努斯編造謠言刑求無辜不加詳勘致成冤獄枉殺四命其咎甚重不能屢恕著革職發往吉林交該將軍富俊等派撥當差二十三年釋回授司經局洗馬道光元年以老病乞休賞三品卿銜四年卒子瑞元二品廕生湖北按察使

金光悌

金光悌安徽英山人由舉人於乾隆三十四年會試取內閣中書四十五年成進士四十八年充江西鄉試副考官十二月遷宗人府主事四十九年充會試同考官五十年升刑部員外郎五十一年升郎中五十三年俸滿截取知府仍留刑部五十四年京察一等記名復經刑部奏留是年充廣東鄉試正考官五十五年刑部奏請以四五品京堂用上允所請五十六年有江西舉人彭良驛爲伊子頂買吏員冒領執照被人告發上命刑部審辦時光悌適因病請假御史初彭齡以光

梯與良孿係兒女媼親恐有推諉瞻徇之弊奏參上命軍機大臣訊明告病在先並無瞻徇部議以未能速審完案亦有不合降一級調用五十七年仍補刑部員外郎嘉慶元年升郎中四年充會試同考官五年奉旨以四五品京堂用六年八月授光祿寺少卿因值覈辦秋審案件仍留刑部旋經御史張鵬展奏光梯辦理秋審錯誤九十餘案不應留部上命刑部堂官明白回奏尋大學士董誥等奏秋審案件並無錯誤惟廣東省黃冊有疎漏錯誤之處俱經簽改繕正諭曰金光梯在部年久該堂官懇請留部雖係爲熟手起見但平日廷臣中有在朕前論及金光梯者大率毀多譽少而朕於召見時留心察看金光梯應對未能明晰亦並非出色之員況司員升至京堂例不兼部行走光祿寺少卿金光梯著回本衙門供職不必兼部行走十二月遷內閣侍讀學士七年十一月擢山東按察使十年十月升布政使十一月授刑部左侍郎時有魚臺縣民人李慶臨控馬懷璧糾衆殃民一案上命光梯於途次馳回秉公嚴審得實定擬如律十一年二月命往天津鞠竈戶李丕基控鹽大使周祠剋扣帑卹銀案又往河間鞠寧津縣民人郭洙控縣役唆賊誣扳詐賊案三月復往天津鞠革生楊廷霖誣控楊紹聞服族通奸案

均訊實定擬如律六月刑部審訊北城拏獲用藥迷拐幼孩一案究出配藥根由將首惡楊四楊楊氏及其夥黨如律治罪上以審訊此案實屬認真加恩刑部堂司官員光悌恩予紀錄三次七月命往承德府鞠豐寧縣生員楊林聲誣控書役藉差勒折案建昌縣牌長邢世旺控縣書舞弊派差案及旗人六保誣控孫振培霸種地畝毆斃李銀賄囑頂兇案平泉州民婦于董氏誣控張存信毆斃伊翁于中元案均審訊得實定擬如律十月授江西巡撫十二年奏江西積案繁多酌議設局清釐報聞十四年正月奏請借項修理建昌縣永豐蘆鎮等處圩隄以衛民田上如所請行尋擢刑部尙書十月奉旨刑部尙書金光悌年逾六十行走尙屬勤慎著加恩在紫禁城內騎馬十七年十一月卒諭曰刑部尙書金光悌練習律法辦事認真在尙書任內資格雖淺伊由刑部侍郎洊擢正卿宣力有年遽聞溘逝深堪軫惜著加恩照尙書例賞給卹典該部察例具奏所有任內一切處分悉予開復

秦瀛

秦瀛江蘇無錫人乾隆三十九年舉人四十一年上巡幸山左召試一等欽賜內

閣中書充軍機章京四十八年丁母憂四十九年丁父憂五十二年服闋五十四年升侍讀五十七年二月京察一等十月遷戶部江西司郎中五十八年授浙江溫處道五十九年調杭嘉湖道嘉慶二年署按察使以擬斬犯婦葉梅氏在獄自縊部議降調上加恩改爲留任五年閏四月升按察使十月調湖南按察使七年因病乞解任允之九年病痊補廣東按察使十年閏六月擢浙江布政使十月入覲上以其年逾六旬精神漸遜命以三四品京堂補用十二月補光祿寺卿旋調太常寺卿十一年二月疏言廣東濱臨巨海東西延亙三千餘里盜匪不靖出沒重洋橫肆劫掠比年且至登岸始猶遠在高廉一帶上年則廣州所屬且有盜船攔入海上大股盜匪如鄭一烏石二總兵寶朱瀆等連踪接艦聲勢甚張內地則順德香山新會三縣上年連有內盜肆劫之案臣前任臬司訪係鶴山會匪梁修平案內逸犯馬觀復及開平盜案內逸犯李英芳爲之渠魁該二犯蹤跡詭祕實與海盜勾結不捕則出而爲患捕之急則遁入海中統兵之將出海剿捕大半藉詞遷延潛匿島嶼卽與盜遇亦不能盡力追捕以致盜匪不靖夫統領將弁者提督乃黜一孫全謀而魏大斌卽孫全謀之續再黜一魏大斌而繼魏大斌者又恐

未必非魏大斌之續臣愚以爲剿捕之法一曰討軍實水師廢弛則帑餉虛糜廣東情形輒以經費不敷爲慮今洋鹽兩商捐輸寬裕惟恐經手之員尙有侵漁遣委之將仍復驕惰此非立法痛懲難免徒資耗費一曰樹聲威盜黨善於偵探非我兵先聲足以警人則盜已從而輕我古人用兵以虛運實以寡擊衆自操勝算臣擬兵行之日督撫宜舉觴歡飲有功而歸開轅行賞不用命者殺無赦一曰戒虛飾舟師擒捕盜匪真假豈能豫必但存一邀功之念勢將以假爲真讞成多失其實卽偶有平反亦每以獲盜爲重不復深咎嗣後總期真盜弋獲毋縱毋枉至守禦之法尤宜亟講沿海分設礮臺原爲防守口岸然口岸多而汛兵少一經調撥倍覺空虛卽未調撥而無兵之處盜船乘間直入內港各縣雖設有巡船船少不能禦盜且爲盜資又保甲一法僅屬虛名且縱令胥役訛索反成厲政欲行保甲團練必須百姓服從一號令而民無不應臣以爲嚴防守必先澄吏治澄吏治必先固民心一曰清訟獄粵民好訟大小案件頻奉諭旨嚴飭尙多沈擱始由案之初起遲延不辦土棍訟師從而把持遂至供情屢易莫可窮究惟有督飭州縣有一案卽清一案務洗慵惰偏私之習一曰抑冗濫六計尙廉近海州縣有緝盜

解犯之費尤宜撙節庶不致虧倉庫而累閭閻乃一令到任卽有薦幕友長隨者多人坐食勢不能復爲廉吏至雜職武弁惟利是圖武弁稍授以權卽挾制文員而雜職差委過多亦滋擾累一曰懲蠹役地方官不能不用胥役而不可爲胥役用胥役熟悉地方情形官用胥役卽能用官而轉不爲官用迨至串同官親家屬肆爲民害羽翼已成輒付之無可奈何上官復以人能辦盜曲爲開脫殊不知廣東胥役每有暗通盜匪收受陋規者此尤不可不嚴行懲創也三者旣舉而吏治澄吏治澄而民心固於以舉行保甲團練無不可使之民卽無不可行之法衆志成城守禦有資矣上以所奏各條俱屬可採命兩廣總督吳熊光詳細查覈分別酌辦四月擢順天府府尹先是通州舉人崔成輔控告王文元霸地搶割復被兇毆兼尹莫瞻菴令將王文元取保釋放迨原告呈懇親提輒帶至私宅訊供事聞命留京王大臣會同刑部鞠實上以事在秦瀛未到任以前惟於莫瞻菴違例專擅之處不早奏參下部議處尋議降二級留任十二年正月升刑部右侍郎八月因湖南省積案未清秦瀛曾任按察使吏部奏請降二級調用上加恩改爲留任十三年閒散宗室敏學恃勢逞兇命刑部會同宗人府審訊堂司各員故爲

開脫所敘情節自相矛盾下部嚴議尋議革職諭曰秦瀛在署專辦部務於會審案件未能酌覈允當且亦年老無能著降三級調用十四年正月補光祿寺卿三月授都察院左副都御史充會試知貢舉四月授倉場侍郎五月諭曰倉場一切事宜因循怠玩諸弊叢生見當整飭之際秦瀛年齒漸衰恐難周到著以二品頂帶仍補都察院左副都御史六月遷內閣學士兼禮部侍郎銜尋擢兵部右侍郎署刑部右侍郎十一月轉左侍郎十五年正月實授刑部右侍郎十二月因目疾解任回籍道光元年卒

鮑桂星

鮑桂星安徽歙縣人嘉慶四年進士改翰林院庶吉士六年散館授編修八年三月大考二等擢右中允八月轉左中允九年二月上幸翰林院分韻賦詩桂星與焉進雅十篇賜文綺七月充河南鄉試正考官十年九月上幸盛京進頌十篇賞荷包大緞十月提督河南學政十一年正月授司經局洗馬九月遷侍講十二年轉侍讀十三年正月充文穎館總校七月充山西鄉試正考官十一月署日講起居注官十五年二月京察一等記名以道府用四月授侍講學士八月提督湖北

學政十七年轉侍讀學士九月擢詹事府少詹事十八年四月授詹事九月遷內閣學士兼禮部侍郎銜十二月充文淵閣直閣事十九年閏二月命稽察中書科三月擢工部右侍郎七月署武英殿總裁九月充武會試正考官十一月命往通州查驗倉儲十二月條奏武英殿刊刻校勘及收存版片各事宜得旨交軍機大臣議奏又奏參提調劉榮黼聲名平常居心險詐副管祝麟聲名亦復不好難以姑容命武英殿總理事務王大臣及總裁會同秉公查奏尋將所詢情節奏入諭曰朕召見常福據奏伊等在武英殿查詢時提調劉榮黼對衆指稱鮑桂星因熙昌校勘修改恐致遲延曾言熙總裁所校不過偏旁點畫可以將就並言近日有旨旗人多靠不住此時習撫多用漢人等語當交軍機大臣傳詢鮑桂星卽據認有此語係本年秋間聞自周兆基並稱在部與滿員共事見多有徇私背公者適是日周兆基自盛京差回遂著傳詢周兆基兼令鮑桂星將徇私背公係何人何事據實指出隨據周兆基登覆伊於召見時並未奉有此旨亦未與鮑桂星言及見在已據鮑桂星自認彷彿記憶是日赴園太早假寐初醒周兆基所言聽聞不真其鮑桂星所指熙昌囑託武英殿供事又託將吉林開採煤窯議准及慶溥託

伊工程委員等款據熙昌登覆實無請託供事之事卽鮑桂星亦不能指出所託供事姓名其囑託吉林煤窯一節據熙昌覆稱但言吉林請開煤窯係屬好事並非託其議准慶溥登覆祇認曾在朝房問過鮑桂星所奏何事鮑桂星若以具奏董率工程亦未囑託委員以上各情節如果鮑桂星存心公正則周兆基以召對時諭旨失口向人宣露鮑桂星應立時奏參朕必將伊加以褒獎乃以彷彿無稽之言輒向劉榮黼轉述其誕妄之罪尙何所辭卽慶溥熙昌等果有囑託情弊鮑桂星亦應將所託何人何事原交名條據實奏參乃因口舌爭競牽連率指一經研究全無證據豈能以此坐周兆基等之罪鮑桂星任性乖張妄言亂政著交部嚴加議處尋議革職得旨鮑桂星指訐慶溥熙昌等囑託公事一無證據其咎猶小至其所述朕輕滿洲重漢人之說此則妄言亂政之大者朕統御寰區滿洲漢人一視同仁從無偏愛偏憎於其間國家設官定制如東三省及新疆各城並各省駐防文武大員皆專用滿洲此因地制宜之道有漢人所必不能勝任者若直省督撫滿漢間用因才器使惟視其人之賢否何嘗有畸輕畸重之見乎鮑桂星以私意揣度爲此無稽之言謬妄已極卽著照部議革職不准回籍令其在京閉

門思過仍責成五城御史不時稽察如私著詩文有怨望誹謗之詞卽行嚴參從重治罪二十四年九月上六旬萬壽命軍機大臣將獲咎各員開單具奏桂星特賞編修道光二年七月授侍講八月署日講起居注官十二月授侍講學士三年補通政使司副使兼稽察左翼宗學四年二月擢詹事府詹事十二月充文淵閣直閣事五年因病乞假尋卒

費錫章

費錫章浙江歸安人乾隆四十九年聖駕南巡召試一等賜舉人授內閣中書五十五年充軍機章京五十七年遷起居注主事六十年調戶部主事嘉慶三年升員外郎六年七月授河南道監察御史尋掌四川道御史九月以本年鄉試改期天氣驟涼奏請照會試之例每人散給棉布料被一件以示體恤得旨允行七年四月諭曰據熊枚面奏見在暫署直隸總督一時乏人襄理事務請飭令御史費錫章前往在署幫辦等語著照所請費錫章准其暫行隨往該御史見充內場監試茲聞務將竣著卽日出關一同起程俟熊枚交卸督篆仍著回京供職旋經御史砥柱奏參諭曰據砥柱奏署直隸總督熊枚請將御史費錫章隨往在署幫辦

事務殊屬冒昧請嗣後嚴飭在京大臣奉命署理督撫者不得援以爲例等語所奏甚是御史係屬言官本非大臣可以隨帶之員前熊枚而奏懇將費錫章隨往朕卽覺其所奏未協因伊係署任暫時姑允所請嗣熊枚到任後旋據奏稱先令費錫章回京供職業經批諭該署督奏請帶往原屬冒昧並著費錫章卽行回京今砥柱適有此奏與朕批諭正相符合國家設官內外各有體制督撫身任封疆自司道以下皆係幫同辦事之人一切案牘自有幕友襄理若由部院簡放督撫者皆得各帶所屬司員前往辦事恐司員等揣知該堂官堪膺外任預爲趨奉一經簡放督撫卽可帶往辦事補用道府易啟屬官營求之弊不可不防其漸嗣後在京部院大臣除有兵差審案等事仍准隨帶司員外其簡放督撫及署理督撫者不但不准請帶御史所屬官員亦均不准奏請將此通諭知之八年閏二月奏言禁城內向來當差行走之人並無查考請添設腰牌以嚴出入諭曰該御史所奏係專指禁城而言但朕臨莅所在皆屬禁地如駐蹕圓明園巡幸熱河木蘭等處各行在卽與宮廷無異斷無皆用腰牌之例況防盜弭奸之法亦不在此總應環衛森嚴分明堂陛其扈蹕在途之侍衛官尤當近依乘輦一切應如何酌定章

程及該御史所奏是否可行之處著派御前大臣軍機大臣領侍衛內大臣前鋒統領護軍統領內務府大臣會同悉心妥議具奏尋議行九年二月協理京畿道三月御史鄭敏行奏參此次京察都察院保送一等人員內有御史費錫章於嘉慶七年春闈監試適主考熊枚奉旨出闈署理直隸總督該御史在至公堂向熊枚懇求隨帶出差及帶往直隸後熊枚又因費錫章聲名不好欲將該御史撤回費錫章尙在逗留卽經砥柱指名奏參今都察院將該員首列一等不特中外傳爲笑柄亦無以清羣吏而儆官邪諭曰科道職司糾劾如各部院堂官果有不法瞻徇情面之處自當據實陳奏況京察爲激揚大典儻各衙門所保人員實有奔競營私情弊科道等得有確據尤應直言無隱此次該御史奏參若係六部及各衙門保送人員或該御史亦在一等之列則其言尙屬因公今鄭敏行係參劾本衙門保送之員而該御史又並未得列一等是其居心卽已涉私但既有此奏豈可不加詳察據稱費錫章在至公堂衆人屬目之地向熊枚懇求該御史自係在闈目睹何以不卽時彈劾直至今日保列一等始行舉發究竟費錫章如何向熊枚懇求其時至公堂衆人屬目又係何人在旁一同聞見其帶往直隸後如

何聲名不好亦必實有劣蹟可指如該科道果係卑鄙則豈特不可濫廁一等且不應玷居官職何況臺諫清要之秩卽著鄭敏行將此指出情節一一據實回奏毋得一字稍屬含混至京察保送人員三載考績自應就數年中奉職無過之員遴選薦舉費錫章才具聲名究竟如何何以列入薦牘並著都察院堂官據實覆奏至熊枚在至公堂時費錫章曾否向伊懇求其在直隸時聲名如何不好熊枚是否因令其回京亦著熊枚據實具奏勿稍徇隱旋各遵旨據實覆奏諭曰都察院堂官稱費錫章聲名並無不好實未聞費錫章在至公堂有懇求熊枚帶往直隸之事因其在本衙門辦事勤慎是以列入一等等語該堂官保奏費錫章係因其辦公勤慎並未聞聲名不好之處該堂官均無不合至熊枚稱前年奉旨出闈署理直隸總督因素知費錫章諳習奏摺於開啟龍門時面與商酌欲其前往幫辦費錫章因向無此例力辭不允有知貢舉瑚素通阿等在闈日擊可證又奏明帶往後費錫章到彼從不預聞地方事件亦未與官員接見何從有不好聲名等語費錫章不但無懇求熊枚帶往直隸之事而當熊枚欲伊隨往時方且力辭不允卽有營私鑽競情事必有昏夜乞憐之狀豈肯於衆耳目之地率意徑行毫

無避忌鄭敏行所云費錫章在至公堂向熊枚懇託之言本非情理且當熊枚帶同費錫章前往時未曾奏明該員不願隨往今鄭敏行覆奏摺內尙稱砥柱係當時同在闈監試之人伊出闈後卽指名奏參是費錫章向熊枚懇求出差憑證確鑿等語伊與熊枚所奏各執一詞情節迥異若不確切查明費錫章事有左證豈可任其濫膺上考儻鄭敏行所言無據是飭躬自愛者無端蒙奔競之名而居心妒忌者轉得肆污蔑之計不獨有關人品心術而於政體所係亦復不小旣據熊枚鄭敏行奏稱所言皆有證據卽傳令熊枚瑚素通阿砥柱費錫章鄭敏行五人於本月十六日同至圓明園交軍機大臣詳悉訊問並令當面質證明確據實具奏再降諭旨嗣經軍機大臣訊明鄭敏行所指並無確據召見熊枚瑚素通阿諭曰朕而詢熊枚稱前年在闈時得聞署理直隸總督之信欲將費錫章帶往費錫章以御史衙門向無隨帶之例力辭不允伊曾經面奏恩准帶往任所僅止四五日細思未便久留仍令其回京供職費錫章實無聲名不好之處詢之瑚素通阿據稱伊知貢舉時在至公堂親見熊枚向費錫章口稱欲帶伊同赴直隸費錫章當以體制不符再三致辭迨奉旨准令隨往費錫章未敢故違不得已而隨往並

據砥柱稱在闈監試實未見費錫章向熊枚而求帶往卽鄭敏行亦已自認冒昧陳奏無可置辨并請治罪等語可見費錫章實無營私鑽競情事見有熊枚瑚素通阿等確證可憑卽從前砥柱奏參亦以熊枚違例奏帶御史並未劾及費錫章聲名是鄭敏行特因伊未列一等妒忌同僚至加以卑鄙不堪之語實屬挾私懷詐本應革職治罪但念其究屬言官若將鄭敏行斥革恐科道等官因此又相率緘口鄭敏行以同與京察之人不得一等卽飾詞瀆奏有心淆亂是非其居心嫉妒豈可復膺臺諫之任著改爲員外郎補用御史費錫章旣查訊明確毫無不合著准其列入一等以示朕持平覈實至意十月轉吏科給事中十一月掌工科給事中十三年詔偕編修齊鯤冊封琉球中山王尙灝十四年三月回任五月擢鴻臚寺少卿十六年轉光祿寺少卿十七年遷通政司參議十八年二月升太常寺少卿四月擢光祿寺卿八月調補順天府府尹九月因逆匪林清等潛入禁城滋事下部議處尋議革職上以其到任未久改爲降四級畱任二十年三月上耕藉田順天府所備耕牛不馴習上以費錫章係專轄之員下部嚴議部議降三級調用上念其年餘以來督緝尙屬奮勉改爲革職畱任二十一年三月諭曰朕上年

躬耕藉田順天府所備牛隻教演不能馴習降旨將該府尹等分別降革畱任本年躬耕藉田該府尹等所供牛隻服習馴擾禮儀告備著將費錫章革職畱任之處改為降二級畱任二十二年三月卒諭曰費錫章自簡任順天府府尹辦事奮勉且獲逆犯多名甚屬認真驟聞溘逝殊為可惜著加恩賞加兵部侍郎銜卽照侍郎例給予卹典該部察例具奏尋賜祭葬

清史列傳卷三十二終